

سابقہ

سید خان رتی





Salaam Khan Gimmi

گھنے رکھاں نال بھریا ہو یا پنجاب، موجاں تے چھلاں مار دے ہوئے دریاواں والا
پنجاب، سرہوں دے پھلاں تے سورج وچ لشکر دے سنہرے ستیاں والا پنجاب..... ڈھور ڈنگر
چراغ دے، حقے دی واری لیندے، واڈھیاں کر دے، ڈھول دی تھاپ تے بھنگڑا پاؤندے تے
ہیر دا قصہ سنا کے دلاں وچ جھرمٹا پیدا کر دے سوہنے گھرواں دا پنجاب..... ڈوڈھ برکدیاں،
کھوہ توں پانی بھر دیاں، ڈھونگی دی واج تے ٹپے، ماسیے گاؤندیاں تے رکن من ورھدے مینہ
وچ پینگھاں جھونڈیاں نیاراں دا پنجاب۔

سلیم خان گٹھی ہوراں دے قلم نے صرف پنجاب دے سبھن دی مورت ای نہیں دکھائی
سگوں اوتھوں دے میلیاں ٹھیلیاں دا ذکر وی بڑی مہارت نال کیتا اے۔ گھرواں دیاں کشتیاں
تے کڑیاں بالٹیاں دیاں ونگاں چڑھان دے شوق نوں وی چا بکدستی نال پیش کیتا اے۔

گلریز ہاشم گمّی



لکھاری دیاں ہور کتاباں

پنجابی:

ناول	:	سانجھ/رت تے ریتا
کہانیاں	:	لہودی خوشبو/تردے پیر
سیرت	:	چن عربوں چڑھیا
سفر نامے	:	دیس پردیس/سیاچن دی چھاویں

اردو:

علاقائی ادب:	کشمیر ادب و ثقافت/بلوچی ادب/بلوچ ثقافت
سیرت	: اللہ کا محبوب جرنیل
سفر نامہ	: گوری دھرتی کالے لوگ
ناول	: کمانڈو کہانی
بال ادب	: منش نوبرا ویلی/برقانی انسان/مشن گولڈ ٹاور

ساجھ

سلیم خان گمّی



سانجھ ناول سلیم خان گیمی

عبداللہ جی نے نوید حفیظ پریس، لاہور توں چھپوا کے
سلیسکے، مدینہ ناور فیروز پور روڈ، لاہور توں ٹوری۔

دوجی وار	:	2020ء
چھپائی آہر	:	شگفتہ گمی لودھی
ٹائٹل آہر	:	افضل ساحر
گرافکس	:	عادل وحید
تعداد	:	500
مُل	:	400 روپے

SANJH

(Punjabi Novel by Saleem Khan Gimmi)

Copyright @ 2020 - 2nd Edition

Printed by:

Naveed Hafeez Press, Lahore.

Price:

Pakistan: Rs. 400.00

Abroad: US\$ 10.00, Euro: 9.00, Poundsterling 8.00

Title Painting: Satish Gujral

ISBN: 978-969-7863-15-0



Sulaikh
bookmakers

printing . publishing . editing

67 2nd Floor Madina Tower 224, Ferozpur Road Lahore
+ 92 300 44 30 026 sulaikh@gmail.com

چڑھاوا

میرے ویڑھے دے مہکدے پھل
وردہ ہاشم، عبداللہ ہاشم خان تے حممنہ ہاشم
دے ناں جیہڑے اپنے نانے دے پیار، محبت، علم دوستی
تے سانجھ دے پندھ نوں جاری رکھن گے..... ان شاء اللہ

لاہ ہمنیر اُجھل بُرے دا چائن لا عقل دا

(میاں محمد بخش)

ایس ناول بارے

ریڈیو پاکستان دے پنجابی پروگراماں نال دلچسپی رکھن والے گئی ہوراں دے پنجاب تے پنجابی نال پیارتوں چنگی طرحاں واقف نیں۔ پیار آکھدے نیں کہ گجھا نہیں رہندا تے اظہار دے نت نویں جتن کردا رہندا اے۔ ”سانجھ“ گئی ہوراں دے ایسے پیار دا اک سچرا اظہار اے تے اُردو رسم الخط وچ ایہہ پہلا ناول اے جس دیاں رگاں وچ پنجاب دا خون سرکدا جا پدا اے۔ ناول دیاں پہلاں سطرھاں ای پڑھن والے نوں شہراں توں دُور دی پینڈو وٹوں وچ لے جان دیاں نیں جتھے اے صنعتی انقلاب توں پہلاں وی رہتل لمکی آؤندی اے۔ تے مراد خاں اپنی حویلی وچ منجے تے بیٹھا دُھپ سیک رہیا اے۔ تے ہولی ہولی حقے دے سُوٹے مار رہیا اے دو مچھاں تے اک گھوڑی اک پاسے پٹھے کھا رہیاں نیں۔ ”مراد خاں نے کمبل دی بُگل ماری ہوئی اے۔ اوہ دیاں چنگیاڑیاں ورگیاں اکھاں وچ سوچ اے تے (ایسے کر کے) تیر ورگیاں مچھاں تکتھیاں ہون دی تھاں ڈھیہ پیاں جا پدیاں نیں۔“ اوہ چھ دن بعد آون والے شاہ سکندر دے میلے بارے سوچ رہیا اے۔ میلہ جیہڑا دیہاتی زندگی دا اک ضروری حصہ اے تے جیہڑا آپوں تے سال دا کارا کر کے رُج جاندا اے پرستکار یا پھٹکار پنڈ دیاں وڈیریاں لئی چھڈ جاندا اے کیوں جے اوہو ای ایہناں میلیاں دے موہری ہوندے نیں تے سارا چنگ مند اوہناں دی جھولی پینا ہوندا اے۔

ناول دا پہلا حصہ ایہناں میلیاں مشاہدیاں نال تعلق رکھدا اے جیہناں وچ کدے بوٹے خاں اوگرے دے لیانیاں دیاں ڈانگاں تے کھونڈ اپنیاں بانہواں تے جھلدا اخیر سنتو کھ سنگھ نوں پڑ وچ ای سٹ لیندا اے۔ بھاویں آپوں پھاہے لگ جاندا اے تے کدھرے کر پا

سنگھ قاؤ دے ڈھڈ وچ بلم ماردا ہو یا پشلا نیوندرا مکا ندا اے تے نویں بھانجی پاندا اے۔

پر میلے زے پھٹ پھٹا ای نہیں ہوندے تے نہ ڈانگ سوٹے دا ای ناں اے اتھے
کبڈیاں دے چھے وی وجدے نیں۔ گھول ہوندے نیں۔ گھوڑ دوڑ ہوندی اے۔ کِلے
پھنڈے جانڈے نیں۔ بھنگڑے پینڈے نیں۔ شاہ سکندر ورگے میلیاں تے سوانیاں تڑکے
تڑکے لمیاں ہیکاں نال گاؤندیاں آؤندیاں نیں۔ سلام بھر دیاں نیں تے ہتھ چک کے
دُعاواں تے منتاں منگدیاں نیں۔ کوئی پُت منگدی اے۔ کوئی دُدھ منگدی اے۔ کواریاں
اپنے ویراں تے بھابھیاں دی حیاتی دی دعا منگدیاں نیں تے جانڈی واری میلے توں
پوڑیاں۔ ونگاں تے تویت دھاگے خرید کے لے جانڈیاں نیں۔ قوالی ہوندی اے۔ بھنگاں
دے ملنگی رگڑے لگدے نیں۔ رات نوں کنجری دا مجرا ہوندا اے تے اقبال دی دُستی ہوئی
تقدیر اُمم دے اُلٹ اتھے طاؤس در باب اوّل تے شمشیر و سنا آخر ہوندا اے۔

اپنے ناول وچ گئی ہوراں شمشیر و سنان آخر والی ایس گل نوں بڑی کامیابی نال نبھایا
اے۔ لڑائیاں دونہ دلاں وچ ای ہوندیاں نیں تے اک ول وی عام طور تے زیادتی ہوندی
اے جس نوں ناول نگار بند دا اے تے ایس طرحاں اپنے ہیر و لئی تھاں پدھری کردا اے۔ پر
ایس ناول وچ انج نہیں ہوندا۔ مصنف ہیر و ول کنہ تے کھاندا اے پر جیہناں نال اوہدے
معاملے پینڈے نیں۔ اوہناں دے مونہاں تے کالکھ لپٹن دی نہیں کردا۔ ایسے کر کے سانوں
کرپا سنگھ نال نفرت نہیں ہوندی بھاویں اوہ قاؤ دے ڈھڈ وچ بلم کھوب دیندا اے تے لام
تے گیاں جدوں بربادے جنگلاں وچ دوواں دا فیر ٹاکرا ہو جاندا اے تے کرپا سنگھ قاؤ
تے پہلاں وار کردیاں ہو یاں جانوں مر جاندا اے۔ قاؤ دے بچ رہن دی خوشی تے ہوندی
اے پر کرپے دی موت دا افسوس وی ہوندا اے۔ شاہ سکندر دے میلے تے کرپا سنگھ مجرا
کردی بجلی نوں چک کے لے وگدا اے تے قاؤ ول کے اک نوں پھڑکڑا اے تے دوجی
نووں پڑ وچ پرتا کے لے آؤندا اے۔ اتھے وی پنڈاں دے حساب نال کرپے نے مرداں
والا کم کیتا سی تے ایہناں ویلیاں وچ بانہواں والے اپنیاں بانہواں دا مان ایسے طرحاں دین
دی کر دے نیں۔ اگوں رب جیہنوں دے چٹی دے میلے تے ہینا سانس کرپا سنگھ نال اپنی
یاری دا مُل پاندا ہو یا ایس بپار وچ دوواں بانہواں دی راس روڑھ لیندا اے تے بھاویں

اوس دھکے نال لڑائی لین دی کیتی سی۔ پر جیہناں بھناں دے نیوندے مَکّانے ہون اوہناں ویلے وی آپ ای کڈھنے ہوندے نیں تے ایسے کر کے قاؤونوں ستکارن دے باوجود ویہنے دیاں بانہواں دے کڑک جان دی خوش نہیں ہوندی۔

ایس طرحاں مخالفان نوں گندیاں کردیاں پر اوہناں تے گند نہ سُدیاں ہوياں گئی ہوریں اپنے ہیر و نال پڑھن والے دی دلچسپی پیدا کر جانے نیں تے ناول دا پہلا حصہ ختم ہو جاندا اے جیہڑا سارے ناول دی جان اے۔

دو جا حصہ موت دی آواز توں لڑدا اے جیہڑی کرپا سنگھ نے قاؤونوں سانجھی وجدی اے۔ کرپا سنگھ ایس آواز نوں کتھاں وچ مار کے لام تے لڑ گیا تے کسے میلے وچ مرداں وانگوں سُنن دی تھاں برما دے اک گمنام مورچے وچ سُنن تے مجبور ہو گیا۔ قاؤو نے ایس آواز نوں سُن کے ہنگارا بھریا تے ڈھڈ وچ وجی بلم، سرتے و سیاں ڈانگاں تے برما دے جنگلاں وچ دے موت پپار وی اوس کولوں زندگی دی راس نہ کھوہ سکے۔ زندگی نے اوہدا ہمیشہ کچھ پُوریا۔ کیوں جے زندگی تے موت پال نہار دے ہتھ اے۔

لاماں سُن دے نال ای قاؤو دی زندگی دا اک ہور باب مُک جاندا اے۔ اوہ ناواں کٹوا کے پنڈ پنہنچ جاندا اے تے ناول دا تیجا حصہ شروع ہو جاندا اے۔ جس دا تعلق مُلک دی ونڈ نال اے۔ ایہہ اوہ ویلا سی جس وچ سانجھی وِتوں والے پنڈاں نوں رب نے سبھ توں زیادہ آزمائش وچ پایا تے کوئی کوئی مائی دالال نہتیا۔ میں شہراں دا ناں نہیں لیا۔ ایس کر کے جے شہراں دی آبادی وچ سانجھی جڑ کوئی نہیں ہوندی۔ تے لوک بے لحاظی کر جان تاں وی اچرج نہیں۔ پر پنڈاں دیاں سانجھاں تے صدیاں توں لڑیاں آؤندیاں سن تے جیہڑی ہوا ایڈیاں پکیاں جڑاں والے رُکھاں نوں وی اُکھیڑ دے اوہ کڈی ظالم ہوا ہو سکدی اے تے جیہڑے رُکھ ایس وچ وی قائم رہے اوہ کڈے پکے ہو سکدے نیں؟ ایس وگنی وچ اپنی تھاں تے کھلوتے رہن والیاں وچوں اک قاؤو وی سی، جس دی ڈانگ کرپے تے اُٹھی کہ پنے سانسی تے اپنے پنڈ دی لاج واسطے اُٹھدی رہی تے اخیر تے وی کل تائیں دیاں والی تے اج پردیسن ہوندی پنڈ دی دھی پریتو دی عزت بچاندیاں ای نہیں اپنے پنڈ دی عزت تے حرف آؤندیاں تک کے اوس اوہ قول پورا کیتا جیہڑا تائے

مراد خاں نے ہر نام سنگھ نال کیتا سی۔ تے ایس قول توں جان قربان کردتی۔

ناول قول دی ایس پالنا تے آکے ختم ہو جاندا اے۔ باہری دہلیز تے مائی روڑی تے اندرلی تے صُغی نوں پیٹھیاں تے ہر نام سنگھ تے اوہدی دھی نوں دیسوں بدلیں ہوندیاں ویکھ کے ایس ناول نوں ٹریجڈی کہن تے جی کردا اے تے اوہناں نال ہوئی وی ٹریجڈی اے پر قاؤ دے ایہہ بول ناول دی دکھانتا نوں ختم کر جاندا اے نیں ”لے چاچا تیری دھی تیرے کول آگئی آ۔ سانوں ہُن اجازت دے“۔ اوہدیاں لتاں بھاویں ڈکوڈو لے کھا رہیاں سن تے سریر کنب رہیا سی پر اوس دے دل وچ کوئی کنہی نہیں سی سگوں کسے ہتھ پائے، اوکھے کم نوں کر لین دی ہول سی تے ٹریجڈی کم دے ادھ وچ رہ جان دا ناں اے۔ اسیں سمجھ نہیں سکدے جے قاؤ زندہ رہندا تے ہو رکیہڑی تھوڑ پوری کردا۔ ناول دے ہیرو دا جنم اپنی ماں واسطے نہیں ہوندا۔ اوہ رنڈی کیوں نہ ہووے تے نہ اپنی تیویں واسطے ہوندا اے اوہ سجر ویاہی کیوں نہ ہووے تے میرا خیال اے کہ ہیرو دی موت وی ناول نوں ٹریجڈی نہیں بنا جاندی جے اوہ موت کویلے دی نہ ہووے تے قاؤ نوں ایس توں چنگا مرن ویلا نہیں سی مل سکدا۔ ایسے کر کے مصنف دی ایس گل نال مینوں اتفاق نہیں کہ ایہہ ناول ٹریجڈی اے۔ ایہہ وکھری گل اے کہ ایس نوں کامیڈی وی نہیں آکھیا جاسکدا۔

میریاں گلاں قاؤ دوالے بھوندیاں رہیاں نیں۔ ایس کر کے نہیں جے ناول وچ کرن سُنن والی گل کوئی نہیں سی ایس کر کے جے تعارف کران والے دا حق وی ہوندا اے تے میں سمجھنا فرض وی اے کہ اوہ کسے دا تعارف کراندیاں ہویاں اوس دی شخصیت دے کسے نکھیر ویں تے من بھاو نے پہلوانوں اگے کرے۔ دیباچہ لکھن والے وچ تے تنقید کرن والے وچ اک بنیادی فرق ہوندا اے۔ اک دا کم سونے نوں کٹھالی وچ پا کے اوہدا عیب ثواب ویکھنا ہوندا اے تے دو جے دا تعلق اوس دی سوجھ نال ہوندا اے اک صراف ہوندا اے تے اک سُنیارا۔ ایسے کر کے ایس سونے وچدی ملاوٹ ول اشارہ کرنا میرا کم نہیں۔ اُنج وی میں پھٹلاں نوں عطاراں دی اکھ نال نہیں بلبل دی اکھ نال ویکھن دا عادی آں۔

شریف کنجاہی

کچھ ایس کتاب بارے

سلیم خان گمی ہو راں دا ناول ”سانجھ“ دیس پنجاب دی کہانی اے جیہڑی پنجابیاں لئی لکھی گئی سی۔ لکھاری اوس پنجاب دی کہانی سناوندے نہیں جیہدے وچ سوہنیاں مورتاں ورقتے ورقتے کھلریاں تے ٹردیاں پھر دیاں نظریں آؤندیاں نہیں۔

پنڈاں دے واسی تے پاندی فجرے ویلے اپنے اپنے سفران تے نکلدے نہیں تے شاموں پہلاں گھراں دے جیاں وچ بیٹھے اپنے پنہ دے قہے سناوندے نظریں آندے نہیں۔ وارث شاہ نے سوہنا رنگ بھریا اے:

چڑی چوبکدی نال جے ٹرے پاندھی، پٹیاں دُڈھ دے وچ مدھانیاں نہیں
ہوئی صبح صادق جدوں آن روشن، تدوں لالیاں آن چچلاناں نہیں

گھنے رکھاں نال بھریا ہويا پنجاب، موجاں تے چھلاں مار دے ہوئے دریاواں والا پنجاب، سرہوں دے پھلاں تے سورج وچ لشکدے سنہرے سٹیاں والا پنجاب..... ڈھور ڈنگر چراندے، حقے دی واری لیندے، واڈھیاں کردے، ڈھول دی تھاپ تے بھنگڑا پاؤندے تے ہیر دا قصہ سنا کے دلاں وچ جھرنات پیدا کردے سوہنے گھروواں دا پنجاب..... دُڈھ رڑکدیاں، کھوہ توں پانی بھر دیاں، ڈھولکی دی واج تے ٹپے، ماہیے گاؤندیاں تے کن من ورحدے مینہ وچ پینگھاں جھوٹدیاں میاراں دا پنجاب۔

سلیم خان گمی ہو راں دے قلم نے صرف پنجاب دے سپہن دی مورت ای نہیں دکھائی سگوں اوتھوں دے میلیاں ٹھیلیاں دا ذکر وی بڑی مہارت نال کیتا اے۔ گھروواں دیاں کشتیاں تے کڑیاں بالڑیاں دیاں ونگاں چڑھان دے شوق نوں وی چابکدستی نال پیش کیتا اے۔

ناول ”سانجھ“ سانجھ پیار دی کہانی اے، جیہڑی ہیرو دی دلیری تے جرأت تے

وکھاؤندا ای اے سگوں پنڈاں دی روایت نوں وی مکھ رکھدی اے، کیوں جے لکھاری ناول وچ پنجاب واسیاں دی غیرت نوں مرن نہیں دیندا۔ سلیم خان گمی دا آج توں ادھی صدی پہلاں لکھیا جان والا ایہہ ناول آج دے عہد تے وی پورا اُتردا اے کیوں جے مٹی دی واشنا کدی بدلی نہیں جاسکدی تے نہ ای لہودی خشبو۔

میںوں یاد پیندا اے کہ جدوں میں دسویں دے امتحاناں توں ویلھی ہوئی تے والد ہوراں نے میںوں تے میری والدہ ہوراں نوں سکروو آن دی دعوت دتی پئی چند دیہاڑے پھر ٹر جاؤ۔ اسیں دوویں لہور توں پنڈی تے پنڈی توں جہاز راہیں سکروو اپڑ گئے۔ سوہنا پہاڑی مقام، ٹھنڈیاں ہواواں تے شیشے ورگے پانیاں دیاں جھیلاں۔ اسیں او تھے 22 اپریل توں 28 اپریل 1981ء تک رہے تے واپس آؤن لگیاں والد ہوراں نے میںوں تاکید کیتی پئی لہور پہنچ کے سکروو دے ایس اک ہفتے دا سفر نامہ ضرور لکھنا اے۔ تے فیر میں اوہ سفر نامہ لکھیا تے اوہ رسالہ ”حریت“ وچ چھپیا۔

سلیم خان گمی ہوراں دی شخصیت پیار، ہمدردی تے تعاون دی ٹردی پھر دی مورت سی۔ یونیورسٹی دے زمانے وچ اک واری میں ریڈیو سٹیشن لہور گئی۔ میرے نال کجھ جماعتی تے ساڈے معتبر تے دانشور استاد جناب اسلم رانا مرحوم وی سن۔ والد صاحب نوں میرے آؤن دا پتا چلیا تے آپ اٹھ کے اپنے آفس دا دروازہ کھولیا۔ ڈاکٹر اسلم رانا بہت متاثر ہوئے تے کہن لگے۔ ”دھیاں نوں انج ای پروڈوکول (عزت افزائی) دینا چاہیدا اے، کیوں جے ایہہ ساڈے نبی دی سنت اے۔“

سلیم خان گمی ہوریں ہمیش چھوٹیاں نوں لکھن دی ترغیب تے ہلا شیری دیندے۔ میںوں یقین اے پئی سلیم خان گمی ہوراں دے لکھے ہوئے اکھر تے اوہناں دے بیان کہیتے ہوئے وچار رہندی دنیا تائیں اوہناں دے ہون دی گواہی دیندے رہن گے۔
 ان شاء اللہ۔

پروفیسر گلریز ہاشم گمی

صدر شعبہ پنجابی، گورنمنٹ پوسٹ گریجویٹ

کالج برائے خواتین، سٹیلا سٹ ٹاؤن

گوجرانوالہ۔ پاکستان

میلے مشاہدے

(1)

مراد خاں اپنی حویلی وچ منجے اُتے بیٹھا دھپ سیک رہیا سی تے ہولی ہولی ہٹے دے سُوٹے مار رہیا سی۔ دو مچھاں تے اک گھوڑی بڑی پریت نال ونڈتے پٹھے کھا رہیاں سی۔ شروع مکھڑ دیاں دناں پر اُنج دی سریر ٹھنڈ مندا اے تے سورج دیاں رشاں دی مٹھی مٹھی گرمی نال جُسے دا خون سُرکن لگ پیندا اے۔ مراد خاں نے کمبل دی بکل ماری ہوئی سی۔ سر تے گھٹ کے صافہ بٹھیا ہویا سی تے پیر لٹھے دے تہمت وچ لکائے ہوئے سن۔ اوہدیاں چنگیاڑیاں ورگیاں اکھاں وچ سوچ سی تے تیر ورگیاں مچھاں ترکھیاں ہون دی تھاں گجھ ڈھٹھیاں ہویاں سن۔ فرید پور دا خاں صاحب مراد خاں چھ دن بعد آؤن والے شاہ سکندر دے میلے بارے سوچ وچار کر رہیا سی۔ جے میلہ چنگا ہو گیا تے فرید پور دے پٹھاناں تے سکھاں دی گڈی چڑھ جائے گی تے جے ذرا پھٹکا رہیا تے نال دے پٹھاناں سکھاں تے جٹاں دے بڈ مسخریاں کرن گے۔ شاہ سکندر دے میلے دی کامیابی پنڈ دی آدر بھا وچ وادھے دا موجب سی۔

اک دم گھوڑی نے ٹیٹا ماریا تے کن کھڑے کر لئے۔ مراد خاں نے دھون اُتانہ چک کے گھوڑی ول ویکھیا۔ گھوڑی نے پٹھے چھڈ کے اپنی تھوٹھنی اُتانہ چک لئی سی تے کن حویلی دی کندھ دے اُتوں دی مُنڈیاں دیاں اوازاں تے لائے ہوئے سن۔ فیر مراد خاں نے کندھوں پار پیلیاں وچ دوجی گھوڑی دے ہنکن دی آواز سنی۔ ایس آواز وچ غصہ سی۔

مراد خان منجے توں اٹھیا۔ کمبل سنبھالیا تے حویلی دے وڈے سارے بوہے ول ودھیا۔ جدوں اوس بوہا کھول کے باہر کھیتراں ول دھیان ماریا تے کیہ ویکھدا اے سردار

ہرنام سنگھ گھوڑی تے سوار اے تے پنڈ دے نلے نلے منڈے اک پاسے ہو کے کھلوتے نیں تے کھپ پا رہے نیں۔ سردار ہرنام سنگھ گھوڑی نوں اڈی لاند اے۔ راساں کھچدا اتے دھوکے ماردا اے پر گھوڑی نے اڑی نہی ہوئی اے۔ اوہ اگلے پوڑتے دھون اُتانہہ چکدی اے ہنکدی اے فیر پچھلے کھراں تے کھلو جاندی اے۔ پنڈ دے نلے نلے منڈے ایہہ تماشہ ویکھدے نیں۔ پٹھاناں دے منڈے گھوڑی نوں ہلاشیری دیندے نیں۔ تے سکھ کا کے سردار ہرنام سنگھ نوں شاباشی دے رہے نیں۔ پٹھاناں دے منڈیاں داموہری فوجی رستم خاں دا پتر شیئوں اے تے سکھ منڈیاں دا سر گردہ چرن سنگھ دا منڈا روپا اے۔

مراد خاں کجھ چر تے ایہہ نظارہ ویہندار ہیا۔ تے فیر چھیتی چھیتی پیر پٹڈا کھیتر ول ٹر پیا۔ جد اوہ کول پٹجیا تے منڈیاں نے دہل رولا پادتا۔

گھوڑی وی غصے وچ سی تے سردار ہرنام سنگھ وی غصے وچ سن۔ اوہدی پگڑی بلو نیاں نال ڈھلی ہو گئی سی تے کچھ کیس گل وچ آڈ گئے سن۔ اوہدا سارا جتہ مڑھکے وچ بھج گیا سی۔ ”ہرنام سیہاں! نہ مار گھوڑی نوں۔ کھلو جا۔“ مراد خاں نے زور نال کہیا۔

ہرنام سنگھ نے اکھ چک کے مراد خاں ول ویکھیا۔ اوہدیاں اکھاں لال سرخ سن۔ ”تھلے اُتر آ۔ گھوڑی بڑی اڑ بھ اے۔“ مراد خاں نے سمجھاندیاں ہویاں کہیا۔

”میں وی گھٹ اڑ بھ نہیں۔“ ہرنام سنگھ دی آواز وچ غصہ سی۔

”اوہ تے ٹھیک اے پر توں پٹھاں آجا۔ ایہوں میں ٹھیک کرنا۔“

ہرنام سنگھ پٹھاں اُتر آیا تے مراد خاں تہ بند کس کے گھوڑی تے بہہ گیا۔

”چل بھاگاں والیئے۔“ کہہ کے مراد خاں نے اڈی لائی۔ گھوڑی بالکل نہ بہی۔

”مراد خاں! ایہہ بڑی کم ذات گھوڑی آ۔“ ہرنام سنگھ نے مڑھکا پونجھدیاں تے

پگ پنجدیاں آکھیا۔

”بُنے ویکھ لینے آں۔ ہرنام“ سیہاں ایہہ کم ذات اے یا اسیں کم ذات آں۔“

منڈے جیہڑے چپ ہو گئے سن کھڑ کھڑ ہسن لگ پئے۔

مراد خاں نے شیئوں کولوں دا تری لئی۔ سریر گٹھا مُتھا کیتا۔ گوڈے گھوڑی دے اگلے

بہوواں وچ تے راساں کھچیاں تے دھڑکا ماریا۔

گھوڑی گربلا کے حویلی ول مٹھی تے پٹھان منڈیاں نے رولا پاتا۔ ہن تیک پنڈ دے بندے تے بڈھیاں وی پنڈ دیاں کندھاں کوٹھیاں اُتے آ کھلوتے سن۔ منڈیاں دے رولے گولے وچ اوہ وی شامل ہو گئے۔

گھوڑی تیز مٹھدی حویلی وچ آ کھلوتی۔ تھوڑے چر پچھوں سردار ہرنام سنگھ تے منڈے وی حویلی وچ آ گئے۔ مراد خاں نے گھوڑی پرھے کندھ نال مٹھی تے داتری شیموں نوں دے کے بولیا۔

”شتو گڑیو! جے تسیں رولا نہ پاندے تے گھوڑی نے ضد نہیں سی کرنی جاؤ دفع ہو جاؤ۔ تے ککراں نالوں گوند لاه کے تیر تے گلیاں بناؤندے پھرو۔“ منڈیاں نے مراد خاں دے غصے توں ڈر کے کھسکن دی کیتی۔

”مراد خاں! مینوں ایہہ گھوڑی نہیں چاہیدی۔ توں میرے نال وٹاندرا کر لے اپنی گھوڑی مینوں دے دے تے ایہہ توں لے لے۔“ ہرنام سنگھ نے تجویز پیش کیتی۔

”ہرنام سیہاں! میری گھوڑی نالوں تیری گھوڑی چنگی اے، بلوچی گھوڑیاں ذرا غصے والیاں ہوندیاں نیں تے نالے اے تیک ایہدے تے میراٹی وی نہیں بیٹھا۔“

”میراٹی توں بٹھاؤندا پھیریں۔ بس توں مینوں اپنے والی گھوڑی دے دے۔ ہور کجھ نہیں تے اصل تے ہے نا۔“

”میں اپنے والی گھوڑی اپنے توں وکھ نہیں کرنا چاہندا، انج کرنے آں پئی توں اپنے والی گھوڑی قاؤونوں دے دے تے اوہدی ٹیرتوں لے لے۔“ مراد خاں نے تجویز پیش کیتی۔

”گل تے تیری ٹھیک اے مراد خاں پر میری گھوڑی بہتے مل دی اے۔“ ہرنام سنگھ بولیا۔

”بہتے مل دی اے تے قاؤونال کچھ پیسے تینوں دے دے گا۔“

”پر قاؤومن جائے گا!“ ہرنام سنگھ نوں شک سی پئی قاؤونہیں منے گا۔

”کیوں نہیں منے گا۔ اک تے ساڈے یار دا پتر اے تے دوجے اوہ میرا نوکر اے۔“ مراد خاں نے بڑے دان تران نال آکھیا۔

”یار دا پتر ہون والی گل تے ٹھیک اے پر اوہ اپنے آپ نوں تیرا نوکر گھٹ ای سمجھدا اے۔“ ہرنام سنگھ نے بالکل سچی گل کیتی۔

”میں کدوؤں اور انہوں اپنا نوکر سمجھنا واں۔ میں تے اوسنوں اپنا پتر سمجھنا واں۔ کھائے پیئے موج اڈائے۔ دھی صغی دا بھرا کوئی نہیں ہیگا۔ اللہ میاں نے اوس نوں شینہہ ورگا جوان بھرا دے دتا اے۔ بوٹے خاں ساری زمین مقدماتے تے وتچ وٹ کے لاگیا تے قادو وچارا بے ملکھا تے بے زمینا ہوگیا جے اج بوٹے خاں دی بھوئیں ہندی تے قادو اج میری نوکری نہ کردا۔ میرا شریک ہوندا!“

”گل تیرے والی بالکل ٹھیک اے پر اک طرحاں سوچیا جائے تے بوٹے خاں نے بالکل ٹھیک کیئا۔“

”اوہ کس طرح؟“ مراد خاں نے پچھیا۔

”قادو دے پیو نے پنڈ دی آن تچھے سنتو کہ سنگھ نوں قتل کیئا تے اوہدے اُتے مقدمہ بنیا۔ مقدمہ جتن واسطے اوس نے زمین وپچی زمین نہ وپچدا تے قتل دا مقدمہ کیوں لڑدا؟“

”پر فائدہ کیہ ہويا۔ زمین وی وک گئی تے مقدمہ وی ہر گیا۔ عمر قید دی سزا ہوئی تے جیل وچ ای مر گیا۔“ مراد خاں دے لہجے وچ دکھ تے افسوس سی۔

”یار مراد خاں۔ بوٹے خاں لوہے ورگا پکا بندہ سی۔ جتھے کھلو گیا بس کھلو گیا۔ جیہدا ساتھ دتا پورا دتا۔ جیہنوں یار کہیا اوہدے واسطے اپنی جان وی داء تے لا دتی۔ جدوں وساکھی تے لڑائی ہوئی سی تے سنتو کہ سنگھ بوٹے خاں دے ہتھوں قتل ہويا سی۔ اودوں میں توں رکھا تیلی۔ چرن سنگھ جتے خاں تے دوجے دل چھڈ بیٹھے سن۔ پر اوہ کلا جوان اوگرے دے لبانیاں دیاں ڈانگاں تے کھونڈا اپنیاں بانہواں تے جھلدا رہیا تے اخیر اوس سنتو کہ سنگھ نوں پو وچ ای سٹ لیا تے باقی لبانے دوڑ گئے۔“

”ہر نام سیہاں۔ چھڈ ایہناں گلاں نوں۔ ایہہ دکھ دیاں گلاں نیں۔ بوٹے خاں ورگے پتر ماواں کدے کدائیں جمہیاں نیں تے بوٹے ورگے دل والے بندے ہاری ساری نہیں ملدے۔“

اوہ دوویں گھوڑی دے گنڈھ کول کھلوتے گلاں پئے کر دے سن بوٹے خاں دے ذکر نے اوہناں نوں اتھوں ہٹن تے مجبور کر دتا۔ اوہ دوویں پچپ چپتے سوچدے ہوئے اپنے جوانی دے دن یاد کر دے منجے تے آ بیٹھے۔ اوہناں محسوس کیئا کہ اوہ اک دم ہڈھے ہو گئے نیں۔

کچھ چرچپ رہن پچھوں ہر نام سنگھ بولیا۔

”شاہ سکندر دے میلے دیاں تیا ریاں دا کیہ حال اے۔“

”مینوں کیہ پتا؟ تینوں پتا ہونا چاہیدا اے ہر نام سیہاں۔“ مراد خاں نے سنگھ ول

انج ویکھیا جیویں اوس نوں ہر نام سنگھ دا سوال سن کے دکھ ہو یا ہوئے۔

”میرے ذمے آئے دال دی اگرا ہی سی۔ میں اوہ اگراہ کے خانقاہ تے پہنچا دتے نیں۔“

”بالن دا کیہ حال اے؟“

”بالن بہت، بھاویں پندرہ مچ بلن۔ لکڑی نہیں ملن لگی۔ ملنگ عیش نال اک سیکن گے۔“

آنا، دال تے بالن ہو گیا۔ تھلے وچھون لئی کیہ ہووے گا۔ اخیر میلہ ویکھن والیاں

تے ملنگاں نے کا سے تے سونا بہنا وی اے؟“

دو گڈے کیسر دے تے دو گڈے چھوئی دے کھٹے ہو گئے نیں۔ الی ماچھی پندراں

پھوڑھیاں تے صفاں بنا چکا اے میرے خیال وچ ایہہ کجھ بہت اے۔“

”ہاں ٹھیک اے۔“ مراد خاں نے تسلی نال کہیا۔

”تساں جیہڑا کم اپنے ذمے لیا سی اوہا کیہ بنیا اے؟“ ہر نام سنگھ نے کارگزاری پچھی۔

”امر تر توں قوالاں دیاں تن ٹولیاں آرہیاں نیں رحیم آباد دے بھنڈ ہون گے۔“

بگنی بگنے دے ناچے وی آن گے۔ جھیکرے دے راس دھاریے وی آرہے نیں۔“

”تے کوئی نچن گون والی؟“ ہر نام سنگھ نے مسکرا کے پچھیا۔

”پٹھان کوٹ دی بجلی نوں سد اگھلیا اے۔ امید اے آجاوے گی۔“

”مراد خاں زندہ باد۔“ ہر نام سنگھ نے نعرہ ماریا تے مراد خاں نوں تھاپی دتی۔

”ہر نام سیہاں! یار کجھ حیا کر۔ ہُن تے اسیں بڈھے ہو گئے آں۔ کنجریاں دے

گون سُنن دی عمر لنگھ گئی اے۔“ مراد خاں نے ہسدیاں ہو یاں کہیا۔

”خاں صاحب! حالی کنجریاں دے ناچ ویکھن تے گون سُنن دی عمر نہیں لنگھی۔ اگلے

سال بھاویں لنگھ جاوے۔“ ہر نام سنگھ نے دھون اُچی کر کے کہیا۔

”بجلی جدوں آوے فساد ہو جاندا اے۔“ مراد خاں نے اپنا اندیشہ ظاہر کیتا۔

”فساد ضرور ہونا چاہی دا اے۔ فساد تے ڈانگ سوٹا ہون دے بغیر تے میلے

مشاہدے جیسے لگدے نہیں۔“ ہر نام سنگھ نے فلسفہ سمجھایا۔

”گل انج اے پی جے ساڈے سلکھن سنگھ تے قاؤو ہوریں کسے دو جے پنڈ دے منڈیاں دا سر پاڑ دین تے سانوں معافی منگنی پیندی اے تے لائپلے پنڈ دے لوک ساڈے منڈیاں دا سر پاڑ جان تے سانوں غصہ آ جاندا اے۔“

”میں بڑا گھبوا جی کیتا ہویا اے۔ جس کسے دا سر پاٹے گا۔ اوس نوں گھبوا دیاں گے۔ کوئی بہتا اوکھا ہوئے گا تے چار پیسے نال دے دیاں گے۔“

”مینوں اوگرے دے لبانیاں دا بہتا فکر اے۔ اوہو ای بہتے کھرود پاندے نہیں۔“

”اوگرے وچ سوائے کرپا سنگھ دے ہور کون کھپ شپ پاسکدا اے؟“

”تے کرپا سنگھ تیرا جوانی ہون کارن سارے فرید پور دا جوانی اے اسی اوہنوں سٹاں مار دے

یا اوہ سانوں سٹاں مار دا چنگا نہیں لگدا۔ کسے دو جے پنڈ دی گل ہووے تے اسیں نہڑ سکے آں۔“

”میں اوہنوں آپ سمجھا دیاں گا۔ پی منڈیا کھپ نہیں پاؤنی۔ ارمان نال میلہ ویکھنا اے۔“

”بس ذرا شراب گھٹ پی کے آوے، ہور کیہڑی گل اے۔“

”توں تے مراد خاں بالکل مولوی اکبر بندا جا رہیا ایں۔ شراب اوہ لوک بہتی پیندے

نیں جیہناں پلے چار پیسے ہوندے نہیں۔ نہیں سمجھیا؟“

”سمجھ گیاں پر زمین پھوک کے شراب پینی تے سر پاڑنے تے پڑوانے چنگی گل اے؟“

”کدے چنگی وی اے تے کدے نہیں وی چنگی!“ ہر نام سنگھ نے پو لے جیسے مونہہ نال کہیا۔

”چنگی کدوں تے مندی کدوں؟ ایہہ دس۔“

”جدوں اپنا سر پاٹے مندی تے جدوں دو جے دا پاٹے چنگی۔“

”یملو جٹ تے خدا نوں لے گئے چور۔“ ایہہ کہہ کے مراد خاں زور زور نال ہسن

لگ پیا۔ ہر نام سنگھ وی اوہدے نال رل کے زور زور نال ہسن ڈیہہ پیا۔

اوہ اے جس ای رہے سن۔ تے قاؤو اپنی ٹیر دیاں راساں پھڑی حویلی وچ آیا۔

لما سوہنا گبھرو۔ اکی 21 بائی 22 سال دی عمر۔ چھوٹیاں، چھوٹیاں کلکیاں مچھاں۔ بلیاں

اکھیاں۔ گھلے ڈلھے ہڈ مضبوط جسم۔ سر تے بودے۔ چچی انگلی وچ چھاپ۔ گل وچ

توتیریاں۔ جی چاہندا سی بندہ ویکھدا ای رہوے۔“

مراد خاں تے ہر نام سنگھ نے قاؤونوں ویکھیا تے پُپ ہو گئے۔

”چا چا کیہ گل اے دوویں بڑے ہس رہے سو۔“ قاؤو نے کَلّے نال ٹیر بندھیاں پکھتیا۔

”قاؤو داد خاں! بجلی آ رہی اے شاہ سکندر دے میلے تے۔“ ہر نام سنگھ اُچی بولیا۔

”کوئی خط پتر آیا اے؟“ ٹیر بندھ کے اوس پکھتیا۔

”نہیں۔ خط پتر تے کوئی نہیں آیا۔ بس دل اے پئی آوے گی تے ضرور آوے گی۔“

ہر نام سنگھ نے اپنے فقرے دے اخیر لے لفظ زور دے کے کہے۔ قاؤو آن کے منجی دیاں پوانداں اُتے بہہ گیا تے سردار ہر نام سنگھ دے موڈھے تے ہتھ مار کے بولیا۔

”چا چا! جے بجلی آپ نہ آوے گی تے اسیں آپ جا کے لیاواں گے اپنے چاچے لئی۔“

”جیوندار ہو پچیا۔ اسیں نے ہُن بڈھے ہو گئے آں۔ نس بھج دے کم تساں ای کرنے نہیں ناں۔“ سردار ہر نام سنگھ بہت خوش سی تے مراد خاں مسکرا رہیا سی۔

”پچھا پئی قاؤو۔ تیری ٹیر دا سودا ہو گیا۔“ مراد خاں نے معاملے دی گل کیتی۔

”کیہدے نال سودا ہو یا۔ میری ٹیر دا؟“ قاؤو نے پکھتیا۔

”سردار ہر نام سنگھ نوں تیری ٹیر پسند آ گئی اے۔ توں ایہدی بلوچی گھوڑی نال اپنی ٹیر دا وٹاندر اکر لے۔“

”چا چا ہر نام سنگھ میری گھوڑی نال اپنی گھوڑی دا مار چا کر کے گھائے وچ رہیگا۔ ایہدی بلوچی گھوڑی زیادہ مل دی اے۔“

”توں نال مینوں سو روپیہ وی دیویں گا۔ ہر نام سنگھ نے گل مکائی۔

”کیوں تایا؟“ قاؤو نے مراد خاں کولوں پکھتیا۔

”آہو پتر۔ توں اپنی ٹیر دے نال سو روپیہ دے کے سردار ہر نام سنگھ دی بلوچی گھوڑی لے لے۔“

مراد خاں نے اپنی گل منان دی خاطر وکیلاں وانگ لفظ چتھ چتھ کے کہے۔

”ایہہ سودا مینوں منظور نہیں۔ ہاں انج ہو سکدا اے پئی چا چا ہر نام سنگھ اک مہینے لئی میری ٹیر لے لئے تے اوہدی بلوچی گھوڑی نوں راس کر دیاں۔“

”کیوں پئی ہر نام سیہاں۔ منظور ای ایہہ گل؟“ مراد خاں نے صلاح پکھتیا۔

”مینوں نہیں منظور، گل پکی کرو وٹا ندرے دی۔ اوس طرحاں میں نہیں گوڑی تے میراٹی بٹھاسکدا؟“ ہرنام سنگھ نے رو سے نال کہیا۔

”جے ایہہ گل اے تے فیر میں اپنی ٹیر نال سو روپیہ نہیں دیاں گا صرف اتنی روپے دیاں گا۔“ قادو نے کہیا۔

”چل مینوں منظور اے میں سمجھاں گا مینوں سو روپے ملے نیں۔“ ہرنام سنگھ نے منظوری دے دتی۔

”چلو جی۔ سودا پکا ہو گیا۔ ٹیر تے ہوئے تو تے اتنی روپے بجلی دی جھولی وچ پا دیو۔“ مراد خاں نے ہس دیاں ہویاں کہیا تے اوہ تینوں کھڑکھڑ کے ہسن لگ پئے۔

”ہچھا پئی مراد خاں اسیں چلے گھراں نوں۔ بڑیاں گپاں ماریاں نیں۔“ ہرنام سنگھ ہاسا مکا کے بولیا تے منجھے اتوں اٹھ کھلوتا۔

”چنگا تیری خوشی، ہاں قادر داد خاں توں موتیے دے بوئے لیاندے نیں؟“ مراد خاں نوں اکدم چیتا آ گیا۔

”آہو۔ چار بوئے لیاندے نیں۔ گھر جی وچ نیں۔“

”دو بوئے سردار ہرنام سنگھ نوں دیدے۔“

”ضرور..... ضرور..... کا کی پریتم کور مینوں کل کہہ رہی سی پئی باپو مینوں سدا بہار موتیے دے بوئے منگوا دے۔“

”صُغی نے وی مینوں کل کہیا۔ میرا خیال اے دوواں نے کٹھی صلاح گندھی ہووے گی۔“

”بالکل۔ بالکل۔ بڑیاں نامراداں نیں۔“ ہرنام سنگھ نے قادر کولوں دو بوئے پھڑ دیاں ہویاں آ کھیا۔

”ہرنام سیہاں، موتیے دے بوئے ویڑھے وچ اُٹے ہوئے سوہنے لگدے نیں۔“

”سانوں چنگے لگن یا نہ لگن مراد خاں کڑیاں نوں تے لگن گے۔ ہلا فیر صاحب سلامت۔“

”صاحب سلامت، پر ٹیر تے لیندا جا۔“ مراد خاں نے ہرنام سنگھ نوں ہاک مار کے آ کھیا۔

”سلکھن سنگھ نوں بھیجنا واں۔ اوہ آ کے لے جاوے گا۔“ حویلی دا بوہاٹپ کے کچھے

تکے بغیر ہرنام سنگھ نے کہیا تے گلی وچ مڑ گیا۔

(2)

فرید پور سکھاں تے پٹھاناں دا سانجھا پنڈا اے۔ گل گھراسی (80) نیں۔ چالی (40) گھر سکھاں دے تے میہ (30) گھر پٹھاناں دے، باقی دس گھر دوجیاں ذاتاں دے نیں۔ مثال دے طور تے بنارسی تے تلسی داس دے دو گھر نیں۔ بنارسی تلی داس کراڑ نیں، پر خالص کراڑ نہیں۔ سکھاں تے پٹھاناں وچ رہندیاں بہندیاں اوہناں وچ وی دوواں قوماں دیاں چنگیاں مندیاں گلاں آگیاں ہوياں نیں۔ بنارسی دی دکان پٹھاناں دی ونڈ ول اے۔ ایس واسطے اوہ دھرم دی سونہ کھان دی بجائے ایمان دی قسم چکدا اے۔ بنارسی دا اچے تیک ویاہ نہیں ہوياہ کلا مارا اے۔ آپ اپنی روٹی پکاندا اے جیہدے وچوں اڈھی پٹھان منڈے کھا جاندے نیں۔ ایہو وجہ اے پئی اوہ ہمیش بھکھا رہندا اے تلسی داس بنارسی دا وڈا بھرا اے۔ سکھاں دی ونڈ پاسے دکانداری کردا اے۔ اپنی تیویں شانتی دے ہتھ دی پکی ہوئی روٹی چوکنے وچ بہہ کے کھاندا اے بنارسی مچھی دا شوقین اے تلسی داس تڑکا لگی ماہہ دی دال دا۔ شانتی پتلے لک دی ملوک جیہی میار اے۔ ویاہ نوں دو سال ہو گئے نیں۔ پر پچی بچہ کوئی نہیں۔ سکھاں دے پاسے رہن کارن ذرا گھلی ڈھلتی اے۔

کھلتی ڈھلتی دا مطلب ایس تھاں تے صرف اپنا اے پئی پنڈ دا کوئی منڈا ہاسے بھانے مخول کر دے تے غصہ نہیں کر دی۔ ہس کے ٹال جاندی اے۔

شانتی دے من وچ سکھاں دی بجائے پٹھاناں دی بہتی عزت اے خبرے ایہدی وجہ ایہہ وے پئی دُور دے ڈھول چنگے لگدے نیں۔

بنارسی نے تلسی داس دے گھراں دے بعد اٹھ گھر باقی رہ گئے دو گھر جولاہیاں دے نیں۔ اک مولوی اکبر دا تے دوجا سبھان جلاہ دا۔ سبھان جلاہ مولوی اکبر دا زکا بھرا تے منڈے مجید دا پو۔ کھڈی داکم کر دا اے۔

مجید سبھان داکم تے کردا اے پر پٹھان منڈیاں نال رل کے ڈنڈ سپاٹے وی لاند اے تے سکھ منڈیاں نال بہہ کے کدے کدائیں شراب وی پی لیندا اے۔

سبھان جلاہ دا وڈا بھرا مولوی اکبر پنڈ دی مسیت دا امام اے۔ نماز تے تراپیاں

پڑھاندا اے تے ہاڑی سوئی پٹھاناں کولوں ٹھوک و جا کے دانے لیندا اے۔ سچی گل مونہہ تے کہہ دیندا اے بھادویں مراد خاں ناراض ہووے۔ یاں ہرنام سنگھ نٹھے۔ مولوی اکبر کہندا اے پئی اوہ بے نماز آدمی کولوں نہیں ڈردا تے مراد خاں تے ہرنام سنگھ دوویں نماز نہیں پڑھدے۔ خیر ہرنام سنگھ نے نماز کیہ پڑھنی اے۔ اوہ تے سکھ اے پر مراد خاں دی مسیت ول گھٹ ای رجوع کردا اے۔ ہوئی کتے عید دی نماز پڑھ لئی۔ مولوی اکبر کتے بہتا ای شرمندیاں تے زچ کرے تے مراد خاں گھڑیا گھڑیا جواب دیندا اے پئی تینوں جوں نمازاں پڑھن جوگا چھڈیا ہو یا اے۔

پنڈ وچ پٹھاناں تے سکھاں دا جھگڑا سر چلے تے سکھ مولوی اکبر نوں منصف پاؤندے نیں۔ اوہدی وجہ ایہہ وے۔ پئی مولوی اکبر پٹھاناں نوں جھوٹھیاں کردا اے تے فیصلہ سکھاں دے حق وچ دیندا اے۔ اوہ کہندا اے کہ میں سکھاں دے خلاف فیصلہ دیاں تے اوہ کہن گے پئی مسلمان ہوں پاروں پٹھاناں دا کچھ پوریا سوتے نالے مسلمان انصاف پسند نہیں ہوندے۔ مولوی اکبر اپنے فیصلے عام طور تے سکھاں دی ونڈول جا کے اوہناں دے گوردوارے وچ سناندا اے۔

ہُن باقی رہ گئے چھ گھر جیہناں وچوں اک گھر پرسن جھیوری دا اے پرسن دا گھر سکھاں والے پاسے اے۔ اوہ اپنے نکے جیسے گھراگے بہہ کے سارا دن بھٹھی تائی رکھدی اے تے بالاں کڑیاں دا میلہ سارا دن اوتھے لگا رہندا اے۔ جے سارے پنڈ وچ اک نہ ملے تے اک ٹولن والا پرسن جھیوری دی بھٹھی تے چلا جاندا اے۔ کئی واری ٹیاریاں وی چھلکوتے چھابیاں سراں تے چک کے پرسن دی بھٹھی تے جاہندیاں نیں۔ نتیجہ ایہہ اے پئی بعض ٹٹے ہوئے گھرو بھٹھی ول گیرے مارن لگے پندے نیں۔ تے خواہ مخواہ کھنگھور دے نیں۔ پرسن چنگے گھنگھورے تے گڑبڑ والے گھنگھورے نوں بڑی چھیتی پچھان لیندی اے تے گھنگھورا مارن والے نوں جتلاؤن واسطے کسے بچے نوں جھڑک کے کہندی اے۔

”وے دفع ہو۔ کیہ تینوں کتے کھنگھ لگ گئی اے۔“

جے فیرو وی گیرے تے کھنگھورے وجدے رہن تے اوہ اوس ٹیار دے دانے فٹاٹ بھن کے اوس نوں گھر ٹور دی اے جیہدے واسطے گیرے تے کھنگھورے وجدے

ہوں۔ جیہڑیاں چنگیاں مندیاں گلاں دا پتا پنڈ دے عام لوکاں نوں چھ مہینے بعد لگدا اے۔
اوہدا پتا پر سنو جھوڑی نوں چھ مہینے پہلے لگ جاندا اے۔

باقی رہے سن پنج گھر۔ ایہناں پنجاں گھراں وچوں دو گھر سکھ لوہاراں دے نیں۔
ایہناں دوواں گھراں نے پنڈ دا سارا لوہارا تے ترکھانا کم سامبھیا ہویا اے تے دوویں گھر
سکھاں دی پتی ول نیں۔ بختر سنگھ لوہارا تے داتریاں، رمبے، پڑچھیاں، ترکنگھے، بھوبلا،
کھئی، دراٹ، ٹکوائے، برچھیاں، بلماں، چھوٹیاں تے ہلاں دے پھالے بڑے سوہنے
بناند اے۔ زرنجن سنگھ ترکھان اے تے ہل دی کٹی توں لے کے گڈے دے پنجو تیک ہر
شے بڑی سوہنی ستھری تے پکی تیار کردا اے۔

اک گھر دھوبیاں دا اے تے اک نائیاں دا۔ دھوبی داناں رحمت اے تے نائی داناں
شفیع اے۔ دوویں بندے ماچڑو جیسے نیں۔ پر شفیع دا مزاج اُسترے وانگ تیز اے اوہ تگڑے
اگے نہیں کھینے کردا اے پر ماڑے اگے ساہنے وانگ مُنڈی چک لیندا اے۔ تگڑے ماڑے
شفیع نائی دی عزت کردے نیں۔ اوہدی وجہ ایہہ اے پئی اوہ ہر سال عاشورے تے کوتل
(گھوڑا) کڈھدا اے تے دُوجے اوہدی گھر والی ایمنہ بی بی بڑے چنگے سُجھا دی اے پٹھان
چودھرائی ہووے یا سکھ بھر بھائی ہر اک نوں کدے نہ کدے سر پیڑ یا لک پیڑ ہوندی اے۔
تے اوہ ایمنہ بی بی نوں بلاؤندیاں نیں تے اوہ دوڑی دوڑی آؤندی اے۔

جھنڈ لہائی، ختنے عقیقے، کڑمائی تے ویاہ شادی دے کم کاج وی شفیع نائی تے اوہدی
تیویں دے ہتھوں نکلدے نیں۔ تے ایہو موقعیاں اُتے دوویں خاوند تیویں لاکڑی بنے
پھر دے نیں۔ شفیع دیاں تلوار مارکہ مچھاں ویکھ کے ای ناواقف آدمی تاڑ جاندا اے پئی
ایہہ بندہ طبیعت دا تتا اے تے ایمنہ بی بی دے مہندی لگے نکلے ملو کڑے ہتھ ویکھ کے
اوپری بڈھی جان لیندی اے پئی چندری شوکن ہلگی اے۔ پنڈ دیاں ساریاں ٹیاریاں تے
بھر بھانیاں کنگھی پٹی تے عطر پھلیل دے معاملیاں وچ ایمنہ دی صلاح لیندیاں نیں۔

ہُن رہ گیا اخیر لا اک گھر اوہ دینے مراٹی دا اے۔ دینے مراٹی دے گھر دے گل پنج
جی نیں۔ اک اوہ آپ تے اک اوہدی گھر والی ریشم بی بی دو منڈے نیں تے اک دھی۔
وڈا منڈا فیروز اے تے وڈا شاہ سوار اے۔ اڑبھ وچھیریاں تے گھوڑیاں نوں اوہوای

چنگی چالے پاندا اے۔ گھوڑیاں تے وچھیریاں نوں راس کرن والے میراشیاں دی ٹہل سیوا بہت ہوندی اے۔ اوہ دُدھ گھیو وچ نہاؤندے نیں۔ تے چنگے کپڑے پاؤندے نیں۔ کھان پین تے کپڑے لیڑے دے علاوہ اوہ وچھیریاں تے گھوڑیاں دے مالکاں کولوں نقد وی لیندے نیں۔ ایہو وجہ اے پئی فیروز ڈاڈھا گٹرا اے چنگے پاندا اے تے واہوا کھاندا اے۔ جیہناں دناں وچ کم نہ لیجھے اوہ مراد خاں یا ہرنام سنگھ دی حویلی جا کے اوہناں نوں گھوڑے گھوڑیاں دیاں خصلتاں سمجھاندا رہندا اے۔ دینے میراٹی دازکا منڈا بھونڈی پنڈ دا چونا چاردا اے۔ اوہ سویرے سورج چڑھے پنڈ دا ڈنگر وچھا ہک کے پڑاں وچ لے جاندا اے تے اوتھوں سارے ڈنگراں نوں کچی سڑ کے پا کے بیلے پچا دیندا اے۔ ڈنگر بیلے دی کاٹی رھب تے پلشیٹی وچ مونہہ مار دے رہندے نیں تے اوہ ریت دے کسے تھمبڑے تے بہہ کے لغوزہ و جاندا رہندا اے۔ ترکالاں ویلے اوہ چونا ہک کے پنڈ واڑ دیندا اے۔ دینے دی کڑی دی عمر اٹھ نو سال اے ایس واسطے اوہ پنڈ دی وسوں وچ کوئی وادھا گھانا نہیں کردی۔

دینا میراٹی ادھکڑ عمر دا اے تے افیم کھاندا تے بھنگ پیندا اے۔ ہمیش نک وچ بولدا اے۔ کئی واری انج جاپدا اے اوہ گل نہیں کر رہیا سیٹی و جا رہیا اے۔ ہولی ہولی لکا لکا کے جس ویلے اوہ گل ساندا اے تے بندے نوں خواہ مخواہ ہاسا آجاندا۔ اوہ جتھے وی جاوے لوک خوش ہوندے نیں۔ کئی واری سکھ ٹیاراں اوس ٹوں دھریک تھلے بلا لیندیاں نیں۔ دُدھ دا گلاس تے گڑ دی نکر اوہدے اگے رکھ دیاں نیں تے اوس نوں ”میر زادہ“ کہہ کے اوہدے کولوں ون سوتیاں تے کھٹیاں مٹھیاں گلاں سُن دیاں نیں۔ تے ہس ہس کے حالوں بے حال ہوندیاں نیں۔ بعض لوکاں دا خیال اے پئی دینا میراٹی بڑا چالاک بندہ اے تے اوہ اک دوجے دے خلاف گلاں کر کے تے گھسوساں چھڈ کے دنگا فساد کراندا اے۔ پر اے تیک دینے مراٹی دی کسے گل تے دنگا فساد نہیں ہویا، جے کہتے اوہ جھوٹا پے جاوے تے فٹ ”بھاگ لگے رہن۔“ کہہ کے معافی منگ لیندا اے۔

فرید پور دا گل رقبہ ست سو گھماں اے۔ چار سو گھماں زمین سکھاں دی اے تن سو گھماں زمین پٹھاناں دی اے۔ سکھاں وچ وڈا مالک سردار ہرنام سنگھ اے۔ اوہدی زمین سو گھماں اے۔ پٹھاناں وچ وڈا مالک مراد خاں اے۔ اوہدی زمین وی پوری سو گھماں

اے۔ مراد خاں دے بعد مولو کبا پیئے دا نمبر آؤندا اے۔ اوہدی زمین پنجاہ گھماں سی پرہن
 پندرہ گھماں رہ گئی اے۔ ہینتی گھماں زمین بیج کر کے یا گہنے پا کے کباب کھالئے نہیں
 لوک مخول دے طور تے کہندے نیں پئی مولو کبا پیئے کول اوہدے پیو دادے دے ویلے دی
 اک ہانڈی اے جیہدے وچ اوہدی ہینتی گھماں زمین مک گئی اے۔ بعض لوک حیران
 نیں۔ پئی ہانڈی دے تھلے وچ ہینتی گھماں زمین کیوں لگ سکدی اے۔ حیران ہوں
 والیاں لوکاں وچ دینا میراٹی وی اے۔

چڑھدے پاسے پنڈ توں کجھ دور نومنی وگدی اے۔ ایس نومنی وچ گرمیاں نوں
 منڈے کڑیاں نہاندے نیں۔ چھالیاں ڈک کے کچھیاں پھڑیاں جاندیاں نیں۔ کمیاں دے
 پھل کھڑ دے نیں تے ڈنگر وچھا پانی پیندا اے۔ نومنی توں دور پرہہ ہٹ کے شاہ سکندر دا
 مقبرہ اے۔ مقبرے تے نومنی دے وچکار کنک جوار تے کما دیاں فصلاں ہوندیاں نیں۔
 برسات لگ جائے تے مٹھی وی ہوندی اے پر نومنی دے نال نال برسات نہ ہووے تے
 جھونا چیرا بن جاندا اے، جسوں کتر کے لوک ڈنگراں اگے پاچھدے تے۔ سبھ توں بہتی
 فصل اوس زمین وچ ہوندی اے جیہڑی زمین پنڈ تے نومنی دے وچکار اے۔ ایس زمین
 وچ تے مولیاں، پالک، گوبھی، کریلے، توریاں، گھیو کندھولیاں، تھوم، دھنیا، گنڈھے تے
 کھیرے وی اُگدے تے پلدے نیں۔ سبزی والی ایس زمین نوں کچیاں کھوہیاں دے پانی
 نال سنجیا جاندا اے۔ گرمیاں نوں ایہناں کچیاں کھوہیاں وچ شارکاں رڈھاں کڈھ کے
 آہلنے بناندیاں نیں تے آندے بچے دیندیاں نیں۔ ایہہ آندے بچے ادھے ای پلدے
 نیں۔ باقی ادھے منڈے بھن توڑ کے مکا چھڑدے نیں۔

شاہ سکندر دے مقبرے دے نالوں دی کدے راوی وگدا سی پرہن او تھے برتیا سٹ
 گیا اے تے برتیا بیلا بن گیا اے۔ بیلے وچ صرف دینے میراٹی دا منڈا چونا چاردا اے یا
 کدے کدے کرپا سنگھ اوگرے دے ہینہ سانس نال لے کے آندا اے تے فرید پور دے
 منڈے اوہناں نال مل کے خرگوش (سیہا) تے گڈڑ مار دے نیں۔ مقبرے توں اک کوہ
 ہٹواں راوی اے جدوں راوی وچ ہڑ آؤندا اے تے بیلے دی بجوہ وچ ہر پاسے پانی دے
 ہڑل چڑھ جاندے نیں۔ خرگوش تے گڈڑ نہس کے شاہ سکندر دے مقبرے دے نال بنے

ہوئے چھوٹے چھوٹے کمریاں وچ اگت سکیں چلے آؤندے نیں۔ مقبرے دا مجاور سائیں
 سب ایہناں دناں وچ کلا نہیں رہندا۔ اوہ خرگوشاں تے گدڑاں نال گیاں ماردار ہندا اے۔
 ایہہ تے سی فرید پور دا چڑھدا پاسا۔ فرید پور دے لہندے پاسے (جیہنوں لوک میرا
 آکھدے نیں) بڑی نتھ زمین اے۔ ایس زمین وچ ہر فصل ہوندی اے۔

پنڈ دے ایس پاسے پڑنے جتھے مرلیاں لگدیاں نیں تے گاہ پیندے نیں۔ پڑاں
 دے آلے دوالے۔ ٹالھیاں کھلوتیاں نیں۔ جوار پکّے تے اتھھے منڈے کڑیاں کٹھے
 ہوندے نیں۔ ٹالھیاں دے اُتے منہ پائونڈے نیں تے تھلے ڈھانڈرلی لا کے دودھیاں
 پھلّیاں بھندے نیں۔ کدے انج وی ہوندا اے پئی کوئی نیار منہ تے بہہ کے ہا ہو کر رہی
 اے تے کاں تے طوطے اُڈا رہی اے تے کوئی شیطان منڈا ہیک لا کے گوندا اے۔

صفٹاں یار دیاں

میں بیٹھ مہنے تے کردی

صفٹاں یار دیاں ہائے

ایہو جیسے شیطان منڈیاں نوں ہمیش انجدا جواب ملدا۔

”گھر ماں بھین نہیں ہیگی۔ اتھھے آ گیا ایں گتے وانگر بھونکن.....“

منڈا ایہناں لفظاں نوں اسی تمنغہ سمجھدا اے تے ہسدا ہسدا اگانہہ ودھ جاندا اے۔
 پڑاں توں کوئی دو پیلیاں ہٹ کے ڈونگھا کھوہ اے۔ ایہہ کھوہ سردار ہر نام سنگھ دا
 اے۔ ایہہ ٹنڈاں والا کھوہ اے۔ کھوہ دے آلے دوالے ٹالھیاں دھریکاں تے توتاں دا
 ٹھنڈا اے۔ ٹنڈاں دا پانی پاڑ جھے وچ پیندا اے تے اوتھوں سیمنٹ دے بنے ہوئے پکّے
 حوض وچ اکٹھا ہوندا اے۔ حوض وچوں نالی تھانیں پانی کیاریاں تے کھیتراں نوں جاندا
 اے۔

گرمیاں دی بہارے پنڈ دیاں کڑیاں چڑیاں چرنے پیڑھے چک کے ڈھونگے کھوہ
 دے توتاں۔ دھریکاں تے ٹالھیاں دی چھاں پٹھاں آندیاں نیں۔ گیت گوندیاں نیں۔
 تے گوڑھے کتدیاں نیں۔ جدوں بہتا وٹ گرمی لگے تے دو تن کڑیاں کھوہ گیڑ دیاں نیں
 تے دو تن کپڑے لیڑے لاہ کے حوض وچ وڑ جاندیاں نیں تے چونیاں مار مار کے

نہاؤندیاں نہیں۔ نہاؤن پچھوں چرخہ چھڈ کے وال سکاؤندیاں رہندیاں نہیں۔

شاماں نوں مُنڈے کٹھے ہوندے نہیں۔ بانسریاں وجدیاں نہیں۔ ماہیے ڈھولے گائے
جانڈے نہیں۔ ہیر پڑھی جاندی اے۔ ڈنڈ بیٹھکاں وجدیاں نہیں۔ میلیاں، کوڑی، دنگل،
گھوڑ دوڑتے پڑ پھوکنی دے پروگرام بندے نہیں۔ (پڑ پھوکن مچھی دا شکار اے جیہڑا
ہنیریاں راتاں نوں راوی دے پانی وچ مواتے بال کے کھیڈیا جاند اے۔ مچھی مواتے
دے ڈگدے چنگیاڑے کھان پانی وچوں اتانہ اُبھردی اے تے شکاری گرلی سٹ کے
اوس نوں پھاہ لیندا اے)

ڈونگھے کھوہ تے اک کوٹھاوی اے۔ مینہ کنی ہووے تے اوہ بچا دا کم دیندا اے۔
جتنے میرا مُکدا اے اوتھوں اوگرے دے لبانیاں دی زمین شروع ہو جاندی اے۔
ایہہ پنڈ سردار ہرنام سنگھ دی بھین کلونت کور دے منڈے کرپا سنگھ دا اے۔ کرپا سنگھ دی
گڑمائی ہرنام سنگھ دی دھی پریتم کور نال ہوئی ہوئی اے۔ مراد خاں دے لفظاں وچ کرپا
سنگھ کلتے ہرنام سنگھ دا جوانی نہیں۔ اوہ سارے پنڈ دا جوانی اے۔

فرید پور دے لوک سدھے پدھرے جٹ زمیندار نہیں۔ واہی نیجی اوہناں دا پیشہ
اے۔ ہڈ بھن کے کار کردے نہیں۔ تے موجاں ماندے نہیں۔ نلے نلے مقدمے حویلیاں
وچ بہہ کے مُکا لیندے نہیں۔ وڈے مقدمے پلے پے جان تے تھانے، کچھریاں تے
ہسپتالاں وچ مُکدے نہیں۔ آلے دوالے دے پنڈاں دے لوک فرید پور دے سکھاں تے
مسلماناں کولوں ریکدے نہیں۔

کیوں پئی باہرلے پنڈ دے مقابلے وچ اوہ اک مُٹھ ہو کے کھلو جاندے نہیں تے
اک جان بن کے سختیاں نرمیاں جھلدے نہیں۔

(3)

شاہ سکندر دا میلہ اک دن تے اک رات رہندا اے۔ دن نوں عام طور تے زنانیاں،
بڈھے ٹھیرے تے بچے میلہ ویکھدے نہیں۔ اصل میلہ رات نوں ہوندا اے تے گھرو تے
اوہ شوقین بندے میلہ ویکھدے نہیں جیہناں دی کنی چار پیسے ہوندے نہیں۔ کیوں پئی

کنجریاں تے نچن گون والے منڈیاں نوں ویلاں شیاں کراؤنیاں ہوندیاں نیں۔ رات نوں فساد دا وی خطرہ ہوندا اے۔ اوہ انج کہ ویلی ویلاں کراؤندے اک دوجے نال کھیہڑ پیندے نیں تے ڈانگ سوٹا چل جاندا اے۔ دن نوں امن چین ای رہندا اے۔ صوفی قسم دے لوک بال ایانیاں نوں اُنکلی لا کے میلے وچ آؤندے نیں، اوہناں نوں بھلے پکوڑیاں تے جلیب لے کے کھلاؤندے نیں۔ بھلے پکوڑیاں وچ بھلے تے پکوڑے گھٹ ہوندے نیں تے مریج مسالہ تے ککھ کان بہتا ہوندا اے۔ جلیب گڑ وچ کڈھے ہوندے نیں تے ککھل تے گھٹا اوہناں تے جیا ہوندا اے۔ شہری لوک کھالین تے مودھے ہو جان پر پینڈو لوک کھاندے نیں۔ تے اوہناں نوں کجھ وی نہیں ہوندا۔ معدے دی گل اے نا؟

بہتی وکری اوہناں چھاڑی والیاں دی ہوندی اے جیہڑے پکوڑیاں ونگاں تے تویت دھاگے وچدے نیں۔ کڑیاں چڑیاں اپنے سارے جوڑے ہوئے پیسے اوہناں چھاڑی والیاں نوں دیندیاں نیں۔ تے آپ ونگا چھکاؤندیاں میلہ پٹیاں ویکھدیاں نیں۔ لوڈا ویلا اے تے بڈھیاں بندیاں دیاں ٹولیاں تے ڈھانیاں میلے وچ آ رہیاں نیں۔ بہتے لوک پیدل ای ٹرے آؤندے نیں۔ کچھ لوک گھوڑیاں تے آ رہے نیں۔ پیدل آؤن والے دن دے میلی نیں تے گھوڑیاں تے آؤن والے رات دے۔ گھوڑیاں تے آؤن والے میلے وچ گیرامارن گے تے پتا کرن گے پئی رات نوں کیہڑا کیہڑا شغل میلہ لگے گا! ناچے نچن گے یا کنجریاں؟

ایہہ سوہ بُوہ لے کے اوہ واپس اپنے اپنے پنڈاں نوں پرت جان گے تے پنڈ جا کے اپنے سنکیاں ساتھیاں نوں میلے وچ نچن گاؤن والیاں بارے دس گے۔ ایہہ اک طرحاں دے ہرکارے نیں۔ جیہناں نوں پنڈاں دے لوکاں نے میلے دی چڑھت یا پھلے پن دا پتالین بھیجا اے۔

گڑیاں دی اک ٹولی شاہ سکندر دے مزار ول جا رہی اے۔ زنانیاں تے گڑیاں نے سراں اُتے چنگیراں تے پراتاں چکیاں ہوئیاں نیں۔ ایہناں وچ پورا اے۔

پورا پوری دا وڈا بھرا سمجھ لئو۔ کنک دیاں روٹیاں دے نلکے نلکے ٹورے کر کے اوہناں وچ گھیو تے شکر ملا دیندے نیں۔ فیر ایہناں تناں چیزاں نوں آپس میں وچ گتھ

دِتا جاندا اے۔ شاہ سکندر دے مزار تے مناں مونہیں چورما اکٹھا ہوندا اے۔ بس ریت دی گل اے۔ پُورے دی تھاں توں وی ریت ٹر پیندی تے خبرے لوک لُون دیاں نکراں دے پہاڑ کھڑے کر دیندے۔ پر پُورے وچ اک فائدہ اے بک بھرتے مونہہ وچ سُنو۔ مٹھا سوادلا تے فیر گھيو والا۔ لُون کھان واسطے بالن۔ ہانڈی ڈوئی تے چلھے چونکے دی لوڑ پیندی اے۔

زنائیاں تے گڑیاں ہور نیڑے آگیاں نیں۔ اوہ لمیاں ہیکاں نال گارہیاں نیں۔

پیرا سچدیا وے لا جاں رکھ دیا وے

میرا دھیان تیری ول پیرا

میرے ہتھ چنبھے دیاں ٹھوٹھیاں

میرا پیر سچا تے میں جھوٹھی آں وے بوہڑ پیڑا

ایہہ زنائیاں تے گڑیاں پُورا مزار دے مجاور سائیں سپ دے حوالے کرن گیاں آپ مزار دی وِگن دے نال کھلو کے ہتھ چُک کے دعاواں تے منتاں منن گیاں۔ کوئی پتر منگدی اے۔ کوئی دُدھ منگدی اے۔ کسے دا خاوند بڑا بھیرا اے اوہدے کولوں امان منگدی اے۔ کسے دے گھر ست پُت ہوئے نیں۔ اوہ دھی منگدی اے۔ کسے نیں کسے خاص کُجے وچ روپے لُکا کے رکھے ہوئے نیں۔ اوہ چاہندی ای پئی اوہدے گھر والے نوں پتا نہ لگے۔ جے پتا لگ گیا تے اوہ اپنے بھرا دے ویاہ تے کیہ خرچ کرے گی۔ کوئی اپنی شریکینی دی موت دی طلبگار اے۔ کسے نوں ڈر اے پئی اوہدا خونت دوجاہ ویاہ نہ کرے۔ اوہ شاہ سکندر کولوں مدد چاہندی اے۔ کواریاں کڑیاں اپنے ویراں تے بھایاں دی حیاتی دی دعا منگدیاں نیں۔ کیوں جے اوہناں ای اوہناں دھیاں بھیناں دے کاج سوار نے نیں۔

مزار تے قوالی ہو رہی اے۔ قوالاں دی ٹولی دے ساہمنے کچھے تے کھبے سچے قسم قسم دے ملنگ تے فقیر بیٹھے نیں۔ کسے دی بٹنڈا اے تے کسے دے سر تے لٹاں نیں۔ کسے نے چھتے تے پٹے رکھے ہوئے نیں تے کسے نے بودی۔ کوئی کناں توں بُچا اے۔ تے کسے نے کناں وچ جھمکے پائے ہوئے نیں۔ کسے دے لک لنگوٹی اے تے کسے نے عرباں وانگ اپنا سارا سریر کپڑیاں وچ لکایا ہویا اے۔ کوئی حق ہو دا نعرہ ماردا تے کوئی علی

مولا داجیکارا۔ کوئی سکھ و جاندا اے تے کوئی کجھ وی نہیں و جاندا اے کوئی حال کھیڈ دا اے تے کوئی لت چُک کے بھنگڑا پاندا اے۔ کسے نے جُسے تے گا چنی تے آتا ملے ہوئے نہیں۔ تے کسے نے کالی سیاہی۔ کسے نے اپنے موڈھے تے مُتہر رکھی ہوئی اے تے کسے نے ہتھ وچ سوئی پھڑی ہوئی اے کسے دا مونہہ کڈ و وانگ گول اے تے کسے دا کریلے وانگوں لما۔ کسے داک ٹک ٹچ بٹن وانگ پھینا اے کسے دا بگلے دی چیخ وانگ جڑکھا۔

اصل وچ ایہہ سارے ملنگ تے فقیر نکمے ہیگے نہیں، کوئی واہی توں ڈر کے فقیر بن گیا تے کوئی اپنی تیویں نوں طلاق دے کے۔ کوئی نکا ہوندا بھنگ تے چرس دی چاٹ وچ پھس کے نکمٹا ہو گیا تے کوئی چوری چکاری چھڈ کے سوکھلی زندگی دی تلاش وچ ملنگ بن بیٹھا۔ ایہہ ملنگ تے سائیں اپنے جوگے نہیں تے نہ لوکاں جوگے تے نہ خدا جوگے۔ ایہناں دا ہونا نہ ہونا اک برابر اے۔ پر پنڈاں دے سدھ پدھرے مرداں تیویاں دے وہماں دی وجہ کر کے عیش پئے کر دے نہیں۔

دینا مرانی قوالی سُن رہیا اے تے اوہدا سرافیم دے لور وچ بلونے پیالیندا اے۔ مَولُو کبابیا اپنیاں مچھاں چوپدا ہویا کدے کدے مزار دے آ لے دوالے کھلوتیاں کڑیاں ول نظر ماردا اے تے فیر کھیسے وچوں نوٹ کڈھ کے ویل کراؤندا اے۔

قوال تالوں بے تال ہوئے ہوئے نہیں تے کافی دے بول ”اکوالف تیرے درکار“ تے اٹکے ہوئے بول دی مٹی پلٹ کر رہے نہیں۔

مَولُو کبابیا تے دینا میرانی مزار کول بیٹھے شام تیکر قوالی سُنن گے تے فیر بھنڈا رکھا کے بجلی کنجری دے مَجَرے وچ جا بہن گے۔

سارے علاقہ وچ بجلی کنجری دے آؤن دیاں دُھماں نہیں۔ ہر کاریاں نے پنڈ و پنڈ جا کے اپنے سنگیاں ساتھیاں نوں دس دتا اے کہ رات بجلی کنجری دا مُجرا ہوئے گا۔ لوک چھیتی چھیتی پٹھا دتھا بنا رہے نہیں۔ تے ڈنگراں نوں پانی ڈاہ رہے نہیں۔ تاں جے اوہ نہنت تے لا پرواہ ہو کے مَجَرے وچ شامل ہو سکن۔ ہر اک دی کوشش اے پئی اوہ مَجرا ویکھے پر گھر بار تے ڈنگراں دی راکھی واسطے وی کوئی بندہ گھر رہنا چاہی دا اے۔ ایہہ تے نہ ہووے کہ چور مجھ بلدیاں کوئی دوجا ڈنگر کھول کے گل لا جاوَن، پر جیہڑا بندہ وی ڈنگراں

تے گھر بار دی راکھی تے چھڈیا گیا اوہو ای چوری نال مجرا ویکھن آ جاوے گا۔
 ساڈے لوک میلیاں دے بڑے شوقین نیں۔ بس ذرا سارا بہانہ ہتھ آ جاوے۔
 فٹ میلہ مناؤن لئی تیار ہو جان گے۔ بیائی کرن دے بعد شاہ سکندر دا میلہ آ جاندا اے۔
 جس ویلے سرو نہہ پھل دی اے۔ سکھاں دا میلہ جیہوں چٹی دا میلہ کیہندے نیں۔ جس
 ویلے کنک پکدی اے تے وساکی آ جاندی اے تے۔ ایہناں بتاں میلیاں توں علاوہ
 دنگل۔ گھوڑ دوڑ۔ کبڈی تے لاہلی دے چھوٹے چھوٹے میلے آ جاندے نیں۔ جے ایہناں
 میلیاں وچ دنگا فساد نہ ہووے تے برائی کوئی نہیں۔ پر دنگا ضرور ہوندا اے۔
 منڈے گھنڈے ایویں ای کھوتر جاندے نیں۔ تے فیر سر پڑا بہندے نیں۔ ایہہ
 دشمنیاں کئی کئی ورہے چلدیاں نے تے کئی جاناں گواچ جاندیاں نے اے ایہہ چیز نہ ہووے
 تے میلہ تفریح دا ذریعہ اے۔ مل بہن دا بہانہ اے تے ضروری چیزاں خریدن دی منڈی۔

(4)

ڈونگھیاں ترکالاں پے گیاں نیں۔ بجلی کنجری دا مجرا سنن واسطے لوک ٹولیاں بن بن
 کے آ گئے نیں۔

اک کوٹھے وچ پندراں 15، سولہاں 16 ملنگ اکٹھے ہوئے نیں۔ اوہناں نے پیریں
 گھنگرو بختے نیں تے موڈھے اُتے مکھیتراں چائیاں نیں۔ اوہناں وچ اک ہیک لاکے
 گوندا اے تے فیر اخیر لے بول تے اوہ سارے اکٹھے بولدے نیں تے نچدے نیں۔

گھيو دا دريا ہووے

کھنڈ دا بریتا ہووے

بوٹا ہووے بھنگ دا

اللہ دی جناب وچوں ایہو دل منگدا

لوک کوٹھے دا دروازہ ملے ایہناں ملنگاں نوں نچدیاں گوندیاں دیکھ رہے نیں تے
 حیراں ہو رہے نیں۔ کالے کالے جُسے بھیڑے بھیڑے چہرے لال سُرخ اکھاں۔ دیوے
 دی لو وچ ایہہ سارے ملنگ بھوتنے پئے دسدے نیں۔

چرس دا پہاڑ ہووے

صافیاں دا تھان ہووے

لکڑیاں دا ٹال ہووے

کولہ ہووے جنڈا دا

اللہ دی جناب وچوں ایہو دل منگدا

ایس کوٹھے توں کچھ دُور اسلام پورہ دے پٹھان مُنڈیاں دی منڈلی بیٹھی ہوئی اے۔

ساریاں دے ہتھاں وچ ڈانگاں تے کھونڈ نیں۔ اک منڈا کن تے ہتھ رکھی گا رہیا اے۔

جگنی جا پئی اے لہندے

اڈ اڈ بھور پھلاں تے بہندے

عاشق سدا مسافر رہندے

اوئے پیر میریا جگنی اوئے

اوئے سائیں میریا جگنی اوئے

جگنی جا وڑی سی روہی

اوتھے رو رو کملی ہوئی

جٹاں پھڑ سہاگے جوئی

اوئے پیر میریا جگنی اوئے

اوئے سائیں میریا جگنی اوئے

ایہہ ٹولی جنڈیاں لے دے جٹاں دی اے۔ ایہہ ڈانگ سوئے توں اڈ دو تن حقے وی

نال لے آئے نیں۔ مُجرا ہون وچ کچھ چراے۔ ایس واسطے ایہہ مولوی غلام رسول دیاں

چھٹیاں سن کے ویلا پٹا رہے نیں۔ گون والا کوئی میراٹی منڈا جا پدا اے کیوں جے آواز وچ

بڑا سوز تے درد اے۔

ندیوں پار دگ چٹھیے لئیں خبراں کہے پئے معاملے دور والے ساڈے نین وچھنڈے

رت بھنے لہریں مار وگاوندے ندی نالے ندیوں پار دسیندیا بیلیا اوئے تیریاں اُلفتاں دے

ڈٹھے عجب چالے تیریاں درد فراق دیاں شورشاں نے ترسندے نین وچ نیر گامے تیرا

خط آیا لاناں مار دا اوئے ساڈے جگر اندر پاندا گیا چھالے۔

واہ واہ جھوٹھیاں وعدیاں تیریاں تے لائبو وچ کلیجڑے خوب بالے۔
ایہہ اوگرے دے لبانیاں دی ٹکری اے۔ نکے جیہے ککڑ نال ہر نام سنگھ دے جوانی تے
پریتو دے منگیتر کرپا سنگھ دی گھوڑی بجھی ہوئی اے۔ کرپا سنگھ نے ٹھاٹھا بھیا ہو یا اے تے
وچکار کھلوتا اے اوہدے آلے دوالے دوجے سکھ منڈے دائرہ بنا کے کھلوتے نیں۔ کرپا سنگھ
سد دے انگ وچ گوندا اے اوہدے گون توں پتا لگدا اے کہ اوں نے شراب پیتی ہوئی اے۔

پنڈاں وچوں پنڈ سنی دا پنڈ سنی دا موگا
موگے وچ اک سا دھور ہندا اوہدی سنی دی سو بھا
آؤندی جاندی نوں گھڑا چکا وے لک وچ مارے گوڈا
لک میرا پتلا جیہا مار سہن نہ جوگا
لک میرا پتلا جیہا اوئے

”مار سہن نہ جوگا۔“ کہہ کے سارے سکھ منڈے چن ٹپن ڈیہہ پئے نیں۔ کتنی زندگی
اے۔ ایہناں دے نچن وچ! کئی زندگی اے ایہناں دیاں آوازاں وچ! کئے سوہنے لگدے
نیں۔ ایہہ گوندے تے مچدے!

طلبہ کھڑک پیا اے تے پڑ بچھ گیا اے۔ بجلی پڑ وچ آ کھلوتی اے۔ لم سٹمی، چن ورگا
مکھڑا کٹار ورگے نمین۔ کالیاں لمیاں زلفاں۔ سوہنے ستھرے ہتھ کسی مُستی لال قمیض۔ چٹی
ریشمی شلوار، گلے وچ ڈوریا۔ پیر پٹدی اے تے محسوس ہوندا اے۔ انگریزی شراب دی بند
بوٹل نے ہلکورا لیا تے سگرٹ دا سونا مار کے جس ویلے دھواں کڈھدی اے تے ملوک
لال بکھیاں انج گول ہو جاندیاں نیں جیویں پھل گلاب دیاں پتیاں گول کیتیاں جان۔
گیس دی لو وچ بجلی دا وجود پری دا وجود جا پدا اے۔ اوہ پری جیہڑی کسے دی نہیں تے فیر
وی ساریاں دی اے۔ ہنے ای ایہدے گلے وچوں نکلے ہوئے بول بجلی وانگ ساریاں
نوں ہلون کے رکھ دین گے تے لوک نوٹاں دے تھبے دے تھدے ایہدیاں پیراں تے
سٹن لگ پین گے۔

سازندے اپنے طلبے واجے تے سارنگیاں ٹچن کر رہے نیں۔ بجلی دی ہڈھی ماں بڑی

بھر مردانی ہو کے بیٹھی ہوئی اے تے پان پتھ رہی اے۔ اوہ خوش اے پئی اج رات گھٹ
توں گھٹ دو ڈھائی ہزار نوں ہتھ مارے گی۔

مراد خاں صف وچ بہہ گیا اے اوہدے اگے حقہ اے تے اوہدے موڈھے نال موڈالا
کے سردار ہر نام سنگھ بیٹھا اے اوہناں دوہاں نے نوٹاں والیاں گتھلیاں سامنے رکھ لئیاں نیں۔
کدے کدے بجلی دی ماں ایہناں گتھلیاں ول اکھ پٹ کے ویکھدی اے تے فیر پان پتھن
لگ پیندی اے۔ پڑ وچ ونج نال کھتے سچے دوگیس بلدے پئے نیں۔ ایہناں دوہاں گیساں دی
لو دُور دُور تیکر کھنڈ گئی اے۔ جدھر ویکھو سرائی سر نظر آؤندے نیں تے جتھے سر مکدے نیں۔
اوتھے لوکاں دی واڑ کھلوتی ہوئی اے۔ نال ای بیلا اے جتھوں کدے کدے گڈر دی آواز
آؤندی اے۔ پر لوکاں دے کن تے طبلے سارنگی دی آواز تے لگے ہوئے نیں۔

”کا کی ہُن شروع کر۔“ دُوروں باہی وچوں ایہہ کسے سکھ دی آواز آئی اے۔
”باپو! ذرا دم لے بھاگ لگے رہن۔“ ایہہ دینے میراٹی دا جواب اے ساری خلقت
ہس پئی اے۔

دینا میراٹی۔ مولو کبابیا۔ مجیدا جولاہ۔ دُلا بکروال۔ بنارسی۔ اٹی فوجی رستم خاں۔ قادو۔
فیروز۔ ہر نام سنگھ دانوکر دلدہر سنگھ۔ سلکھن سنگھ درشن سنگھ، گورونجن سنگھ، رُوپا۔ تلسی داس۔ چرن
سنگھ پڑ دے اک پاسے بیٹھے ہوئے نیں۔ دینا میراٹی چپ کر کے کوئی گل کر دیندا اے تے
پوری ٹولی ہس پیندی اے۔ اوہ بجلی دی ماں تے سازندیاں نوں مخول کر رہیا اے۔

”سجنو تے مترو۔“ سردار ہر نام سنگھ پڑ وچ کھلو کے کہہ رہیا اے۔
”تسیں مجرا سنن آئے او۔ بڑی خوشی نال سنو۔ پر کھپ شپ نہیں پاؤنی۔ جے کسے
نے رولا گولا پایا تے بھیڑی گل ہوئے گی۔“

”ہنچھا سردار جی ہنچھا۔ ہُن تسیں بہہ جاؤ۔“ ایہہ کسے مسلمان دی آواز آئی۔
سازاں نے مکھڑا کہیا اے تے بجلی نے بھونٹنی لئی اے۔ لوکاں نے واہ واہ تے
ہائے وائے دے نعرے مارنے شروع کر دتے نیں۔

ساز ملنگ و جا رہے نیں۔ بجلی مرزا صاحبان سنائے گی تے سنن والیاں نوں وچھا
کے رکھ دیوے گی۔ لو اوہ گا رہی اے۔

متھے لیکھ لکھیند یا لکھ عشقے دی گل

میرے دل وچ بلن مہتابیاں چل دانا باد دے ول

مینوں جھوٹے دین سہیلیاں اک دوجی دے ول

میری ٹٹ گئی پینگھ ہلاریوں

سائیں سچے نال بھالی اے گل

مینوں تانگاں دے مرزیاں تیریاں

جٹا ای او او او او او او

صاحبان دے عشق دی پینگھ تے ادھ واٹوں ٹٹ گئی سی پر بجلی دی آواز طبلے دے
ٹھیکے تے سوار ہلارے چڑھی ہوئی اے تے کوہاں قافاں تے پہنچی اے۔ سنن والے ”لٹ
لیا ای“۔ ”جیوندی رہو جینے۔“ ”صدقے جاواں تیرے“۔ ”شاوا پئی شاوا“۔ دے نعرے مار
رہے نے تے حالوں بے حال ہو گئے نیں۔ ہر پاسیوں سیٹیاں ای سٹیاں وچ رہیاں
نیں۔ ایہہ ویل نہیں دے بکرا رے نیں۔

دلہ رسنگھ نے گیس چک لیا اے۔ قاؤو نے کھوٹ پھڑ لیا اے پئی کوئی منڈا باہی وچوں
وی لنگھیاں شرارت نال بجلی دی پٹی یا پٹ تے چوٹدی نہ وڈھے۔ اک سازندے نے طبلہ
پر نے نال کس کے ڈھڈ نال بنھ لیا اے۔ تے اوہ چارے ای ویلاں گراؤن ٹر پئے نیں۔
بجلی مرزا صاحبان دا اک بول نچ کے گاؤندی اے تے ویلی دے متھے یا گلھ تے
رکھے ہوئے اک یا پنج دے نوٹ نوں پھڑ کے ویل کر دی اے۔ بعض شیطان منڈے
نوٹ اپنے دندان وچ رکھ دیندے نیں۔ تے بجلی نوں کہندے نیں پئی اوہ نوٹ اپنے
دندان نال ویلی دے دندان وچوں کڈھے۔ بجلی تیار نہیں ہوندی تے ہتھ نال لعنت بھیجن دا
اشارہ کر کے دوسرے ویلی ول مڑ جاندی اے۔ دندان وچ نوٹ دین والے ویلی دے سگی
ساتھی ہسدے تے کھلی مار کے پھکڑی لاؤندے نیں۔ بجلی تے نہیں۔ ویلی تے۔
بجلی پندرہ سولہ روپے اگرہ کے فیر پڑ وچ آکھلوتی اے تے مرزا صاحبان دی دوجی
کلی سنا رہی اے۔

چڑھدے مرزے خاں نوں جٹ ونبل دیندا مت

بھٹھ رقاں دی دوستی۔ گھڑی جیہناں دی مت
 ہنس ہنس لاؤندیاں یاریاں رو کے دیندیاں دس
 ہتھیں یار کو ہاندیاں دے کے دھونے لت
 لکھیں ہتھ نہ آؤندی دانشمنداں دی پت
 مینوں خطرہ تیری جان دا
 جٹا مرزیا او او او او او او او

پہلے وانگوں ہر پاسیوں واہ واہ سبحان اللہ تے جیوندی رہو دے نعرے و بے نہیں تے
 سیٹیاں نے بلایا اے۔ پر ایدکیں، بجلی دُور نہیں گئی۔ مراد خاں تے سردار ہر نام سنگھ دے
 نوٹاں نوں ہوا وچ اُچھال کے ویل کراؤن لگ پئی اے۔
 ”ویل ویل دس روپیاں دی ویل خان صاحب مراد خاں دے گھر دی ویل۔ ویل
 ودھے تے جد ودھے۔ بھاگ لگے رہن۔“

انجے اوہنے سردار ہر نام سنگھ دی ویل ہوئی اے۔ اوس وی دس روپے دتے نہیں۔
 مٹھی تے سودالی آواز والا کوئی سا زندہ بجلی نوں ساہ دوان لئی دُہڑالا رہیا اے۔
 اک نہ بیجیں سنگھنا باجرہ، دوجی نہ بیجیں جوار وے
 پھڑیا نہ جائے ساتھوں باجرہ، مٹیٹھی نہ جائے جوار وے
 اک نہ ماریں ساڈے چھوچھکاں، دوجی نہ کڈھیں گال وے
 پنڈے تے رڑکن چھوچھکاں، دل وچ اڑ کے گال وے
 کھنگورا مار کے بجلی فیر شروع ہو گئی اے۔

حجرے شاہ مقیم دے اک جٹی عرض کرے
 میں بکرا دینی آں پیرا دا، میرے سردا سائیں مرے
 پنج ست مرن گواہنڈناں رہندیاں نوں تاپ چڑھے
 گنتی مرے فقیر دی جیہڑی چاؤں چاؤں نت کرے
 ہٹی سڑے کراڑ دی جتھے دیوانت بلے
 گلیاں ہو جان سنجیاں وچ مرزا یار پھرے

مینوں تانہنگاں وے مرزیا تیریاں

جٹا ای او او او او او او

ایدکیں بیلے والے پاسیوں اک تھاں توں چھ ست سیٹیاں آئیاں نیں۔ پہلے وانگوں
دندر سنگھ نے گیس پھڑ لیا اے۔ سازندے نے طبلہ چک لیا اے تے ہرنام سنگھ دا وڈا منڈا
سلکھن سنگھ کرپان پھڑ کے بجلی نال ہوٹریا اے۔ بجلی دا حفاظت گیر ہر واری جاوے تے
لوک مخول کرن لگ پیندے نیں۔

دور گیس دی لو وچ کھلوتے ہوئے جوناں دیاں پگڑیاں دسدیاں نیں۔ پئی ایہہ سکھ گھرو
نیں۔ طبلے دے ٹھیکے تے جلی دے پیر ٹھمکے لین لگ پئے نیں تے اوہ مرزا صاحبان دا بول گا
رہی اے۔ ہن اوہ چپ ہو گئی اے تے سکھ جوناں دے اکٹھے ہسن دی آواز آئی اے۔

ویل لین وچ دیر ہو رہی اے۔ تے مراد خاں تے ہرنام سنگھ دے کن کھڑے ہو گئے نیں۔
قاؤ کھوٹ پھڑ کے کھلو گیا اے۔ ساری خلقت دے کن تے اکھاں بجلی ول لگیاں ہوئیاں نیں۔

گیس اک دم بجھ گئی اے۔ کسے نے گیس دی ڈھیری مروڑ کے اوہدی پھوک کڈھ
دی اے۔ ہنیرے وچ بجلی دیاں چیکاں اُبھریاں نیں تے فیر مرگیاں نیں۔ انج جاپدا
اے جیویں کسے نے اوہدے مونہہ تے ہتھ رکھ دتا اے۔

ساری خلقت پیراں تے کھلو گئی اے بجلی دی بے بے خان صاحب تے سردار
صاحب کہہ کے اپنی دھی دے بچان دی التجا کر رہی اے۔

خلقت وچ گھسکا را پے گیا اے۔ لوک ایدھر او دھر سن لگ پئے نیں۔

”تایا میں جاواں؟“ قاؤ مراد خاں کولوں پچھدا اے۔

”نہیں، حالی نہیں۔“ مراد خاں قاؤ نوں روک لیندا اے۔

سلکھن سنگھ نستا نستا آیا اے۔ اوہنوں ساہ چڑھیا ہو یا اے۔

”باپو، باپو! کرپا سنگھ بجلی نوں چک کے بیلے ول نس گیا اے اوہدے نال دے

کرپاناں کڈھ کے راہ روکی کھڑے نیں۔“ سلکھن سنگھ کہندا اے۔

”قاؤ پتر۔ نس کے جا بجلی نوں چھڑا کے لیا۔“ سردار ہرنام سنگھ کہندا اے۔

”میتھوں ایویں کرپا سنگھ دے سٹ پیٹ نہ لگ جاوے۔“ قاؤ کہندا اے۔

”کوئی گل نہیں۔ تُوں جا۔ ایہہ پنڈ دی عزت دا معاملہ اے۔“ سردار ہر نام سنگھ کہندا اے۔
تھوڑی دیر بعد بجلی پھر جڑے ہوئے پڑ وچ بچ رہی سی تے منڈیاں گھنڈیاں دا دل
پسند گیت ”ڈیموں“ گا رہی سی۔

میرے متھے اُتے ڈیموں ڈنگ لانی گیا

ٹکا لان والی جگہ سُبانی گیا

لوک اوئے ہائے دے نعرے تے سیٹیاں مار رہے سن۔ تے ویلاں کرا رہے سن۔
بجلی ندھڑک ہو کے بانہواں چیر دی دور دور تیکر ویلاں لین جا رہی سی۔
کرپا سنگھ دا سارا سریر تے سارے کپڑے خون وچ گھجن سن اوہ بے ہوش سی تے پڑ
وچ ہر نام سنگھ دے سامنے لما پیا ہو یا سی، قاؤ دا وہدے سرہانے کھونڈ لئے چوکیداراں وانگ
کھلوتا ہو یا سی۔ اوہ چپ چان سی انج جیویں کوئی گناہ کر بیٹھا ہووے۔
جد سردار ہر نام سنگھ نے قاؤ ونوں کہیا۔

”کوئی گل نہیں۔ تُوں جا۔ ایہہ پنڈ دی عزت دا سوال اے۔“ تے قاؤ و ستمیں والا تے
دیسی تیل وچ بھجنا ہو یا۔ کھونڈا لے کے اوس پاسے نسا جدھروں بجلی دیاں چیکاں آئیاں سن۔
راہ وچ اوہدا ٹا کرا اوگرے دے لبانیاں تے کرپا سنگھ دے ساتھیاں سنگیاں نال ہو یا اوہنے۔
”نگڑے ہو جاؤ۔“ دالکرا ماریا تے اوہناں ول ودھیا، اوہ گل چھ سن، چار تے للکرا
سن کے اگے پچھتے ہو گئے تے باقی دو گر دے والے جوان اوہدے سامنے آئے۔ اوہناں
دیاں کرپاناں قاؤ دے کھونڈ دا مقابلہ نہ کر سکیاں، اخیر دوواں نوں جان بچا کے نسا پیا۔
جدوں قاؤ دا گانہہ ودھیا تے کرپا سنگھ بجلی نوں کٹر نال بچھی اپنی گھوڑی کول لے گیا
سی۔ اوہدی خبرے کوشش ایہہ سی کہ بجلی نوں گھوڑی تے سٹ کے اوگرے یا کسے دوسرے
تھاں لے جائے۔

تاریاں دی پھلکی لو وچ قاؤ نے کرپا سنگھ نوں ویکھیا جیہڑا رچھ وانگ بجلی نال گھل
رہیا سی تے بجلی جان چھڈان وچ لگی ہوئی سی۔ جد قاؤ نے دوواں نوں ویکھیا تے بجلی
نوں دلیری دتی۔

”نگڑی رہو۔ میں آ گیاواں۔“

کرپا سنگھ نے قاؤ دی آواز سُنی۔ دھکا دے کے بجلی نوں ریت تے سُٹیا تے گال کڈھ کے تے کرپان دھرو کے قاؤ ول ودھیا پر سر وچ دو تن کھونڈ کھا کے زمین تے ڈگ پیا۔ ایسے چر وچ سلکھن سنگھ تے فیروز ہو ریں وی اوتھے آ گئے۔ قاؤ نے کرپا سنگھ نوں بوری مانگ موڈھے تے سُٹیا تے چک کے پڑ وچ لے آیا۔

سلکھن سنگھ نے کرپان لئی۔ گھوڑی لکرنالوں کھولی تے اڈی لا کے پنڈول چلا گیا۔ تاں جے کتے کرپا سنگھ دے سنگی ساتھی۔ فرید پور جا کے گڑ بڑ نہ کرن۔

پڑ دوبارہ جم گیا تے بجلی توبہ توب کر دی۔ فرید پڑ وچ آ کھلوتی۔ اوہ نہیں سی چاہندی کہ فرید پڑ تے گائے پر سردار ہر نام سنگھ نے کہیا کہ ایہہ فرید پور دے پٹھاناں تے سکھاں دی عزت دا معاملہ اے تے ایسے عزت دے معاملے دی خاطر اوس اپنی پریتو دے منگیتر دا سر پڑوان توں فرق نہیں کیتا۔

دو جے دن سورج دی ٹکلی نکلدے تیک بجلی نجدی رہی اوہدا جسم نچ نچ کے تھک ٹٹ گیا سی تے گلا بھارا ہو گیا سی۔ اوس کوئی دو ہزار روپے کٹھے کر لئے سن۔ جیہدے وچ دینے مراٹی دے وی دو روپے شامل سن۔

جدوں پڑ کھنڈن لگاتے دینا مراٹی بجلی دی بے بے نال ڈھک کے کہن لگا ”بھاگ لگے رہن۔ میرے دو روپے دے دیو۔“

ایہہ گل مراد خاں دے کن وچ وی پے گئی۔ اوس دینے مراٹی نوں ہولی نال پنڈ ماری تے فرید پور دا نوٹ اوہدی تلی اُتے رکھ کے بولیا۔

”پکولا۔ ڈھائی سو وچوں ایہہ پنج بچے سن۔ ایہہ توں لے لے۔“

(5)

سورج چڑھے نال سلکھن سنگھ پنڈوں منجی لے آیا تے کرپا سنگھ نوں منجی تے پا کے فرید پور لے گئے۔

کرپا سنگھ دی منجی نال مراد خاں۔ ہر نام سنگھ، گور بجن سنگھ، درشن سنگھ، چرن سنگھ، رُوپا، بناری، فوجی رستم خاں، فیروز تے قاؤ وی سن مولو کبابیا تے دینا مراٹی ملنگاں کول

جا کے سوں گئے سن۔

جدوں قادو اپنے گھر بجاتے ہوئے ہے وچ اوہدی ماں رُوڑی وی بیٹھی ہوئی سی۔ اوہ قادونوں ویکھ کے کھلو گئی۔

”وے کا کا۔ تُوں ہر نام سنگھ دے جوائی داسر پاڑ سٹیا اے۔“ اوس قادونوں پچھیا۔
”آہو۔ بے بے۔“

”پر کا کا۔ تینوں کیہ لوڑی سی؟“

”بے بے! اوہ بجلی نوں چک کے بیلے ول لے گیا سی۔“

”وے کا کا، لے گیا سی تے تاں کیہ ہو یا؟ اوہ کیہڑی کسے دی نوہہ دھی سی؟“
”پر بے بے، ساڈے میلے وچ آئی ہوئی سی۔“

”وے کا کا، میلہ سارے پنڈ داسی۔ تیرا تے نہیں سی۔“

”مینوں چاچے ہر نام سنگھ نے کہیا سی پئی جا جا کے اوہنوں چھڈا کے لیا۔“

”کا کا ہر نام سنگھ وی پاگل اے۔ جیسے اپنے جوائی داسر تیتھوں پڑوایا۔“

”پچھا بے بے، گلاں چھڈ۔ میں ہُن پچھلے اندر وڑ کے سون لگاں واں کوئی آوے
تے کہنا گھر نہیں اے۔ مینوں نیندر بہت آئی ہوئی اے۔“ ایہہ کہہ کے قادو پچھلے اندر نکر
وچ ڈٹھے ہوئے منجے تے کھیس تان کے سوں گیا تے اوہدی چٹے والاں والی وختاں دی
ماری ماں دروازے وچ بہہ گئی۔

جدوں اوہ سوں کے اٹھیا تے ڈیگر ویلا سی۔ اوس مونہہ تے پانی دے چھٹے مارے
تے بناری دی دکان ول چل پیا۔

رستے وچ اوہنوں فوجی رستم خاں دامنڈاشیموں ملیا۔ اوس بکری دی ڈوری پھڑی
ہوئی سی۔ اوہ قادونوں کھلار کے بولیا۔

”بھاہ! میری بکری کیہندی اے۔ پئی کہ میں اوہ کھونڈ ویکھنا اے جیہدے نال تُوں
کرپا سنگھ نوں راتیں پھڑکایا اے۔“

”پر شیطانا! تیری بکری نوں کیویں پتا لگا اے کہ میں کھونڈ نال کرپا سنگھ نوں پھڑکیتا اے؟“
”میں دسیا اے بکری نوں۔“

”تینوں کیویں پتا لگا؟“

”مینوں میری بے بے نے دسیا اے۔“

”تیری بے بے نوں کہینے دسیا اے؟“

”میرے اہے نے۔ ہور کہینے۔“

”پہلاں اک پتی دے شیئوں۔ فیر تینوں تے بکری نوں کھونڈ دکھاواں گا۔“

”کھونڈ بکری نے ویکھنا اے۔ بکری دی پتی لے لے۔ میں تے سکے پیو نوں پتی

نہ دیواں۔“

”بڑا شیطان ہو گیا ایس شیئوں توں“ قادو نے پیار نال اوہدی لال سررخ گل تے

چپڑ ماری تے اگانہہ ودھ گیا۔

جدوں اوہ بناری دی دکان تے اپڑیا تے بناری نے اوہنوں ویکھ کے نعرہ ماریا۔

”جیوندار ہو میریا شیر جوانا۔ پنڈ دی لاج رکھ لئی او۔ ایمان نال۔“

”انج ای کرنا چاہی داسی۔ فکر نہیں۔“ فوجی رستم خاں بولیا۔

”پتی بڑی ہمت والا گھرواے۔ پورا اپنے پیو تے گیا اے۔ سمجھ کر لو۔“ ایہہ مولو کبابیاسی۔

”تسیں سارے لڑائی جھگڑے وچ خوش او۔“ مولوی اکبر گھر لی تے بیٹھا بولیا۔

”نہیں مولوی جی۔ ایہہ گل نہیں۔ ایمان نال اوہ گل ای ہور بن گئی سی۔“ بناری سر ہلا

کے کہیا۔

”کیہڑی گل بن گئی سی بناری داسا؟“ مولوی اکبر نے پچھیا۔

”مولوی جی متھوں پچھو۔ بناری کولوں پچھدے او۔“ فوجی رستم بولیا۔ ”کرپا سنگھ

نے گڑ بڑ کیتی۔ قادو نے ایکشن لے کے اوہدی سکیم فیل کر دتی۔ فکر نہیں۔“

”سکیم اوہدی وی بھیڑی سی پر تہاڑی سکیم ساریاں سکیمیاں نالوں بھیڑی سی۔“

مولوی اکبر غصے وچ آ گیا سی۔ تسیں کیوں منگوائی بجلی۔ کنجریاں نچاؤنیاں۔ کنجراں داکم اے۔

”بس تسیں تے مولوی جی پنڈ والیاں دے پچھے ای پئے رہندے او ایمان نال۔“

بناری بولیا۔

”پچھے پئے رہندے نے تے فکر نہیں۔ اسیں کیہڑی ایہناں دی گل منن واسطے تیار

آں۔“ فوجی رستم خاں بولیا۔

”نہ منو، اخیر حشر دیہاڑے پچھتاؤ گے۔“ مولوی اکبر ایہہ کہہ کے اٹھیا تے مسیت ول ٹر پیا۔

”بہہ جا، قادر داد خاں۔ کھلو کاہنوں رہیا ایں۔“ بنارسی نے کہیا
”نہیں یارا چلنا۔ ٹیر دے چٹھے دتھے دا پتا کراں۔“ قادو ایہہ کہہ کے مراد خاں دی
حویلی ول ٹر پیا۔

جدوں اوہ حویلی اپڑیا تے دلا حویلی دے چبوترے توں اٹھ کھلویا۔
”مینوں پتا اے توں گھوڑی دے پٹھیاں دا پتا کرن آیا ایں۔ میں سارے ڈنگراں
نوں پٹھے پا دتے نیں۔ میں کہیا ساڈا یار رنج کے سوں بہوے۔“
”دلیا! تینوں کیویں پتا لگا پئی میں ستا ہو یا ساں۔
”مینوں تیری بے بے نے دسیا سی پئی قادو پچھلے اندر ستا ہو یا اے میں گھر جو تیرے
گیا ساں۔“

”ہلا۔ پر میں تے بے بے نوں ٹھاک دتا سی پئی کسے نوں نہ دسیں پئی میں ستا ہو یا۔“
”وکیہ لے پھیر۔ تیری بے بے نے مینوں دس دتا۔ تائی نے ایہہ وی کہیا سی پئی
مُنڈا خراب ہو گیا اے۔ لڑائی جھگڑے شروع کر دتے سو۔“
”بس یار! لڑائی جھگڑا کیہ کرنا اے چاچے ہر نام سنگھ دے کہن تے میں۔ بجلی نوں
چھڈاں ٹر پیا۔“

”بہت چنگا ہو یا نالدے پنڈاں تے رُعب بڑا بیٹھا اے۔“
”پئی دلیا۔ اصل جگرا تے سردار ہر نام سنگھ دا اے۔ اک طرحاں اوس اپنے پتر دا سر
آپ پڑوایا اے۔ کرپے نوں ہر نام سنگھ دا پتر ای سمجھونا۔“
”بالکل۔ بالکل، ہر نام سنگھ دا بڑا جگرا اے۔ سانوں خوشی تے ایہہ دے پئی ساڈا
میلہ اُجڑیا نہیں۔ قائم دائم ای رہیا اے۔ کرپا سنگھ اپنے فعل وچ کامیاب ہو جاندا تے
اسیں لاگے شاگے دیاں پنڈاں وچ مونہہ دسن جوگیاں نہیں سی رہنا۔ لوکاں نے چھتیاں
دینیاں سن تے کہنا سی فرید پورے گنڈھوں کمزور نیں۔“

”چلو انج ای ٹھیک سہی۔ اللہ جو کر دا اے چنگا ای کر دا اے۔“
 قاؤ و حویلی وچوں پرت کے پیلیاں ول تڑپیا۔ اوہ رات دے واقعے نوں بھلاؤنا
 چاہندا سی۔

جدوں اوہ پڑاں وچ جُجاتے اگوں اوہنوں پینا ساہنسی نکریا۔ پینا ساہنسی کرپا سنگھ دا
 بڑا یار سی تے اوہ ہر ویلے کٹھے پھر دے رہندے سن۔ پینے نے اک ہتھ وچ ڈانگ پھڑی
 ہوئی سی تے دو جے ہتھ وچ گتے دی ڈور۔

”ہینیا۔ کدھروں؟“ قاؤ نے پینے دے کول آکے آکھیا۔
 ”ایہہ کُتا سردار کرپا سنگھ دا اے۔ ایس سویر توں بھونک بھونک کے کن کھا مارے
 سن۔ ایہہ کرپا سنگھ نوں ٹولدا سی۔ میں سوچیا ایس نوں کرپا سنگھ وکھا ای لیا یئے۔“
 ”رات میلے وچ نہیں لہھا؟“ قاؤ نے پچھیا۔

”چنگا ہو یا نہیں لہھا۔ جے لہھ جاندا تے خان بادشاہاں نے میرا سر وی دل دینا سی۔“
 ”نہیں۔ تاں وی کیہ ہو یا سی۔ تُوں آیا نہیں مجرا سنن؟“
 ”میرا نکا منڈا ہمار سی۔ میں اوہدے سرہانے بیٹھا رہیا۔“
 ”ہن کیہ حال اے اوہدا؟“

”فرق اے اگے نالوں!“
 ”ہینا! کرپا سنگھ نوں ساڈا نہیں تے سردار ہر نام سنگھ دا ای خیال کرنا چاہی دا سی۔“
 ”شراب وچ تے عقل باہر ہوندی اے۔ فیر اوہ پی کے وی بہت گیا سی۔“
 ”تدے ای۔“ قاؤ نے کہیا تے پیلیاں ول تڑپیا۔

اوہ اک پیلی دے بنے بہہ گیا۔ تے رات دے واقعے بارے سوچن لگ پیا۔
 اوہ رات والے واقعے نوں بھلاؤنا چاہندا سی پر بھلا نہیں سی سکدا۔
 اوہ سوچن لگ پیا۔ میں چنگا نہیں کیتا۔ کرپا سنگھ پنڈ دا جوائی بھرا سی پر تیتو اوہدے
 نال پیار کر دی اے۔ اوہ کیہ سوچدی ہووے گی؟

فیر پر تیتو تے صُغی آپس وچ سہیلیاں وی نہیں۔ صُغی وی ضرور میرے خلاف ہو گئی
 ہووے گی۔ اگے اوہ مینوں ہسدے متھے ملدی سی ہن پتا نہیں کیوں ملے۔ میں اوہدی

سہیلی دے ہون والے خاوند دا سر جو پاڑ دتا اے۔

سُکھن سنگھ تے سُکھا دا چنگا اے تے فیر سوچ سمجھ والا وی اے پر اوہدے دوویں
نکے بھرا گور بچن سنگھ، درشن سنگھ تے زریاں موہرے دیاں گندلاں نیں۔ اوہناں وچ تے
غصہ وی بہت اے۔ اوہ دوویں ضرور سڀ وانگ وں گھولدے ہون گے۔

مولو کبابیا وی ہُن پٹھاناں تے سِکھاں وچ وَتھ تے وَنڈ پاؤن وچ کامیاب ہو
جائے گا۔ اوہ اگے ای تائے مراد خاں دے خلاف اے۔ کیوں بے تائے مراد خاں نے
اوہدی زمین جوں بیع خریدی ہوئی اے ہر نام سنگھ تے چرن سنگھ بھاویں مولو کبابیئے دیاں
پٹھیاں گلاں وچ نہ آؤن پر نکا پوچ تے ضرور اوہدیاں گلاں وچ آ جاوے گا۔

بنارسی داس وی سِکھاں نوں چلے گا۔ اوہ چاہندا اے کہ پٹھان تے سِکھ آپس وچ
لڑن مرن۔ مقدمے چلن۔ ٹونب ٹلاؤکے تے اوہ سو روپے دی ٹونب چالی روپے توں
خریدے۔ جدوں میرے پیو تے قتل دا مقدمہ بنیا تے میری بے بے دیاں ساریاں ٹونباں
بنارسی داس نے کوڈیاں دے مُل خریدیاں سن۔

پر میں تے جو کجھ کیتا اے اپنے واسطے نہیں کیتا۔ پنڈ دی غیرت بچاون واسطے کیتا
اے تے اوہ وی چاچے ہر نام سنگھ دے کہن تے کیتا اے۔ میں تے چاچے ہر نام سنگھ نوں
پہلے کہہ دتا سی پئی ایویں کتے سٹ پیٹ نہ لگ جائے۔ پر اوس کہیا کوئی گل نہیں۔ ٹوں بجلی
نوں واپس پڑ وچ لے آ۔

قادو ایسے طرحاں دیاں سوچاں وچ دُبا ہویا سی تے اوہدیاں کناں وچ چوڑیاں
چھٹکن دی آواز آئی۔ جدوں اوہنے ڈونگھے گھوہ مُنڈی چُک کے ویکھیا تے اوہنوں صُغی
تے پریتو نظر آئیاں۔ اوہ پیراں تے اُٹھ کھلوتا۔

دُڈھ کھناں دیاں پلایاں مٹیاں۔ انگ انگ وچ جوانی دا نور کالے پراندے تے
لمیاں گُتتاں۔ ہوا نال گلوکڑیاں پاندے کیسری دوپٹے ملوک لک تے اُچیاں دھوناں۔
دُھپ وچ چمکدیاں نک دیاں تیلیاں لُس لُس کردے ریشمی لاچے۔ بُکھاں تے لالیاں تے
اکھاں وچ کجکل۔ دوویں رُعب وچ سن۔ یا انج سمجھ لئو کہ غصے وچ سن۔ پریتو کجھ نڈھال
جیہی سی پر صُغی۔ چُست جا پدی سی۔

اوہ اپنے دھیان ڈنڈیو ڈنڈی تریاں آریاں۔ جدوں اوہ دوویں قادو دے لاگے
پہنچیاں تے اوس صغی نوں پچھیا۔
”صغرا! کتھوں آئی ایں۔“

آواز سُن کے اوہ دوویں کھلو گئیاں پر پرتو دوجے پاسے مونہہ فیر لیا۔
”کتوں آواں تینوں کیہ؟ تُوں کوئی ٹھانیدار لگا ہو یا ایں ساڈے تے۔“
”صغیے۔ تُوں اپنی اوکھی کیوں بولنی ایں؟“

”میں سوکھی کیوں بولاں۔ تیرا دتا کھانی آں؟ دس مینوں؟“
”تُوں تے نہیں میرا دتا کھاندی پر میں تے تیرا دتا کھاندا واں۔“
”وے جا۔ دل دا کھوٹا!“

”دل دا کھوٹا کیہ پئی کیہنی ایں صغیے! میں کیہرا کھوٹ کیتا اے؟“
”ہور تُوں کھوٹ کیہ کمانا سی؟ وچارے کرپا سنگھ دارا ت سر پاڑ دتا اے۔“
”پر اوہ بجلی نوں چک کے بیلے ول لے گیا سی!“

”تُوں بجلی نوں واپس لے آؤندا۔ سر ضرور پاڑنا سی وچارے دا۔“
”پئی تُوں وی کمال کرنی ایں صغیے۔ اوس تے کرپان نال میرے اُتے حملہ کیتا سی۔“
”کرپان نال حملہ کیتا سی؟ ہائے میں مر گئی۔“

”جے میں کھوٹ نال اوہدا وار نہ روکدا تے اوہدی کرپان تے میرے ڈھڈ وچ
دھس جاندی۔“

قادو دی گل سُن کے صغی نے پرتو ول مونہہ کیتا تے بولی:
”لے سن لے۔ میں نہیں سی تینوں کہیا پئی کرپا سنگھ وی کسے نالوں گھٹ نہیں۔“
فیر اوہ قادو ول مونہہ کر کے بولی:

”تہاڈیاں تسیں جانو۔ ہُن تساں آپس وچ ای لڑ لڑ کے مرنا ایں چل پرتو چلیے۔
دفع کر ایہناں مرداں دیاں گلاں نوں۔ بڈھیاں تُوں ایہہ فافٹ لڑ پیندے نیں۔“
فیر اوہ دوویں نلے نلے پیر پُندیاں پنڈ نوں تریاں۔

سُورج دُبن دا پر بندھ کر رہیا سی تے کاواں دی ڈار رولا پاؤندی لہندیوں چڑھدے

نوں جا رہی سی۔

قاؤو نے محسوس کیا کہ ضعی نال گلاں کر کے اوہدا دل ہولا ہو گیا اے۔ اوہ ضعی نوں
ایہہ گل منان وچ کامیاب ہو گیا سی کہ اوہدا کوئی بہتا قصور نہیں۔ وڈی گل ایہہ سی کہ
اوہدیاں گلاں پریتم کور نے وی سن لیاں سن۔

جدوں اوہ واپس پریتا تے اوہنوں پڑاں دے وچکار ہنیا ساہنسی ملیا۔

”کیوں پئی ہینیا! مل آیاں ایں کر پے نوں۔“

”آہو، مل آیاں۔“

”کیہ حال اے اوہدا؟“

”ٹھیک اے۔ بڑا جند والا گھرواے۔ گھڑا خون دگیا اے پر اوہ بالکل نہیں گھبرایا۔

شراب نے اوہدا سریر واہوا گرم رکھیا اے۔ جے شراب نہ پیتی ہوندی تے اوہدا سریر ٹھنڈا
پے جانا سی، شراب نے تے ٹیکے داکم دتا اے۔“

”کیناں کو دناں وچ اٹھ کے تڑے پھرے گا؟“

”دو تن دن بعد بالکل ٹچن ہو جائے گا۔ فٹ فیٹ۔“

”ہوش وچ اے نا؟“

”آہو، ہوش وچ اے۔ ہس رہیا سی پئی قاؤو داء لا گیا۔ ہن چٹی دے میلے تے ملنی

ہوے گی۔“ پنے نے تڑدے ہوئے کہیا، قاؤو وی پنڈول تڑپا تے بولیا۔

”ہینیا! اساں کیہ اوہدے نال لڑنا ایں۔ اوہ تے ساڈے گھر دا بندہ اے۔ پنڈ دا

جوائی اے۔“

(6)

جدوں بہار آؤندی اے تے پھل کھڑدے نیں۔ جدوں جنور پچھاں نال پچھاں لا

کے مٹھیاں بولیاں بولدے نیں۔ جدوں نرم نرم گندلاں جوان ہوندیاں نیں تے سرہوں

دیاں پھلاں دی پیلک ہری گھچا کنک دے اُتے وچھدی اے۔ جدوں اویریاں ہرا پٹھا

کھا کے بالٹیاں بھر بھر کے دُڈھ دیندیاں نیں۔ جدوں آساں تے سدھراں دے بوٹیاں

تے بُور آؤندا اے تے من دیاں گجھیاں رمزاں بھانہ بن کے مچدیاں نیں اوہ دن چٹکی دا
 میلہ لگدا اے۔ چٹی دا میلہ میل ملاقاتاں دی تھاں اے۔ مونہہ در مونہہ گلے شکوے کرن دا
 ذریعہ اے۔ گھٹلی رُت دیاں خوشیاں منان دا وسیلہ اے تے بانہواں وچ بانہواں پا کے
 سیل سپاٹے کرن دا بہانہ اے۔ آج چٹی دا میلہ اے۔

چٹی فرید پور تے اوگرے دی پہاڑی والی گتھے ڈھائی تن کوہ دی واٹ تے اے۔
 سگھاں دا گراں اے۔ علاقے دے سارے سگھاں دا وڈا گوردوارہ چٹی اے تے
 گوردوارے دے نال والے ٹالھیاں دے باغ وچ میلہ لگدا اے۔ گوردوارے دے وچ
 گیانی، گورو صاحبان دی اوکھی تے پوتر حیاتی بارے گل کتھ سناؤندے نیں تے باہر
 ٹالھیاں دے باغ وچ میلے وچ آئے ہوئے گھروسداں سُرّاں تے ہیکاں لاؤندے نیں
 تے ٹیاراں دے ہاسے تے کھلیاں کنّاں وچ رس گھولدے نیں۔

پنجاب دے میلے سکے نہیں لنگھدے۔ کجھ نہ کجھ ہو ای جاندا اے۔ کدے کبڈی
 دے جتھے وجدے نیں تے کدے گھول ہوندے نیں۔ کدے گھوڑ دوڑ ہوندی اے تے
 کدے کلتے پھنڈے جانندے نیں۔ کدے سنڈھیاں دے بھیڑ ہوندے نیں تے کدے
 بندیاں دے۔ وساکھی دے میلے وچ ہمیش بھنگڑے پندے نیں۔ شراباں پیتیاں جاندياں
 نیں تے سر پائندے نیں۔ کدے کدے اک دو بندے قتل وی ہو جانندے نیں۔

میلیاں وچ حیاتی تے موت دی کھیڈ کیوں کھیڈی جانندی اے؟ ایہدی کوئی خاص
 وجہ نہیں۔ قتل ہون تے کرن دے کئی سبب نیں۔ کسے ویلے تے پرانیاں دشمنیاں دے
 کارن بندے لڑ پندے نیں تے قتل ہو جانندے نیں۔ ایہہ پرانی دشمنی کدے اک پنڈ دی
 دوجے پنڈ نال ہوندی اے تے کدے اک پنڈ دی اک دھردی دوسری دھرنال ہوندی
 اے۔ کسے ویلے بنا کسے وجہ توں لڑائی ہو جانندی اے۔ جیویں مُنڈے نے رَج کے پیتی
 ہوئی اے۔ ہوش حواس قابو وچ نہیں۔ اوہ کولوں دی لنگھدے کسے دوجے گھروں اُچی
 ساری گالھ کڈھ دیندا اے۔ گالھ سنن والا پرت کے گالھ کڈھن والے داسر پاڑ دیندا اے
 کیوں جے گالھ سنن والے نے گھٹ پیتی ہوندی اے تے ذرا ہوش وچ ہوندا اے۔

کئی واری کوڈی۔ دنگل۔ گھوڑ دوڑ تے بنی پھرن دے مقابلیاں وچ رہ پھرن پے جاندا

اے۔ رچھڑ جھگڑا بن جاندا اے تے امن امان درست کرن لئی ڈانگ دا سہارا لیا جاندا اے۔
 کسے ویلے لڑائی گڑیاں توں ہو چندی اے۔ کوئی جنا کسے سونی جیہی نیار دے سو پٹن دی
 تعریف کر بہندا اے تے گڑی دے بھرا، چاچے، تائے یا دوجے اوہدا سر چتھ دیندے نیں۔
 میلیاں وچ لڑائیاں بس ایویں کیویں ای ہو جاندیاں نیں۔ لڑن دا ارادہ تے ہوندا
 اے پر بہتا پکا نہیں ہوندا۔ پولیس وی میلیاں دیاں لڑائیاں وچ زیادہ گواہ نہیں کردی۔
 ڈانگ سوٹا کھان والے وی کوئی زیادہ پرواہ نہیں کردے۔ اصل وچ ڈانگاں مارن والے
 تے ڈانگاں سہن والے دا پنجابی وسوں بڑا تھاں تھتتا اے۔ دوواں نوں بہادر تے دلیر سمجھیا
 جاندا اے۔ پر جے تئیں ڈانگ مار کے پولیس کولوں ڈرو تے ڈانگ سہہ کے پڑ چھڈو تے
 لوک تہانوں مخول کرن گے تے جولاہ کہن گے۔

چھاہ ویلا اے تے چٹی دا میلہ بھر دا پیا اے۔ نکیاں نکیاں دکاناں، ٹالھیاں دے
 مڈھیں لگیاں ہوئیاں نیں تے دکاندار وں سونیاں بولیاں بول کے سودا سوتر وچج رہے
 نیں۔ اک پٹھیاں اکھیاں والا دُوم ٹٹی ہوئی سرنگی تے گز فیر دا ہویا بیت دوہڑے تے سی
 حرفیاں گارہیا اے۔ سرنگی دی آواز اینج آ رہی اے جیویں کوئی دھاراں کڈھ رہیا ہووے۔
 ایہہ مانگت اے۔ ہر دکان تے جاندا اے۔ گاؤندا اے تے پیسہ یا دو پیسہ یا کوئی کھان پین
 دی کوئی شے لے کے اگلی دکان تے تڑ جاندا اے۔ کئی دکاندار دیندے دواندے کجھ نہیں بس
 ہتھ دے اشارے نال اگے ودھن دا حکم دیندے نیں۔ لٹو سنوکیہ گارہیا اے۔

دل توہیں، دلبر بھی توں ہیں، اتے دید توہیں دُکھ تیرا
 نیندر بھٹکھ آرام توہیں توں، تئیں دِن جگت اندھیرا
 نین پران حیاتی توں ہیں، تئیں دِن کوئی نہ میرا
 ہاتھم سانجھ تہاڈے دم دی، ہور وسدا ملک ہتھیرا

دکاندار اپنی دکان سجا رہیا اے تے راگی ول کوئی دھیان نہیں دے رہیا۔ راگی
 اودوں تیک گاؤندا رہے گا جدوں تیک اوہنوں یا تے بھٹکھیا نہیں مل جاندی تے یا دکاندار
 اوہنوں اگانہہ ودھن دا اشارہ نہیں کر دا۔ دکاندار سُنے نہ سُنے نکلے سکھ کا کے تے
 کاکیاں بڑی پریت نال اوہدے شعر سُن رہے نیں۔ شعراں توں زیادہ اوہناں نوں سرنگی

وچوں نکلن والی مٹھی مٹھی رُوں رُوں نال دلچسپی اے۔ سرنگی دی رُوں رُوں اوہدی آواز
دے نال نال بدل جاندی اے۔

ح حسن دا مُلک مشہور خونی، بندے نیناں دے تیر کٹار اوتھے
وانگ آب حیات اوہ راہ اوکھا، دھندو کار غبار ہزار اوتھے
آوے پرت نہ جیوندا فیر مُڑ کے، پاوے جہات جیہڑا اک وار اوتھے
دیوے یوٹیا جا کے جان جیہڑا، چاہوے پریم دے اوہ اسرار اوتھے
دکان دار اچے وی اپنے کم وچ رُجھا ہویا اے۔ اوہ راگی ول دھیان دے رہیا۔
ایہہ پوٹیاں تے ونگاں دی دکان اے۔ دکان دار کوئی شیخ جا پدا اے۔ عمر پئی اے۔ چٹی
خشخشی داڑھی نال چہرے تے رعب اے۔ راگی گارہیا اے۔

الف اکناں نوں ہس کے یار ملیا، اک پھڑیاں ہجر دیاں بُتیاں نوں
اک ویہندیاں سردا تاج تیرا اک سہکدیاں تیریاں جُتیاں نوں
اکناں جاگدیاں دے رہے بھاگ سُتے، بھاگ جاگ پئے اکناں سُتیاں نوں
علی حیدرا یار مہربان ہووے، جنت واڑ دیندا پھڑکتیاں نوں
شیخ نے ہتھ دے اشارے نال راگی نوں اگانہہ ودھن دا اشارہ کردتا اے۔ اوہ اگلی
دکان ول تڑپا اے تے اوہدے نال سکھ کا کے تے کاکیاں وی۔

ٹالھیاں دے باغ دے نال والی ویہندھڑ پیلی وچ ڈھو وچ پیا اے۔ تے خلقت
اودھرنوں تڑپئی اے۔ اوگرے دا زرنجن سنگھ اپنا سنڈھالے کے پڑ وچ آ گیا اے۔ سنڈھا
جزیرا ہویا اے تے اوہدے تیل وچ بھجے ہوئے سنگ ڈھپ وچ چمک رہے نیں۔ پچھلے
سال وی زرنجن سنگھ دے ایسے سنڈھے نے بھیڑ چتے سن۔ لوک کیہندے نیں جیویں شہراں
وچ بعض کوچوان اپنے گھوڑیاں نوں سگرناں پلاؤندے نیں اوسے طرحاں زرنجن سنگھ
اپنے سنڈھے نوں شراب پلاؤندا اے۔ تہدے ای تے اوہ سنڈھا دلیری نال بھڑدا اے۔
اک سنڈھے نوں دیکھن لئی اک دُوجے اُتے ڈگ رہے نیں۔ دو تن لاکڑی
لاٹھیاں نال اوہناں نوں چکھے نوں دھکے مار رہے نیں۔ لوک چکھے ہٹ رہے نیں تے
وچکار اکھاڑہ بن رہیا اے۔ ایسے اکھاڑے وچ سنڈیاں دے بھیڑ لگن گے۔

ڈھولی نے ڈھول ڈبل کھڑکایا ہویا اے۔ اوہ چھنج دا ڈھول و جا رہیا اے۔

آؤ لوکو جاؤ لوکو ساڈے پنڈ چھنج اے۔ کرپا سنگھ۔ ہینا ساہنسی تے پنج ست دوجے
مُنڈے ٹیڈیاں پکڑیاں ہتھی ہتھاں وچ ڈامگاں تے کرپاناں لئی کھلوتے نیں۔ ہینے ساہنسی
کول بلم اے۔ اوہدیاں لمیاں لمیاں بے سُریاں مچھاں ڈراونیاں نیں۔ اکھیاں لال گلال
نیں۔ اوہ پیراں توں ننگا اے۔ ہینا ساہنسی اوگرے دانیا پرمنیا سٹاں مارن تے کھان والا جتا
اے۔ کرپا سنگھ دا لنگوٹیا اے۔ شغل دے طور تے ایس سُر پالے ہوئے نیں۔ اصل کمائی
چوری چکاری اے۔ کرپا سنگھ ایس نوں پولیس دی مار کولوں بچاندا اے تے ہینا ایہدے
وٹاندرے وچ کرپا سنگھ دے نال شراب پین وچ ساتھ دیندا اے۔ قادو وی ایس گل نوں
مند اے کہ ہینا مدان وچ کھلو کے دلیری نال وار کردا اے تے وار روکدا اے۔ کرپا سنگھ
تے اوہدی ٹولی شراباں پی کے آئے نیں تے قادو نال دو دو ہتھ کرن توں نہیں ٹلن گے۔
میلے وچ آؤن والے بہت سارے لوکاں دا وی ایہو خیال اے۔

باہی وچوں نکل کے سردار ہرنام سنگھ دا زنگا پُتر درشن سنگھ کرپا سنگھ ول آیا اے۔ اوہ
کرپا سنگھ نوں نال لے کے باہی ول تڑپا اے۔ ہُن اوہ دوواں باہی چیر کے لوا بنجے ول
تڑپے نیں۔

”اوئے درشن سیہاں۔ کھلوتے جا۔ کتھے تڑپا جانا ایں۔“

”بھائی۔ میں تینوں اک بڑی ضروری گل دسن آیا۔“ درشن سنگھ کھلو کے کرپا سنگھ نوں
کہندا اے۔

”اوئے کیہڑی جروری گل دسن آیا ایں۔“

”فرید پور دے پٹھان میلے وچ تیاری کر کے آرہے نیں۔“

”تاں کیہ ہویا۔ اسیں وی تیار آں۔“

”چنگی گل ایہہ جے تسیں تیار ہوئے تے۔ میں سوچیا پئی کتے تسیں تھوڑے تیار نہ ہوؤ۔“

”اوئے درشن سیہاں۔ گھگی کاں دا مقابلہ نہیں کر سکی۔ جے شاہ سکندر دے میلے

میراجٹ ہینا میرے نال ہوندا تے قادو خاں نوں وی اساں لوتھ پا دینی سی۔ اوہدا کا کا ہمار
سو تے ایس واسطے اوہ میرے نال میلے تے نہ آسکیا۔ جے آجاندا تے قادو چھڈ مراد خاں

نوں وی اسیں وچھا دیندے۔ تے اوہ فیر لہدے اپنی بجلی نوں۔“
 ”بھائی۔ تیاری بڑی جروری اے۔ قادو لڑن تے آ جاوے تے علاقے وچ کوئی
 اوہدے سامنے نہیں کھلوسکدا۔“

”اوئے جاوی۔ آ گیا اے سانوں ڈراؤن۔ اک قادو نہیں دس قادو ہون فیروی واہ
 گرو دی کرپا نال کرپا سنگھ تے پینا اوہناں نوں پڑ وچ لمیاں پاوے گا۔ آ ہو۔“
 ”میں تے ایہو چاہنا واں پر کتے ایہدا اُلٹ نہ ہو جاوے۔“

”توں بے گمراہ رہ درشن سیہاں۔ اسیں اج بتی دھاراں بخشوا کے آئے ہوئے آں۔“
 کرپا سنگھ جدوں پلٹ کے پڑ وچ آیا تے پڑ وچ فوجی رستم خاں دا وی سنڈھا کھلوتا
 ہویا سی۔ سنڈھے دے پنڈے تے پھلاں والی جھلی سی تے جھل دے اُتے فوجی دا کا کا
 شیموں بیٹھا پپنی و جا رہیا سی۔ پینا تے اوہدے نالدے پڑ وچوں نکل کے باہی وچ جا
 کھلوتے سن۔ کرپا سنگھ نے اوہناں نوں ویکھیا تے اوہناں کول جا کھلوتا۔

باہی چیر کے قادو، دُلا، سلکھن سنگھ، فیروز، دینا مرانی، مولو کبابیا، جیدا جولاہ، اوہدا پیو
 سجان، آلی ماچھی، بختر سنگھ، مراد خاں تے سردار ہرنام سنگھ اگے ودھے تے فوجی رستم خاں
 کول آ کھلوتے۔ اخیر تے مولوی اکبر اپنی ململ دی پگ سنبھالدا اگانہہ آیا۔ ڈھول و جنا بند
 ہو گیا تے چٹی دا سردار دسوع سنگھ تے مولوی اکبر پڑ وچ آ کھلوتے۔ ایہہ دوواں نرنجن سنگھ
 تے فوجی رستم خاں دے سنڈھیاں دے بھیڑ دا فیصلہ دین گے۔ دسوع سنگھ، نرنجن سنگھ ولوں
 تے مولوی اکبر فوجی رستم خاں ولوں لاکڑی تے منصف نیں۔

دسوع سنگھ تے مولوی اکبر اک دوجے دے بڑے پریمی نیں۔ کدے مولوی اکبر چٹی
 آ جاندا اے تے دسوع سنگھ نال اسلام تے سکھ مذہب تے بحث کردا اے۔ کدے دسوع
 سنگھ فرید پور آ جاندا اے تے مراد خاں دی حویلی وچ بہہ کے مولوی اکبر نال بحث کردا
 اے۔ موضوع ہمیش اک دوجے دے مذہب دی بڑھوتری ہوندا اے۔ دوویں سارا دن
 بحث کر دے رہندے نیں تے اخیر تے اک وی قائل نہیں ہوندا۔ دوویں جھپیاں پا کے
 ہسدے ہوئے گھر و گھریں چلے جاندے نیں۔ ایس بحث مباحثے دا ہور کوئی فائدہ ہووے
 نہ ہووے اک فائدہ ضرور ہویا اے۔ اوہ ایہہ کہ سکھ اسلام بارے ڈاڈھا کجھ جانن لگ

پئے نہیں تے مسلماناں نوں سکھ مذہب دیاں موٹیاں موٹیاں گلاں زبانی یاد ہو گئیاں نہیں۔
 دسودھ سنگھ نے پڑ دے اک پاسے ڈانگ زمین وچ گڈ کے اوہدے اُتے ملل دا تھان
 رکھ دتا اے۔ ایہہ مالی اے۔ جیہدا سنڈھا بھیڑ جتے گا اوہدے سر بنھ دتی جائے گی۔ پچھلے
 سال بھیڑ وچ تن منڈے آئے سن پر ایدکیں صرف دو نہیں۔ پچھلے سال زرنجن سنگھ نے
 ملل دا تھان سرتے بنھیا سی تے اج وی اوسے تھان دا پگڑ اوہدے سرتے اے۔ فوجی
 رستم خاں پہلی واری اپنا سنڈھا بھیڑ وچ لیا اے۔

دسودھ سنگھ ہتھ سروں اُتانا نہ چک کے لوکاں نوں اشارہ دے رہیا اے کہ اوہ ہور پچھے
 پچھے ہٹ جان۔ لوک اک دوجے نوں دھکے دے کے پچھانا نہ پچھانا نہ ہٹ رہے نہیں۔
 شیموں سنڈھے اُتوں اتر کے قادو دے موہڈے تے بہہ گیا اے۔ اوہ ہُن پچنی نہیں و جا
 رہیا۔ فوجی رستم خاں نے سنڈھے دے پنڈے توں پھلاں والی چادر لاہ لئی اے تے فیروز
 نوں پھڑا دتی اے۔

”سنڈھیاں دیاں نتھان کھول دتیاں جاون تے ڈھول و جنا شروع ہووے۔“
 دسودھ سنگھ دی موٹی آواز نے لکارا اے۔ ڈھول اُتے ڈگا تیز تیز و جن لگ پیا اے
 انج جیویں دو پہلوان چھیتی چھیتی انگ تے داء لا رہے ہون تے ڈھولی اوہناں نوں
 ڈھول و جا کے بلا شیریں دے رہیا ہووے۔

سنڈھے اپنی اپنی تھان کھلوتے اک دوجے نوں غصے بھریاں اکھاں نال تک رہے
 نہیں۔ دوویں کالے سنڈھے ہاتھی جا پدے نہیں۔

”یا میرے مولا۔ توں عزتاں شرماں دا والی ایں پر فکر ناہیں۔“ فوجی نے سنڈھے دی
 نتھ کھول دتی اے۔ سنڈھا چوگھر انسا اے۔ دوجے پاسیوں زرنجن سنگھ دا سنڈھا وی گولی
 وانگ آرہیا اے۔ خلقت نے رولا پادتا اے۔

کُتر۔ تے کُتر دا کھڑاک ٹالھی دے باغ وچ گونج رہیا اے۔ ٹالھی دیاں لگراں تے
 بیٹھے ہوئے جنور پُجوں پُجوں چیں چیں کردے ہوئے اُڈ کھلوتے نہیں۔ خلقت نے اینا رولا
 پایا اے کہ پاگل جا پدی اے۔

سنڈھے پچھلے پیریں مُرد کے فیر بھرن واسطے اگانہہ ودھ رہے نہیں تڑاک..... کسے

ٹالھی دا ٹاہنا ٹٹا اے۔ سنڈھا ڈھور بھورا ہو کے اپنی تھاں کھلوتا اے تے لہو دا پرنا لہ زمین اُتے ڈِگ کے چھڑ بنا رہیا اے۔ فوجی رستم خاں دا سنڈھا پچھے ہٹ کے فیر بھیڑن واسطے شوٹ وٹی جا رہیا اے۔

دھڑام..... زرنجن سنگھ دا سنڈھا زمین تے ڈِگ پیا اے۔ فوجی رستم خاں نے نس کے سنڈھا پھڑ لیا اے۔ اوہنوں نتھ پا دتی اے۔ خلقت اڈھڑ گدڑی ہو گئی اے۔ مولوی اکبر تھان کھول کے فوجی رستم دے سر تے بنھ رہیا اے۔ شیموں قاڈو دے موہڈیاں تے بیٹھا زور زور نال پپنی و جا رہیا اے تے بھڑک رہیا اے۔

لوہڈا ویلا اے تے میلے وچ گڑیاں چڑیاں وی آگیاں نیں۔ زرنجن سنگھ اپنے بے ہوش سنڈھے نوں گڈ تے لڈ کے اوگرے چلا گیا اے۔ فوجی رستم خاں نے اپنا سنڈھا میلیوں گجھ دُور ٹالھی تھلے بنھ دتا اے۔ تے مجیدے نوں اوہدی راکھی تے بٹھا دتا اے۔ لوک جتن والے سنڈھے نوں دیکھن جا رہے نیں۔ تے دیکھ کے آرہے نیں۔

فوجی رستم خاں نے حلوائی دی دکان تے کھیس وچھایا ہو یا اے۔ کھیس اُتے اخباراں دے کاغذ نیں تے کاغذاں اُتے حلوائی گرما گرم جلیبیاں جوکھ جوکھ کے سٹ رہیا اے۔ قاڈو۔ سُلکھن سنگھ۔ دینا مراٹی۔ فیروز۔ مولو کبابیا۔ سبحان۔ شیموں۔ چرن سنگھ تے دُوجے مُنڈے مزے نال کھا رہے نیں۔

”رستم خاں۔ مبارکاں ہون۔ تیرا سنڈھا بھیڑ جت گیا اے۔“ اسلام پور دا خان بابا جتے خاں کہندا اے۔

”آؤ بسم اللہ۔ خیر تہانوں ای مبارکاں نے ناں۔ آؤ اُتر و گھوڑی توں۔ کوئی جلیبی شلیبی کھالو۔ فکر نہیں۔“ رستم خاں وڈا سارا جلیب حلق وچوں تھلے اتار دا کہندا اے۔

”بس کھائی چلو۔ مٹھے توں مونہہ مڑ گیا اے۔ میں گھروں کھیر کھا کے آیا تے فیر حنیف خاں۔ بیرم خاں تے دُوجے منڈیاں نے مینوں جلیبیاں والی دکان اُتے بٹھالیا۔“

”ہور کھالو۔ کیہ فرق پیندا اے؟“

”نہیں ہُن جی نہیں چاہندا۔“

”تسین نہیں کھانیاں تیا تے گھوڑی نوں کھلا ر دیو۔“ قاڈو بولیا اے۔

”شاوا شے۔ قادر داد خاں توں وی بیٹھا ہویا ایں۔ میں دیکھیا ای نہیں سی تینوں۔
کیہ حال اے تیرا؟“ جتے خاں نے پیارنال پچھیا۔

”دیکھ ای رہے او۔ جلیبیاں کھا رہیا واں۔“ قادو نے ہس کے کہیا۔

”سنیا اے کرپا سنگھ تے ہینا بڑیاں ڈانگاں لئی پھر دے نیں۔“

”دیکھی جاوے گی۔ کیوں سلکھن سیہاں؟“ قادو نے سلکھن سنگھ نوں پچھیا۔

”آہو آہو۔ سارا قصہ بنے دا اے۔ اوہو ای کرپا سنگھ نوں خراب کر رہیا اے۔“

سلکھن سنگھ نے کہیا تے وڈی ساری جلیبی چھن ڈیہہ پیا۔

”اوہناں کول تے ڈانگاں کرپاناں نیں پر تہاڈے کول تے اک سوئی وی نہیں۔

میرے منڈیاں کولوں سوٹے لے لٹو جے چاہی دے نے تے“ جتے خاں لڑائی کراؤاے۔

”تایا! سوٹے بہت..... اساں پورا سمیان کیتا ہویا اے۔ آؤ اُترو پٹھاں جلیبیاں

کھا لئو۔“ قادو خاں اپنے پیو بوٹے خاں دے یار باش جتے خاں نوں کہندا اے۔

”نہیں میں چلنا واں۔ میں سوچیا میرے مرن والے یار دے پتر نوں میری لوڑاے

تے میں تیار آں۔“

”مہربانی تایا مہربانی۔“

شیموں نے کوئی بہتی تکتی جلیبی مونہہ وچ پالئی اے تے ہائے ہائے پیا کردا اے پر

جلیبی مونہہ وچوں نہیں کڈھدا۔ قادو زور زور نال ہسدا اے تے کہندا اے ”شیموں تیرا پیو

تے اینا لالچی نہیں جتا توں ایں۔“

”میری بے بے بڑی لالچن اے۔“ شیموں جلیبی اندر لنگھا کے کہندا اے۔ ساری

ٹولی ہسدی اے۔

”کھاؤ کھاؤ۔ دہن کھاؤ۔ فکر ناہیں۔“ فوجی رستم خاں کہندا اے۔ سارے نویں

سریوں شروع ہو جانداے نیں۔

”میں وی آکھاں سارے دھوناں تھلے سٹ کے کیہ لہہ رہے نیں۔ پتا نہیں جلیبیاں

کھا رہے نیں“ ایہہ صغی دی آواز اے۔ سارے دھوناں چک کے اُتا نہہ تھکدے نیں۔

صغی تے پریتو تے دوجیاں گڑیاں اوہناں نوں دیکھ کے ہسداں نیں۔ شیموں اپنی تھاں

توں اٹھ کھلونا اے۔

”صغیے۔ ساڈا سنڈھا بھیڑجت گیا اے۔“ شیموں بڑا خوش ہو کے دسدا اے۔

”وڈیا بہہ جا۔ مینوں پہلے ای پتا اے۔“ صغی کیہندی اے۔

”سنڈے دے جتن دا پتا ہووے گا۔ پر تینوں ایہہ نہیں پتا ہووے گا کہ اوں چاچے

نرنجن سنگھ دے سنڈھے نوں کیویں ٹکر مار کے ڈیگیا۔“ شیموں کہندی اے۔

”نہیں۔ مینوں نہیں پتا۔“ صغی اپنی مورنی ورگی دھون نفی وچ ہلا کے کیہندی اے۔

”لے میں تینوں ہنئے دسناں واں کہ ساڈے سنڈھے کیویں ٹکر ماری تے مقابلے تے

آؤن والا سنڈھا کیویں ڈیگیا۔ بھاء قاؤو۔ ٹوں بن ساڈے والا سنڈھا تے میں بنیا واں

چاچے نرنجن سنگھ والا سنڈھا تے فیر میں اوہناں نوں ڈگ کے دساں گا۔“

صغی، پریتو تے دوجیاں کڑیاں ہس رہیاں نیں۔

”شیموں پتر۔ آگیا ایں شرارتاں تے فکر ناہیں۔“ فوجی رستم خاں پیار نال کہندی اے۔

قاؤو تے شیموں دوویں اپنیاں دھوناں اگے نوں انج کڈھ لیندے نیں جیویں کنگو

لڑن ویلے کڈھ دے نیں۔ فیر قاؤو شیموں دے نک تے پوہلے نال اپنا سر ماردا اے۔

شیموں لما جیہا ساہ لے کے اپنا سر ہلاؤندا اکھاں میچدا اے تے دھرم زمین تے ڈگ پیندا

اے۔ پھر اٹھ کے نجن لگ پیندا اے۔ کڑیاں پٹاں تے ہتھ مار کے ہس دیاں نیں تے ہس

ہس کے حالو بے حال ہوندیاں نیں۔ بندے وی اوہناں نال رل جاندے نیں۔

”لو بنی جوانو۔ تسیں ذرا کچھے کچھے ہٹ جاؤ۔ تسیں ہن جلیبیاں دے فرنٹ تے

چان ماری شروع کر دیو۔ فکر ناہیں۔ دکاندارا! سٹ دے پنچے چھوے چھابے جلیبیاں

دے۔“ فوجی رستم خاں کہندی اے۔

”تے اخیر تے سنڈھا ٹالھی تھلیوں کھول کے دکان تے بنھ لئیں۔ پیسے ساڈے

کولوں پورے نہیں نکلنے۔“ قاؤو ہس کے کہندی اے تے اوہدے نال سارے ای ہسن لگ

پیندے نیں۔

”بھاگ لگے رہن۔ جلیبیاں اینیاں کھالیاں نیں پئی رات نیندر نہیں پینی۔“ دینا

مراٹھی لماں کوڈکار مار کے کہندی اے۔

”بھنگ دی پیالی چاڑھ لیں۔ بڑی ہاضم ہوندی اے۔“ سلکھن سنگھ مشورہ دیندا اے۔
 گڑیاں ہسدیاں ہوئیاں کھیس تے آ بہندیاں نیں تے مرد اٹھ کے پرانہ جا
 کھلوندے نیں۔ شیموں، صُغی، پرتیو تے دوجیاں گڑیاں ول گوہ نال تک رہیا اے تے
 مٹھا لگیاں اُنکیاں چٹ رہیا اے۔ فوجی اپنی ڈب وچوں نوٹاں وی تھسبی کڈھ کے گئے
 بغیر دکاندار نوں دیندا اے تے کہندا اے۔

”گن لے جوانا۔ گھاٹا وادھا گڑی صغراں پورا کرے گی۔ فکر ناہیں۔“
 ”چاچا۔ توں رہن دے۔ میں ای سارے پیسے دے دیاں گا۔“ اوہ کہندی اے۔
 ”نہیں کا کو۔ توں کیوں پیسے دیویں۔ میں جو جیونا واں۔“
 ”چلو پئی مجیدے نوں وی اوہدے ہتھے دیاں جلیبیاں دے آئے۔ فیر آ کے میلہ
 ویکھنے آں۔“ قادو کہندا اے۔

”پتا نہیں باپو۔ مولوی اکبر تے تایا مراد خاں کتھے نیں۔ سلکھن سنگھ پچھدا اے۔
 ”ویر! اوہ بانی سُنن گوردوارے ول گئے سن۔ اوہ تھے ہون گے۔“ پرتیو کہندی اے۔
 ”ہلا۔ تسیں دکان تے بیٹھو اسیں جئے آں۔“ سلکھن سنگھ کہندا اے۔
 ”ہلا ویر۔“

”پئی میں وی چلیا واں بانی سُنن۔ مینوں وی چھٹی دیو۔“ چرن سنگھ کہندا اے۔
 ”ہلا چاچا۔“ سلکھن سنگھ کہندا اے تے اوہ سارے سوائے چرن سنگھ دے ٹالھی ول
 تَر پیندے نیں۔

جد قادو، سلکھن سنگھ تے دوجے مُنڈے واپس ڈانگ سوٹیاں نال تیار ہو کے واپس
 پرتے تے حلوائی دی دکان دے آ لے دوالے بھیڑ لگی ہوئی سی۔
 ”قادرا۔ چنگا ہو یا اسیں ٹالھی تھلیوں مجیدے کولوں سوٹے لے کے آئے آں۔
 حلوائی دی دکان تے گڑ بڑ جاپدی اے۔“ سلکھن سنگھ نے فکر مندی نال کہیا۔
 ”مئے پتا لگ جاندا اے۔ معاملہ کیہ اے؟“ قادو نے کہیا تے اگانہ ودھ کے بھیڑ
 وچ جا وڑیا۔ باقی اوہدے پچھے ہو گئے۔

”جلیبیاں دے پیسے میں دیاں گا ایہہ نہیں دین گیا۔“ پنے دے ہتھ وچ نوٹ سَن۔

آواز وچ کنہنی تے ساہ وچ شراب دی بو۔

”ایہناں دے پیسے رستم خاں صاحب دے گئے نیں جی۔“ دکاندار ڈرنال کنب

رہیا سی۔

جس ویلے قادو کھونڈ پھڑ کے پینے دے سامنے ہو یا تے تماشہ دیکھن والے چار چار
گروں پچھے ہٹ گئے۔ ہُن اک پڑ جیہا بن گیا جیہدے وچ حلوائی دی دکان۔ کڑیاں، ہینا
تے اوگرے دے مُنڈے (جیہناں دے ہتھاں وچ ڈانگاں تے کرپاناں سُن) تے قادو
کھلوتے ہوئے سُن۔

”ہینا! توں کیوں پیسے دے رہیا ایس؟“ قادو نے پچھیا۔

”اوئے میں نہیں دے رہیا۔ سردار کرپا سنگھ دے رہیا اے۔“ پینے نے بانہہ ہلا کے کہیا

تے اوہدے مونہہ وچوں روڑی مار کہ شراب دی بو والا ساہ قادو دیاں ناساں وچ وڑ گیا۔

”سردار کرپا سنگھ آپ آن کے کیوں نہیں پیسے دیندا۔“ قادو نے غصے تے ضبط

کردیاں ہوئیاں کہیا۔

”اوئے اوہدے تے میرے وچ کیہ فرق اے؟“

”ٹوں ساہنی ایس تے اوہ سکھ اے۔ ایہہ فرق اے۔ اوہدی جگہ ساڈی منجی دے

سرہانے ول اے تے تیری جگہ ساڈیاں جتیاں وچ۔ ایہہ فرق اے۔“

”اوئے کتیا پٹھانا۔ توں میرے مونہہ آؤنا ایس۔“ پینے دی گالی اے مونہہ وچوں نکلی

نہیں سی تے قادو نے اوہدے گل وچ ہتھ دے کے اوہنوں پچھے کھلوتے سکھ مُنڈیاں تے

سُٹیا۔ ہینا ڈگدا ڈگدا پیریں کھلو گیا تے تہی لَت اگانہہ ودھا کے اوہنے نکوے نال قادو تے

وار کیتا۔ قادو چھیتی نال لاپنے ہو گیا تے پینے دا نکو پولی مٹی والی زمین وچ دھس گیا۔ قادو

نے اُلا ر کے کھونڈ ماریا تے پینے دیاں دوویں بانہواں کڑک کر کے کہنیاں توں اُتے کر کے

ٹُٹ گیاں تے ہینا نکوے تے مونہہ بھار ڈگ پیا۔ قادو نے دوجی واری کھونڈ سکھ

مُنڈیاں ول اُلا ریا پر اوہ پچھاں نس گئے۔ اوہو کھونڈ پینے دے موہراں وچ پیا۔ کرپا سنگھ

ٹالھی دے پچھوں کرپان کھج کے گولی وانگ قادو ول نسا پر سلکھن سنگھ چھال مار کے دوواں

دے وچکار آ گیا۔

”ہٹ جا سگھن سیہاں“ ایہہ کرپا سگھ دی آواز سی جیہڑا سگھن سگھ دے جتھے
وچوں نکلن دا جتن کر رہیا سی۔

”سگھنا! آؤن دے کرپا سگھ نوں۔“ قادو غصے وچ بولیا۔

سگھن سگھ نے اپنا چہا کھول دتا۔ قادو نے کھونڈ سٹ کے چھیتی نال اپنا کھا ہتھ
کرپا سگھ دی بجی بنی نوں پایا (جیہدے وچ اوہنے کرپان پھڑی ہوئی سی) تے سچے ہتھ دی
مٹھ کس کے اوہدی ٹھوڈی تھلے ہورا ماریا۔ کرپان ہتھوں چھٹ گئی تے کرپا سگھ اپنے آپ
نوں سنبھالدا چار پنج قدم پچھے جا ڈگیا۔

اینے چر وچ سردار ہرنام سگھ۔ چرن سگھ۔ مراد خاں تے مولوی اکبر قادو تے کرپا
سگھ دے وچکار آکھلوتے۔ کرپا سگھ پگڑی سنبھالدا کرپا نوں بغیر بھیڑ وچ پرت گیا۔

(7)

اوسے دن ای شام نوں فرید پور دے منڈے گڑیاں تے سیانے پنڈ پرت
آئے۔ اوگرے دے لبانے پینے نوں سہکدیاں ہویاں منجی تے پا کے لے گئے۔ لمی پوڑی
گل نہ ودھی کیوں جے لوکاں دا خیال سی ساہسی جمدے ای ایسے واسطے نیں کہ اوہناں
دیاں لٹاں بانہواں ٹکدیاں جڑدیاں رہن۔

رستے وچ مولوی اکبر قادو تے غصے راضی ہو یا پر صُغی تے پرتیو نے اوہنوں ایہہ کہہ
کے ٹھنڈا کیتا کہ جے قادو موقعے تے نہ آجاندا تے پینے نے لوکاں سامنے اوہناں دی بے
عزتی کرنی سی۔ سردار ہرنام سگھ نے قادو نوں تھاپنا دتی کہ اوہ پینے وگے سورے اگے
ڈٹ کے کھلوتا تے اوہدی گالھ دا جواب ٹھک دا دتا۔ مراد خاں وی خوش سی کہ فرید پور دا
سندھاتے قادو میدان مار کے آئے نیں۔ مولو کبابیا چپ چان سی۔ دینا مراٹی اے تیک
مٹھے مٹھے ڈکار مار رہیا سی۔ تے شیموں سندھے تے بیٹھا پپنی و جا رہیا سی۔

دو جے دن سورج دی ٹکی نکلن توں پہلاں کسے نے قادو دا گنڈا کھڑکایا۔ قادو دی
ماں روڑی تے بوہا کھولیا۔ سردار ہرنام سگھ دا کاما دلہ ر سگھ تے الی ماچھی سن۔

پنڈ وچ مشہور سی پئی دلہ ر سگھ دے سینے وچ چڑی دا دل اے کہ اوہ بہت ڈراکل

بندہ اے۔ آلی ماچھی ٹٹیاں بانہواں لتاں جوڑن دا کاریگری۔ اوہنے ایہہ کاریگری اپنے پیو کولوں سیکھی ہوئی سی۔

مائی روڑی دوواں نوں اندر لے گئی۔ قاؤو جگ پیا سی۔ اوہنے دوواں نوں کول ڈٹھی ہوئی منجی تے بٹھایا تے مائی روڑی اوہناں لئی دہیں دے چھئے لے آئی تے کول بہہ گئی۔
 ”سویرے سویرے کیویں سچھے دلدر سیہاں۔“ قاؤو نے چکھیا۔

”واہگرو دی سونہ۔ بڑی جروری گل کرن آئے آں اسیں دوویں۔ کیوں آلی۔“
 دلدر سنگھ نے آلی نوں آرک مار کے چکھیا۔

”آہو۔ آہو۔“ آلی ماچھی نے دہیں دا چھٹا سنبھال دیاں ہویاں کہیا۔
 ”کیہ جروری گل اے۔“ قاؤو نے دلچسپی نال کہیا۔

”اسیں دوویں ساری رات اوگرے کٹ کے ہئے ہئے آئے ہاں۔“ دلدر سنگھ بولیا۔
 ”کیہ کرن گئے سی اوگرے؟“

”مینوں تے ترکالاں ویلے وڈے سردار ہوراں دھڑی گھیو ولٹوئی وچ پا کے دتا تے کہیا کہ ایہہ گھیو پینے واسطے اوگرے لے جا کیوں جے قاؤو نے اوہدی کھتی سچی بانہہ کوکیاں والا کھونڈ مار کے توڑ دتی اے۔ سردار ہوراں نے مینوں پندراں روپے وی دتے کہ ایہہ پینے نوں دے کے کہنا کہ اوہ ایہناں روپیاں دی ٹکڑائی والی شے کھاوے۔ تے نالے ایہہ وی کہیا کہ کلونت کور نوں کہنا کہ پکس ٹھانے نہ جاوے سٹ پیٹ لگدی رہندی اے۔“
 گل مُکا کے دلدر سنگھ ڈیکوڈ یک دہیں پین لگ پیا۔

”ہلائی آلی۔ توں کیہ کرن گیا سی؟“ قاؤو نے آلی کولوں چکھیا۔

”مینوں خاں صاحب نے بھیجا سی کہ میں جا کے پینے دیاں بانہواں چاڑھ آواں تے پنڈے تے مالش کر آواں۔“ گل کر کے آلی ماچھی وی دہیں پین لگ پیا۔
 ”دلدر سنگھ دہیں پی بیٹھا سی۔ چھٹا منجی تھلے ریڑھ کے بولیا۔

”آلی تے ڈنگراں والے اندر پینے نوں مالش کردا رہیا پر میں بیٹھک وچ بیٹھا کرپا سنگھ، ترنجن سنگھ تے دو جیاں دیاں گلاں سُندا رہیا۔“
 ”ہلا۔ کیہ گلاں کردے سن اوہ؟“

”واہگرو دی سونہ اوہ تیتھوں بہت ڈر گئے نیں۔ تھر تھر کنبہ لے نیں۔ پر اوہناں

نوں تیرے تے غصہ وی بہت اے۔“

”پچھا! پر میرے تے غصہ کیوں اے دلہر سیہاں؟“

”توں پہلاں کرپا سنگھ نوں شاہ سکندر دے میلے تے ماریا۔ فیر ہُن چٹی دے میلے

تے پنے دیاں بانہواں توڑیاں تے کرپا سیہاں دی بے عزتی خراب کیتی۔“

”دلہر سیہاں۔ اوہ عزت والے کم کرن تے عزت کروان۔ کیوں پٹھی چٹکی ہوئی اے۔“

”گل تے تیرے والی ٹھیک اے۔ پر ہوڑ مار تے بے نقوف جو ہوئے۔ ہُن اوہ

تیرے نال وسا کھی دے میلے تے لڑن گے۔“

”وسا کھی کبھڑی دُور اے۔ ویکھ لواں گے لڑ دے نیں یاں مار کھاندے نیں۔“

”اوہ کبھندے سن لام لگی ہوئی اے۔ قادونوں وڈھ کے لام وچ بھرتی ہو جاواں

گے۔ کبھڑا کسے نے پچھنا ایں۔

”ایہہ گل کون کہندا سی؟“

”کرپا سیہاں۔ ہور کون؟ پئی توں اوہدی ٹھوڈی تے ہُورا جو پریتو دے سامنے ماریا سی

تے اوہ ڈگ پیاسی۔ بھلا ویاہ ہون دے پچھوں کرپا سنگھ دا رعب پریتو تے کیویں پوے گا؟“

”پریتو اُتے رعب پان دی گل سی تے مینوں کرپا سنگھ پہلاں دَسدا۔ پریتو دے

سامنے اوہدے کولوں میں ہُورا کھالیندا۔“

”واہگرو دی سونہ۔ محول نہیں۔ ہُن کرپا سنگھ دا پریتو تے کدے رعب نہیں جمنّا۔“

”پئی ایہہ گل اے تے اسیں وسا کھی دے میلے تے پریتو دے سامنے کرپا سنگھ کولاں

مار کھالواں گے۔ پر کرپا سنگھ آپ کہوے تاں۔ نہیں تے نہیں۔“

مائی روڑی چھنے لے کے ڈھارے وچ چلی گئی جتھے اوس بڑکنا پایا ہویا سی۔ دلہر

سنگھ نے کھتے سچے اگھ پُرا کے ویکھیا تے ہولی جیہی بولیا۔

”جے توں قادر سکھ ہوندا تے پریتو نے اپنے باپو نال لڑ کے تیرے نال ویاہ کرا

لینا سی۔ اوہدے اُتے تیرا بہت رعب اے۔“

”گلاں تینوں بہت آوندیاں نیں دلہر سیہاں پر تینوں کیویں پتا اے کہ اوہنے

میرے نال اپنے باپوتوں اک واگی ہو کے ویاہ کرا لینا سی؟“

”بس میرا گویڑا اے۔ میرا دل جو کہندا اے۔“

”اپنے دل دی بھلی کہی۔ ساڈا ویاہ شیاہ کتے نہیں ہونا دلدر سیہاں۔ تیرے وانگ

میں وی کواریاں ای پیا پھرنا ایں۔

”صغی جو ہیگی اے“ آلی نے اپنی لمی چپ توڑی۔

”انے مردہ بولے گاتے کفن پاڑے گا۔ اوئے آلی۔ کتھے رام رام کتھے ٹیں ٹیں۔

ویاہ ہوسکدا سی جے میرا پیو جیوندا ہوندا۔ ویاہ ہوسکدا سی جے میری زمین ہوندی۔ ویاہ

ہوسکدا سی جے میں مراد خاں دا کاما نہ ہوندا۔ میرا پیو جیوندا نہیں ہوسکدا۔ میری زمین

مینوں واپس نہیں مل سکدی کیوں جے بیج ہوگئی۔ تے دُنیا تے دوجا مہینوال نہیں جم سکدا

کہ ڈنگر چارن دے بعد سوہنی نال ویاہ وی کرے۔“

”واہگرو دی سوہنہ۔ صغی نال تیرا ویاہ ہوسکدا اے۔ جے ہونا ہووے تے۔“ دلدر

سنگھ دی گل سُن کے قادو زور نال ہسیا۔ اوہدا حالی ہاسا نہیں سی مگّا تے اوہدی بے بے دی

آواز ڈھارے وچوں آئی۔

”وے کا کا شرم کر۔ کیہ کنجراں وانگ ہسنا پیا ایں۔“

”نہیں بے بے کوئی گل نہیں۔ میں دلدر سنگھ دی گل توں ہسیا واں۔“

دلدر سنگھ تے آلی منجی توں اٹھ کھلوتے۔

”چلیئے یار۔ ساری رات جاگ کے کدھی اے۔ اساں کہیا کہ اپنے یارنوں گل

بات سناندے جائے تے وہیں پیندے جائے۔ واہگرو دی سوہنہ بڑا مزہ آیا دیں دا۔“

”واہگرو دی سوہنہ۔ مینوں تیریاں گلّاں دا بڑا مزہ آیا اے۔“

قادو وی اٹھ کے اوہناں نال تڑپیا۔

(8)

جٹا آئی او وسا کھی
جٹا آئی او وسا کھی
جٹا آئی او وسا کھی
جٹا آئی او وسا کھی

پو نہہ کوٹاں توں وسا کھی دے آؤن دیاں واہراں نیں۔ ترکالاں ویلے پنڈو پنڈ
بھنگڑے دے ڈھول و جے شروع ہوندے نیں تے رات ٹھڈی تیک وجدے رہندے
نیں۔ وسا کھی فصلاں پلن دا میلہ۔ جدھر نظر مارو کنک دے سیوے رنگے سٹے ہلوانے تے
بھوانٹیاں لیندے نظر آؤندے نیں۔ ایہہ سٹے ہالیاں دے مضبوط ہتھاں دی سچی کار دا
پھل نیں۔ جس دھرتی وچ اوہناں دا مڑھکا ڈلھیا اوس دھرتی وچوں پانی پی کے ایہہ
فصلاں جوان ہوئیاں نیں۔ جس مٹی وچ اوہناں اپنی جند رولی اے اوس مٹی وچوں اوہناں
دیاں سدھراں دا بی پھل پھلایا اے۔ اپنی کیتی کتری دا مل پیندا ویکھ کے جٹ پھلایا نہیں
سامندا۔ زمین توں اُریا پھر دا اے۔

واڈھیاں دُور نہیں۔ نیڑے نیں۔ واڈھیاں پین گیاں۔ ٹیاراں تے پر بھانیاں
نچدیاں گوندیاں چھاہ ویلا لے کے آؤن گیاں۔ پو لے تے بھریاں بھجن گیاں۔ سٹے چنے
جان گے۔ مرلیاں لگن گیاں۔ گاہ پین گے۔ دھڑاں اُسن گیاں۔ نپائی ہووے گی۔ راکھ
پٹھن گے۔ پداں وچ مایے، ڈھولے ٹپے گائے جان گے۔ بوہل جوکھے جان گے۔ دانے
کوٹھیاں تے بھڑولیاں وچ آؤن گے۔ گجھ کھان لئی رکھے جان گے۔ باقی وکن گے۔ پیسے
پٹے ہون گے۔ ہار، بند، پازیاں، بگتیاں، ٹکا، دُونی، کنگن، چھڑ کنگن، نتھ، لونگ، گوکھڑو۔ عطر
پھلیل تے سک سرمہ خریدیا جاوے گا۔ وسوں تے نکھار آوے گا۔ حیاتی پنکرے گی۔ رُوح
جاگے گی۔ وسا کھی اکھی نہیں آئی۔ جٹاں زمینداراں لئی زندگی دا سندیسہ لے کے آئی اے۔
بل واہن والے نوں وی احساس اے کہ اوہدی فصل..... تے انج اوہدی محنت.....
جوان ہوگئی اے۔ ایہہ احساس اوہدیاں بولیاں وچ اے۔

بارھیں برسیں کھٹن گیا تے کھٹ کے لیاندی گانی
 اساں دیاں فصلاں تے، کہی سوئی آئی جوانی
 اساں دیاں فلاں تے
 بارھیں برسیں کھٹن گیا تے کھٹ کے لیاندی سوئی
 اپنیاں زمیناں چوں، جٹا چن لے ہیرے موتی
 اپنیاں زمیناں توں

فصل پکّن دا موسم شرارتاں، شوخیاں، مسخریاں تے چوہلاں دا موسم وی اے۔ دیور
 بھابیاں نوں چھیڑ دے نیں تے روائتی محبوب نوں مخول کر دے نیں۔
 بارھیں برسیں کھٹن گیا تے کھٹ کے لیایا سردے
 بھابو تیرے بند نہ بنے مُنڈے مر گئے کمائیاں کر دے
 بھابو تیرے بند نہ بنے
 بارھیں برسیں کھٹن گیا تے کھٹ کے لیایا جھاواں
 کندھاں وچ رکھ مورییاں تینوں دُڈھ دا گلاس پھڑاواں
 کندھاں وچ رکھ مورییاں
 بارھویں برسیں کھٹن گیا تے کھٹ کے لیایا جوں
 متھے یار دے نہ لگیا جاوے جھوٹھی پے گئی وچناں توں
 متھے یار دے نہ لگیا جاوے
 بارھیں برسیں کھٹن گیا تے کھٹ کے لیایا پھپھڑے
 مُنگے تھمیاں نال پراندے، جیہناں دے راتیں یار وچھڑے
 مُنگے تھمیاں نال پراندے

جے گبھرو پنڈوں باہر گھنگرو پیریں پا کے سداں سُرّاں ہیکاں لاؤندے نیں تے
 اوہناں دناں وچ پنڈ دیاں کڑیاں کٹھیاں ہو کے گدا پاؤندیاں نیں نچدیاں نیں تے
 گوندیاں نیں:

بولی پاواں شلن مناواں

بولی دے دن آئے

شام جی کتھے کُو ڈیرے لائے

شام جی کتھے کُو ڈیرے لائے

فرید پور۔ خان پور۔ اوگرے تے دو جے پنڈاں دے لوک کنڈل پور وسا کھی ویکھن
جان دے نیں۔ فرید پور دا اپنا بھنگڑا نہیں ہوندا۔ ہاں خان پور تے اوگرے دا علیحدہ علیحدہ
بھنگڑا ہوندا اے۔ مولوی اکبر۔ سردار ہرنام سنگھ تے مراد خاں دا خیال اے کہ بھنگڑا نچدا
آدمی بے رعب لگدا اے۔ پر ایہدے باوجود مُنڈے یا تے خان پور دے بھنگڑے وچ جا
شامل ہوندے نیں تے یا اوگرے دے بھنگڑے وچ۔ پرانے گڑ تے ککراں دے سکڑاں
نوں روڑی وچ دب کے شراب تیار کیتی جاندی اے۔ فیر چھنیاں تے گلاساں وچ پا کے
ڈیکو ڈیک سنگھوں پٹھاں سُٹی جاندی اے۔ سکھاں دے سارے ایانے سیانے شراب
پیندے نیں پر پٹھاناں وچ کوئی کوئی۔ مراد خاں شراب نہیں پیندا۔ پر ہرنام سنگھ جے کتے
گلاس وچ تھوڑی جیہی پا دیوے تے انکار وی نہیں کر سکدا۔ اوہدا خیال اے انج ہرنام
سنگھ دا دل ٹٹ جائے گا۔ مولو کہایا تے آینی پیندا اے کہ مونہہ وچوں جھگ نکلیں لگ
پیندی اے۔ قادیونے اے تیک شراب نہیں پیتی۔ اوہوں شراب دتی وی جاوے تے اوہ
ایہہ کہہ کے شراب پین توں نانہہ کر دیندا اے کہ ایہہ حرام شے اے۔ ایہو گل اے کہ
مولوی اکبر قادیونے ہمیش خوش رہندا اے۔ دینا مرانی تے اوہدا وڈا مُنڈا فیروز وی مونہہ مار
لیندے نیں۔ ایہو حال مجیدے جولاء دا اے۔ شراب عام طور تے تلسی داس دے گھر تیار
ہوندی اے۔ شانتی اوہناں دناں وچ بناری دے گھر آ جاندی اے جیہناں دناں وچ
اوہدے گھر شراب دی بھٹی کھلدی اے۔ فرید پور دے لوکاں نوں ناجائز شراب تیار کرن
دا ڈر خوف نہیں۔ کیوں جے پکس نوں مراد خاں تے ہرنام سنگھ سنبھال لیندے نیں۔

وسا کھی کنڈل پور دے سبھ توں وڈے باغ وچ لگی ہوئی اے۔ ایہہ امباں دا باغ
اے۔ باغ دے وچکار گوردوارہ اے تے گوردوارے دے چار چوہیرے کوئی چالی بھنگڑے
پے رہے نیں۔ ڈھولاں دی گڑ گج وچ کن پئی آواز سنائی نہیں دیندی۔ کئی شرابیے پیلیاں
دے بے مودھے پئے ہوئے نیں۔ سکھاں دے کیس کھلے نیں تے انج جاپدا اے جیویں

سارے موت ناچ وچ شامل ہون آئے نیں۔ ہر پاسیوں ہیکاں ای ہیکاں لگ رہیاں نیں۔ سمجھ نہیں آؤندی کیہڑی ہیک سُنے تے کیہڑی نہ سُنے۔ سارا میلہ افراتفری تے ہول توائی وچ گم اے۔ ایانے چیک رہے نیں۔ ماواں کھپ پا رہیاں نیں۔ پیو ہوش حواس گوائی بیٹھے نیں۔ پتر کٹاں تے ہتھ رکھ کے تان سین بنے ہوئے نیں۔ دھیاں ہرنیاں وانگوں سیلیں باگیں چڑھیاں ہوئیاں نیں۔ ایہہ اک سکھ بابا جیہدی عمر ستر سال توں گھٹ نہ ہووے گی کلا ای اکل انجے بھنگڑا پا رہیا اے۔ اوہنے وی کوئی تَبکا کوپی لئی لبھدی اے۔ پتا نہیں ایہہ پلس دا سپاہی کدھر نسا جا رہیا اے۔ خبرے کتے لڑائی ہوگئی اے۔ دُور اک امب تھلے اک جوان کڑی تے اک جوان مُنڈا ہس ہس کے گلاں کر رہے نیں۔ دوواں دے نک جڑے ہوئے نیں تے دوویں سکھ جاپدے نیں۔

ایہہ لَو۔ صُغی، پرتو تے اوہناں دیاں سہیلیاں وی آسکئیاں نیں۔ ساریاں نے دنداسہ ڈھیر سارا ملیا ہویا اے تے رنگ چوکھا چڑھیا اے۔ ساریاں نچے جیسے امب تھلے کھلو گئیاں نیں۔ اک بھنگڑا امب دے نیڑے آ رہیا اے۔ ایہہ تے خان پور دا بھنگڑا اے تے فرید پور دے لگ بھگ سارے مُنڈے بھنگڑے وچ نیں۔

پرتو۔ ”اوہ ویکھ، تیرے ویر گور بچن سنگھ تے سلکھن سنگھ۔“

”آہو اڑیے۔ کئے سوہنے لگدے نیں بھنگڑا پوندے۔“

”اوہ ویکھ فیروز۔ دُلا۔ مجیدا۔ بنارسی تے شیموں۔ ہائے فی شیموں ول ویکھ کتا سوہنا

لگدا اے۔ اوہا پیو اپنے پتر نوں بھنگڑا پاؤندیاں ویکھ کے کتا خوش ہوندا اے۔“

صُغی۔ ”قاؤ ونہیں لبھدا بھنگڑے وچ۔“

”اوہ نہیں بھنگڑا پاؤندا ہوندا۔“

”پر صُغی۔ اوہ گھونڈ کیہدا اے۔ اوہ تے قاؤ دا اے۔ آہو قاؤ دا اے۔“

”دفع۔ ایہہ فیر گھونڈ لے کے آ گیا اے۔“

”پر صُغی۔ ویکھ قاؤ نے ٹھاٹھا کیوں بنھیا ہویا اے۔“

”پرتو پگڑی ویکھ تے پگڑی دا شملہ ویکھ۔ پگڑی انج بنھی ہوئی اے جیویں لاٹ

صاحب ہووے۔“

”اوہ اپنے آپ نوں لاٹ صاحب ای سمجھدا اے۔“

”پریتو۔ تیرا بھرا سلکھن سنگھ سد لاؤن لگا ای۔ اوہنے اپنا سجا ہتھ کن تے رکھ لیا اے۔“

وگدی راوی وچ سُٹیا پاوا

رن فقیر دی جٹ کردا دعویٰ

ایہہ اوہنے نہیں چھڈ فی بھاویں بولد وک جائے ساوا

ڈھول والیا اوئے

”ویکھیا ای صغیے۔ میرے ویر نے کتنی چنگی سد لائی اے۔“

”آہو پریتو۔ لے ہُن قاؤ نے وی کن تے ہتھ رکھ لیا ای۔ ایہہ وی سد لائے گا۔“

”آہو۔ اوہنے کھتا ہتھ کن تے رکھیا اے تے تے ہتھ وچ گھونڈ پھڑ کے اوہنوں

سروں اتانہہ اُلا ریا اے۔“

”پریتو سن کیہ کہندا اے بھلا۔“

بارھیں تاں برسیں فی شاہو کھٹ گھر آیا

کھٹ کے لیا یا تاں پنج دھیلے

پہلے تاں دھیلے دی میں کنک منگائی

کچھ شاہو دیاں پھلکیاں نوں رہندی کوٹھی چہ پائی

دو جے تاں دھیلے دا میں گھیو منگایا

کچھ شاہو دیاں پھلکیاں نوں رہندا کپیاں چہ پایا

تیجے دھیلے دا میں تیل منگایا

کچھ شاہو دے گردے رہندا شیشی چہ پایا

چوتھے تاں دھیلے دا میں عطر منگایا

کچھ شاہو دے جوڑے نوں رہندا زلفاں نوں لایا

بنجویں دھیلے دے میں پھل منگائے

کچھ شاہو دی مسیجے رہندے کتاں چہ پائے

اندرتاں وڑ کے شاہو منگدا فی لیکھا

گورے! اک دھیلے دامینوں پیندا ای بھلیکھا
 کوٹھے تے چڑھ کے شاہو دیندا ای دُہائی
 لوکو! باراں تاں برساں دی کھٹی میری رن گوائی
 ڈھول والیا جوانا او او او او

”ہائے میں مر گئی۔ پریتو! ایہہ ایہنے کیہو جیہی سد لائی اے۔“
 ”گروے۔ ایہہ سد تینوں سنائی اے قادو نے۔“
 ”نی جازد ہو۔ مینوں سنائی اے۔ میرا کیہ اوہ لگدا اے؟“
 ”سانوں کیہ پتا؟ تینوں پتا ہووے گا جیہنوں اوہ سداں سنا رہیا اے۔“
 ”پریتو۔ ایہ اتھے ای میل بن کے کدے گئے نیں۔ اگے چکھے ہوندے ای نہیں۔“
 ”تاں کیہ.....؟ سنی چل سداں تے ویکھی چل بھنگڑا۔ تیرے پٹھاناں دا بھنگڑا اے۔“
 ”وچ سکھ وی تے ہے نیں ناں۔“
 ”اوہ وی ایس ویلے پٹھان بنے ہوئے نیں صغیے۔“
 ”لے سُن۔ قادو فیر لگا ہیک لاؤن۔“

شیشی بھری شراب دی جیہڑی نتری وانگ کپور
 مینوں سستی نوں ون چڑھ گیا میں کھیڈن جانا دُور
 میں کھیڈاں نال سہیلیاں میری اکھیں پے گئی دُھوڑ
 میرے پلے پیسہ اک نہ، میں لنگھنا پہلے پُور
 توں بوہڑاوے ربا سچیا میرے عشق دی منزل دُور
 ڈھول والیا جوانا او او او او او

”بکئے ہُن دس! ہُن تے اوہنے صاف کہہ دتا اے میری منزل دور۔“
 ”پریتو مخول نہ کرا یو پس۔“
 ”بلو ایویں نہیں سچی جچی۔“
 ”نی ہولی بول مر جائیے۔ گڑیاں نہ سُن لین۔“
 ”گڑیاں نوں اپنی ہوش کدوں اے جیہڑی گل ساڈی سُنن گیاں۔“

”تے تڑ پیا ای بھنگڑا اگانہہ نوں۔ پریتو۔ داری نوں بھیج کے قادونوں بُلا۔“

”کیہ کہنا اے بُلا کے؟“

”توں بُلا تے سہی۔ ذرا اوہدے تے رعب پاؤنے آں۔“

”اوہ تے پہلے ای تیرے حُسن دے رعب تھلے اے ٹیارے۔“

”مخول چھڈ پریتو۔ بُلا سُو۔ نہیں تے اوہنے دور چلا جانا ایں۔“

”بُلا، بُلا نی آں۔ داری۔ نی داریے۔ جا میری بھین دوڑ کے۔ قادونوں کہہ پریتو

بلاؤندی اے۔“

”ہچھا جانی آں“ کہہ کے داری دوڑی دوڑی گئی تے قادونوں بُلا لیا ئی۔

”کیہ گل اے پریتم کورے؟“ قادو نے ٹھاٹھا کھول دیاں ہویاں کچھیا۔

”صُغی تیرے نال گل کرنا چاہندی اے۔“ پریتو نے صُغی ول اشارہ کیتا۔

”کیہ گل اے صُغیے؟ مینوں بُلا یا ای۔“

”توں سانوں اتھے ویکھ کے پھٹیاں سدھیاں سدّاں کیوں لاؤن لگ پیا سی۔“

”مینوں تے نہیں سی پتا پئی تسیں اتھے کھلوتیاں ہوئیاں او۔ جے مینوں پتا ہوندا تے

میں کدے سد نہ لاؤندا۔ مینوں ایمان نال پتا نہیں سی۔“

”ایویں جھوٹیاں قسماں نہ چک۔“ صُغی نے ایویں کیویں دے غصے نال کہیا۔“

”رب گواہ اے مینوں نہیں سی پتا پئی تسیں اتھے کھلوتیاں ہوئیاں او۔“

”سانوں ساریاں نوں تیرے تے بہت غصہ اے۔“

”مینوں آپ اپنے تے اُمسوس اے۔ پرہن میں کیہ کر سکنا واں۔ جو ہونا سی ہو گیا۔“

”توں ایہناں ساریاں کڑیاں نوں مٹھیا ئی کھواتاں تینوں معاف کیتا جاوے گا۔“

”میں ضرور“ مٹھیا ئی کھلاؤندا اپنیاں بیبیاں بھیناں نوں۔ پر میرے کول تے اک پیسہ نہیں۔“

”میرے پیو کولوں منگ لیندا۔“

”منگے سن پرتایا کہن لگا پیسے سارے صُغی کول نیں۔ میں چُپ کر رہیا۔“

”پیسے تے جچی مچی سارے میرے کول نیں۔ توں میتھوں منگ لیندو۔“

”تیتھوں منگدا میں چنگا نہیں ساں لگدا۔“

”ہنچھا میں تیرے وتوں ایہناں ساریاں نوں مٹھیاکی کھلا دیاں گی تے توں میتھوں اپنے حصے دے پیسے لے لے۔“

”بالکل نہیں۔ مینوں پسیاں دی کوئی لوڑ نہیں۔ جے ہوئی تے میں فوجی کولوں لے لوں گا۔ تساں اتھے ای رہنا۔ بھیر وچ نہ وڑنا۔ کئی لُچے لفنگے پئے پھر دے نیں۔“ قاؤو نے کہیا تے میلے وچ جا وڑیا۔

صغی نے داری نوں پیسے دتے تے ساریاں کڑیاں نوں اوہدے نال مٹھیاکی خریدن بھیج دتا سوائے پریتو دے۔

”گروئے۔ ایس منڈے نے تیرے قابو نہیں آؤنا بھاویں توں حُسن دے چمکارے مارے تے بھاویں دولتاں دکھا۔“

مینوں کیہ لوڑ اے پریتو ایہنوں قابو کرن دی۔ میں تے ویاہ ای نہیں کرانا۔ کَلّے پیو دی کَلّی دھی آں۔ مرن تیکر پیو دی جائیداد تے عیش کراں گی۔“

”وکیہ لوں گے۔ اسیں وی تے اتھے ای نا۔“

”نی پریتو۔ ایہہ خلقت کدھرنتی جاندی اے۔“

”میرے خیال وچ کتے لڑائی ہو پئی اے۔“

”پر ایدھر تے بُنے داری۔ شیداں تے دوجیاں گڑیاں مٹھیاکی لین گیاں سن۔“

”قاؤو وی اوہناں توں ذرا کو پہلے ایسے پاسے گیا سی۔“

”ایہہ گھوڑی تے چڑھ کے فصلاں ول کون نسیا اے؟“

”ایہہ تے میری بھووا دا پتر لگدا اے۔“

”کون کر پا سگھ؟“

”آہو۔“

”میں سمجھ گئی آں پریتو۔ میں سمجھ گئی آں۔ قاؤونوں ظالماں نے مار سُٹیا اے۔ قاؤونوں۔“

”نہ بھیرگی گل مونہوں کڈھ۔“

”میرا دل کہندا اے پریتو۔ میرا دل کہندا اے۔ یا اللہ توں رحم کریں۔ قاؤونوں کجھ

نہ ہووے۔“

”پلس وی نسی جاندی اے اوس ے پاسے، خلقت پلس نوں ویکھ کے پچھوڑنس پئی اے۔“

پچھوڑنسی خلقت وچوں داری، شیداں تے دوجیاں گڑیاں وی صُغی تے پرتیوول دوڑ کے آئیاں۔ دوواں نے اگانہہ ودھ کے پچھیا کہ کیہ ہونی ورت گئی اے۔ کیہ ہو گیا اے؟

”کرپا سنگھ قادو دے ڈھڈ وچ بلم مار کے نس گیا اے۔ اوہدیاں ساتھیاں تے قادو داسر ڈانگاں مار کے پھیریا اے۔“ داری نے روندیاں ہوئیاں دسیا۔ صُغی کھلوتی ہوئی سی۔ پیراں تے بہہ گئی۔ بہہ کیہ گئی سمجھو ڈگ پئی تے سر تے دوویں ہتھ رکھ لئے۔

”نی داریے! درشن سنگھ تے نال نہیں سی؟“ گھبرائی ہوئی پرتیو نے پچھیا۔

”اوہ قادو دے سر اُتے ڈانگاں ماردا پیاسی تے پلس اپڑ گئی۔ پلس نے اوس نوں پھڑلایا اے۔“ پرتیو وی صُغی دے کول ڈھے پئی۔

فوجی رستم خاں دوڑیا دوڑیا آیا تے بولیا۔

”صُغی، پرتیو، داری، شیداں تسیں فیروز نال پنڈ وگو۔ اسیں قادو دی لوتھ نوں بہرام کوٹ دے ہسپتال لے کے چلے آں۔“

”کاہدے لئی چا چا؟“ داری نے ڈردیاں ڈردیاں پچھیا۔

”کاکی! اوتھے ڈاکدار لوتھ دا معائنہ کرے گاتے پلس دے سپاہیاں نوں دتے گا پئی قادو سر دی سٹ کھا کے مریا یا ڈھڈ دے زخم نال مریا اے۔ ساڈے نال پلس دے دو سپاہی وی چلے نیں۔ تسیں جاؤ پنڈ نوں۔ مائی روڑی نوں آکھنا فکر نہ کرے قادو چنگا بھلا اے۔“

موت دی آواز

(1)

فوجی رستم خاں تے صُغی نے یکہ کرائے تے لیا۔ پلس دا اک حوالدار نال بیٹھاتے اوہ تے قادو دی لوتھ نوں لے کے ترکالاں ویلے بہرام کوٹ دے ہسپتال وچ پہنچے۔ رستے وچ صُغی پھلکاری وچ مونہہ لکو کے روندی رہی۔ فوجی رستم خاں اوس نوں ساری راہ چپ کراؤندا رہیا تے کہندا رہیا۔ ”گڈیئے نہ رو۔ اللہ حیاتی دین والا اے فکر ناہیں۔ جو انان دے سٹاں لگدیاں ہوندیاں نیں۔ حوالدار سکھ سی۔ اوہ ساری راہ چپ رہیا۔ صرف اک وار بولیا کرپا سنگھ نے سکھاں نوں لاج لائی اے۔ اوہ سامنے نہیں آیا تے اوس چوری وار کر کے مرداؤ اپنے دا ثبوت نہیں دتا۔ مراد خاں تے ہر نام سنگھ تھانیدار حاکم خاں دے نال چوکی چلے گئے سُن کیوں جے پلس چرن سنگھ تے درشن سنگھ نوں لائیاں مارن دے الزام وچ گھست کے لے گئی سی۔

یکہ ہسپتال دے احاطے وچ پہنچیا تے سکھ حوالدار اثر کے وارڈ وِل نسیا۔ خوش قسمتی سی کہ ڈاکٹر لہنا سنگھ شام دی گشت تے آیا سی تے ہندو نرس ساوتری اوہدے نال سی۔ فوجی رستم خاں تے صُغی نے قادو نوں بانہواں اُتے پا کے اندر لیا ندا۔ ڈاکٹر نے اک نکر وچ وچھے ہوئے منجے ول اشارہ کیتا کہ زخمی نوں اوتھے لما پا دیو۔

”حوالدار کچھمن سنگھ جی۔ گل کیہ اے۔“ ڈاکٹر لہنا سنگھ نے پچھیا۔

جناب آج وساکی دا میلہ سی۔ اوگرے دے کرپا سنگھ تے ہر نام سنگھ فرید پور یے دے پتر درشن سنگھ نے ایہدے سٹاں ماریاں۔ ایہہ قادو اے۔ خاں صاحب مراد خاں دا

عزیز تے بوٹے خاں دا پتر۔“

”ہچھا ہچھا۔ سمجھ گیا۔ ہر نام سنگھ تے خاں صاحب نہیں آئے؟“ ڈاکٹر نے ہچھکھیا۔

”اوہ جناب۔ تھانیدار صاحب نال چوکی گئے نیں۔“ حوالدار نے دسیا۔

ڈاکٹر نے نبض ویکھی تے اپنا کن قاؤ دیاں ناساں اُتے رکھیا۔

”زندگی موت پالٹھار دے ہتھ وچ اے۔ اصولاً جوان نوں اوّل تے اوس ے ویلے

نہیں تے راہ وچ مرجانا چاہی داسی پر جنا جیوندا اے۔“

”جیوندا اے؟“ صغی، فوجی تے حوالدار دے مونہہ وچوں نکلیا۔ ایس فقرے وچ

حیرانی، خوشی تے معلوم کیہ کیہ سی۔

”ہاں جیوندا اے۔ تے واہرودی کرپا نال جیوندا رہوے گا۔“ ڈاکٹر نے جوش نال کہیا۔

ساوتری دوائیاں لے کے آگئی۔ اک بندہ گرم پانی چُک لیا۔ دوسرے بندے نے ڈھیر

سارا رُوں تے ملل دیاں پٹیاں چکیاں ہوئیاں سُن۔ چوتھے آدمی دے ہتھ وچ لائین سی۔

”تسیں تنے باہر چلے جاؤ۔ جدوں میں بُلاواں اودوں آؤنا۔“ ڈاکٹر نے کہیا تے

حوالدار۔ فوجی تے صغی ہولی ہولی پیر پٹ کے باہر چلے گئے۔

جدوں اوہ واپس کمرے وچ آئے ڈاکٹر لہنا سنگھ خون دھو کے پٹیاں بنھ چُکا سی۔

نرس نے قاؤ دونوں بے ہوشی وچ ای دوائی پلا دتی سی تے ٹیکے وی لگ چُکے سُن۔

”زندگی موت پالٹھار دے ہتھ وچ اے۔ تہاڈے فکر کرن نال ہمار نوں کوئی فائدہ

نہیں ہوئے گا۔ ایس واسطے بے فکر رہو۔ حوالدار جی تسیں چھٹی کرو۔ سویرے آ جانا۔ کاکی

تے کیہ ناں تیرا چودھری؟“

”جی میرا ناں رستم خاں اے۔ لوک مینوں فوجی کیہندے نیں۔“ رستم خاں نے

ادب نال اپنا ناں دسیا۔

”کاکی تے فوجی رستم خاں برانڈے وچ آرام کرن۔ میں بندیاں دی ڈیوٹی لادتی

اے۔ اوہ زخمی دے کول رہن گے۔“

”ہچھا جی۔ مہربانی۔ بڑی کرپا۔“ فوجی نے کہیا۔

”جاؤ فیر باہر برانڈے وچ آرام کرو۔ کل تہا نوں جُدا کرہ دے دیاں گے۔“

جد حوالدار۔ فوجی تے صنعی کمریوں باہر چلے گے تے نرس نے ڈاکٹر نوں ہولی نال کن وچ کہیا۔ ”رات جاگن دا فائدہ تے کوئی نہیں۔ تئیں صاف صاف کیوں نہیں کہہ دیندے کہ ایہدے کفن دفن دا انتظام کرن۔“

”ساوتری انج نہ کہو ایہہ بھیرے لفظ نیں۔ ڈاکٹر نوں امید دا پلہ نہیں چھڈنا چاہی دا۔ ایس جنے دی حیاتی دی بڑی لوڑ اے۔ جے ایہہ مر گیا تے لوک کہن گے سکھ ڈاکٹر سی اوس نے پرواہ نہ کیتی تے زخمی مر گیا۔“

”پرتھاڈی پرواہ نال وی ایسے نہیں جی سکنا۔“ ساوتری کہہ رہی سی۔

”تے کئی ایسے وی کیس ہوندے نیں جیہناں دی پرواہ نہیں کیتی جاندی پر فیرو جیوندے رہندے نیں۔“

”اوہ ایسے سیریس کیس نہیں ہوندے۔“

”تیرا مطلب ایہہ اے کہ ایہہ کیس ایسا خراب ہو گیا اے کہ ساڈی پرواہ دا وی کوئی فائدہ نہ ہووے گا۔ ایس واسطے پرواہ نہ کیتی جائے۔ ہے نا؟“

”جی ہاں۔ میں ایسے طرحاں سمجھنی آں۔“

”جے توں ایس طرحاں سمجھنی ایس ساوتری تے غلط سمجھنی ایں۔ عام لوکاں کول دماغ تے دل ہوندا اے۔ اوہناں دا دل تے دماغ وکھرو وکھرے ہوندے نیں۔ کدے دماغ کم کردا اے تے دل کم نہیں کردا۔ کدے دل کم کردا اے تے دماغ کم نہیں کردا۔ پر ڈاکٹر دا دماغ تے دل دوویں اکو ویلے کم کردے نیں۔ دماغ دوا سوچدا اے تے دل پالنہار دے اگے دعا منگدا اے۔ تے جیہڑا ڈاکٹر ایہناں دوہاں سندراں کولوں کم نہیں لیندا اوس نوں میں ڈاکٹر نہیں سمجھدا۔ میرا دماغ ایس بچے نوں بچاؤن دے حیلے سوچے گاتے جے کسے حیلے وچ کمی رہی تے اوہ میرا دل دعا منگ کے پوری کرے گا۔ ساوتری! سنسار دے پالنہار دے رنگ نیارے نیں۔“

ساوتری بڑھے ڈاکٹر دیاں گلاں سُن کے شرمندی جیہی ہو گئی تے بولی۔ ”پر ماتما تہاڈی دعا پوری کرے۔“

فیرواہ دوویں ہولی ہولی پیر پٹ دے تے سوچدے کمرے وچوں باہر نکل گئے۔

لالین جیہڑے آدمی نے پھڑی ہوئی سی اوس نے قاؤ وول ویکھیا تے فیر ہولی نال اوہدے سرہانے لاگے رکھی میز تے لالین نکا دتی۔ باقی بندے اپنیاں اپنیاں چیزاں چک کے نال والے کمرے ول ٹر پئے۔

رات بیت چلی اے۔ کجھ چر پہلاں ہسپتال دے نالوں دی وگن والی کچی سڑک چوں وی وساکی ویکھ کے آؤن والے لوکاں دیاں گلاں۔ رولا ہاسے۔ کھلیاں تے گھنگھڑاں دی چھنکار ہسپتال دیاں کندھاں نال وج رہی سی۔ پرہن چپ چان اے۔ صرف ہسپتال دے قبرستان وج اُٹے ہوئے ککرتے بیٹھا اُلو کدے کدے بول پیدا اے تے ڈکوڈولے کھانڈیاں رُوحاں نوں ڈراؤندا اے۔ ہوا چل رہی اے پر محسوس ہوندا اے کوئی دُکھیا آہاں بھر رہی اے۔ بازار دے آوارہ گتے نالیاں وچوں کجھ لبھدے اک دوجے نال لڑ پندے نیں۔ تے چاؤں چاؤں کرن دے بعد فیر چپ ہو جان دے نیں۔

فوجی رستم خاں برانڈے دے پنج اُتے گھوک سٹا اے۔ پنج تھلے مٹی دے پیالے وج دال تے روٹیاں ٹھنڈیاں ہو گئیاں نیں۔ اوہ ایہہ روٹیاں تے دال صُغی لئی لیا سی پر اوہنے اک بُرکی نہیں چکھی۔ اوہ پنج تے سٹے فوجی دیاں پیراں وج بیٹھی اے۔ اوہنے اپنا سارا سریر گنجھ کے لال پھلکاری وج لکولیا تے اکھیاں میٹیاں ہوئیاں نیں۔ اوہدی اک نظر قاؤ وولوں میلے وج کھونڈ پھڑیاں سد لاؤندیاں ویکھدی اے تے دوجی اکھ کمرے وج بے ہوش پئے ہوئے نوں۔ اوہدی اک نظر اج وی دوپہر تے اے تے دوجی اج وی شام تے۔ پتا نہیں قاؤ دی بے بے نوں کسے نے دسیا اے یا نہیں پئی قاؤ تے اجل نے وار کیتا اے۔ اوہنوں موت نے ہاک ماری اے۔ اوہ موت دی آواز تے اگانہہ چلا گیا اے۔

”زندگی موت پالنبہار دے ہتھ وج اے۔“ اوہدے کناں وج سکھ ڈاکٹر دے لفظ گونج رہے نیں۔ اک سکھ قاؤ وولئی موت دی آواز بنیا اے تے دوجا سکھ اللہ کولوں اوہدی حیاتی دی بھکھیا منگ رہیا اے۔ دو انساناں دے ایس مقابلے وج کون جتے گا؟ ایہدا پتا رب دے سوا کسے نوں نہیں۔

ہسپتال دے قبرستان وج اُگے ہوئے ککرتے اُلو بولیا اے۔ ایہہ کیہ ہوندا اے؟ اینے کیہدے نال گل کیتی اے؟ اینے کسے کولوں کجھ پچھیا اے یا کسے ایس آواز دا جواب

دتا اے جیہڑی میں نہیں سنی۔ اوہ آواز جیہڑا کوئی وی نہیں سُن سکدا۔ صرف جنور ای سُن سکدے نیں تے سمجھ سکدے نیں۔ آخر اُو دی بولی دا کوئی مطلب تے ہووے گا۔ ضرور کوئی مطلب ہووے گا۔ پر اوہ مطلب کیہ اے؟ کتے ایہہ مینوں تے نہیں کہہ رہیا کہ تُوں اتھے بچ تے بیٹھی ہوئی ایں تے قادو میرے کول قبرستان وچ آ گیا اے۔ اوہناں لوکاں کول آ گیا اے جیہڑے ہِے وی نیں تے نہیں وی۔

”جاگدے رہو پئی او۔“ چوکیدار مینوں کہہ رہیا اے پئی جاگدی رہ۔ جاگدی رہ۔ کتے تینوں چور نہ پے جاوے۔ کتے چور نہ تیرا سبھ کجھ پُچرا لے جاوے۔ اجیہا چور جیہڑا نظر نہیں آؤندا۔ جیہڑا روحاں دی چوری کردا اے۔ جیہڑا ناں موت وی اے۔ جیہنے میرے قادرنوں آواز ماری اے۔

صُغی دا سریر کنیا تے اوس جُھنجھنی لے کے پھلکاری وچوں سر باہر کڈھیا۔ کھبے سچے نظر ماری پر ہر پاسے ہنیرا و سدا نظر آیا۔ اوہ ہولی جیہی اٹھی تے پھلکاری سنبھال دی کمرے وِل تَر پئی۔ کمرے دا بُو ہاکھول کے اوس جھاتی ماری۔ سامنے پلنگ اُتے قادو پیا ہو یا سی تے سرہانے لائین جگ رہی سی۔ اوہنوں جھاکا تے آیا پر اوہ چھیتی چھیتی پیر پندی قادو دے منے کول چلی گئی۔ اوس کھبے سچے تکیا کہ کوئی ویکھدا نہ ہووے پر اوٹھے کوئی وی نہیں سی۔ ڈیوٹی تے کوئی وی نہیں سی۔ ساریاں نوں نیندر پیاری اے کون کسے لئی راتاں جاگدا اے؟ کون کسے لئی دُکھ جُر دا اے؟ اوس دوبارہ ایدھر اودھر ویکھیا پر اوہنوں لائین دی نئی نئی لو وِچ کوئی نہ لبھا۔ اوہ کچھو کچھو ہو کے منے دی بائی نال بہہ گئے۔ اپنا ہتھ قادو دے سینے ول ودھایا تے اوہدے ہتھ وچ اپنا ہتھ پا کے اپنے بُکھاں نوں نیڑے لیائی۔ چُمیا تے اکھیاں نال لا کے ہولی ہولی رون لگ پئی تے روندی رہی۔

فیر ڈاکٹر لہنا سنگھ ربڑ دے بوٹ پا کے اک ہتھ وچ سوئی تے دُوبے ہتھ وچ ٹارچ پھڑ کے قادو وِل گیرا مارن آیا۔ جد اوہ کمرے وچ وڑیا تے اوس صُغی نوں بائی نال لگ کے روندیاں ویکھیا۔ اوہ آ کے اوہدے سر تے کھلو گیا۔ اوس ویکھیا صُغی قادو دے بے جان ہتھ اُتے اکھیاں رکھ کے اپنی دھیانے رو رہی اے۔

”بھولے! ہمار دی بائی نال لگ کے روئی دا نہیں۔“ ڈاکٹر نے کہیا۔ صُغی قادو دا

ہتھ چھڈ کے زور زور نال رون لگ پئی۔ ڈاکٹر نے سوئی تے ٹارچ میز تے رکھی۔ تھلے بیٹھی صُغی اٹھا کے سینے نال لایا تے کھجی ہوئی آواز وچ بولیا۔ نہ رو میری دھی۔ نہ رو۔ زندگی اللہ میاں دے ہتھ وچ اے۔“

(2)

دو بجے دن شاہ ویلے مراد خاں تے ہر نام سنگھ کنڈل پور دی پلس چوکی پہنچ گئے۔ تھانیدار حاکم خاں ابے تیک گھروں نہیں سی آیا۔ اوہ اوہدے کمرے وچ بہہ کے انتظار کرن لگ پئے۔ تھوڑی دیر بعد حاکم خاں وی وردی لاہ کے آ گیا۔ اوہدے ہتھ وچ موٹا جیہا ڈنڈا سی۔

”رات کتھے رہے او خاں صاحب؟“ حاکم خاں نے گُرسی اُتے بہندیاں تے پالش کیتا ہويا ڈنڈا میز تے رکھ دیاں ہوياں کچھیا۔

”رات نوں دیر نال بہرام کوٹ پہنچے ساں۔ سویرے ڈاکدار نوں ملے تے تہاڈے ول آ گئے۔“ مراد خاں نے دسیا۔

”قاؤد کوئی پتالگا؟ جیوندا اے یا.....“ تھانیدار نے فقرہ پورا نہ کیتا۔

”ڈاکدار کہندا سی گھبران دی کوئی گل نہیں۔“ مراد خاں بولیا۔

”ہچھا خاں صاحب ایہہ دسو پئی تہانوں کدوں پتا لگا پئی کرپا سنگھ، درشن سنگھ تے چرن سنگھ نے قادر نوں مار ڈگایا اے؟“

”میں تے ہر نام سنگھ کٹھے پنڈوں میلہ ویکھن آئے ساں۔ پنڈ دے باقی منڈے ساتھوں پہلے آ گئے ہوئے سن۔ اسیں کنڈل پور سردار سورن سنگھ دی حویلی گھوڑیاں بٹھیاں تے آپوں میلے وچ چلے آئے۔ جد اسیں گوردوارے لاگے پہنچے آں تے او تھے سانوں اک واقف بندہ مل گیا۔ اسیں اوہدے نال گلاں کرن لگ پئے۔ گلاں کرای رہے ساں تے انج معلوم ہويا جیویں واہر جیہی پئی اے۔ فیر اسان ویکھیا پلس دے بندے اودھرنسی جاندے نیں۔ جدوں اسیں او تھے پہنچے تے قاؤد موہدا پیا سی تے پلس دے سپاہیاں نے درشن سنگھ تے چرن سنگھ نوں جھٹھے مارے ہوئے سن۔ اپنے چر وچ تسیں او تھے اپڑ گئے۔“

باقی سارے معاملے دا تہانوں پتا ای اے۔“

”میلیاں مشاہدیاں وچ لڑائیاں ہوندیاں نیں۔ لوک زخمی وی ہوندے نیں تے مردے وی نیں پر اصل مجرم قابو آ جاندا اے۔ ایس معاملے وچ اصل مجرم گھوڑی نوں اڈی لا کے نس گیا اے تے دُوجے درجے دے مجرم قابو آ گئے نیں۔ میں اوہناں نوں رات کرپا سنگھ بارے پچھیا پر اوہناں کول اکو ای گھڑیا گھڑایا جواب اے تے اوہ ایہہ ”جناب سانوں نہیں پتا“ دسو پکس ہُن کیہ کرے؟“

”میں تے چاہناں حاکم خاں“ مراد خاں بولیا۔ ”اللہ میاں قادو دی حیاتی دیوے۔ او ہٹھیک ٹھاک ہو جاوے تے آپس وچ صلح صفائی ہو جاوے۔“

”پر قادو دے بچن دی امید گھٹ اے۔ کرپا سنگھ دی بلم نے اوہدا ڈھڈ چیر کے رکھ دتا تے اوہ زمین تے ڈگ پیا۔ اُتوں درشن سنگھ تے چرن سنگھ نے ڈانگاں نال اوہدا سر پھسہ دتا۔

”ڈاکٹر لہنا سنگھ بڑا سیانا اے۔“ ہرنام سنگھ دیر توں پُچ سی۔ خیر اوہ وی بولیا

”سردار ہرنام سنگھ جی۔ تسیں مینوں ایہہ دسو پئی تسیں کرپا سنگھ ورگے جنے نوں دھی داساک کیوں دتا اے؟“ حاکم خاں نے پچھیا۔

”ایس واسطے پئی اوہ میری بھین کلونت کور دا پتر اے تے ایس کر کے پئی کرپا سنگھ دی واہوا زمین اے۔“ ہرنام سنگھ نے کہیا۔

تُسیں کدے ایہہ وی سوچ لینا سی پئی کرپا سنگھ ڈھیر ساری شراب پیندا اے۔ اپنی نگرانی وچ شراب کڈھوندا اے۔ چوراں ڈاکوواں تے سانیاں نال اوہدا پیار اے۔ میلیاں وچوں گون والیاں نوں چُک لے جاندا اے۔“

”ایہہ کم اسیں وی اپنی جوانی وچ کر دے ہوندے ساں خاں صاحب۔“ ہرنام سنگھ نے کہیا۔

”میرا خیال اے تُسیں کسے تے چوری وار نہیں کر دے ہوو گے۔“ حاکم خاں نے طنزاً کہیا۔

”نہیں۔ میں ہمیش لکار کے لڑیا واں۔ میں کدے کسے تے چوری وار نہیں کیتا۔ میں

چوری وار کرن والے نوں مرد دا بچہ نہیں سمجھدا۔“ ہرنام سنگھ نے مان نال کہیا۔

”کرپا سنگھ نے چوری وار کیتا اے۔“

”ایسے واسطے میریاں اکھیاں تہاڈے ساہنے نیویاں نیں۔ اوہ سامنے آکے للکار کے قاڈو تے وار کردا تے قاڈو دا وار کھاندا۔ مر جاندا یا قاڈو نوں مار کے پھانسی دے تختے تے چڑھ جاندا تے میں خوش ہوندا۔ اوہ قاڈو تے چوراں طرحاں وار کر کے لگ گیا اے۔ مینوں ایہدا دکھ اے۔ سکھ تھوڑ دے نہیں ہوندے۔ کرپا سنگھ تھوڑ دلا نکلیا اے۔“ ہرنام سنگھ دے آخری فقرے وچ نفرت سی۔

”تہانوں کوئی پتا ہووے پئی اوہ ایس ویلے کتھے اے؟“ حاکم خاں نے ٹوہ لائی۔

”مینوں کرپا سنگھ دے تھان نکانے دا پتا ہووے تے میں آپ تہانوں اوس نکانے تے لے جاواں تے کہواں اوہ جے کرپا سنگھ اپنی پستول نال ایہدی چھاتی ستاں گولیاں نال پاڑ دیو۔“

”پر سردار ہرنام سنگھ! تیرا نگا پتر درشن سنگھ وی اوہدے نال سی۔“ حاکم خاں نے کہیا۔

”ہاں۔ میرا نگا پتر درشن سنگھ اوہدے نال سی۔ پر سارے پتر، پتر نہیں ہوندے۔ گپتر وی ہوندے نیں۔ تہاں جدوں دا اوس نوں پھڑیا اے میں درشن نوں اک وار نہیں ملیا۔ ملنا چاہواں تے مل وی سکنا واں کیوں جے اوہ دُور نہیں تے اوہدے ملن تے کوئی پابندی وی نہیں۔ پر میں اوس نوں نہیں ملیا۔ میرا اوہدے کولوں جی چڑھ گیا اے۔“

”کیہڑی گلواں جی چڑھ گیا اے سردار ہرنام سنگھ؟“ تھانیدار نے پچھیا۔

”درشن سنگھ نے اوس جنے تے وار کیتا جیہڑا ڈگ پیا داسی۔ کھلوتے ہوئے تے وار نہیں کیتا۔ درشن سنگھ نے اوس جنے تے وار کیتا۔ جیہڑا ساڈے پنڈ دا نک مونہہ سی۔ درشن سنگھ نے قاڈو تے وار کر کے فرید پور دے پٹھاناں تے سکھاں وچ وتھ پاؤن دی کوشت کیتی۔ فرید پور دے بھرپے تے سانجھ پیار دے بُوٹے نوں جڑھوں پٹن دا گناہ کیتا۔“

”پر ہُن تسیں دسو پلس درشن سنگھ نال کیہ سلوک کرے؟“ حاکم خاں نے ہرنام سنگھ کولوں پچھیا۔

”اوہو سلوک جو پلس اپنے ملزماں نال کردی اے۔“ ہرنام سنگھ نے رُکھائی نال کہیا۔

”ہرنام سنگھ غلط کہند اے“ مراد خاں بولیا۔ ”حاکم خاں! میرے اُتے مہربانی کرتے چرن سنگھ تے درشن سنگھ نوں چھڈ دے۔“

حاکم خاں مراد خاں دی گل سُن کے حیران رہ گیا۔
 ”چرن سنگھ تے درشن سنگھ نوں چھڈ دیاں؟ اوہ کیوں خاں صاحب؟“
 ”ایہناں دوواں نوں چھڈن نال ساڈے پنڈ وچ پانک تے دو جائیگی نہیں پئے گی۔“ مراد خاں نے کہیا۔

”بادشاہو۔ اسیں تے ایہناں دے ذریعے کرپا سنگھ نوں پھڑنا اے۔“ حاکم خاں نے کہیا۔
 ”جڑور جڑور۔ زیادتی کرن والے نوں سزائور ملنی چاہیدی اے۔“ ہرنام سنگھ نے کہیا۔
 ”اوہ یارتوں چپ کر۔ سزا ملنی چاہیدی اے۔ کیتی ناں سٹکھاں والی گل۔“
 حاکم خاں مراد خاں دی گل سُن کے ہس پیا۔

”آپس وچ صلاح کرلو پئی تسیں کیہ چاہندے او۔“ تھانیدار نے کہیا۔
 ”اسیں کجھ نہیں چاہندے حاکم خاں۔ جو جی وچ آؤندا اے کر۔“
 اٹھ مراد خاں بہرام کوٹ چلے۔ مُنڈے دا پتا کرے۔ ہے یا نہیں ہیگا۔“ ہرنام سنگھ
 کُرسی توں اٹھ کھلوتا۔ مراد خاں نے ہرنام سنگھ دی گل سُنی اُن سُنی کر دتی تے حاکم خاں
 دیاں اکھیاں وچ اکھیاں پا کے بولیا۔

”میں پیسے والا آدمی واں۔ دو چار سو اپنے اک پٹھان بھرانوں دے دیاں گاتے
 کوئی فرق نہیں پین لگا۔ حاکم خاں نوں اخیر مراد خاں نے پیسے والا لچ دتا۔
 ”نہیں پیسیاں ویسیاں دی گل نہیں۔ کیس قتل دا اے۔ ایہو جیسے کیس وچ پلس بڑی
 محتاط ہوندی اے۔“

”چل پئی ہرنام سیہاں۔ توں جتیا تے اسیں ہارے۔“ مراد خاں کُرسی توں اٹھ
 کھلوتا۔ ”ہاں یاد آیا حاکم خاں۔ درشن سنگھ دا ذرا خیال رکھنا۔ کچا مُنڈا اے۔“
 ”فکر نہ کرو خاں صاحب“ حاکم خاں نے کہیا تے ضمنی کھولن لگ پیا۔

جد مراد خاں تے ہرنام سنگھ برانڈے وچوں دی لنگھ رہے سن تے درشن سنگھ تے چرن
 سنگھ نے اوہناں نوں ویکھیا۔ درشن سنگھ نے سیخاں وچوں دی ہتھ باہر کڈھے تے ڈوڈیا کے

بولیا ”باپو۔ باپو۔“

”مرسوہری دیا“ ہر نام سنگھ نے کہا تے اگانہہ ودھ گیا۔

(3)

گھوڑیاں نوں دڑکی لا کے مراد خاں تے ہر نام سنگھ ڈیگر ویلے بہرام کوٹ پہنچ گئے۔
قاڈو دے کمرے وچ وڑن توں پہلاں مراد خاں نے اپنیاں مچھاں نوں تادتا تے گردن
اکڑائی۔ ہر نام سنگھ دا چہرہ گول سی تے سارے چہرے تے داڑھی۔ مچھاں تے بھروٹیاں دے
والاں نے چھاں کیتی ہوئی سی۔ اوس اپنے چہرے تے دوویں ہتھ پھیرے تے ٹیڈھی پگڑی
جیہڑی ڈھلی ہوئی سی ذرا کس کے بنھی۔ دوواں نے کھنگورا ماریا تے کمرے وچ وڑ گئے۔
ڈاکٹر، نرس تے صغی نے کھنگورے سنے تے دروازے ول تکے۔

”ڈاکدار جی، ست سری اکال“

”ست سری اکال مراد خاں، ست سری اکال۔ آؤ۔ آؤ۔ میں بے کا کونوں پچھ رہیا
سی پئی خاں صاحب کیوں نہیں آئے۔“

”بس جی۔ تھانیدار حاکم خاں نال رڑکھیر لگ گئی۔ اوتھے ڈیر ہو گئی۔“ مراد خاں نے دسیا۔
”جنا بے ہوش اے۔ پر فکر والی گل نہیں۔ واہرودی کرپا نال تگڑا ہو جاسی۔“ ڈاکٹر
نے کہا۔

”تہانوں پتا اے ایہہ منڈا کون اے؟“ ہر نام سنگھ نے ڈاکٹر کولوں پچھیا۔

”نہیں۔ کون اے ایہہ گبھرو؟“

ایہہ بوٹے خاں دا پتر اے۔ اوہ بوٹے خاں جن دس نمبرے سنتو کہ سنگھ نوں قتل کیتا سی۔
”پچھا، پچھا، پچھا سمجھ گیاں۔ ہر نام سیہاں سمجھ گیاں۔ ٹھیک ٹھیک۔“ ڈاکٹر کجھ یاد
کرن لگ پیا۔

”میں اودوں دینا نگر دے ہسپتال نواں نواں لگا سی، جدوں سنتو کہ سنگھ دی لوتھ آئی
سی اوتھے۔ تے اودوں مینوں پہلی واری بوٹے خاں، مراد خاں تے ہر نام سنگھ دا پتا لگا سی۔
ٹھیک ٹھیک۔“

”اسیں دوویں تے ڈاکٹر صاحب ایویں مشہور ہو گئے ساں۔ اصل وچ قتل بوٹے
خاں نے کیتا سی۔“ مراد خاں نے کہیا۔

”آہو۔ تہانوں تے جج نے چھڈ دتا سی پر بوٹے خاں نوں پھانسی ہو گئی سی۔“ ڈاکٹر
نے یاد کر کے کہیا۔

”بس ایہہ سمجھ لو پئی ایہہ مُنڈا قادو ساڈے پھانسی چڑھن والے یار دی نشانی
اے۔“ ہرنام سنگھ نے ہرکھ نال قادو ول ویکھدیاں کہیا۔

”اوہ تہاڈا اکلیاں دا یار نہیں سی۔ میرا وی یار سی۔ پھانسی دین توں پہلاں میں اوس
نوں ملیا ساں۔ اوہ بالکل نہیں سی گھبرایا۔ علیٰ علیٰ کرردا پھانسی دے تنختے تے چڑھ گیا سی۔“
”ایہہ وی پیو وانگ بڑا دلیر اے۔ پر وسا کھی وچ اُن بھول ماریا گیا۔“ ہرنام سنگھ
نے افسوس نال کہیا۔

”نہیں بچ گیا اے۔ فکر والی گل نہیں۔ اج شام تیکر ہوش آ جاوے گی۔ بڑے نویں
نویں ٹیکے لائے نیں اسان وی ایس نوں۔“ ڈاکٹر نے فخر نال کہیا۔

”سردار صاحب! اسیں وی تہاڈے تابعدار آں۔ یاد آیا کوئی دس دن ہوئے نیں
میں تہانوں گھيو دا پپا بھیجیا سی۔ مل گیا سی؟“ مراد خاں نے پچھیا۔
”ہاں مل گیا سی۔“ ڈاکٹر نے کہیا۔

”اک پپا گھيو دا تہانوں میں بھیجاں گا پر اودوں جدوں قادو ٹکڑا ہو جاوے۔“ ہرنام سنگھ
نے کہیا۔

”حالی تیکر مراد خاں دا گھيو نہیں ملکيا۔ اوہ کھا لواں تے پھیر۔“ ڈاکٹر لہنا سنگھ نے ہس
کے کہیا۔

”ڈاکٹر صاحب۔ میری دھی نوں ملے او۔ ایہدا ناں صغرا بی بی اے۔“ مراد خاں
نے کہیا۔

”ہاں ملیا۔ راتیں میں کوئی دوو جے قادو نوں ویکھن آیا تے بھیردی روندی پئی سی۔
میں چک کے سینے نال لایا تے حوصلہ دتا۔“ ڈاکٹر نے پیار نال کہیا۔

”قادو نال ایہوں بہت ہرکھ اے۔ نکتے ہوندے ایہہ اکٹھے ای کھیڈ دے رہے

نہیں۔ ایہدا بھرا کوئی نہیں بس ایہہ قادونوں ای بھرا سمجھدی اے۔ سیانی ہو گئی اے پر ہن وی کئی واری ایہدے نال لڑ پندی اے۔“

صغی نے اپنیاں گلاں ہوندیاں سُنیاں تے باہر آ کے بچ تے بہہ گئی تے سوچن لگ پئی کتے اوہدا پیو جھوٹھ تے نہیں بولدا پئی قادو اوہدا بھرا اے۔

”میں کاکونوں وکھرا کمرہ دے دتا اے جتھے ایہہ روٹی پکایا کریگی۔ پنڈوں اک مرانی آیا سی۔ اوہدے کول بھانڈے، گھیو، دال تے دوجیاں چیزاں سُن۔ میں اوہ کمرے وچ رکھوا دتیاں نیں۔“ ڈاکٹر نے کہیا۔

”تے ساڈا اک بندہ شامیں آیا سی۔ فوجی رستم خاں سی اوہدا ناں۔“ مراد خاں نے کہیا۔

”اوہ پنڈ چلا گیا اے۔“ صغی نے کمرے وچ آ کے دسیا۔

”تے آیا کون اے دینا؟“ ہرنام سنگھ نے پچھیا۔

”آہو چاچا۔“ صغی نے کہیا۔

”ہن اوہ ناماں نیم کتھے گیا اے؟“ مراد خاں نے ٹول کیتی۔

”بھاگ لکے رہن۔ جڑ ساوی۔ بوٹا ہریا۔ اتھے ای آں۔ کتے نہیں گیا۔ بس ذرا

باہر گیا ساں۔“ دینے مرانی نے نک وچ بولدیاں تے اندر آؤندیاں ہویاں کہیا۔

”باہر کیہ کرن گیا سی تو دینا؟“ ہرنام سنگھ نے پچھیا۔

”بھاگ لکے رہن، بھرتی ہو رہی سی لام واسطے۔ اوہ ہوندی ویکھ رہیا ساں“ دینا بولیا۔

”بھرتی بڑی کھل گئی ڈاکٹر جی۔“ مراد خاں نے فکر مندی نال کہیا۔

”دراصل برما وچ انگریزاں نوں بڑی مار پے رہی اے۔ جاپانی تے آزاد ہند فوجاں

نے تے انگریزاں نوں نک چنے چہوا دتے نیں۔“ ڈاکٹر نے کہیا۔

”ایہہ چنگی گل اے یاں ماڑی گل اے سردار جی؟“ مراد خاں نے فکر مندی نال کہیا۔

”چنگی وی اے تے ماڑی وی اے۔ میرے خیال وچ چنگی گھٹ اے تے ماڑی

بہت اے۔“ ڈاکٹر نے سوچ کے دسیا۔

”اوہ کیویں جی؟“ سردار ہرنام سنگھ بولیا۔

”ویکھو نا سردار ہرنام سنگھ جی۔ پئی انگریزاں وٹوں اسیں لوک لڑ رہے آں۔

انگریزاں نوں مار پئی تے سمجھ لوسانوں مار پئی۔“ ڈاکٹر نے کہیا۔

”ایہہ گل ٹھیک آ۔“ ہرنام سنگھ نے کہیا۔

”تے جیہڑی آزاد ہند فوج اے اوہ نہیں ساڈی فوج۔“ مراد خاں نے شک ظاہر کیتا۔

”ساڈی کیویں ہوسکدی اے؟ اساں اپنے گھرو انگریزاں دے حوالے کیتے سُن۔

جاپانیاں دے حوالے نہیں کیتے سُن۔“ ڈاکٹر نے کہیا۔

”ایہہ بہتیاں اُچیاں گلاں نیں۔ ساڈی سمجھ وچ گھٹ آؤندیاں نیں۔ بی بیاترے دی

گل ہووے تے اوہ اسیں سمجھ سکے آں۔ کیوں ہرنام سیہاں؟“ مراد خاں نے حمایت منگی۔

”آہو۔ تیرے والی گل ٹھیک آ۔“

”ہچھا۔ چلو میرے گھر چلے۔ اتھے کھلو کھلو کے تے تّاں وی تھک گئیاں نیں۔

نالے آرام کراں گے تے نالے کوئی چاء پانی چھکاں گے۔“ ڈاکٹر نے کہیا۔

”آہو چلو۔ اتھے تے دواواں دی بودماغ نوں چڑھ رہی اے۔“ مراد خاں نے کہیا۔

”ساوتری۔ قاؤو دا ٹمپرچر میرے گھر ای لے آویں۔“ ڈاکٹر نے تردیاں ہویاں

کہیا۔

”دینیا! پئی کُدی دا نکا نکا کم نس بھیج کے کرنا۔ ایویں نہ کتے افیم دے نشے وچ سوں

رہویں۔“ ہرنام سنگھ نے کہیا۔

”بھاگ لگے رہن۔ فکر مندی والی کوئی گل نہیں۔“

”لے دھینے اسیں ڈاکٹر دے گھروں ہو کے سدھے پنڈ جانا ایں۔ فکر والی کوئی گل

نہیں۔ اپنے ویر دا خیال رکھیں۔ ثواب دا کم اے۔“ مراد خاں نے صغی دے سرتے پیار

دیندیاں ہویاں کہیا۔

”تسیں فکر نہ کرو خاں صاحب۔ کسے چیز دی گھاٹ نہ آوے گی واہگرو دی کرپا

نال۔“ ڈاکٹر نے کہیا تے اوہ تنے کمریوں باہر نکل گئے۔

”بھاگ لگے رہن۔ کٹا رعب اے ساڈے خاں صاحب دا۔“ دینے مراٹی نے صغی

نوں سنا کے کہیا ”ڈاکٹر وی ہتھ بدھے غلام نیں ساڈے خاں صاحب دے۔“

”چاچا دینیا! ڈاکٹر وی بہت چنگا اے۔ جے ایہہ رات نہ آؤندا تے مینوں تسلی نہ

دیندا تے خبرے مینوں کیہ ہو جاندا۔“ صغی نے اکھاں جھمکدیاں ہویاں کہیا۔
 ”بھاگ لگے رہن۔ ڈاکدار وی سبھا دا چنگا جا پدا اے۔ سِکھ ہوندے اُنچ وچوں
 چنگے نیں۔ سوائے کرپا سنگھ۔ چرن سنگھ تے درشن سنگھ دے۔“ دینے مرانی نے کہیا۔
 ”دفع کر۔ اوہناں داناں نہ لے میرے سامنے۔“ صغی نے کہیا تے پھلکاری ٹھیک
 کر کے اُپر لین لگ پئی۔

(4)

مائی رُوڑی نکلی منجی اُتے پئی ہونگ رہی اے تے اتی ماچھی دی تیویں اوہدا سر
 گھٹ رہی اے۔ اوس دن شامیں مائی رُوڑی بُو ہے وچ کھلو کے اپنے پُتر نوں اڈیک رہی
 سی تے داری نے کول آ کے افسوس وچ رُک رُک کے آکھیا۔ ”امتاں! قادو نوں کرپا سنگھ
 نے بلم مار کے مار دتا اے۔ اوہدی لوتھ ہسپتال لے گئے نیں۔“ ایہہ لفظ مائی واسطے بجلی بن
 کے آئے تے اوس نوں بُو ہے دی دوار ساف مار کے ڈگا گئی۔ داری نے اوہنوں چکلیا تے
 منجی تے پا دتا۔ اوہ اوس دن دی منجی اُتے پئی اے۔ نہ کجھ کھاندی اے نہ پیندی اے۔ نہ
 بولدی اے نہ چالدی اے۔ تاپ چڑھیا ہو یا اے تے اوہ ہونگدی پئی اے تے اتی ماچھی
 دی تیویں اوہدا سر پئی گھٹدی اے۔

دینے مرانی دازکا مُنڈا بھوندی چونا چاردا اے پر اوہ ہُن چونا بیلے وچ نہیں کھڑدا۔
 پڑاں وچ کھلیار دیندا اے تے آپ ٹالھی دے بچے تھلے بہہ رہندا اے۔ اوہدا لغوزہ پتا
 نہیں کتھے گواچ گیا اے۔

ڈونگھے کھوہ تے واڈھیاں دے دینیں بڑی رونق لگدی ہوندی سی۔ مُنڈے سارا دن
 واڈھیاں کر دے سُن تے شام نوں تیل دیاں شیشیاں لے کے کھوہ تے آ جاندا سُن۔
 مالشاں کر دے سُن۔ گیت گاؤندے سُن۔ ہاسا بکھیڑا ہوندا سی۔ پر ہُن ڈونگھا کھوہ چُپ
 چان اے۔ کدے کدائیں سلکھن سنگھ تے گور بچن سنگھ کھوہ تے آؤندے نیں تے گیرا مار
 کے چُپ چان رہ کے چلے جاندا سُن۔

پرسنود دی بھٹھی تپدی تے ہے پر جیہی تپتی جیہی نہ تپتی۔ گڑیاں آؤندیاں نیں دانے

بھناندیاں نہیں تے اٹھ کے چلیاں جاندیاں نہیں جیویں اوہناں نوں کسے چیز دا ڈر لگا ہووے۔ مُنڈیاں دے سنگھے ہُن خراب نہیں ہوندے تے اوہ ہُن کھنگورے نہیں مار دے۔ شیموں دی بکری نے وی میسنا تکنا بند کر دتا اے۔ پہلے اوہ بکری دی ڈوری پھڑ کے سکھاں والی ونڈ چلا جاندا سی تے رُوپے تے دُوبے کاکیاں نوں نال لے کے ہر گھرا گے جا کے کھلو جاندا سی تے نعرہ ماردا سی ”بول میری بکری“ تے رُوپا تے دُوبے مُنڈے نعرے مار دے سَن“ میں۔“

سکھ عورتاں تے گڈیاں ہسدیاں ہوئیاں اپنے اپنے گھراں وچوں نکلدیاں سَن۔ کوئی آٹا دیندی سی کوئی گڑ دیندی سی تے کوئی سارے مُنڈیاں دا گول دائرہ بنا کے وچ دُدھارنی رکھ دیندا سی تے پیالیاں دے کے کھندی سی۔ ”پیو دُدھ پھڑا پیو۔“ جے کوئی ناراض ہوندی سی تے سارے مُنڈے اوہدے آ لے دوالے کھلو کے بھنگڑا پاؤندے سَن تے چھیتی چھیتی نچدے ہوئے کہندے سَن۔

”بول میری بکری میں“

”بول میری بکری میں“

”بول میری بکری میں“

تے اخیر ناراض ہون والی تیویں یا کاکی ہنس پیندی سی۔

ہُن شیموں بکری لے کے گھر وگھریں نہیں جاندا۔ اوہ بکری نوں کلتے نال بنھ کے اوہدے اگے پتے سٹ چھڑدا اے تے آپوں اپنی ماں کول بہہ رہندا اے۔

ایہناں دناں وچ شام ویلے روزانہ کرپا سنگھ اپنی گھوڑی تے چڑھیا فرید پور آؤندا ہوندا سی تے پٹھاناں دی ونڈ ول پھیرا ماردا ہوندا سی۔ پٹھان مُنڈے اوس دی گھوڑی دی لگام پھڑ کے کہندے ہوندے سَن ”پٹھاں اُتر کرپا سیہاں کوئی پانی دھانی پی لے۔“

”اوئے نہیں یار۔ بس چلنا واں۔ تلسی داس کولوں لال پری لین آیا ساں۔ ہُن گھر چل کے پینا واں تے موج اڈاناں واں۔“ تے فیر اوہ گھوڑی نوں اڈی لا کے اوگرے ول چلا جاندا سی۔ گڈیاں روز شام نوں پریتونوں دسدیاں سَن پئی کرپا سنگھ تینوں دیکھن آیا سی۔ پرہُن نہ کرپا سنگھ آؤندا اے تے نہ اوہدی گھوڑی۔ اوہ دونیں پتا نہیں کتھے لگ گئے

نیں۔ پلس وی اوہناں دا پتا بے تیک نہیں لاسکی۔

وسا کھی ملے اج دس دن ہو گئے نیں۔ قادو ہُن ہوش وچ اے۔ اوہ گلاں کر دا اے
تے منجی توں اتر کے ہسپتال دے کمرے تے برانڈے وچ چکر لاؤندا اے۔ صغی وی
اوہدے پیراں وچ پیر پا کے اوہدے نال کمرے تے برانڈے وچ چکر لاؤندی رہندی
اے۔ کوئی اوہناں نوں بھین بھرا سمجھدا اے تے کوئی اوہناں نوں کجھ ہور۔
مراد خاں تے ہر نام سنگھ بہت خوش نیں کیوں پئی قادو بچ گیا اے۔

(5)

شکل دوپہر اے۔ قادو ہسپتال توں کجھ دُور دسہری انب دے جھانگلے بُوٹے تھلے
ہسپتال داکمبل وچھا کے لما پیا ہویا اے۔ اوہدی کنڈ اسمان ول اے تے گوڈے تے ٹھوڈی
نکے نکے گھاہ اُتے وچھے ہوئے کھیس اُتے نکلے ہوئے نیں۔ تیل وچ کھچن کرتہ اوس متھے
تھلے رکھیا ہویا اے۔ تہمت دارنگ وی تیل ملن کارن مٹی رنگا اے۔ سرتے ململ دی چٹی
پٹی بچھی ہوئی اے۔ اوہدے لاگے سروں دے کوڑے تیل دی بوتل بھری پئی اے۔ صغی
بوتل چوں تیل کڈھدی اے۔ ہتھاں اُتے ملدی اے تے فیر قادو دے لک تے چوڑ
دیندی اے۔ انج کردیاں اوہدیاں ونگاں وچوں ون سونیاں مٹھیاں مٹھیاں راگ راگنیاں
نکل دیاں نیں۔

”صغیے! مینوں ہاسا پیا آؤندا اے پئی کدے ایہو جیہا وقت وی میرے اُتے آؤنا
سی۔“ قادو ہولی جیہی کہندا اے۔

”میں تیرا مطلب نہیں سمجھی قادو۔“ صغی اپنا کن قادو دے مونہہ دے نیڑے کر کے
پچھدی اے۔

”ایہو پئی توں میرے پنڈ دی مالش کریں گی۔“

”لے ایہدے وچ بُری گل کیہدی اے۔ ہمارا خیال رکھنا ہر اک دا فرض اے۔“

”پر ہُن تے میں ہمار نہیں۔ ہُن تے میں تگڑا ہو گیا واں۔“

”حالی سواہ تگڑا ہویا ایس۔ نرس کہندی سی حالی کمزوری ہیگی اے۔“

”اوہ تے خیر ٹھیک اے پر زخم راضی ہو گئے نیں۔ ہُن تے زخماں دے کھرٹ وی لٹھ گئے نیں۔“

کھرٹ تے اُتر گئے نیں پر زخم حالی لوے نیں۔ پکے نہیں ہوئے۔“
 ”ہو جان گے رب چاہے۔ جے سردار لہنا سنگھ تے توں ہسپتال وچ نہ ہوندے تے میں مک گیا سی۔ سمجھو۔“

”اسیں تینوں مکن دیندے ساں؟ ڈاکدار تے تیرے لئی بھمیری وانگ بھوندار ہیا اے۔“
 ”تے تُوں؟ تُوں تے میرا چوکیدار لیا ہو یا سی۔“

”ہور کیہ کر دی؟ میرے بابل نے مینوں کہیا ہو یا سی پئی قاؤ دی دہلی سیوا کر۔ ایہہ پنڈ دانک مونہہ اے تے ایہدے سرتے اے اسیں بڑے گھول گھلنے نیں۔“
 ”مہربانی اے تائے دی۔ ایہو جیسے چنگے دل دا بندہ میں اے تیک رُوئے زمین تے نہیں تکیا۔“

”قاؤ! میرے بے دادل بہت چنگا اے۔ پتا ای ڈاکدار نوں کیہ کہندا سی اوں دن؟“
 ”نہیں مینوں تے نہیں پتا۔“

”ڈاکدار نوں کہندا سی زخماں دی رپٹ چنگی نہ لکھو تاں پئی درشن تے چرن سنگھ عدالت وچوں بری ہو جان۔“

”تے درشن دا باپو کیہ کہندا سی؟“

”اوہ ڈاکدار نوں کہندا سی رپٹ بھر کے لکھو۔ جے درشن نے دس سال قید ہونا اے تے پندرہ سال ہووے۔“

قاؤ وگل سُن کے ہسن ڈھ پیا۔ صغی نے مالش کردیاں ہتھ روک لئے۔ کیوں پئی قاؤ دا سارا سر ریل رہیا سی۔ اوہنوں ڈرسی کتے زخم نہ ترٹ جان۔
 ”ہلا فیر ڈاکدار نے کیہدی گل مَنی؟“ قاؤ نے ہاسا ختم کر کے پچھیا۔

صغی دوبارہ مالش کرن لگ پئی تے بولی ”ڈاکدار نے کہیا میں اپنی مرضی کراں گا۔“
 ”پتا نہیں کیہ بنیا اے؟“

”بنیا کیہ اے؟ دوویں جیل وچ پئے ہوئے نیں۔ چاچا ہر نام سنگھ روز اے نال لڑا اے

پئی توں کیوں روشن سنگھ تے چرن سنگھ نوں جیلوں کڈھن کڈھون دا اپنا اڈم کر رہیا ایں۔“
 ”اصل وچ تایا درشن سنگھ نوں اپنے پتر وانگ سمجھدا اے تے چرن سنگھ نوں بھراواں وانگ۔“
 ”ایہہ غلط گل اے۔ پتر تے بھرا ہوندے تے تینوں گور کنارے کیوں پہنچاندے؟“
 ”اصل قصور تے کرپا سنگھ دا اے جیہڑا پتا نہیں کتھے لگیا ہویا اے۔“
 ”میں کہنی آں اوہ لام تے چلا گیا اے۔“

”میرا اپنا وی ایہو خیال اے۔ اوہدے کسے واقف نے تصدیق کر دتی ہوئے گی پئی
 مُنڈا چنگے چال چلن دا اے تے بھرتی کرن والیاں نے اوس نوں بھرتی کر لیا۔ اجکل تے
 سرکار گٹیوں گوڈیوں رہے ہوئے مُنڈیاں نوں دی فٹاٹ بھرتی کر رہی اے۔ کرپا سنگھ تے
 فیرو جند والا گھروسی۔“

”پر قادو! اپنی بھرتی کیوں کھلی ہوئی اے؟“
 ”بس لڑائی لگی ہوئی اے۔ سردار لہنا سنگھ سویرے مینوں دس رہیا سی کہ انگریزاں دی
 اپنی فوج اوہناں دے خلاف ہو گئی اے تے خلاف ہون والیاں نے آزاد فوج بنا لئی اے۔“
 ”ایہہ آزاد فوج کیہ کرے گی؟“
 ”ایہہ فوج انگریزاں نال لڑے گی تے ہندوستان تے قبضہ کر کے حکومت چلائے گی۔“
 ”پر ساوتری کہہ رہی سی کہ انگریز بڑے چالاک تے بہادر ہوندے نیں۔“
 ”نہیں انگریز صرف چالاک ہوندے نیں۔ بہادر نہیں ہوندے۔ بہادر صرف مسلمان
 ہوندے نیں۔“

”سکھ وی بہادر ہوندے نیں کیوں جے اوہ پنڈاں وچ رہندے نیں تے مسلماناں
 دے کول بہندے کھلوندے نیں۔ پنڈاں وچ رہن والے لوک شہراں وچ رہن والے
 لوکاں نالوں بہتے بہادر ہوندے نیں۔“
 ”پنڈاں وچ رہن والے بے وقوف وی ہوندے نیں۔ ایویں ای لڑ دے مردے
 رہندے نیں۔“

”تیرے والی گل وی ٹھیک اے۔“
 ”چچا قادو! جس ویلے کرپا سنگھ نے تیرے بلم ماری اے توں ہتھ نال روک لینی سی۔“

”گل کرو۔ کرپا سنگھ نے کیہڑی مینوں دس کے بلم ماری سی۔ اوہ تے انب دے
 بونے چھ لکھا ہویا سی۔ مینوں تے اودوں پتا لگا جدوں بلم میرے ڈھڈ وچ دھس گئی۔ میں
 بلم باہر کدھن لگا تے درشن تے چرن سنگھ نے ڈانگاں مارنیاں شروع کردتیاں۔“
 ”میریاں تے قاؤو! ہُن بانہواں تھک سکنیاں نیں۔ چھڈ دیاں مالش کرنی؟“
 ”آہو چھڈ دے۔ مالش دامزہ نہیں آیا۔“
 ”آہو جی ہُن کاہنوں مزا آؤنا اے؟ سریر وچ طاقت جو آ گئی اے۔“
 ”بس ایہو گل اے۔ پنڈ جا کے دُتے کولوں مالش کرواواں گا۔ اوہدے ہتھ واہ واہ
 بھارے نیں۔“
 ”پنڈ وی اسیں کل نہیں تے پرسوں چلے جاواں گے۔“
 ”ہُن تے ہسپتال وچ دل وی اداس ہو گیا اے۔ جدوں دا دینا مراٹی گیا اے دل
 اُکا نہیں لگدا۔ اوہ ہوندا سی تے ہاسا ٹھٹھا چلدا رہندا سی۔“ قاؤو کھیس تے اٹھ کے بہہ گیا
 تے گروتہ گل وچ پاؤن لگ پیا۔

خیر سلا پچھن کیہ آوے۔ جس دن قاؤ نے پنڈ آؤنا سی اوس دن سویر نوں مراد خاں، ہرنام سنگھ، اسلام پور دا چودھری جتے خاں تے فیروز گھوڑیاں تے چڑھ کے ہسپتال آئے سن۔ فیروز نے قاؤ دی ٹیر جس اُتے اوہ چڑھ کے آیا سی قاؤ دے حوالے کیتی تے آپوں تانگہ لے کے اوہدے وچ بھانڈے ٹینڈے سٹے تے صغی نوں بٹھا کے شاہ ویلے فرید پور آ گیا۔ دوپہراں نوں مراد خاں نے شراب دیاں بوتلاں منگوائیاں تے دو تن کلوں بھٹے تے فیروز ہرنام سنگھ۔ جتے خاں، ڈاکٹر لہنا سنگھ۔ قاؤ تے دو تن کمپونڈر قسم دے لوکاں نے ڈاکٹر دے گھر شغل میلہ کیتا۔ ایس دعوت وچ سردار ہرنام سنگھ نے ڈاکٹر لہنا سنگھ دا شکریہ ادا کیتا تے گھيو دا پپا دتا۔ ایہہ پپا فیروز سویرے ٹیر اُتے رکھ کے لیا یا سی۔ لوڈھے ویلے مراد خاں، ہرنام سنگھ، جتے خاں تے قاؤ گھوڑیاں نوں دُر کی لا کے اوگرے پہنچے۔ ہرنام سنگھ دی بھین کلونت کور دے گھر گھری گو بیٹھے ددھ دا اک اک گلاس چڑھایا۔ ڈکار شکار مارے تے عصر ویلے فرید پور پہنچ گئے۔

قاؤ نے کلونت کور دے گھروں کوئی چیز نہ کھادی نہ پیتی۔ اوس نوں مراد خاں نے بڑا زور لایا پئی کجھ کھاپی لے پر اوس صاف کہہ دتا پئی حالی اوہدا سینہ کرپا سنگھ وٹوں صاف نہیں ہویا۔ جدوں اوہدا غصہ مک جاوے گا اوہ آپ اوگرے آ کے پانی دھانی پی لوے گا۔

کلونت کور اپنے پتر وٹوں بے فکر سی۔ اوہدا خیال سی کرپا سنگھ فوج وچ بھرتی نہیں ہویا۔ اپنے کسے یار بلی کول لگیا بیٹھا اے۔ جدوں ہرنام سنگھ نے پنے نوں بلا کے پچھیا تے اوہنے کہیا پئی کرپا سنگھ نے میلے جان توں اک دن پہلاں اوس نوں (پنے نوں) دسیا سی کہ اوہ قاؤ وٹوں قتل کر کے لام تے چلا جائے گا۔ پنے دیاں دوویں بانہواں گہنیاں توں ذرا گوا تاناہہ کر کے ڈاکٹر نے وڈھ دتیاں ہویاں سن۔ صرف ڈلو جیسے رہ گئے ہوئے سن۔ پتا نہیں پنے دے ڈلو ویکھ کے مراد خاں نوں ترس آ گیا۔ اوہ بولیا ’ہینیا! کدے

میرے کول آتینوں کوئی بوری دو بوری دانے دیاں۔‘

کلونت کور جیہڑی اپنے بھرا دی پواندے بیٹھی ہوئی سی چٹاک نال بولی: ’پنے نوں فرید پور جان دی کوئی لوڑ نہیں۔ ایہدیاں بانہواں میرے کرپے داکم کر دیاں ٹٹیاں سن۔ ایہدے تے ایہدے ٹبر واسطے بہت دانے۔ ساری عمر بیٹھا کھاوے۔‘

ہر نام سنگھ ہس پیا تے مچھاں تے ہتھ فیر کے بولیا۔
 ”کلونت کور غیرت والے بھرا دی نئی بھین اے مراد خاں۔ اوہ اپنے کتھی نوں فرید
 پور کیویں بھیجے؟“

”غیرت والا ہونا چنگی گل اے ماڑی گل تے نہیں، ناں نہیں لئی دا“
 بتے خاں نے اپنیاں کینڈو ورگیاں لمیاں مچھاں نوں مروڑ کے کہیا۔
 جدوں اوہ چارے سردار ہر نام سنگھ دے ڈونگھے کھوہ تے اُپڑے تے او تھے فرید پور
 دے سارے نکلے موٹے اکٹھے ہوئے دے سی۔ فوجی رستم خاں اپنے سنڈھے جو کے گڈ
 پڑاں وچ لے آیا سی۔ ایس گڈ وچ پنڈ دے سارے نیاں کھلوتے کھپ پارہے سن تے
 اوہ پپنیاں وچ رہے سن۔ جیہڑیاں اوہناں نے وساکی دے میلے وچوں خریدیاں سن۔
 قاؤ، ہر نام سنگھ، مراد خاں تے بتے خاں گھوڑیوں اتر کے جلوس دی شکل وچ پنڈ پہنچے۔
 اوس ساری رات تے اگلے دن قاؤ دے گھر لوکاں دی آؤ جائی رہی۔

(7)

گرمیاں تیز ہو گئیاں سن تے مراد خاں دے سروچ چٹا کے جیہے پچن لگ پئے
 سن۔ اوس بنارسی کولوں چوانی دی مہندی لئی تے گھر جا کے صغی نوں دے کے بولیا:
 ”دھیئے! مہندی گھول۔ اج شام نوں میں سروچ لاؤنا چاہنا واں۔ سر بھارا بھارا لگدا
 اے گرمی نال۔“ ایہہ کہہ کے مراد خاں پڑاں ول آیا۔ او تھے اوہدے مزارعاں نے گاہ
 پائے ہوئے سن تے قاؤ بیٹھا حقہ پی رہیا سی۔ اوہ گاہاں ول گیرا مار کے شاہ سکندر دے
 مزار ول تڑپا۔

جدوں اوہ مزار تے پہنچیا سائیں سب تے دینا مراٹی بھنگ گھوٹ کے پُن رہے
 سن۔ مولو کبابیا پرانہ انب دے بوٹے تھلے مصلہ وچھا کے ستا ہویا سی تے گھراڑے مار
 رہیا سی۔

دینے مراٹی نے مراد خاں نوں ویکھیا تے چھیتی نال اسیساں دین لگ پیا۔ ”بھاگ
 لگے رہن۔ جڑھ ساوی۔ بوٹا ہریا۔ جگ وچ پھرن گھوڑیاں۔ دُڈھیں نہاؤ تے پوتیں پھلو۔

لکھاں تے ہتھ۔ سدا شملے اُچے رہن آل اولاد دی خیر۔“

”بس بس دینا بس۔ اینیاں بڑیاں نیں اسیساں۔“ مراد خاں نے کہیا تے اوہناں دے کول ٹھہ کے بہہ گیا۔

”مولا علی دی خیر۔ بھنگ وچ ساہ ست نہیں رہیا۔ ایہہ چوتھی وار پین لگے آں پر اثر ای کجھ نہیں ہوندا۔ مولا علی دی خیر“ سائیں سپ نے اکھتیاں کھول دیاں ہویاں کہیا۔

”ساہ ست کیوں نہیں رہیا بھنگ وچ سائیں سپ“ مراد خاں نے پچھیا۔ ”مولا علی دی خیر۔ نیتاں وچ کھوٹ آ گیا اے“ سائیں سپ نے کھلیاں اکھاں میڈیاں ہویاں کہیا۔

”کیہدیاں نیتاں وچ کھوٹ آ گیا اے؟ سانوں وی پتا لگے“

”ساڈیاں تہاڈیاں نیتاں وچ۔ ہور کیہدیاں نیتاں وچ۔ بھاگ لگے رہن“

”دینا! پئی میری نیت وچ تے کوئی کھوٹ نہیں آیا۔ کیہ کہندا؟“ مراد خاں نے دھون اُچی کر کے تے مچھاں تے ہتھ فیر کے آکھیا۔

”مولا علی دی خیر۔ فرید پور ہُن اوہ فرید پور نہیں رہیا جیہڑا وسا کھی دے میلے توں پہلے سی“ بھنگ پن کے نلدا اک پاسے رکھ دیاں ہویاں سائیں سپ بولیا۔

”کیوں! کیہ فرق پے گیا اے سائیں سپ“ مراد خاں مزہ لے رہیا سی گل دا۔ ”بھاگ لگے رہن۔ پہلے پنڈ دے اک بندے دی عزت پنڈ دے سارے بندیاں دی

عزت ہوندی سی۔ پر رب خیر کرے ہُن ایہہ گل نہیں رہی“ دینا بولیا۔

”فرید پور وچ بس ہُن دو بندے ٹھیک رہ گئے نیں۔ مولا علی دی خیر۔ اک تے دینا مراٹی تے دوجا مولو کبابیا۔“ سائیں سپ نے بھنگ پیالے وچ پوندیاں کہیا۔

”ہلا۔ ایہہ گل اے سائیں سپ“ مراد خاں ہُن سوچن لگ پیا۔

”مولا علی دی خیر۔ سانوں جھوٹھ بولن دی کیہ لوڑ اے۔ اسیں دنیا دار کمینے نہیں۔“

”ہچھا ایہہ دس سائیں سپ۔ پئی دینا تے مولو کیویں چنگے بندے نیں؟“ مراد خاں نے سوال کیتا۔

”مولا علی خیر۔ دینا تے مولو نہ ماڑی کر دے نیں نہ چنگی۔ اللہ اللہ تے خیر سلا“

”بھاگ لگے رہن۔ سانوں کوڑ مارن دی لوڑ کیہ اے؟“ دینے نے بھنگ دا پیالہ

مونہہ نال لاؤندیاں ہوياں کہيا۔

”کون کوڑ ماردا اے تے کون بھیردی گل کر دا اے؟“ مراد خاں نے فکر مندی نال
”کچھیا فرید پور دے منڈے کڑیاں ہو رکون؟“ مولا علی دی خیر، سائیں سپ نے، ”پیتیاں
تے رب نال گلاں کیتیاں“ دانرہ ماریا تے بھنگ دا پیالہ ڈکا ڈک پی گیا۔ بھنگ پین دے
بعد اوس بھیڑا جیہا مونہہ بنایا تے پیالہ زمین تے موڈھا مار دتا۔

سائیں سپ دیاں کیناں لمیاں زلفاں نے جیہناں دا رنگ کالا اے تے جیہڑیاں
تیل وچ نچڑ رہیاں نیں۔ اوہدے لک صرف لنگوٹ اے پنڈے تے سواہ ملی ہوئی اے۔
اکھاں لال نیں۔ گلے وچ کوڈیاں دے ہار نیں۔ ہتھاں دیاں ساریاں انگلیاں وچ
چھاپاں نیں۔ ہر چھاپ دا تھیوا وکھرے تے نوکیلے رنگ دا اے۔

”ہاں پئی سائیں سپ۔ کبھڑے منڈے کڑیاں خراب کم کر دے نیں“ مراد خاں
نے سائیں سپ دیاں اکھاں وچ اکھاں پا کے کچھیا۔

سائیں سپ نے مراد خاں دیاں اکھاں وچ اکھاں پائیاں تے بولیا۔
”مولا خیر کرے۔ قاؤو تے صغراں بی بی“

”سپ سائیں ڈنگ ماریا ای؟“ مراد خاں دی چیک سُن کے دینا مراٹی کنیا تے
مولو کبابیا اٹھ کے بہہ گیا۔

”مولا علی دی خیر۔ گھرو گھراہو گلاں ہوندیاں نیں“ سائیں سپ نے ہولی نال
کہیا، ”فقیراں نوں جھوٹھ بولن دی کوئی لوڑ نہیں۔“

مراد خاں اٹھ کھلویا۔ اوہدیاں اکھاں انج لال سن جیویں تاڑے لکیاں ہوياں نیں۔
اوہدا سارا سریر غصے نال کنب رہیا سی۔

سائیں سپ نے اپنا سر تے مکھیتر جیہدے نال اوہ بھنگ گھوٹ رہیا سی کھلوتے
ہوئے مراد خاں دے ول ودھائی تے بولیا۔

”مراد خاں۔ مکھیتر نال میرا سر دل دے پر میں جھوٹھ نہیں کہیا۔ مولا علی دی خیر“

”کیوں اوئے دینیا ٹھیک اے؟“ مراد خاں نے غصے نال کچھیا۔

”مائی باپ۔ بالکل ٹھیک اے۔ بھاگ لگے رہن۔ میں آپ اوہناں نوں رات

ویلے پُراں والیاں ٹالھیاں پٹھ کھلوتیاں تے گلاں کر دیاں ویکھیا اے، مونو کبابیا اٹھ
کے سائیں سب ہناں دے کول آ گیا سی۔ مراد خاں نے اوہدے ول رجوع کیتا۔
”کیوں مولا داد خاں۔ کجھ تینوں پتا ہووے؟“

”بھاء کل پرسوں مینوں میرے گھر ملی سی۔ اوہنے وی ایہو جیہی گل کیتی سی جیہو جیہی
گل دینے نے کیتی اے“ ایہہ کہہ کے اوہ وی مصلے تے بہہ گیا۔

”گل سنجی اے تے پر سنجی ہووے گی“ مراد خاں نے سوچدیاں کہیا

”بڑی مہربانی سائیں سب تیری۔ توں مینوں دس دتا اے۔“

”مولا علی دی خیر۔ فقیر لوک جھوٹھ نہیں بولدے“ سائیں سب نے کہیا تے مصلے

تے لما پے گیا۔ مراد خاں لال اکھاں لے کے پنڈول تڑپا۔

مراد خاں سدھا گھر آیا۔ جد اوہ ویڑھے وچ وڑیا تے اوہنوں صنعی دالان وچ بیٹھی

نظر آئی۔ اوہ اوہدے کول چلا گیا۔ صنعی پیڑھی تے بیٹھی۔ چھتے وچ مہندی گھول رہی سی۔

اوہدے ہلن نال ونگاں تے چوڑیاں دا چھنکار سارے ویڑھے وچ کھلر جاندا۔ اوہ ایس

ویلے پیڑھی اُتے بیٹھی بالکل اپنی مرن والی ماں بختاور وانگ جا پدی سی۔

”صنعی میں مہندی نہیں لاواں گا“ مراد خاں غصے نال بولیا۔

”مینوں پتا اے تئیں باہروں کسے نال لڑکے آئے او تے غصہ میرے نال کر رہے اوہ“

صنعی نے بھولپن نال کہیا۔

”بالکل ایہو گل اے“

”میں تے ہُن مہندی گھول لئی اے۔ تئیں نہ لاؤ گے تے میں اپنے ہتھاں اُتے

لالواں گی۔“

مراد خاں نوں وٹ چڑھیا ہویا سی تے اوہدا دل چاہندا سی کہ صنعی نوں لٹاں بانہواں

توں پھڑے۔ سروں اُتاتانہہ اُلا رے تے زور نال زمین اُتے سٹے مرجاوے تے سبحان

اللہ نہ مرے تے اوہ فیراوس نوں لٹاں بانہواں توں پھڑے سروں اُلا رے تے زور نال

زمین اُتے سٹے۔ مرجاوے تے چنگا نہ مرے تے اوہ فیر صنعی نوں.....

”قاؤ آیا سی۔ تہاڈا کچھدا سی۔ میں کہیا مینوں نہیں پتا۔ میرا خیال اے اوہ حویلی

وچ بیٹھا ہویا اے۔“

صُغی دی گل سُن کے مراد خاں نے غصے نال کنڈ موڑی تے حویلی ول تڑپیا۔
جد اوہ حویلی پہنچیا تے قاڈو گھوڑی دی کھری وچ بیٹھا گھوڑی دے پتھے ٹھیک کر رہیا
سی۔ مراد خاں نوں ویکھ کے اوہ کھری وچوں نکلیا تے مراد خاں دے کول آ گیا۔
”مِراں دا بول ہویا اے۔ چل کے جوکھ لیو“ قاڈو نے کہیا۔

دُتے نوں کہو اوہ جوکھ کے میرے حصے دے مِراں گھر سُدے تے توں سویرے
میرے نال چلنا ایس تحصیلے۔ او تھے تحصیلدار نال اک ضروری کم اے“ مراد خاں نے کہیا۔
”بہت بچھا“ قاڈو نے کہیا تے مِراں دا وزن کراؤن چل پیا۔

(8)

دو بجے دن جُمعے نوں مراد خاں قاڈو نوں نال لے کے تحصیلے گیا۔ اوس قاڈو نوں کہیا
ہویا سی پئی تحصیلدار نال کم اے پر اوہ تحصیلدار دے کول جان دے بجائے بھرتی کرن
والے دفتر چلا گیا تے لیفٹیننٹ رام داس نوں سلام جا ماریا۔ قاڈو حیران سی پئی اوہدا تایا
اوہنوں کتھے لے آیا اے۔

تھوڑی دیر بعد پنڈاں دے منڈے او تھے ڈھانیاں بن بن کے آؤن لگ پئے
ایہناں منڈیاں نوں لیان والے پنڈاں دے نمبردار۔ ذیلدار، چوکیدار تے ہور عزت آبرو
والے بندے سن۔ بھرتی ہون والیاں وچ کجھ منڈے تے بس مَوئے مُکے ہوئے سن
جیہناں نوں غریبی لے آئی سی تے کجھ ایہو جیسے سن جیہڑے اپنی خوشی نال آئے سن۔ دوجی
قسم دے گبھرواں دے پیو یا تے پہلی وڈی لڑائی وچ لڑے ہوئے سن تے یا ایہہ
چاہندے سن پئی اوہنے ہر دے پتر بھتیجے سپاہی بھرتی ہون تے لیفٹیننٹ تے کپتان بن کے
واپس آؤن۔ کوئی وی ایہہ سوچن واسطے تیار نہیں سی پئی اوہ اپنے پالے پوسے ہوئے
گبھرواں نوں موت دی چتا وچ سٹ رہیا اے تے لڑائی دی قبر وچ پارہیا اے۔

جواناں نے کپڑے اتارے تے لین دوڑی بنائی۔ مراد خاں نے قاڈو نوں ہدایت
کیتی پئی اوہ وی لنگوٹا کر کے قطار وچ جا کھلوئے۔

”کیہدے لئی تایا؟“ قادو نے پچھیا

”بھرتی ہون لئی ہو رکا ہدے لئی“ مراد خاں نے رکھا جیہا جواب دتا:

”پر میں بھرتی نہیں ہونا چاہندا۔ میں بھرتی ہو گیا تے میری بھارتی لہ چار بے بے

دا کیہ بنے گا؟“

قادو نے بھرتی ہون دے خلاف دلیل دتی۔

”جے اوہ تیری بے بے اے تے میری بھرجائی لگدی اے۔ توں بالکل نہ گھبرا“

”گھبران والی گل نہیں۔ مینوں میری بے بے یاد کر کے روئے گی“ قادر نے کہیا۔

”روئے گی کیوں؟ اوہ تے سگوں خوش ہووے گی پئی اوہدا پتر بہادر اے تے لام

تے گیا اے“

”کچھ وی ہووے میں لام تے نہیں جانا۔ تئیں مینوں پہلاں دسدے تے

میں پنڈوں پیر نہیں سی پٹنا۔“

”قادو داد خاں میری گل سمجھ۔ میں لیفٹین رام داس نوں زبان دے چکاں واں“

”تایا زبان دین توں پہلاں مینوں تے پچھ لینا سی“ قادو رکھا بولیا۔

”مینوں تیرے اُتے مان سی پئی توں میری گل توڑ چاڑھیں گا۔ ایس واسطے میں

پہلاں تیرے نال گل نہ کیتی۔“

”تے پنڈ کیوں نہ دیا پئی میں قادو تینوں بھرتی کراؤن چلیا واں؟“

”ایس واسطے نہیں دیا کہ دس وچ فیدہ کوئی نہیں سی“ مراد خاں نے گول مول گل کیتی

”تایا مینوں تیری کیتی ہوئی گل دا خیال نہ ہووے تے میں بالکل بھرتی نہ ہوواں۔ پر

خیر رب جو کردا اے چنگا کردا اے“ قادو نے کپڑے اُتارے تے لام ڈوری وچ جا کھلوتا۔

لام ڈوری گھٹن لگ پئی۔ منڈے ترن لگ پئے۔ اک دوتن چار۔ اخیر قادو دی وی

واری آ گئی۔

”نام؟“ لیفٹین رام داس نے پچھیا

”قادو داد خاں“ قادو نے دھون اکڑا کے زور نال کہیا تے لیفٹین اوہدے مونہہ ول

ویکھن لگ پیا۔

”پیو داناں؟“

”بُوٹے خاں“

”زندہ یا مرحوم؟“

”پھانسی چڑھ گیا“ لیفٹیننٹ رام داس نے اک وار پھر قاؤ و نوں غور نال تکیا۔

”بھرتی کراؤن کون آیا اے؟“

”میں جناب۔ فرید پور دا نمبردار مراد خاں“ مراد خاں نے چھیتی نال کہیا۔

”عمر کنی اے؟“

”رب جاندا اے۔ میں کدے عمر دا حساب نہیں رکھیا“ قاؤ و نوں نے پوہے جیسے مونہہ نال کہیا۔

”جی لکھ لئو ویہہ اگلی سال“ مراد خاں نے مشکل حل کیتی۔

ڈاکٹر نے اگانہہ ودھ کے ایویں سرسری جیہیا معائنہ کیتا تے قاؤ و نوں دے چوڑے تے

گھلے سونے رنگے سینے تے سیاہی نال دو تن نشان لائے۔

”کاہدے وچ بھرتی ہوئیں گا؟“ رام داس نے پچھیا

”فوج وچ ہوواں گا ہور میں پٹوار وچ ہونا ایں“ رام داس ہنس پیا۔

”جوان لاگری بننا چاہنا ایں یا کچھ ہور؟“

”بس رفل چلاواں گا ہور کچھ نہیں کراں گا“

قاؤ و نوں نے فوجی رستم خاں کولوں سنیا ہو یا سی پئی اوس رفل نال چھبی بندے مارے

سن تے رفل چلاؤنا بہادران داکم اے۔

قاؤ و بھرتی ہو گیا تے مراد خاں خوشی خوشی پنڈ پلٹیا۔ اوہ سدھا روڑی کول گیا۔ روڑی

دروازے وچ بیٹھی اپنے پتر داراہ ویکھ رہی سی۔

”بھین روڑیے! قاؤ و نوں میں بھرتی کرا آیاواں“

”بھرتی کرا آیا ایں بھائی مرادیا؟“ مائی روڑی نے حیران ہو کے پچھیا۔

”آہو۔ اوہ تھے تحصیلے بھرتی ہو رہی سی۔ قاؤ و کہن لگا پئی تایا مینوں بھرتی کرا دے۔

میں تحصیلدار دی منت کیتی تے اوہنے قاؤ و نوں حوالدار بھرتی کرا دیتا“

”پر قاؤ و داد نے میرے نال کوئی گل نہیں سی کیتی پئی اوہ بھرتی ہون چلیا اے“

”بس ایویں اوہنوں خیال آ گیا تھیلے جا کے۔ میں نے اوہنوں بڑا منع کیتا پر اوہ
ضدای کرن لگ پیا“

”ہن میرا کیہ بنے گا؟ میرا تے تاپ ای نہیں اُتردا۔ اگے دشمنان نے اوہدا ڈھڈتے
سر پاڑ سٹیا سی ہُن اوہ بھرتی ہو گیا اے۔ بالکل اپنے پیوتے ہو یا اے رب ای خیر کرے“
”بھین روڑیے۔ بوٹے خاں تے پنڈ دا نک مونہہ سی۔ اوہدے بعد ہُن بوٹا
ساڈے پنڈ دا نک مونہہ اے۔“

”توں بھین روڑیے فکر نہ کر۔ میں وی تیرا بھرا جیونا آں۔ جو مرضی کھا ہنڈا“
”مینوں کھان پین دی بھکھ نہیں مرادیا۔ مینوں تے پانا قادر اکھاں سامنے ویکھن
دی بھکھ اے“

مراد خاں مائی روڑی دی روح دی بھکھ نہیں سی مکا سکدا ایس واسطے اوہ حویلی سدھا آیا۔
جد اوہ حویلی آیا تے سردار ہرنام سنگھ شکایت دے لہجے وچ بولیا:
”مراد خاں۔ توں اکھا ای تھیلے چلا گیا۔ مینوں نہیں نال کھڑیا“
”مراد خاں منجے تے بہندیاں ہو یاں بولیا۔

”ہرنام سیہاں۔ کم چھیتی داسی تے بڑا لازمی سی۔ میں قادونوں بھرتی کراؤن گیا
ساں تے کرا آیا آں“

”قادونوں بھرتی کرا دیتا ای مراد خاں“ ہرنام سنگھ دیاں اکھاں حیران سن۔ چہرہ
ایس واسطے حیران نہیں جا پدا سی پئی داڑھی چھاں بھروٹیاں تے کیساں وچ لگیا ہو یا سی۔
”آہو یار قادونوں بھرتی کروا دیتا اے۔ میں قادو تے صُغی بارے بڑیاں اولیاں
گلاں سنیاں سن۔ قادو پنڈ رہندا تے میری عزت دا پھٹکا نہیں سی رہنا“
”ہچھا ایہہ گل سی۔ فیر توں مراد خاں واقعی چنگی گل کیتی دا“

ایہدے بعد اوہ دوویں چپ چان ہو گئے تے ڈونگیاں سوچاں تے ویہناں وچ
دُب گئے۔

اوسے شامیں پریتو نے صُغی نوں جا دیا۔ صُغی پچھلے اندر جا کے منجے تے ڈگ پئی
تے مہندی وچ رُتھے ہوئے لال لال ہتھاں وچ مونہہ لکو کے دیر تک روندی رہی۔

سن 1944ء دا شروع سی تے انگریز تے امریکی فوجاں برما دے جنگلاں پہاڑاں۔
 وادیاں تے دریاواں وچ جاپان تے آزاد ہند فوج دے دلیر تے جوشیلے جواناں نال لڑ
 رہیاں سن۔ تن مہینے بھیڑی چنگی سکھلائی دے بعد قادی تے اوہدیاں ساتھیاں نوں برما
 دے جنگلاں وچ دشمن نوں مارن تے ہراؤن واسطے بھیج دتا گیا۔

کانگو تے برما دے جنگل دنیا دے سبھ توں بھیڑے جنگل نیں ایہہ گل قادی نوں
 سکھلائی دے دوران اوہدے انسٹرکٹر نے دتی سی۔

کانگو دے جنگل تے اوہ ویکھ نہ سکیا پر برما دے جنگل ویکھ کے اوہدا اُتے دا ساہ
 اُتے ای رہ گیا۔ اوس اپنی ہوش وچ کدے اس طرحاں دا جنگل نہیں سی ویکھیا۔ اوہ اپنے
 پنڈ کول وگن والی راوی دے بریتے وچ اُنھے ہوئے ککھ کان نوں ای جنگل سمجھدا سی پر
 برما دے جنگل ویکھ کے ساہ پھل گئے۔ اوس سوچیا جے جنگل ایسا اے تے اوس دے وچ
 وس والا دشمن کیسا ہووے گا پر اوہنوں فوجی رستم خاں دے لفظ یاد آ گئے۔

”فکر نہیں۔ رب مالک اے“ کہیا تے موہڈے اُتے رفل تے راشن پانی چک کے
 جنگل وچ جا وڑیا۔ اوہ اکلا نہیں سی۔ اوہدے نال اوہدے ورگے دو جے جوان دی سن تے
 اک افسری جیہڑا جواناں دی کمان کر رہیا سی۔

جنگل وچ قسم قسم دے درخت نیں ایہیہ درخت جیہڑے قادی نے ایس توں پہلاں
 نہ کدے دیکھے نیں تے نہ بھالے نیں۔ درختاں دے علاوہ ہور کئی قسم دا گھاہ بوٹ اے۔
 زین تے اُگنی نظر نہیں آؤندی درختاں دیاں ٹانہیاں تے لگراں آپس وچ پلچ سکتیاں ہویاں
 نیں تے پچے توڑن واسطے کلڑی (دراٹ ورگا ہتھیار) نال اوہناں نوں وڈھنا ٹکنا پیندا اے
 سویرے اٹھ وچے توں لے کے شامیں پنج وچے تیکر مشکل نال اٹھ نو میل پیندا مکیا اے
 اک گھنٹے وچ اک میل سفر کر لینا بڑی بہادری دا کم سمجھیا جاندا اے۔

عام طور تے ست اٹھ گز توں پرانہہ نظر نہیں جاندی بعضے بعضے تھاں تے اک گز توں
 اگے سوائے درختاں تے گھاہ بوٹ توں کجھ نظرای نہیں آؤندا۔

دن کیہ تے رات کیہ؟ ہاتھی۔ چترے تے کھڑے پے سب آدمی دی جان دے لاگو

نہیں۔ اوہناں کولوں تے اللہ ای بچا دے انسان دی اوہناں اگے کوئی واہ پیش نہیں جاندی۔
 برما دے جنگل وچ ٹھونہوا عام اے۔ ٹھونہوا لڑن نال بندہ مردا تے نہیں پر بے ہوش
 ضرور ہو جاند اے۔ بے ہوش نہ ہوئے تے تا پیا جاند اے تے کم کاج توں جاند اے۔
 جنگل وچ دو قسم دیاں کیڑیاں ملدیاں نیں لال کیڑی تے چٹی کیڑی۔ لال کیڑی
 اڈھے انچ توں لے کے پونے انچ تیک لمی ہوندی اے۔ ایہدے ڈنگ وچ زہر ہوندا
 اے تے ڈنگ انچ جسم وچ وچدا اے جیویں کھل وچ سوئی کھوب دتی جاوے۔ چٹی
 کیڑی دے ڈنگ وچ زہر زیادہ نہیں ہوندا پر اوہ کیڑیاں وچ مورییاں کری جاندی اے۔
 ایہہ کیڑیاں رات نوں بالکل سون نہیں دیندیاں۔ تڑپھا پائی رکھدیاں نیں۔
 برما دے جنگل وچ کیڑیاں تے سر دیاں والاں وچ جوواں عام پلدیاں نیں تے
 جان عذاب وچ پائی رکھدیاں نیں جے جوواں مارن ول پے جاوے تے چا پانی تہانوں
 جوواں وانگ مار دین گے۔ ایس واسطے جووان لڑدے نیں تے جوواں پلدیاں نیں۔
 فیر تھان تھان تے نکلیاں نکلیاں پہاڑیاں نیں۔ ایہناں پہاڑیاں اُتے چڑھنا تے
 جے کسے نہ کسے طرحاں چڑھ گئے تے اُترنا بڑا مشکل اے۔ ہر ویلے مینہ وسدا رہندا
 اے تے ہر ویلے پیر تلکھن دا دھڑ کو پچھے لگا رہندا اے۔ پیر تلکھیا تے تسیں کسے چھپر ٹوئے
 یا کھڈ وچ ڈگے تے پھر باہر نہ نکل سکتے دن رات بارش ہون کارن کپڑے لیڑے ہمیش
 گلے رہندے نیں درختاں دے پتے وی ہمیشہ گلے ہوندے نیں تے ایہناں پتیاں نال
 جوکاں چھڑی وانگ چھبر کے لکیاں رہندیاں نیں تہاں تہاں تہاں جے تسیں کتے کھلو جاوے
 تے اوہ جوکاں تہاڈے جسم دی خوشبو یا بوسنگھ کے تھلے گلے سڑے پتیاں اُتے پیندیاں نیں
 تے تہاڈیاں بوٹاں تے پتلوناں ول ودھ دیاں نیں جے کتے اوہناں نوں تہاڈے جسم نال
 مونہہ لاؤن دا موقع مل گیا تے اوہ تہاڈا لبو پی کے بوری وانگ پھل جاندیاں نیں۔ رات
 نوں مکھیری مکھی دے قد کاٹھ دا مچھر ڈھیاں وانگ تہاڈے اُتے ڈگدا اے تے تہاڈے
 گوشت تے کھل وچ رندے وانگ ڈنگ پھیردا اے۔ زہریلے پچھر دے ڈنگ مارن دے
 بعد جنگلی تاپ چڑھدا اے تے بندے نوں اُگن جمن جوگا نہیں چھڈدا۔ دوجی عام ہماری
 پچس تے تیجی ہماری تے دا بار بار آنا۔

برما دے جنگل وچ اک خاص قسم دی بدیو ہوندی اے۔ ایہہ بدبو گھٹ تے شاہن بہتی ہوندی اے۔ ایہہ درختاں دیاں پتیاں۔ لگراں۔ ڈاہنیاں تے گھاہ بوٹ دے کتھ کان چھپڑاں وچ ڈگدا رہندا اے تے گلداسر دا رہندا اے۔ ایہدی وجہ نال ہوا وچ اُشاہن تے ساڑو سیا رہندا اے۔ ایہہ بدبو تے شاہن تہاڈے کپڑیاں وچ وڑ جاندی اے تے اودوں تیک نہیں نکل دی جد تیک تئیں کپڑے گرم پانی نال دھو نہیں ہوندے تے آپ نہا نہیں لیندے۔

ایسے جنگل وچ تہاڈی جان دا ویری رہندا اے۔ ایس دشمن ویری دا تہانوں کوئی پتا نہیں۔ ہوسکدا اے اوہ اُلاہنگاں اگے کسے بوجھے اوہلے یا ہاتھی گھاہ (بندے دے سروں اچا گھاہ) وچ لُک کے بیٹھا ہووے۔ جد تئیں پیر چک کے اگے رکھو تے اوہ اپنی بانہہ ودھا کے تہاڈے سینے وچ پھڑا تاڑھ دے۔ ہوسکدا اے اوہ تہاڈے پچھے آ گیا ہووے تے تہاڈے لک دی سنگھی وچ گولی مار کے تہانوں موہندیاں کر دے۔ اینج وی ہو یا اے کہ دشمن دی تعداد ڈیڑھ سواے۔ اک بندہ سبھ توں اُگے اے تے باقی 149 بندے دس ویہہ گز پچھے لُکے بیٹھے نیں تئیں اک بندہ مار ڈگایا اے تے بہت خوش او۔ تہاڈی خوشی اودوں مک جاوے گی جدوں 149 بندے تہاڈے اُتے پُپ چپتے حملہ کرن گے تے تہاڈے تریہہ (30) چالی (40) بندے مار کے دوڑ جان گے۔ حقیقت ایہہ اے کہ برما دے جنگل وچ دشمن دی ٹھیک گنتی دا اندازہ لاؤنا بہت ای مشکل اے۔

اک انگریز افسر دے خیال وچ برما دی لڑائی گوشت تے ہڈیاں دے بنے ہوئے بندیاں دی لڑائی نہیں۔ لوہے دے بنے ہوئے جوناں دی لڑائی اے جند جان والے بہادر دلیر تے چالاک جوناں دی لڑائی۔

ایہہ لڑائی ہور وی مشکل ہو گئی اے کیوں جے برما وچ جاپانی سپاہیاں دے نال نال آزاد ہند فوج دے جوان وی لڑ رہے نیں اوہ انگریزاں دے ماتحت لڑن والے ہندوستانی سپاہیاں دی زبان سمجھدے نیں۔ ہندوستانی سپاہیاں دے لڑن دے طریقے دا اوہناں نوں پورا پورا پتا اے۔ تے اوہناں دا نعرہ وی بڑا جذباتی اے۔ ”جے ہند“ تے ”وٹی چلو“ دے نعریاں وچ اک خاص قسم دی دل کھویں کشش اے تے من بھوندا سہپن اے۔ اوہ علیحدہ

چیز اے کہ آزاد ہند فوج نہ آزاد اے نہ ہندوستانی اے تے نہ فوج ای اے آزاد ایس واسطے نہیں پئی جاپانیاں دے ماتحت لڑ رہی اے۔ ہندوستانی ایس واسطے نہیں کہ اوہ برما تے ملایا وچ لڑ رہی اے ہندوستان دی دھرتی تے نہیں لڑ رہی تے ہندوستانی لوک اوہناں دے نال نہیں۔ فوج ایس کر کے نہیں کہ لڑن والیاں نے فوجی ڈسپلن توڑیا اے جیہڑے جوان تے افسر فوجی ڈسپلن توڑ دین اوہ فوجی گہان دے حق دار نہیں۔ ہمیش آزادی واسطے پوری قوم لڑ رہی اے۔ جیہڑے وچ فوج وی شامل اے۔ قوم دے بغیر اکلی فوج آزادی نہیں جت سکدی۔

(10)

انگریزی فوجاں مونٹ بیٹن دی نگرانی وچ جاپان تے آزاد ہند فوج دے خلاف لڑ رہیاں نیں۔ کلکتے وچ امریکہ دیاں فوجاں اُتریاں نیں۔ امریکہ دے ہوائی جہاز تے سمندری بیڑے جاپانی طاقت نوں سمندر وچ تے خشکی اُتے ملیا میٹ کر رہے نیں۔ ہتھیاراں دی کمی ڈھڈی بھٹکھ تے جاپان دی دغا بازی دی وجہ کر کے آزاد ہند فوج دے جوان مر رہے نیں تے مار کھا رہے نیں۔ جاپان اوہناں دا کچھ ایس واسطے نہیں پور سکدا کہ اوہ آپ شکنجے وچ پھس گیا اے۔ اوہدی اپنی واہ پیش نہیں جاندی۔ نتیجہ ظاہر اے انگریزاں دے ماتحت لڑن والے ہندوستانی جوان شیر ہو گئے نیں۔ ہُن اوہناں دی واری اے پئی اوہ جاپانیاں تے اوہناں دیاں ساتھیاں کولوں چُن چُن کے بدلہ لین۔

مارچ 1944ء دا مہینہ شروع ہو گیا اے۔ قادو تے اوہدے دو بے یار بیلیاں نوں اگانہ و دھن دا حکم مل گیا اے۔ اوہ برما دے اک جنگل وچ رستہ صاف کر دے تے راہ کڈھدے آگے ودھ رہے نیں۔ اوہناں اک نومنی دے کنڈھے ہالٹ بولیا اے۔ اوہ رات ایس نومنی دے کنڈھے رہن گے تے سویرے دشمن دی سوہ لین واسطے نومنی پار کرن گے۔ ایہہ گروپ ریکی گروپ، اے۔

ترکالاں پے گئیاں نیں۔ ہنیرا ودھ گیا اے۔ جنور پُوں پُوں کر دے اپنے اپنے آکھیاں ول جا رہے نیں۔ جنوراں دیاں بولیاں قادو تے اوہدے ساتھیاں نوں اوہناں ویریاں

دیاں چیرکاں جا پدیاں نیں جیہناں نوں اوہ مار دے تے کپدے ایتھوں تیک آئے نیں۔
 اوہ گل ست نیں۔ قادو۔ چونی لال۔ رام سروپ، کچھمن سنگھ، فتح سنگھ، اگوتے شبنو،
 چونی لال لیفٹینن اے تے باقی اوہدے ماتحت نیں۔ اوہ سارے نومنی دے پارلے پاسے
 ریکی تے جا رہے نیں اوہ گل دشمن دی تعداد تے طاقت دی سولے کے تے جاسوسی کر کے
 اپنے وڈے افسراں نوں اطلاع دین گے تاں جے اگانہہ ودھ کے حملہ کیتا جاوے۔

”تن تن آدمی پنج پنج گز تے مورچے کڈھ لئو۔ ایہہ پتن معلوم ہوندا اے ایسا نہ
 ہووے دشمن دے جوان رات ایسے پتن توں ساڈے ول ودھن“

چونی لال نے حکم دتا اے تے گکڑی نال ککھ کان پرانہہ ہٹاؤن لگ پیا اے۔ باقی
 جوان وی کھائی مارن واسطے تیار ہو گئے نیں۔

نومنی دے دونوں پاسیں جنگل اے۔ درختاں دیاں لگراں پانی وچ ڈگیاں ہویاں
 نیں نومنی اوتلی اے پر پانی تیز اے۔ پانی وگن دا شور گناں وچ پے رہیا اے۔

”تہاڈے سریر دا کوئی حصہ ننگا نہ رہوے۔ نہیں تے جوکاں نیں تہاڈا لہو پی لینا ایں“
 چونی لال کہہ رہیا اے۔

دور کتے توپ دا گولہ چلن دی بار بار آواز گونج رہی اے۔ لاگوں دو الوواں دے لڑن
 دیاں آوازاں آ رہیاں نیں۔ انج معلوم ہوندا اے جیویں اوہ کسے شکار توں لڑ رہے ہوں۔

”لیفٹینن صیب۔ ایہہ پتیاں وچوں مینوں تلوار لبتھی اے“ اگوتے چونی لال نوں تلوار
 چک کے دسدا اے۔

”ایہہ جاپانی لیفٹینن دی تلوار اے۔ سانہہ کے رکھ۔ کل میجر صاحب نوں دیاں“
 چونی لال تلوار ویکھ کے اگوتوں کہندا اے۔

”ایہہا مطلب ہو یا پئی جاپانی اج یا کل اتھے بیٹھے کھلوتے نہیں تے ایس ویلے اوہ
 کتے ساڈے لاگے شاگے نیں“ قادو بولیا:

”بالکل درست اے تیرا خیال۔ جاپانی نومنی دے پرلے کنڈھے ہوسن ممکن اے اوہ
 سانوں ایس ویلے ویہندے ہوں“ لیفٹینن نے کہیا۔

”صاحب ایہہ ویکھو کیہ اے؟“ فتح سنگھ تیجے مورچے لئی زمین ٹنب رہیا سی۔ اوہ

اوتھوں زور نال چکیا۔

”ہولی بول فتح سیہاں ہولی بول۔ ایویں نہ آپوں مریں تے سانوں مروائیں ہاں
کیہ اے؟ بھٹی یہ تو کاغذ کا پرزہ ہے“ لیفٹین چونی لال بولیا:

”صاحب۔ ایہہ گورکھی وچ کجھ لکھیا ہو یا اے“ فتح سنگھ سپاہی ایدکیں ہولی بولیا:
”میرے کول آ کے پڑھ۔ مینوں گورکھی نہیں آؤندی“ چونی لال نے فتح سنگھ نوں
بلایا پر قاؤ۔ رام سروپ۔ کچھمن سنگھ۔ اگو تے شیفو وی اپنا کم چھڈ کے کول آ کھلوتے۔
”صاحب میں اُن پڑھ واں“ فتح سنگھ لاچاری نال بولیا۔ کچھمن سنگھ نے اوہدے
کولوں کاغذ دا پرزہ پھیڑ لیا تے پڑھن دا جتن کرن لگ پیا۔ پر ہنیرا واہوا ہو گیا سی تے
گورکھی پنسل نال لکھی ہوئی سی۔

”سارے دائرہ بنا کے بہہ جاؤ“ چونی لال نے کہیا تے سارے پیراں بھار بہہ
گئے۔ لیفٹین نے نارچ جگائی تے کاغذ تے لوستی۔ کچھمن پڑھن لگ پیا۔
”کجھ بول تے ماہیے دے نیں تے باقی کجھ ہور گون نیں۔“ کچھمن سنگھ کاغذ اُتے
نظر مار کے بولیا۔

”چھیتی نال پڑھ۔ ہور وی کم کرنا اے“ لیفٹین دے لہجے وچ تلخی سی۔
”لکھیا اے جی“

(1) مَہل کھڑ دے بہاراں دے

بِرا سیں سکہ دے نہیں

ہُن دُکھڑے یاراں دے

(2) کوٹھے اُتے پلپیا ای

نی سچ دس تُوں سوہنیئے

کدے یاد وی کیتا ای

(3) چھپڑی وچ انب تر دا

ایس جدائی نالوں

رَب پیدا ای نہ کردا

”ایہہ جی اگے تن چار بولیاں لکھیاں ہویاں نہیں“ کچھمن سنگھ بولیا:
 ”پڑھی چل۔ پڑھی چل“ چونی لال نے ہتھ نال چھیتی پڑھن دا کاشن دتا
 کھٹن گیا تے کھٹ کے لیاندا آرا (1)

تیری میری نہیں نبھنی
 توں تیلن میں سنیا را
 سانوں مسیا ج پین بھلیکھے (2)

تیری وے سندھوری پگ دے
 ننگا رکھدی کلپ والا ہاسا
 تے جیٹھ کولوں گھنڈ کڈھدی (3)

”ایہہ جی اگے جند دا لکھیا ہویا اے“ کچھمن سنگھ بولیا:
 ”کچھمن سیہاں۔ پڑھدا چل۔ رُکنا کیوں ایں؟“ چونی لال نے چڑ کے کہیا

جند دا جے چلیوں تلوٹدی (1)
 او تھوں لیا نوں بڈھی رنڈی
 او ہدے کن وچ پانویں ڈنڈی
 او ہنوں وچکن جانویں منڈی
 اک پل بہہ جانا بہہ جانا میرے چندا
 وچھوڑا ہائے بھناں دا مندا

جند دا باجرے دیاں سٹیاں (2)
 میلہ ویکھن آیاں جٹیاں
 ہا سے بلھاں تے ہتھ وچ پکھیاں
 اک پل بہہ جانا۔ بہہ جانا میرے چندا
 وچھوڑا ہائے بھناں دا مندا
 جے ہند۔ دلی چلو۔ پریتو سے ملو
 سردار کرپا سنگھ لبانا آف اوگرہ“

قاؤو کہتے ایہہ اوہ آدمی تے نہیں جیہدی گل تُوں مینوں پرسوں رات سنائی سی“ اگو
تے پچھیا

”آہو۔ ایہہ اوہو آدمی اے“ قاؤو نے افسوس نال کہیا۔

”اوہو کون قادر داد خاں؟“ چونی لال نے پچھیا

”صاحب۔ ایہہ آدمی میرے گراں دے لاگے اک دو بے گراں اوگرے واسکھ
اے۔ ساڈے پنڈ منگیا ہو یا اے۔ پرتو ایہدی منگ داناں اے۔ ایس وساکھی وچ چوری
میرے ڈھڈ وچ بلم ماری سی تے بھرتی ہو گیا سی۔ پتا نہیں آزاد ہند فوج وچ کیویں
آ گیا؟“ قاؤو بولیا۔

”کسے لڑائی وچ جاپانیاں دے قابو آ گیا ہو یگا۔ اوہناں کہیا ہو یگا پئی چول کھاتے
ساڈی مخبری کر۔ یا ہو سکدا اے کسے غدار افسر نے بیوقوف بنایا ہوئے۔ چلو سر چھپاؤن
جوگے مورچے پٹو۔ اوتوں ہنیرا ہو گیا اے“ چونی لال نے حکم دتا۔

دوروں توپاں چلن دی آواز آ رہی سی تے کولوں دی وگن والی نومنی دے پانی دا شور
اچا ہو گیا سی۔ سب سلونیاں دیاں آوازاں کناں وچ ڈر، خوف تے دہشت گھول رہیاں
سن۔ بارش بند سی تے آسمان اُتے بدل تاریاں دے اُلٹ پاسے دوڑ رہے سن جوان نومنی
دے اوتوں دی نگاہ مار دے سن تے بدل تے تارے نظر آؤندے سن تے بے اباؤٹ ٹرن
ہو کے پچھوں ویہندے سن تے کجھ وی نظر نہیں سی آؤندا۔ بس جنگل سی تے جنگل وچوں
سب سلونیاں دیاں رُوح قبض کرن والیاں آوازاں۔

لیفٹیننٹ چونی لال دا مورچہ وچکار سی تے اوہ اکلا سی۔ اوہدے کھتے پاسے مورچے
وچ فتح سنگھ۔ اگو تے رام سروپ بیٹھے سن۔ بچے پاسے قاؤو۔ شیفو تے کچھمن سنگھ ڈٹے
ہوئے سن۔ مورچیاں وچوں بچا کے وجن دیاں آوازاں آرہیاں سن۔ سارے شام دا
راشن ختم کر رہے سن۔

اوہناں دے سامنے ڈھائی تن گز دے فاصلے تے نومنی وگ رہی سی تے کچھے جنگل
سی۔ اوہ سارے پُچ سہمے ہوئے تے اداس سن موت اوہناں نوں گھیر کے اک ایسے تھاں
لے آئی سی جتھوں بچ نکلا۔ کسے مہاتما۔ پیغمبر تے گرو واسطے وی مشکل جا پدا سی۔

اوہ پچھلے دو تن مہینیاں تو لڑ رہے نیں۔ اوہناں تے اوہناں دے ساتھیاں نے موت دیاں اکھیاں وچ اکھیاں پائیاں نیں موت نال دست پنچہ ملایا اے۔ زندگی نوں اپنے ہتھوں نکلدیاں ویکھیاں۔ زندگی روندی تے گر لاؤندی اے موت کولوں ہاری اے۔ حیاتی نے فنا دا روپ دھاریا اے ددھ مکھناں دے پلے گبھرو گولی کھا کے تڑپھے نیں تے تڑپھ کے ٹھنڈے ہو گئے نیں زخمی ہون والیاں نیں اپنیاں دور بیٹھیاں ماواں نوں مدد واسطے پکاریا اے۔

کنبدیاں ہتھیاں۔ روندیاں اکھاں تے اڈے ہوئے پلایاں نیں دُور جنگلاں وچ لڑدے مردے پتراں نوں دعاواں دے ذریعے مدد پہنچائی اے۔ رام۔ رجم تے واہگرو دے لفظاں نیں حوصلے ودھائے نیں۔ پر ایہو جہیا موقع تے کدے نہیں آیا پئی زندگی تے موت پنچے وچ پنچہ پا کے اک دو جے نوں ہران لئی چارہ مار رہیاں نیں پر فیصلہ نہیں ہوندا۔ اوہ سارے پُچ چان۔ اداس تے خوف کھائے بیٹھے نیں۔ انج بیٹھے نیں جیویں نومنی تے جنگل دے وچکار کوئی وی نہیں ہیگا۔ تے جے اوہ ہے نیں تے دشمن نوں دسنا چاہندے نیں کہ اوہ نہیں ہیگے۔ نومنی تے جنگل دے وچکار اوہناں دی موجودگی حقیقت اے پر اوہناں دی کوشش اے ایس حقیقت دا علم کسے نوں نہ ہوئے ہوسکدا اے نومنی دے دو جے کنڈھے وی دشمن ہوئے تے اوہ وی کوشش کر رہیا ہووے کہ اوہدے دو جے کنڈھے بیٹھے دشمن نوں اوہدی موجودگی دا علم نہ ہوسکے۔

پر دو دشمن کدوں تیک اپنی حقیقت چھپاؤن گے اوہ صدیاں تیک تے اپنی اپنی جگہ تے نہیں بیٹھے رہن گے۔ اوہناں نوں اخیر اک دو جے دے سامنے آؤنا ایں۔ فیر اوہ سامنے آ کیوں نہیں جاندے؟ پر سامنے آؤن وچ موت دا خطرہ اے۔ ہار دا خطرہ اے۔ جان دا خطرہ اے۔ ایس خطرے تے قابو پانا بہادری اے۔ اصل تے نرول بہادری۔

”ساؤن دیا بدلا کتھے لائیاں نیں اوراں

اتھے میری نتھ گواچی۔ ڈھل گئے نیں

چن لئے نیں موراں

ڈھول والیا وے“ آواز وچ اداسی اے

”لیفٹین صاحب۔ کرپا۔ ایہہ کرپے نیں سد لائی اے“ سچے مورچے وچوں قادو

دھون چک کے چھیتی نال بول اٹھیا۔

”جنایاں تے بے وقوف اے تے یا پھر بہادر“ لیفٹین چونی لال بولیا: ”ایہہ اکھا

نہیں۔ ایہدے نال بہت بندے ہوسن پر پندراں توں ودھ نہ ہوسن“

”لیفٹین صاحب۔ مینوں اجازت دیو۔ میں وی کرپا سنگھ دا جواب دیاں“ قادو نے

التجاکیتی۔

”توں بے وقوف ایس یا بہادر؟“ چونی لال نے پچھتیا

مینوں نہیں جی پتا پئی میں مورکھ واں یا بہادر پر رب جاندا اے میرا دل کہندا اے

میں وی جواب دیاں“ قادو نے کہیا:

”لادے پھرتوں وی سد۔ اج ویکھی جاؤ گی“ چونی لال بولیا۔

”ندیوں پار کھلوتیا کیہ وڈھنا میں؟

میں تے وڈھنا میں برناں

اوئے شیراں دے سن گھورنے

مل لئے نی ہرناں

ڈھول والیا جوانا اوئے“

قادو دی آواز جنگل وچ تے نومنی اُتے گونجی تے کتاں وچ گونجی رہی۔ قادو دی

آواز پچھان کے نومنی دے دو بے کنڈھے توں کرپا سنگھ نے موٹی ساری گالی دتی تے بولیا:

”اوئے قادو جیونا ایس؟“

”اوئے آہو جیونا واں۔ تینوں مارن لئی“ قادو نے اُچی ساری کہیا کرپا سنگھ نے کوئی

جواب نہ دتا۔ تھوڑی دیر بعد گولیاں دا چھٹا دجّاتے پھر خاموشی دا پہرہ لگ گیا۔ گولیاں قادو

ہوراں دے سراں توں وی لنگھ کے درختاں وچ گھب گیاں۔

لیفٹین چونی لال تے اوہدے جوان ساری رات جاگدے رہے تے اکھاں نومنی

تے تاڑے لا رکھیاں پر نہ تے دو بے پاسیوں کرپا سنگھ دی کوئی آواز آئی تے نہ ای کوئی

گولی چلی۔ چونی لال دا خیال سی کہ کرپا سنگھ نے اوہدے ساتھی واپس جا پانیاں نوں اطلاع

دین گئے نیں۔

رات دا پچھلا پہر سی۔ سب سلونیاں نے وی چپ وٹ لئی سی تے اسماناں دے
تارے بدل وچ لگ گئے سن۔ کنیاں درختاں دے پتیاں تے ٹپ ٹپ ڈگ رہیاں سن۔
جواناں دیاں اکھاں وچ نیند دس رہی سی تے اوہ نیند دا مقابلہ کر رہے سن۔ ساری رات
مورچیاں وچ بیٹھے بیٹھے اوہناں دے جسم پیر منن لگ پئے سن۔

اچانک قادو نوں محسوس ہويا پئی کئی پہر ہولی ہولی نومنی دی ریت تے چل رہے
نیں۔ اوس کن زمین نال لا کے پوک لئی واقعی ریت دی کرچ مریج اوہدے کتاں وچ
پے رہی سی۔

”لیفٹین صاحب۔ دشمن“ اوس ہولی جیہی کہیا تے شیمو نے کچھمن سنگھ نوں بلوئیا۔
اوہناں چھتی نال اکھاں کھول دتیاں۔

پھر اک دم لیفٹین دے کھتے پاسے مورچے وچ گرینیڈ وجیا تے چیک جھاڑا پے گیا۔
کرپا سنگھ تے اوہدے چار ساتھی ”جے ہند“ دا نعرہ مار کے لیفٹین چونی لال دے مورچے
ول سدھے۔ شیفو تے کچھمن سنگھ نے انھیاں گولیاں چلایاں۔ کرپا سنگھ دے دو ساتھی
لیفٹین صاحب دے مورچے ول ودھے پر ڈگ پئے۔ چونی لال مورچے وچوں باہر نکل
آیا سی تے اوہدے ہتھ وچ چھرا سی پر کرپا سنگھ وی رفل دی سنگین چونی لال دے سینے
دے آر پار ہو گئی تے لیفٹین پکھوڑ مورچے وچ ڈگ پیا شیفو دی گولی کرپا سنگھ دے وجن
دے بجائے دو جے سکھ دے لگی تے اوہ وی ڈگ پیا۔ اک گولی شیفو دے لگی تے اوہ
گچھو گچھو ہويا تے مورچے وچ ڈھے پیا۔ کچھمن سنگھ نے مورچے وچوں باہر چھال ماری
تے مدھرے قد دے جاپانی نوں جا پھڑیا۔ کرپا سنگھ نے زور نال چیک ماری تے ”جے
ہند“ دا نعرہ مار کے سنگین نال قادو تے وار کیتا۔ رکھن والے دے راہ نیارے۔ قادو پاسہ
وٹ گیا تے کرپا سنگھ مونہہ بھار مورچے وچ ڈگیا۔ قادو نے دراٹ پورے زور نال کرپا
سنگھ دی بجی وکھی تے ماریا تے لہو دا فوارہ چھٹ پیا۔

”اوائے قادو مینوں بچالے۔ اوائے میں مرنا نہیں چاؤندا“ کرپا سنگھ چچلایا فیر اوس
اپنا کھتا ہتھ کھیسے وچ پایا۔ باہر کڈھیا تے قادو ول ودھا کے بولیا۔

”قادو! توں وی مینوں نہیں بچا سکدا۔ تیرے ہتھوں مرنا میری قسمت سی۔ ایہہ لے

میری مٹھی وچوں چھاپ۔ ایہہ چھاپ، ایہہ مندری پنڈ جا کے میری پرتیونوں دیویں۔ تے
 تے کہویں ایہہ کرپے نے مرن ویلے تینوں دتی سی۔“
 کرپا سنگھ دا اٹھیا ہویا ہتھ ڈگ پیا۔ قادو نے چھیتی نال اوہدی مٹھی وچوں سونے
 دی مندری کڈھ لئی۔

کرپا اک وار پھر ترین لا کے بولیا:

”ایہہ چھاپ میں پرتیونوں وسا کھی دے میلے وچ دینا چاؤندا ساں پر میتھوں تینوں
 بلم لگ گئی تے میں پلس کولوں جان بچان لئی دوڑ گیا۔ ہائے اوئے۔ دوڑ گیا تے موگے جا
 کے بھرتی ہو گیا تے اج؟ اج قادو تیرے ہتھوں مر رہیاں.....“ کرپے دی آواز ڈب گئی
 اوہدا سارا سریر آخری واری کنیا تے پھر اوہ اپنے لہو وچ مونہہ بھار ڈگ پیا۔
 ”واہ اوئے سکھا! بہادر دی موت مر یا ایں۔ جیوندا رہیا تے تیری امانت تیری پرتیو
 نوں پہنچ جائے گی۔“

لوڈا ڈھی ہو گئی سی۔ لال سورج نومنی دے اوس پاروں نیلے اسمان تے چڑھدا انج
 جاپدا سی جیویں اسمانی رنگ دی چھتری وچ گلاب دا پھل تر رہیا ہووے۔ قادو نے ویکھیا
 کرپا سنگھ تے اکو مورچے وچ اک دوجے نال گلوکڑی پا کے ڈگے ہوئے نیں۔ اوہناں دا
 خون اک مک ہو گیا اے۔ ذات کذات دی وتھ مٹ گئی اے موت نے مکا دتی اے۔
 لیفٹین چونی لال اپنے مورچے وچ ٹھنڈا ہو گیا سی۔ اوہدا مونہہ اسماناں ول سی تے
 اکھاں تاڑے لگیاں ہویاں سن۔

کچھن سنگھ نے مدھرے قد والے جاپانی نوں مار دتا سی پر آپ بُری طرحاں زخمی ہو گیا
 سی اوہدا متھا پھٹ چکيا سی تے اوہ بے ہوش سی۔

لیفٹین چونی لال دے مورچے دی پہاڑ والی گٹھے دو ہندو جیہڑے شیفو دی گولیاں
 نال مرے سن۔ زمین تے سپاڑ پٹے ہوئے سن۔ فتح سنگھ اکو تے رام سروپ مورچے وچ
 قابو آ گئے سن تے گرینیڈ نے اوہناں دے تونے اڈا دتے سن۔ مورچے وچ گوشت دے
 لوتھڑیاں دا ڈھیر پیا ہو یا سی۔

قادو نے کچھن سنگھ نوں ماڑی چنگی ملہم پٹی کیتی تے خون بند ہو گیا۔ ہُن قادو لئی

سوال پیدا ہو یا پئی کچھمن سنگھ نوں لک تے پا کے واپس چوکی لے جاوے یا نومنی توں پار ہو کے دشمن دی سُوہ لوے۔ اوہ سوچاں وچ دُب گیا۔

(11)

قاؤو نے سوچیا اوہناں دے گروپ نوں سویرے نومنی دے پار جا کے دشمن دی طاقت تے تعداد دا پتا سولین واسطے بھیجیا گیا سی۔ لڑائی لڑن واسطے ایہہ اطلاع بڑی ضروری اے۔ جے ایہہ اطلاع نہ ملے تے ہنیرے وچ ہتھ مارن والی گل ہوئے گی۔ ہوسکدا اے اطلاع دے بغیر لڑائی دی جیہڑی سکیم بنے اوہ کچی نکلے تے اوہدی پوری دی پوری کمپنی دشمن کولوں مار کھا جاوے۔ کئی قیمتی جوان زندگی توں ہتھ دھو بہن۔ ایس واسطے لازمی اے پئی نومنی ٹپ کے اوہ اکھا دشمن دی طاقت تے تعداد دی سُوہ لوے۔

پر اوہ اکھا اے۔ ایویں نہ کہتے اوہ نومنی ٹپے تے اگلے کنڈھے توں کسے جاپانی یا آزاد ہند فوجی دی گولی۔ چھری یا سنگین دا شکار ہو جاوے۔ پہلے ای اوہدی جان بڑی مشکل نال پچی اے۔ جتھے دس بندے دو جے مرے تے یارہواں اوہ وی مر سکدا سی۔ موت دا خیال کر کے قاؤو نوں بھنی جیہی آئی تے اوس لما ساہ لیا۔ پر اوہ اکھا کچھمن سنگھ نوں چک کے کیویں بے پناہ جنگل دا ست اٹھ میل پنڈا مارے گا۔ انج نہ ہوئے کہ راہ وچ کچھمن سنگھ مر جاوے۔ اوہ جا کے کپتان صاحب نوں کیہ کہوے گا کہ اوہدے نال دے سارے مر گئے نیں۔ دشمن دے بہن کھلون تے تعداد دا کوئی پتا نہیں لگا تے کچھمن سنگھ راہ وچ مر گیا اے۔ ایہہ کہندیاں اوس نوں شرم نہ آوے گی؟

پھیر؟ فیر کیہ کیتا جاوے؟ دلیری کراں تے ماریا جاواں۔ موت کولوں ڈراں تے شرمندگی دا بھار چٹکاں۔ کم دوویں اوکھے نیں۔ کیہ کیتا جاوے؟ اوس گوڑ لایا۔ نقشے موجب نومنی دے پار اک ڈیڑھ میل دے فاصلے تے پنڈا اے۔ اوس نوں پنڈ جان تے آون وچ گھٹ توں گھٹ دو گھنٹے تے ودھ توں ودھ تن گھنٹے لگن گے۔ کچھمن سنگھ بیتاں گھنٹیاں وچ مر نہیں سکدا۔ جے اوہ بچ گیا تے پنڈوں دو بندے لے آوے گا جیہڑے کچھمن سنگھ نوں آرام نال چک کے چوکی چچا دین گے۔

پر جے ایس پنڈ وچ جاپانیاں دی چوکی ہوئی تے پھیر؟ ہوسکدا اے ایہہ پنڈ جاپانیاں دے اثر رسوخ وچ ہووے تے لوک اوس نوں پھڑ کے جاپانیاں دے حوالے کر دین تے جاپانی اوس نوں درخت نال بنھ کے تے اوہدیاں پٹاں وچ سنگنیاں کھوب کے ”کچھن“ دس تیری کئی نفری اے تے اوہ کتھے نیں تے تہاڈیاں سکیمیاں کیہ نیں؟“

پھیر؟ فیر کیہ کیتا جاوے؟ پنڈ جاواں تے ماریا جاواں۔ پنڈ نہ جاواں واپس چوکی جاواں تے کیہ جا کے کہواں؟ موت تے شرمندگی؟ دوویں کم اوکھے نیں۔

قاؤو نے گرینڈ، رفل تے ککڑی چلے تے رب داناں لے کے نومنی دے ٹھنڈے ٹھیر پانی وچ پیر پادتا۔ دوسرے کنڈھے جا کے اوس کھبے بچے تکیا۔ اوس نوں کوئی نظر نہ آیا۔ اوس زمین تے کن لاکے سنیا۔ جنوراں تے پانی دیاں آوازاں اوہدے کناں وچ آئیاں۔ اوہ زمین توں اٹھیا تے دھون چک کے پنڈ ول تڑپیا۔ چار چوہیرے جنگل سی تے وچکار زمینوں اُچے کر کے ونجاں دے کوٹھے اُسرے ہوئے سن۔ اوس اپنے بچے ہتھ وچ گرینڈ پھڑیا تے پنڈ وچ جاوڑیا۔ پنڈ وچ ککڑ ککڑیاں دا ککارا پیا ہویا سی۔ دو تن گھراں وچوں دھواں اُٹھ رہیا سی اوس سوچیا جے مرنا ای اے تے پھر بہادراں وانگر مرو۔ تھڑ کے مرنا وی کوئی موت اے۔

پنڈ وچ وی جنگل وانگ دھوڑ پئی ہوئی سی تے پنج چھ گز توں بندے نوں چنگی طرحاں پچھانا مشکل سی۔ اوس سوچیا جے کوئی بھیڑی چنگی ہوگئی تے اوہ نس بھیج کے دھوڑ وچ لگ سکدا اے تے جان بچا سکدا اے۔

اوہ تڑیا تڑایا اک گھر دے ویڑھے وچ چلا گیا۔ ویڑھے وچ لکڑیاں دا مچ لگا ہویا سی تے پنج چھ برمی اک سیک رہے سن۔ کوٹھے وچوں غرارے کرن دی آواز آ رہی سی خبرے کوئی اُٹھ کے کرولی پیا کردا سی۔ قاؤو نے گرینڈ گھٹ کے پھڑ لیا۔

اوہ مچ دے آ لے دوالے بیٹھے بندیاں دے سرتے جا کے کھلو گیا تے بولیا۔
”بھائیو! ایس پنڈ کا نام کیا ہے؟“

بیٹھے ہوئے بھراواں نے سر اُتہ نہ چائے تے قاؤو ول تِلے۔ اوہ سارے جاپانی فوج دے جوان سن۔ قاؤو دے پیراں تھلیوں مٹی سرک گئی اوہ قدم کچھے بیٹا۔ گرینڈ مچ وچ

ماریا۔ گرینیڈ پھٹیا۔ فیر دوجا پھر تیجا تے فیر چوتھا گرینیڈ پھٹیا۔

اندروں جاپانی فوجی افسر ننگے پیریں دوڑیا باہر آیا۔ قادو نے اگے ودھ کے اوس نوں سنگین تے پروسٹیا۔

”شاباش جوان۔ شاباش“ قادو دے کناں وچ آوازاں پیاں۔ دُھواں گھٹیا تے اوس ویکھیا بہت سارے برمی بڈھے تے عورتاں اوہدے ول خوش ہو کے ویکھ رہے نیں۔ تھوڑی دیر بعد اک بڈھے جاپانی نیں قادو نوں دسیا پئی باراں آدمیاں دا جتھ کئی دناں توں اوہناں دے پنڈ بیٹھا ہو یا سی۔ کلڑ انڈے کھا رہیا سی تے انگریز فوجاں دے خلاف جاسوسی کر رہیا سی۔ ایس گروپ دے علاقے پنج چھ کوہ دے علاقے وچ ہو رکوئی جاپانی سپاہی نہیں۔

قادو نے دو جوان نال لئے۔ واپس کچھن کول آیا۔ اوس نوں چکیا تے شام نوں چوکی آ کے رپٹ بولی۔

میجر صاحب نے برمی جواناں نوں انعام دتا تے قادو نوں بولیا ”شاباش جوان۔ ٹم نے بہت اچا کام کیا۔ ام ٹم کو ثرقی دے گا“ اوس ے رات قادو دی کمپنی نومنی ٹپ کے پنڈوں اگا نہہ پنج میل تے مورچے پٹ رہی سی۔ برمی جواناں نے کمپنی نوں پکے راہ پا کے بڑی چھیتی بہت سارا پنڈا مٹکا دتا سی۔

(12)

تیجے دن امریکی ہوائی جہاز کھان پین دیاں چیزاں نال جواناں تے افسراں دی ڈاک وی لیایا۔ ایس ڈاک کے قادو نوں اپنی ماں دی چھٹی ملی۔ لکھیا ہو یا سی:

نور چشم لخت جگر قادر داد خاں

پیار

اس جگہ خیریت ہے اور آپ کی خیریت خداوند کریم سے نیک مطلوب ہوں۔ احوال آنکہ مجھے روز بخار چڑھتا ہے۔ فوجی رستم خان دوائی لا کر دیتا ہے مگر کوئی فرق نہیں پڑتا۔

اب مولوی اکبر علی سے تعویذ کروایا ہے۔ اب کچھ فرق ہے۔ تم میرے پاس آ جاؤ تو میرے سارے بخار اتر جائیں۔ شیموں روز میرے پاس آتا ہے اور پوچھتا ہے تم کب آؤ گے۔ چرن سنگھ اور درشن سنگھ تمہارے مقدمے میں بری ہو گئے ہیں مگر کرپا سنگھ کو ابھی تک پولیس نہیں پکڑ سکی۔ لوگ کہتے ہیں کہ وہ رات کو اوگرے آتا ہے اپنی ماں سے ملتا ہے اور پھر چھپ جاتا ہے۔ بعض لوگ کہتے ہیں کہ تھانیدار حاکم خاں نے رشوت کھالی ہے اور وہ اس لئے کرپا سنگھ کو نہیں پکڑتا۔ بعض لوگوں کا خیال ہے وہ فوج میں بھرتی ہو گیا ہے۔ بیٹا! اگر کرپا سنگھ فوج میں تجھے ملے تو اُسے کچھ نہ کہنا۔ اگر تم نے اسے مارا تو فوج تجھے پکڑے گی۔ پولیس نے تیرے باپ کو پکڑا تھا تو اُسے پھانسی ہو گئی تھی۔ فوج تو زیادہ طاقت والی ہوتی ہے معلوم نہیں کیا کرے۔ بس تم کرپا سنگھ کو معاف کر دینا۔

بیٹا! لوگ مجھے تمہارے بارے میں اور صُغی کے بارے میں بُری بُری باتیں بتاتے ہیں مگر مجھے یقین نہیں آتا۔ میں کہتی ہوں قادر داد خاں نے میرا دودھ پیا ہے اس لئے وہ کوئی بُری بات نہیں کر سکتا۔ مگر لوگ میری بات نہیں مانتے۔ تم خود آ کر ان کو سمجھانا۔

بیٹا! صُغی میرے پاس روز آتی ہے۔ میرا ماتھا دباتی ہے۔ مجھے پانی پلاتی ہے اور میرے لئے اپنے گھر سے کھیر اور حلوہ پکا کر لاتی ہے۔ ایک دن وہ میرے لئے موتیے کے پھول لائی تھی وہ پھول اُس نے میرے سر ہانے رکھے تھے اور کہتی تھی بیمار کیلئے موتیوں کے پھول اور اُن کی خوشبو اچھی ہوتی ہے۔ ایک دن درشن سنگھ نے شراب پی کر اُسے گلی میں مخول کیا تو اُس نے درشن سنگھ کے چہرہ ماری۔ بڑی غیرت والی ہے۔

مراد خاں کی عزت اب کم ہو گئی ہے۔ سوائے ہر نام سنگھ کے کوئی دوسرا سکھ اُس کی عزت نہیں کرتا۔ خان پور والا بٹے خاں روز مراد خاں کے پاس آتا ہے لوگ کہتے ہیں وہ مراد خاں سے اپنے بیٹے بیرم خاں کیلئے صُغی کا رشتہ مانگتا ہے۔ اللہ جانے سچ ہے یا جھوٹ۔

تمہاری بے بے

روڑی

ہنجوتے راکھی

(1)

قاؤواک سال گجھ مینے برما دے جنگلاں تے امپھال دے پہاڑاں وچ زندگی
موت دی کھیڈ کھیڈ دا رہیا۔ زندگی تے ہمیش اوہدا کچھ پوریا مولا کریم دی نظر ہمیش
اوہدے لئی سوئی رہی۔

لڑائی وچ وی اوس نوں جہازاں راہیں اپنی ماں دیاں چٹھیاں ملدیاں رہیاں پر
چٹھیاں وچ کوئی نویں گل نہیں سی۔ اوہدی ماں نوں اے وی تاپ چڑھدے سن۔ اے
وی شیموں کول بکری دی رسی پھڑی آؤندا سی تے قاؤوا بارے کچھ داسی۔ فوجی رستم خاں
اے وی فوجیاں وانگ دوائی لیا کے دین دی ڈیوٹی پوری کر رہیا سی۔ مراد خاں تے ہر نام
سنگھ دے سانجھ پیار وچ اے کوئی فرق نہیں سی آیا ہتے خاں اے تیک اپنے کا کے بیرم
خاں لئی صُغی دارشتہ منگدا سی تے مراد خاں اے وی گومگو دی حالت وچ سی۔ صُغی پہلے
وانگوں ہُن دی روڑی کول آؤندی سی کھیر تے حلوہ لیاؤندی سی مٹھا گھٹدی سی تے موتیے
دے پھل لیا کے اوہدے سرہانے رکھدی سی درشن سنگھ باقاعدہ شراباں پیندا سی تے رات
نوں گاؤندا ہویا گلیاں وچوں دی لنگھدا سی۔ دینا مرانی تے مولو کبابیا شاہ سکندر دے مزار
اُتے جا کے کوٹا ڈنڈا لے بہندے سن تے بھنگ دے پیالے پیندے سن۔ کرپا سنگھ اے
تیک فراری تے حاکم خاں رشوت لے کے اوہنوں چھڈا جاندا سی۔

ساڈے پنڈ..... سورج چڑھدا ڈبدا رہندا اے۔ دن سال بندے نیں تے سال
صدیاں پر ساڈے پنڈ تے ساڈے پنڈاں دی رہتل نہیں بدلدی۔ لڑائیاں لگن۔ حکومتاں

بدلن۔ بھونجال آؤن ساڈے پنڈ نہیں بدلدے۔ اوہو ای ہالی پنجابی۔ اوہو ای ڈھگے
سڈھے۔ اوہو ای جوتر رستے۔ اوہو ای ریتاں رساں۔ اوہو ای ٹونے ٹونکے۔ اوہو ای وہم
گمان ہر چیز اوہو ای۔

پر مولوی اکبر کہندا اے ملک وچ انقلاب آ رہیا اے۔ مولوی اکبر سیانا آدمی اے
اوہ جھوٹھ بولنا گناہ سمجھدا اے۔ اوہ اخبار پڑھدا اے۔ اوہ رب نوں یاد کر دا اے۔ اوہ
باطن روشن اے۔ اوہ کہندا اے ہندوستان وچ انقلاب آ رہیا اے۔ اوہ کہندا اے لاہور
وچ قائد اعظم محمد علی جناح اے جیہڑا مسلماناں دا غیا پرغیا لیڈر اے۔ اوہ کہندا اے دلی
وچ مہاتما گاندھی اے جیہڑا ہندوواں دا لیڈر اے۔ اوہ کہندا اے امرتسر سکھاں دا اک
لیڈر اے جیہڑا ناں تارا سنگھ اے۔ ایہہ تے لیڈر انقلاب لیاؤن گے۔ آزادی آوے گی
ہندوستان ونڈیا جاوے گا اک نواں ملک بنے گا جیہڑا ناں پاکستان ہووے گا۔ پر اوہ ایہہ
وی کہندا اے کہ ملک دے کجھ ہندو مسلمان تے سکھ آزادی نہیں چاہندے۔ اوہ کہندے
نیں ملکہ داراج رہوے پر ایہو جیہے لوک ہوانوں جال وچ پھڑن دی کوشش کر رہے نیں۔
کدے ہوا وی جال وچ قابو آئی اے؟

پر مولوی اکبر ڈردا اے۔ او کہندا اے ہندو قوم مال دار اے تے چالاک اے۔ اوہ
کتے انگریزاں نال مل کے مسلماناں تے سکھاں نوں دھوکہ نہ دے جاوے۔ ایہہ دوویں
قوماں دل دیاں ساکھل نہیں۔ لُچ گھڑچیاں نہیں مار سکدیاں۔ ایہناں نوں گھچیاں مارن دی
جاک نہیں۔ اوہناں نوں ڈنڈی مارن دا ول نہیں آؤندا۔ ایہناں نوں گھیس وانگراں تھلیو
تھلی جان دا تھوہ نہیں ایہہ دوویں قوماں بڑبولیاں نیں جو دل وچ آیا بلکھاں اُتے آ گیا۔
پر فوجی رستم خاں کہندا اے: ”فکر ناہیں۔ رب مالک اے۔ ساڈے ہڈاں گوڈیاں
وچ جند جان تے شوہ تران اے۔ وقت آوے اسیں تلیاں اُتے جاناں لے کے انگریزاں
تے ہندوواں دے خلاف فرنٹ کھول دیاں گے۔ ساڈا قائد اعظم بڑا سیانا اے اوہ ہندوواں
تے انگریزاں دی رگ رگ توں واقف اے۔ اسیں اوہدیاں گلاں مٹاں گے تے پاکستان
بنالواں گے۔

سردار ہر نام سنگھ کہندا اے ”وقت آؤن دیو۔ ساڈے وچ وی کئی رنجیت سنگھ جمن گے۔“

سردار ہر نام سنگھ ٹھیک کہندا اے۔ وقت آؤن دیو۔ آؤن والی کل اُتے بھروسہ رکھو۔
آؤندی بھلک کبھڑی دُور اے؟

(2)

17 مئی 1945ء وچ میجر جنرل شاہ نواز نیس انگریزاں اگے ہتھیار سُٹ کے اپنی ہار
من لئی۔ سبھاش چندر بوس پہلے ای ہوائی جہاز وچ بہہ کے کسے دُور دیس ول اُڈ گیا سی۔
آزاد ہند فوج دتی ول ودھنا چاہندی سی پر برسات نے اوہدے جواناں دا راہ روک لیا۔
دن راتیں مینہ ون لگ پیا۔ اچھال دیاں ندیاں نالے تے دریا پانی دے ہڑھ نال ٹھاٹھاں
مارن لگ پئے۔ پہاڑی سڑکاں تے رستے رُڑ گئے مقابلے وچ اجیہیاں فوجاں آئیاں
جیہڑیاں طاقت تے تعداد وچ بہت اُچیاں سن۔ جاپانی امریکہ دی ماراگے چڑھ کے نئے
پئے سن۔ جاپان نوں آزاد ہند فوج دے جواناں نالوں اپنے جواناں دی جان بہتی پیاری
تے قیمتی سی۔ میجر جنرل شاہ نواز 17 مئی 1945ء نوں ہتھیار نہ سُٹ دا تے کیہ کردا؟

16 ستمبر 1945ء نوں برما، ملایا، اچھال، انڈونیشیا تے فلپائن وچ لڑن والیاں فوجاں
دے جاپانی کماندار نے ہتھیار سُٹ کے ہار من لئی تے مونٹ بیٹن دے سامنے رنگون وچ
کاغذ اُتے دستخط کر دتے پئی جاپان ہار گیا اے۔

لڑائی بند ہون دے کوئی چار پنج مہینے بعد قاؤو وی فوج وچوں ناں کٹا کے گھراں
پہنچن لئی گڈی چڑھ گیا۔

سردیاں جو بن تے سن تے کما د پیرھن تے گڈھیا لاں پتن تے تتا گڑ کھان دا سوہنا
موسم سی۔ تھیلے پہنچ کے اوس یکہ کرائے تے لیا تے پنڈ ول تڑ پیا۔ ترکالاں ہون توں
پہلاں اوہ شاہ سکندر دے مزار اُتے پہنچ گیا۔ اوٹھے فاتحہ پڑھیا تے سائیں سپ دے
حجرے ول گیا۔ سائیں سپ مچ بال کے بڑے مزے نال اگ پیاسیکدا سی۔

”سائیں بادشاہ“ قاؤو نے نعرہ ماریا۔

”اللہ بادشاہ“ سائیں سپ نہیں سُر تال وچ جواب دتا۔

”سائیں جی یاد اللہ“ قاؤو نے کہیا۔

”غفور ورحیم اللہ“ سائیں سپ نے قافیہ ردیف پورا کیا۔

سائیں سپ قادونوں پچھان گیا سی۔ اپنی تھاں توں اٹھیا تے قادو دے سرتے پیار دیتا۔

بچڑا! ساڈے لئی کیہ لیاندا ای؟“ سائیں سپ نے پچھیا۔

قادو نے سمندری کوڈیاں تے کوکیاں داہار سائیں ول ودھایا۔

”واہ واہ۔ موجاں ہوگیاں بچڑے۔ موجاں ہوگیاں۔ پیر استاد تیرے اُتے نگاہ

رکھن“ سائیں سپ ہار ویکھ کے خوش ہو رہیا سی تے اسیساں دے رہیا سی۔

”سائیں جی اجازتاں“ قادو نے کہیا تے آ کے تانگے وچ بہہ گیا۔ تانگہ کچی سڑ کے

پے کے پڑاں ول ہوٹریا۔

جد تانگہ پڑاں وچ پہنچا تے قادو نے دُتے نوں ویکھیا۔ اوہ کما ددا بھرا پڑاں وچ

سٹ کے ساہ لے رہیا سی۔ قادو چھال مار کے یکے وچوں اُتریا تے جا کے دُتے نوں کلاوہ

مار کے چک لیا۔

”دُلیا“ قادو نے نعرہ ماریا۔

”قادو“ دُلا خوشی نال گجیا۔

کلاوہ چھڈ کے قادو دُتے دے ساہمنے کھلو گیا تے گھٹ کے دست پنچہ ملایا۔

”یار قادو۔ تیریاں بانہواں تے پنچے وچ اگے نالوں بہتا زور اے“ دُتے نے کہیا۔

”زور کیوں نہ ہوئے؟ ایہناں بانہواں نے جاپانیاں دی مار کھادی ہوئی اے“

قادو نے کہیا تے کما ددا بھرا چک کے یکے وچ سٹ لیا۔ نال دُتے نوں وی بٹھالیا۔

”قادو آ گیا“ دُتے نے تانگے وچوں اتر کے زور نال کہیا۔

”میری پیاری بکری۔ بھاہ قادو آ گیا!“ گلی وچ شیموں نے بکری نوں کہیا۔

”قادو آ گیا!“ شانتی نیں اپنے چونکے وچ تلسی داس نوں کہیا۔

”بھچھا! قادو آ گیا؟“ تلسی داس حیران ہو کے بولیا۔

”صُغیے۔ قادو آ گیا“ پریتو نے بنیرے توں لمک کے ہانڈی پکاؤندی صُغی نوں کہیا۔

”چن آ گیا موجاں ہوگیاں“ سردار ہرنام سنگھ نیں سلکھن سنگھ نوں اپنی گڈھیال وچ کہیا۔

”پنڈ دامن تران آ گیا اے۔ ہن مینوں کوئی فکر نہیں“ مراد خاں نیں دل وچ کہیا۔

”فکرناہیں۔ قاڈو آ گیا اے“ فوجی رستم خاں بولیا۔

”بھاگ لگے رہن۔ میرا لیفٹیننٹ آ گیا“ دینا مراٹھی اکھاں کھول کے بولیا۔

”قاڈو پھر آ گیا اے۔ بدمعاشیاں کرن لئی پنڈ۔ ساڈا ہُن صُغی نال ویاہ نہیں ہون لگا

رب جی“

مولو کبابیا ڈکار مار کے سائیں سپ دے لاگے لما پے گیا۔ بھنگ پی کے مولو کبابیا صُغی

نال ویاہ کران دے سُفنے ویکھدا سی۔ قاڈونوں بدنام کرن وچ ساریاں داموہری مولو سی۔

قاڈو جدوں اپنے گھر چُجّا تے پنڈ دیاں بہت ساریاں زنانیاں تے کُویاں اوہدے

گھر اکٹھیاں ہو گئی دیاں سن۔ جدوں اوہ ویرھے وڑیا تے کسے نیں اوہنوں ایس دتی

کسے نیں اوہنوں پیار دتا کسے نیں اوہدا مٹھا چُمتیار کسے نیں اوہنوں اپنی چھاتی نال لایا۔

فوجی رستم خاں دی تیویں نیں توے نال اُنکلی لائی تے فیر قاڈو دے چوڑے متھے تے

سیاہی دی لکیر مار دتی پئی کتے نظر نہ لگے۔

مائیاں بھیناں وچوں دی لنگھدا اوہ اپنی ماں دی منجی کول گیا تے اوہدے گل لگ کے

رون لگ پیا۔ روڑی دیاں اکھاں وچوں وی اتھروواں دی دھار لگ گئی سی۔ موت دیاں

اکھاں وچ اکھاں پان والا گھرو ماں دے گل لگ کے رو رہیا سی۔ ماں دا پیار کتا اُچّا

اے! کنا سچا اے! کنا زول اے! قاڈونوں روڑی نیں اینیاں کمزور بانہواں وچ لیا ہویا

سی تے اوہ اوس ویلے دُنیا دی سبھ اپنیاں توں زیادہ خوش قسمت ماں سی۔

(3)

اوس رات پنڈ دے قریب قریب سارے بندے بڑھیاں تے نیا نے قاڈو دے گھر

اوس نوں ملن تے مائی روڑی نوں ودھائیاں تے مبارکاں دین آئے۔ ایہناں وچ بنارس

بہتر سنگھ، تلسی داس، شانتی، پرسنو، روپا، مولوی اکبر، ہرنام سنگھ، مراد خاں، شفیع نائی اوہدی

مہندی رنگے ہتھیاں والی تیویں ایمنہ۔ بھوندی بھوندی دی ماں تے دینے مراٹھی دی گھر والی

ریشم بی بی گل کیہ پنڈ دے سارے بندے بڑھیاں اوس نوں ملن تے اوہدا حال چال

چلن پچھن تے لڑائی دیاں گلاں سُنن آئے۔ جے نہیں آئے تے اوہ مولو کبابیا۔ درشن سنگھ،

چرن سنگھ، صُغّی تے پرتیوسن۔

مولو کبابیا ایس واسطے نہیں آیا کہ اوہ ہن بھنگ پی کے تے کُگڑ دے کباب کھا کے
صُغّی نال ویاہ کران دے سُنّے نہیں سی ویکھ سکدا۔ کیوں جے اوہدیاں سُنّیاں وچ ہُن
پھلکاری والی صُغّی نے کلّیاں نہیں سی آؤنا نال کھونڈ والا قاؤ وی ہونا سی۔

درشن سنگھ تے چرن سنگھ ایس واسطے نہ آئے پئی اوہناں دے دلاں وچ قاؤ دے
خلاف غصّہ سی۔ اوہ حوالات دیاں سختیاں اہجے تیک نہیں سی بھلے۔ فیر درشن سنگھ صُغّی نوں
مخول کر کے اوہدے کولوں لپڑ وی کھا چکا سی۔

صُغّی ایس واسطے نہ آئی کہ اوہ آ ای نہیں سی سکدی۔ اوہدے پیو نے اوس وچاری
نوں اک طرحاں گھر وچ قید کر چھڈیا سی۔ اوہ بدنامی کولوں ڈردا سی اوہنوں اپنی عزت دا
خیال سی۔

پرتیونوں خبرے ایہہ غصّہ سی کہ اوہدا ہون والا سردا سائیں قاؤ دی وجہ کر کے لاپتا
سی۔ پرتیو دی سس ہُن کہن لگ پئی سی کہ اوہدا پتر کر پا سنگھ فوج وچ لیفٹین ہو گیا اے پر
کرپے دا خط آیا سال توں اُتے دن ہو گئے سن۔ لوک لڑائی لڑ کے گھریں آ گئے سن پر
کرپے دا کوئی خط پتر وی نہیں سی آیا۔

قاؤ صُغّی نوں تے پرتیونوں ملنا چاہندا سی۔ پر اوہ اوہناں دوواں نوں کیویں ملے؟
کتنے ملے؟ کدے راہیں ملے؟ اوہ چاہندا سی صُغّی نوں اپنی چھاتی نال لاوے تے اوہدا
مُتھا چُٹے کیوں جے اوس اپنے مُتھے تے قاؤ والی بدنامی دا کالا ٹکا لایا سی۔ لوکاں نے گلاں
کر کر کے اوہدی شہرت دا غدار کیتی سی اوہ اوس صُغّی نوں ملنا چاہندا سی جیہڑی اوہدی دکھاں
والی ماں لئی کھیر تے حلوہ پکا کے لیاؤندی سی۔ اوہدے سرہانے بہہ کے اوہدا سر مُتھا گھنڈی
سی۔ قاؤ اوس پٹھان گڑی نوں ملنا چاہندا سی جیہدے ویرھے وچ اوہدے ہتھاں دا لیاندا
ہویا موہیے دا بونٹا لگا ہویا اے تے جیہدے پھل اوہدی ماں دے سرہانے تے سجدے سن
تے خوشبوواں دے بُلے آؤندے سن۔ پر اوہ صُغّی نوں کیویں ملے؟ کدے راہیں ملے؟

قاؤ پرتیونوں وی ملنا چاہندا سی کیوں جے اوہدے کول پرتیو لئی کرپے دی مُندری
سی۔ ایہہ مُندری اک امانت سی تے اوہ ایہہ امانت پرتیونوں دینا چاہندا سی۔ اوہدے دل

وچوں آواز اُٹھدی سی۔ ”مندری دینا اک فرض اے ایس فرض نوں تُو لی تُو لی پورا کر۔“ پر
 اوہ ایہہ فرض کیوں چھیتی پورا کرے؟
 ایہو جیسے بھُن تِر گئے سوچدا قادو سوں گیا۔

(4)

دو بجے دن اور چھاہ ویلے سَتا اُٹھیا۔ مسیت دی تُوئی وچ جا کے نہاتا۔ لمیاں
 طریزاں والی بوسکی دی قمیض پائی۔ لیکن داتہمت تیز کیتا وال دا ہے۔ مونہہ تے خوشبو والا
 تیل لایا کلکتاں مچھاں نوں وٹ دتے۔ نوکدار جتی پائی۔ مکھن دے پیڑے نال لسی دے دو
 گلاس پیتے۔ ڈکار ماریا تے گھروں باہر گلی وچ آ گیا۔

اودے سینے وچ فوجی دل جاگ پیا تے بول پیا ”فکر ناہیں۔ چل صُغی نوں اودے
 گھر چل کے مل۔ کیہڑے اوتھے جا پانی توپ پیر کے بیٹھے ہوئے نیں!“۔ عزت بولی
 ”بھیری گل اے۔ توں مراد خاں دی حویلی چل۔ کیہ پتا صُغی گھروں نکل کے حویلی وچ
 آوے تے ملنی ہو جاوے“

اوہ مراد خاں دی حویلی آیا پر اوتھے کوئی نہیں سی۔ مراد خاں دا منجاتے تھتھ ویلھے پئے
 ہوئے سن۔ مراد خاں گھر ہووے گا۔ اوس سوچیا تے حویلی دے کوٹھے وچوں ہو کے اوہ
 مراد خاں دے گھر جا وڑیا۔ مراد خاں گھروں نہیں سی۔

صُغی جھلانی وچ پیرھی تے بیٹھی سدا بہار موتیے دے بھٹلاں دا ہار گندھ رہی سی تے
 ہولی ہولی اپنے دھیانے کوئی گیت گا رہی سی۔ قادو جھلانی دی کندھ اُتے بانہواں رکھ کے
 کھلو گیا۔ صُغی قادو دی نوکدار جتی دی کیڑ نہیں سی لئی۔

برما دے جنگلاں وچ لڑیاں ہویاں قادو نے اُتو تے کاں دی بولی سکھی سی۔ ایہہ
 بولیاں ایس واسطے سکھنیاں پیاں سن کہ اپنے نکھرے ہوئے ساتھیاں نوں جاپان یا آزاد
 ہند فوج دے آدمیاں دی موجودگی یا عدم موجودگی دی اطلاع دتی جاوے۔ اطلاع دین دا
 ایہہ انوکھا تے نرالا طریقہ ایس لئی ضروری سی کہ دشمن نوں بھلیکھے وچ رکھیا جاوے۔

کاں دی بولی دا مطلب ایہہ ہوندا سی کہ دشمن نیڑے تیرے اے تے اودے حملے

دا خطرہ اے۔ مقابلے لئی تیار ہو جاؤ۔ اُلو دی بولی دا مطلب ایہہ سی پئی دشمن نیڑ تیرے
 نہیں تے خطرے والی گل کوئی نہیں۔ جاپانی ایہہ بولیاں سُن کے ایہہ سمجھدے سن کہ واقعی
 اُلو یا جنگلی کاں بول رہیا سی۔ مریکی دستے دے جوان نہیں۔
 صُغی اپنے دھیان وچ مگن موتیے دے پھلاں دا ہار گندھ رہی سی تے مٹھی مٹھی
 آوازے گا رہی سی۔

اچن چیت قادو نے اُلو دی بولی بولی۔
 ”ہائے اللہ مر گئی“ صُغی نے ڈر کے کہیا تے چھیتی نال پیڑھی تُوں اٹھ کھلوتی پھل
 اوہدے پیراں وچ ڈگ پئے۔ قادو کھڑکھڑا کے ہس پیا۔
 ”بس؟ پٹھانی بنی پھر دی اے۔ ڈر گئی ناں؟“ قادو نے چھیڑ دیاں ہویاں آکھیا۔
 صُغی قادو نوں ویکھ کے ٹھٹھمر گئی سی۔ اوہنوں سمجھ نہیں آؤندی سی کیہ کہوے تے کیہ
 نہ کہوے۔

”تسیں۔ اُلو کدوں دے بن گئے او؟“ اخیر اوہ ہس کے بولی۔

”جدوں دا جناب نوں ویکھیا اے“ قادو نے کہیا۔

”نہیں۔ جدوں دا فوج چھڈ کے آیا واں“ اوہ دوویں ہس پئے۔

”اڑیا۔ خط وچ نہ دُعا نہ سلام“

”تُوں کنیاں کو دُعا سلاماں بھیجیاں نہیں؟“

”میں تینوں دُعا سلاماں بھیجی چنگی لگدی ساں؟“

”تے حرج وی کیہ سی؟“

”مینوں سنگ آؤندی سی“

”سنگ تے تیری پنڈ دیاں لوکاں نے میرے بارے گلاں کر کے لاہ چھڈی سی۔“

”پنڈ دیاں لوکاں نوں میں اپنی جتنی دی نوک تے وی نہیں لکھدی۔“

”کچھ اپنے پیو بارے وی فرما دیو۔“

”فرمانا کیہ اے؟ میرا پیو سدہا پدھرا آدمی اے۔“

”ایہو جیسے دو چار سدہا پدھرے پیو ہو رہوندے تے فرید پور دے سارے

مُنڈے جاپانیاں دے ہتھوں مر جان دے“

”پر تُوں تے چنگا بھلا ایں ویہڑ کے ورگا۔ اُلٹا جاپانیاں نوں مار کے تمنغے لے آیا ایں“

”جان تلی تے رکھ کے لڑے آں تے افسراں خوش ہو کے تمنغے دے دتے“

”وے چھڈ۔ وڈا بہادر! ایویں پھڑاں نہ مار۔ خورے کپہڑے بوجھے اوہلے بہہ کے

سال گزار آیا ایں“

”ایمان سے۔ جاپانیاں نوں جا کے پچھ لے“

”کیہ پچھاں جاپانیاں نوں؟“

”ایہو پئی مُنڈا کیویں لڑیا اے۔“

”جاپان جاندی اے میری جتھی۔ میں کیوں جاپان جاواں؟“

”چلو ٹھیک اے۔ نہ توں جاتے جاوے تیری جتھی۔ اچھا میں آیا ساں کہ تیرا شکریہ

ادا کر دیاں۔ تُوں میری بے بے دی بڑی ٹہل سیوا کیتی اے“

”جدوں میں تیری ٹہل سیوا کیتی سی اودوں تینوں یاد نہ آیا شکریہ؟“

”اودوں مینوں ایہہ لفظ یاد نہیں سی۔ ہُن ہو گیا اے“

”ہنچھا جی۔ ہن جناب ہو ریں بی۔ اے اس کر آئے نیں۔ ہلے پئی ہلے“

اوہ دوویں ہسن لگ پئے۔

”ایمان سے میں ہُن اگے نالوں غنمند ہو گیا واں“

”پُرشکوں تے تُوں اوہو قادو جاپنا ایں جیہڑا وسا کھی دے میلے وچ کھونڈ چک کے

سد لاؤندا سی“

”شکل دا کیہ اے؟ دماغ دیکھی دا اے“

”دماغ اوہو لوہے دا بنیا ہویا ہو یگا۔ ڈانگاں تے کھونڈ کھان تُوں“

”صغیے! اک گل کراں جے تُوں کسے دو جے نال نہ کریں تاں“ قادو نے چپ کر

کے کہیا۔

”کرن والی ہووے گی تے کوٹھے تے چڑھ کے کراں گی۔ نہ کرن والی ہوئے گی

تے نہ کراں گی۔“

”ایہہ گل کسے نال نہیں کرن والی۔“
 ”نہیں کراں گی“ صُغی ہُن سمجھ گئی۔ پئی گل خطرے والی اے۔
 ”میں برما دے جنگل وچ کرپا سنگھ نوں مار دتا سی۔“
 صُغی دا مونہہ اڈیا رہ گیا۔

”آہو میں۔ اوہ آزاد ہند فوج وچ چلا گیا سی تے اوس بم لے کے میرے تے حملہ
 کیتا سی۔ میرے پنج ساتھی مر گئے سن۔ صرف میں تے اک کچھمن سنگھ بچے ساں“
 ”فیر تُوں اوس نوں کیویں ماریا“ صُغی دی آواز وچ خوف سی۔
 ”اوس میرے سنگین ماری۔ میں پرانہہ ہٹ گیا۔ اوہ میرے مورچے وچ مونہہ بھار
 ڈگ پیا۔ میں دراٹ جیہے نال اوہدی دُکھی چیر دتی“
 ”میرے اللہ۔ جے تُوں پرانہہ نہ ہندا تے فیر کیہ ہوندا؟“
 ”ہونا کیہ سی؟ میں دی اپنے باقی ساتھیاں وانگ مر جاندا۔“
 ”پھر تے چنگا ہویا کرپا سنگھ مر گیا۔“ صُغی نیں لما ساہ لیا تے اوہدی سُر ت قائم ہوئی۔
 ”پر اوس مرن تُوں پہلاں مینوں پریتولئی سونے دی مُندری دتی سی۔“ قادو نے
 خوبصورت سونے دی مُندری صُغی نوں دکھائی۔

”ایہہ تے بڑی قیمتی اے۔ بچھا کیہ کہن لگا؟“
 ”اوس کہیا ایہہ مُندری میری پریتو دے دینا تے کہنا کہ اوہ ایہہ مُندری پریتو نوں
 وساکھی دے میلے تے دینا چاہندا سی پر نہ دے سکيا۔“
 ”ہاں ہاں۔ مینوں یاد آیا۔ پریتو نے مینوں کہیا سی کہ کرپا سنگھ نے اوہ نوں وساکھی
 دے میلے مُندری دین دا وعدہ کیتا ہویا اے۔ ٹھیک اے۔“
 ”ایہہ مُندری تُوں پریتو نوں دے دیویں“ قادو نے مُندری صُغی ول ودھائی صُغی
 کچھے ہٹ گئی تے بولی۔

”نہ جی۔ ایہہ کم میں نہیں کرنا۔ میں کیویں اپنی سہیلی نوں اوہدے مرے ہوئے منگیتر
 وٹوں مُندری دے سکئی آں۔ اوہ کیہ کہوے گی۔ تُوں آپ اوس نوں دیویں“
 ”پر میں اوس نوں ملاں کیویں؟“

”شانتی نوں کہو۔ اوہ تینوں پریتونوں ملا دیوے گی۔“
 ”چنگا انج ای سہی“ قاؤو نے کہیا تے صُغی نال دوبارہ ملن دا وعدہ کر کے گلی ول ٹر پیا۔

(5)

قاؤو نے شانتی نوں نہ تے ایہہ دسیا پئی اوس لڑائی وچ کرپا سنگھ نوں ماریا سی تے نہ ایہہ دسیا پئی اوہ پریتونوں کرپا سنگھ دی مندری دینا چاہندا اے۔ اوس شانتی نوں یقین کرایا کہ کوئی فکر والی گل نہیں پریتونوں اوہ اپنی بھین سمجھدا اے تے کسے بھیڑے خیال نال نہیں ملنا چاہندا۔ بس ذرا اک گل کرنی اے۔ شانتی سمجھی کہ قاؤو پریتو راہیں صُغی تیک کوئی گل پہنچانا چاہندا اے۔ کیوں جے صُغی تے پریتو اک دوجی دیاں سہیلیاں نیں۔ شانتی نوں پتا سی کہ قاؤو چھوٹھ بولن والا یا ماڑا کم کرن والا بندہ نہیں دل دا چنگا مُنڈا اے۔

شانتی اوس شامیں پریتونوں اوہدے گھر ملی۔ پریتو پہلاں تے حریان ہوئی پھر قاؤو نوں ملن واسطے تیار ہو گئی۔ شانتی نے پریتونوں دسیا سی کہ قاؤو نے پریتونوں بھین کہیا اے۔ پریتو انج وی قاؤو دی عزت اپنے وڈے بھرا سلکھن سنگھ وانگ کر دی سی۔

ملاقات دا وقت کھاؤ پینا سی تے جگہ ڈونگھا کھوہ۔ ایہہ کھوہ سردیاں وچ اجاڑ پیا ہوندا سی کجھ دن ڈنگر وچھا حویلی بھجدا سی تے لوک رات نوں گڈھیا لے اکٹھے ہوندے سن۔
 قاؤو نے روٹی کھاہی تے اپنی بے بے نوں ایہہ کہہ کے کھوہ اُتے آ گیا کہ خان ہے خاں دے منڈیاں بیرم خاں تے حنیف خاں نوں ملن جارہیا اے۔

جد اوہ کھوہ اُتے پہنچیا لوک گھر وگھری سوں بہہ گئے سن۔ چن چڑھدے ولوں بھور رہیا سی تے اوہدی نمی نمی لو وچ درخت تے کھیتر گھوک ستے جا پدے سن۔ اڈھی رات حالی دُور سی تے اوہ ذرا اُتے آ گیا سی۔ پریتو نے اڈھی رات نوں کھوہ اُتے آؤنا سی۔

اڈھی رات وی آگئی پر پریتو نہ آئی۔ اڈھی رات لنگھ گئی۔ پریتو فیروی نہ آئی۔ چن دی لودھم پے گئی تے سارے پھلے پھلے جا پن لگ پئے دور اوگرے تے فرید پور دے گھراں وچوں لکڑاں دیاں بانگاں آون لگ پیاں۔ درختاں اُتے چڑی جنوراں نیں بولنا شروع کر دتا۔ پر پریتو نہ آئی۔ قاؤو اوس نوں اُڈیک اُڈیک کے پھاوا ہو گیا سی۔ اوہدا سریر نیندرا تے

ٹھنڈ من لگ پیا سی۔ اخیر اوہ اپنی تھاں توں اٹھیا تے پنڈ ول تڑ پیا۔ گھر آ کے اوس ویکھیا اوہدی بے بے حالی سستی ہوئی سی۔ پچھلے اندروڑ کے اوہ وی سوں گیا۔

دوپہر ویلے اٹھ کے اوس روٹی کھادی تے گھروں نکل گیا۔ اوہ سارا دن دکاناں حویلیاں۔ خراساں بھٹھیاں، تنوراں تے کچیاں کھوئیاں تے بھوندا رہیا تے لوکاں نوں لڑائی دے قصے سناؤندا رہیا۔ شام نوں اوہنوں پنڈوں باہر وار شانتی ملی۔ بولی۔

”قاؤ رات پریتو دے ڈھڈ پیڑ پے گئی تے ایس واسطے نہ آسکی، اج اوہ ضرور ملے گی“

”کیہ پتا اوہ اج رات وی نہ آوے تے سردی نال میرا کونڈا ہو جاوے۔“

قاؤ نے تلخی نال کہیا۔

”نہیں نہیں۔ اوہ اج ادھی رات نوں ضرور آوے گی۔ پتھر تے لکیر سمجھ“

”چنگا..... ویکھ لواں گا“

”نہیں، کوئی فکر والی گل نہیں۔ اوہ ضرور آوے گی“ شانتی نیں چھیتی نال کہیا تے پنڈ

نوں پلٹ گئی۔ قاؤ نے محسوس کیا شانتی کجھ فکر مند تے گھبرائی ہوئی اے۔ اوہدے ملوک بکھاں تے اوہ ہاسا وی نہیں۔ جیہڑا اوہدی شخصیت دا اک حصہ اے۔ اوس جو کجھ کہیا سی بڑے کاروباری انداز وچ کہیا سی۔ ایویں جیویں کوئی ہول تواری وچ پیا ہویا بندہ دکاندار اگے چوانی سٹے تے کہوے ”چوانی پھر لے تے جوکھ دے چھیتی نال لون“

پچھلی رات وانگ قاؤ نے روٹی کھادی۔ ماں نال خان پور جان دا جھوٹھ بولیا کھوہ اُتے آ بیٹھا۔ چنے دی چاننی رات سی تے تارے اسمانیں جھنمر پارہے سن۔ خاموشی پیلیاں تے درختاں اُتے دس رہی سی قاؤ کھوہ دی گادھی اُتے بیٹھا ہویا سی تے پلانے دے کول اوہدے سچے کھبے سنتریاں وانگ کھلوتے سن۔

کولیاں اُتے رکھی ہوئی لمی ساری ٹالھی دی پوری قاؤونوں انج جاپی جیویں کوئی اڈ دی اڈ دی لوتھ کولیاں اُتے ڈگی ہووے۔ قاؤ دے سامنے کوٹھاسی تے کوٹھے چکھے فرید پور۔

پریتو گھروں نکل کے کھوہ ول تڑ پئی سی۔

درشن سنگھ۔ چرن سنگھ تے پنے سانسی دے دو جوان پتر سردار ہر نام سنگھ دی حویلی دے اک ویران کوٹھے وچ بیٹھے شراب پی کے تے اچار کھا کے ڈکار مارہے سن۔

شانتی اپنے گھر رضائی وچ مونہہ چھپا کے سوچ رہی سی کہ کیہ ہووے گا؟ اوہنوں ساری گل دا پتا سی۔ کیوں پئی ساری گل اوہدے راہیں گئی متھی گئی سی تے اوہدے پتی تلسی داس نوں روپیاں دا بک وی لہجہ گیا سی۔

شانتی نے اک دیہاڑے پہلاں درشن سنگھ نوں دس دتا سی کہ قاؤو پرتیونوں اڈھی راتیں کھوہ اُتے ملنا چاہندا اے۔ درشن سنگھ نے شانتی نوں منع کر دتا سی کہ اوہ حالی پرتیونوں نہ دتے۔

اوس رات درشن سنگھ تے چرن سنگھ تلسی داس دے گھر آئے سن۔ تے اوہتھے اوہناں بیٹھ کے صلاح کُندھی سی کہ قاؤونوں کھوہ تے ایس بہانے قتل کر دتا جاوے کہ اوس پرتیونوں مخول کیتا اے۔ شانتی ایہہ سن کے کنب گئی سی پر تلسی داس دے کہن اُتے اوس دل رکھیا سی۔ تلسی داس نیں چرن سنگھ تے درشن سنگھ دی مدد کرن دامل دو سو روپے منگیا سی۔ چرن سنگھ نیں اوہ روپے تلسی داس نوں گہنے دی شکل وچ دتے سن۔ ایہہ گہنے ویکھ کے شانتی وی خوشی خوشی تیار ہو گئی سی تے اوس مُڑ پرتیونوں کہیا سی کہ اوہ اج راتیں کھوہ اُتے نہ جاوے کیوں جے قاؤونوں کوئی ضروری کم پے گیا اے تے اوہ کھوہ اُتے نہیں آ سکے گا۔ شانتی نے ایہہ وی کہیا سی کہ قاؤو چاہندا اے ایس گل دا پتا کسے چوتھے بندے نوں نہ لگے۔

کوٹھے دے اوہلے پچھوں نکل کے پرتیو قاؤو دے سامنے آ گئی۔ اوس گرم چادر دی بُکل ماری ہوئی سی۔ قاؤو گا دھی تُوں اٹھ کھلوتا۔ پرتیو ٹری ترائی اوہدے کول آ گئی۔

”پرتیو آ گئی ایس؟“ قاؤو نے ہولی جیہی کہیا۔

”آہو۔ پرتیو اڈھی رات نوں مینوں کھوہ تے کیوں بلایا اے؟“ پرتیو دی آواز وچ جھاکا سی۔

”کم کجھ اجیہا سی پئی دن دی لو وچ نہیں سی ہوسکدا“

”میں تیرے اعتبار اُتے آ گئی آں۔ ہُن توں مینوں کم دس“ پرتیو قاؤو دے نیڑے

ایہی سی پئی اوہدے مونہہ دی ہواڑ قاؤو دے چہرے تے پے رہی سی۔ چاننی وچ پرتیو دا دھڑکدا ہويا سینہ قاؤو دیاں اکھاں سامنے سی۔

”سکھ کڑیاں، دلیر ہوندىاں نیں۔ اوہ گھبراؤندیاں نہیں پرتوں تے گھبرا گئی ایں“

”نہیں نہیں۔ میں کیوں گھبرانا اس۔ تُوں مینوں جس کم لئی بلایا اے اوہ کم دس“

”میں تینوں گھوہ تے ایس واسطے بلایا اے پئی مندری دیواں“

”مندری؟“ پریتو نے حیران ہو کے کچھیا تے دو پیر کچھے ہٹ گئی ”کیہڑی مندری؟“

”اوہ مندری جیہڑی مینوں برما دی لڑائی وچ کر پے نیں دتی سی تے آکھیا سی کہ

پنڈ جا کے پریتونوں دے دیویں۔“

پریتو اک قدم قاؤ ول ودھی تے قاؤ دے کپڑے پھڑ کے بولی۔

”کرپا آپ کیوں نہیں آیا؟ اوہ کتھے اے؟“ پریتو دی آواز جذباتی ہو گئی۔

”ایہہ مندری پھڑتے لیہنوں کھیسے وچ پالے۔ فیر میں دسناواں پئی کرپا کیوں نہیں آیا؟“

پریتو نے مندری قاؤ دے ہتھ وچوں لے کے دیکھی تے بولی۔

”قاؤ! ایہہ مندری کرپا مینوں وسا کھی والے دن دینا چاہندا سی پر.....“

”قسمت دیاں گلاں نیں پریتو سکھ گھرو نے تیرے نال جیہڑا وعدہ کیتا سی اوہ پورا کر دتا“

”پر اوہ آپ کیوں نہیں آیا؟ تُوں کیوں آ گیوں؟ تُوں اوہنوں چھڈ کیوں آ یوں؟“

پریتو دا معصوم چہرہ سوالیہ نشان بن گیا۔ قاؤ سچ بولنا چاہندا سی پر اوہ دے دل دی

کوٹھڑی وچوں اک آواز آ رہی سی۔ ”سچ نہ بولیں۔ بکھ سی لے سچ نہ بولیں۔ بکھ سی لے۔“

”قاؤ! بولدا کیوں نہیں۔ کرپا آپ کیوں نہیں آیا“

”پر تم کورے۔ کرپا سنگھ میرے ہتھوں برما وچ ماریا گیا“

”قاؤ“ پریتو نے چیک ماری فیر قاؤ دے سینے اُتے دو ہتھر مار کے اہودے پیراں

وچ بہہ کے، مونہہ لکو کے روؤن لگ پئی۔ کوٹھے اوہ دے چرن سنگھ۔ درشن سنگھ تے پیٹے

سانسی دے جیوان پتر کھلوتے سن۔ اوہ برچھے لے کے قاؤ دیاں نظراں سامنے آ کھلوتے۔

”پریتو! پرانہہ ہٹ جا۔ کرپا سنگھ نوں مارن والا اج بچ کے نہیں جاوے گا۔ قاؤ! مار

لے پئی جیہنوں آواز ماری آ“ درشن سنگھ نے ایہہ لفظ ہولی ہولی تے چٹھہ چٹھہ کے کہے۔

پریتو اٹھ کے کولے اوہلے ہو گئی۔

”قاؤ خالی ہتھ سی۔ اوہدی موت نے اوس نوں گھیر لیا سی۔ دو سکھ تے دو سانی

برچھے لے کے اوہ دے سامنے کھلوتے سن تے اوہناں شراب پیتی ہوئی سی۔

”جے نسنا چاہویں تے نس کے دیکھ لے۔ پنے سانی دے پُرتینوں اک پئی نہیں
تسن دین گے“ چرن سنگھ بولیا۔

”چرن سیہاں! میں ابے تیک کسے میدان وچوں نہیں نسیا تے میں اج وی نہیں
نساں گا“

قاؤو نے دلیری نال کہیا۔ اوہنوں خیال تے آیا پئی نس جاوے پر دل نے کہیا نسا
بے شرمی تے بے غیرتی داکم اے۔

”مراد خاں نوں آواز مارنی اے تے مار لے“ درشن سنگھ نے طنز نال کہیا۔
”وسا کھی دے میلے وچ ٹوں بچ گیا سیس پر ہن بچنا محال اے۔ چل پئی سارنگے
تے گھسیٹے، تاڑھ دیو برچھیاں قاؤو دے سینے وچ۔“

”آپنی سارنگے تے گھسیٹے۔ تسیں اگے پیر پٹو تے میں تہاڑے سینے وچ پستول
دیاں ست گولیاں تاڑھنا واں“ قاؤو نے دھڑکا ماریا تے اپنے دوویں ہتھ اک دو جے دے
اُپر رکھ کے انج اگے ودھائے جیویں پستول پھڑی ہووے۔

”جینیو، پیر پٹو اگے۔ پُندے کیوں نہیں۔ درشن سنگھ نہیں کہیا۔ سارنگا اک قدم کچھے
ہٹا تے بولیا، ”نہیں نہیں میں مرنا نہیں چاہندا۔“

”مرنا نہیں چاہندا تے برچھا کھوہ وچ سٹ کے پرت جا پچھوڑ۔“
قاؤو نے دلیری نال کہیا سارنگے تے گھسیٹے نیس برچھے کھوہ وچ سٹے تے پچھوڑ پرت گئے۔
”پریتو! میں لگا ایس تیرے بھرا نوں گولی مارن“ قاؤو بولیا۔ پریتو کو لے اوہلیوں چکی
”نہیں قاؤو نہیں۔ ایہہ بڑا بے وقوف اے۔ ایہنوں معاف کر دے۔“

”بے وقوف نوں اوہدی بے وقوفی دی سزا ملنی چاہی دی اے۔ ایس صُغی نوں وی
مخول کیتا سی پریتو“

”اوہ تے میتھوں غلطی ہو گئی سی۔ اوہ تے میری بھین لگدی اے۔ کیوں چرن سنگھ؟“
”اوئے مینوں نہیں پتا“ چرن سنگھ نے غصے نال کہیا۔

”برچھا میرے ول سڈے درشن سیہاں تے آپوں نس جا“ قاؤو بولیا درشن سنگھ نیس
برچھا قاؤو دے پیراں وچ سُٹیا تے آپ پچھے ہو کے کھلو گیا۔

”چل پریتو۔ درشن سنگھ نال گھر چل“ قادو نے پریتونوں کہیا۔ پریتو کو لے اوہلیوں نکل کے درشن کول جاکھلوتی قادو نے چھیتی نال نیویاں ہو کے برچھا پھڑ لیا تے بولیا۔

”درشن سیہاں۔ میرے کول پستول کوئی نہیں سی مہینے دے پترتے توں ایویں تھڑک گئے۔ آپنی چرن سیہاں ہن وارکر“ قادو نے للکر ماری تے چھال مار کے چرن سنگھ دے سر اُتے ڈانگ وانگوں برچھا ماریا۔ چرن سنگھ نیں اپنے برچھے نال وار روکیا تے فیر برچھا سٹ کے پیلیاں ول نس اٹھیا۔ درشن سنگھ پریتونوں اکلیاں چھڈ کے پہلے ای دوڑ لا گیا سی۔ قادو نے پریتونوں نال لیا تے پنڈنوں تڑپیا۔

”اللہ دا شکر اے۔ جان بچ گئی۔ کئی واری جھوٹھ بولنا وی ضروری ہو جاندا اے۔“

قادو نے پریتو نال گل کیتی۔ پر اوہ چپ چان سی۔ اوہنوں پتا نہیں سی لگدا کہ اوہ قادو نال ناراض اے یا خوش اے۔ قادو نے کرپا سنگھ نوں ماریا سی پر قادو نے پریتو دے کہن اُتے درشن سنگھ نوں ماریا وی تے نہیں سی نا۔

(6)

دو جے دن فرید پور، اوگرے تے خانپور دے بچے بچے نوں پتا لگ گیا کہ رات ڈونگھے کھوہ اُتے کیہ ہویا اے۔ لوکاں نوں ایہہ وی پتا لگ گیا کہ کرپا سنگھ آزاد ہند فوج وچ چلا گیا سی تے برما دے خونی جنگلاں وچ قادو دے خلاف لڑدا ہویا ماریا گیا سی۔

اگلے دن فرید پور دے گوردوارے وچ پنڈ دے سکھاں دا اکٹھ ہویا۔ اوس اکٹھ وچ گوردوارے دے گرنتھی نیں سکھاں نوں کہیا کہ ”کرپا سنگھ ملک دی آزادی واسطے لڑدا ہویا مریا اے اوہ پنٹھ دا سراچا ویکھنا چاہندا سی۔ اوہ بہادر سی۔ انگریزاں دا پٹھو نہیں سی پر اک ملیچھ نیں اوس نوں اپنی گولی دا نشانہ بنایا۔ آزادی دے اک سپتر نوں قتل کیتا۔ جتنا دے اک مہربان نوں شہید کیتا۔ اوہ لڑائی جیہڑی کرپا سنگھ تے اوہدے دو جے سجناں مڑاں نے برما وچ شروع کیتی سی ہندوستان دے پنڈ پنڈ تے شہر شہر وچ لڑی جائے گی اوہ لڑائی فرید پور وچ وی لڑی جائیگی۔ اوس لڑائی لئی سانوں ہن توں تیاری کرنی چاہی دی اے۔“

کانگریس تے دلی ساڈے نال نیں ساڈا اٹکھ پورن گے۔“

گرنتھی دی تقریر دے بعد گاندھی ٹوپی والا ماچڑو جیہا ہندو۔ اٹھیا تے اوس بڑی گرما گرم تقریر کر کے سکھاں نوں کہیا کہ ہندو تے سکھ بھائی بھائی نہیں مسلمان اپنے عرب شریف وچ جان۔ نہیں جان گے تے اسیں جانے آں کہ اوہناں نوں کیوں ختم کرنا اے؟ ہندو دے بعد اک پیلی پگڑی والا سکھ اٹھیا۔ اوہ وی ہندو وانگوں کسے شہروں آیا سی اوس اپنی پیلی پگڑی نال چکر بٹھیا ہو یا سی تے اوہدی کچھ وچ لمی ساری کرپان لمکدی پئی سی۔ نہنگ نیں وی ہندو وانگ بڑی تنکھی تقریر کیتی تے کہیا کہ فرید پور دے سکھ تیاری کر لین۔ وقت آؤن والا اے جدوں اساں نوں مسلیاں نال لڑنا پوے گا۔

گوردوارہ وچوں تقریراں سنن دے بعد سردار ہرنام سنگھ سدھا مراد خاں دی حویلی آیا تے مراد خاں نوں گرنتھی کانگریسی ہندو تے نہنگ دیاں تقریراں دالپ لباب دسیا۔ مراد خاں زور نال ہسیا تے بولیا۔

”بس ٹھیک اے چھریاں کہاڑیاں تیار کر ہرنام سیہاں تے کسے دن چپ کر کے پے جا مراد خاں نوں۔“

”توبہ۔ کریار مراد خاں۔ گرو دی کرپا چاہی دی اے۔ ساڈے پنڈ اجیہی کوئی گل نہیں ہوئے گی۔“ ہرنام سنگھ بولیا۔

”اے گرنتھی پنٹھی کانگریسی تے نہنگی ضرور سانوں اک دو جے نال لڑا کے مارن گے ویکھدار ہوئوں ہرنام سیہاں“

”نہیں مراد خاں۔ جد اسیں اک دو جے نال لڑاں گے نہیں تے ایہہ سانوں کیوں لڑا دیں گے؟“

”اوہ پئی اچ ساڈے مولوی اکبر کول وی شہروں بندہ آیا سی۔ اوہ دسدا سی کہ میں مسلماناں دی پالٹی دا بندہ واں۔ پاکستان بنان لئی تیار ہو جاؤ۔“

”مولوی اکبر نہیں کیہ کہیا سی؟“ ہرنام سنگھ نے کچھیا۔

”مولوی اکبر نہیں کہیا سی پاکستان ضرور بننا چاہی دا اے۔ پاکستان بنان واسطے ساڈی جان وی حاضر اے۔“

”ٹھیک کہیا مولوی اکبر نہیں۔ آزادی کون نہیں چاہندا مسلماناں ہندواں نے سکھاں

نوں آزادی ملنی چاہی دی اے۔“

”اج عشاء دی نماز توں بعد میری حویلی آجاویں۔ مولوی اکبر تقریر کرے گا اوہ تہاڈے گوردوارے والے اکٹھ توں بڑی گرمی کھا گیا اے۔“

”میں ضرور آواں گا۔ مولوی اکبر نہیں ہمیش سکھاں دا بھلا سوچیا اے۔ اوہدی وعظ تبلیغ وچ وی ساڈے بھلے دی کوئی نہ کوئی گل ضرور ہوسی۔“

”یاں تے پنڈ دے بھلے دی گل ہوئی تے یاں اوس دی گرنختی وانگ بیوقوفی دیاں گلاں کیتیاں۔“

”گرنختی واقعی بے وقوف اے۔ چرن سنگھ دے آکھے لگ کے شہروں بندے بلالیا یا مینوں تے اودوں پتا لگا جدوں گوردوارے وچ لوک اکٹھے ہو گئے سن۔“

”وکیہ لے فیر ہر نام سیہاں۔ اساں باہروں بندہ نہیں بلایا۔ سگوں آئے ہوئے نوں ہوں ہاں کر کے ٹرخا دتا اے۔ مولوی کوئی بھیڑی چنگی گل کرے گا تے پچھن والے بناں گے تے جے بندہ ہوندا باہر دا اوس سانوں گرمی دوا کے چلے جانا سی۔ جیویں تہاڈے گانگریسی تے نہنگ نہیں کیتا اے۔“

”اوہ یار مراد خاں ساڈے منڈیاں دیاں رڑکھٹراں نیں ساڈا بیڑا غرق کیتا اے۔ پنڈ وچ ڈانگ سونا چلدا ای رہندا اے۔ کرپا سنگھ نیں قاذونوں ماریا تے قاذو نے کرپا سنگھ نوں۔ گل ختم ہو گئی کرپا سنگھ نوں مونہہ ماردا کوئی ہور مار چھڈ دا۔ آخر لڑائی سی مرنا جیونا تے نال ہوندا اے ہن چک کرپا سنگھ نوں آزادی دا شہید بنایا جا رہیا اے۔ مینوں تے مراد خاں پنڈ دیاں منڈیاں دی عقل سمجھ دا کوئی پتا نہیں لگدا۔“

”منڈیاں نوں قابو وچ رکھ جے منڈے قابو وچ نہ رہے تے پنڈ والا گھان ہو جانا ایں۔ میں تے مسلمان منڈیاں نوں کہہ دتا اے کہ پنڈ وچ کوئی اجیہی گل نہ ہووے۔ جیہدے نال پنڈ دی سو بھائے حرف آوے۔ مجال اے کوئی مسلمان منڈا کھنگ جاوے۔“

”مراد خاں! توں سیانا آدمی ایں۔ پر مینوں تیرے یار بھتے خاں دا ڈراے۔ اوہ بندہ کجھ تیتے سبھا دا اے تے اوہدے منڈے بیرم خاں تے حنیف خاں وی لڑائی دے بڑے شوقین نیں۔“

”پئی ہر نام سیہاں۔ شوقین نیں لڑائی دے تے پئے ہون سانوں کیه؟ اپنے پنڈ وچ اوہ جو جی چاہندا اے کرن۔ میں اوہناں نوں فرید پور دے معاملے وچ لت نہیں پھیرن دینی۔ ہاں“

”بس میں وی ایہو چاہنا۔ جتے خاں دی طبیعت توں ڈر کے میں تینوں کہیا سی کہ صُغی دارشتہ اوہدے پتر بیرم خاں نال نہ کریں۔“

”توں مشورہ دتا اساں من لیا۔ کدے کدے توں ہر نام سیہاں کم دی گل وی کر جانا ایں“ مراد خاں نیں محول کردیاں کہیا۔ ”کم دی گل توں کدی کدی کرنا ایں۔ میں تے ہمیش کم دی گل کرنا واں“ ہر نام سنگھ نیں ہس دیاں ہویاں کہیا تے اوہ اٹھ کھلوتا۔

”لے یار میں چلنا واں۔ عشا دی نماز دے بعد آواں گا مولوی اکبر دی تقریر سنن“

”آہو۔ ضرور آویں ذرا رونق رہوے گی“ مراد خاں بولیا۔

ہر نام سنگھ دے جان دے بعد مراد خاں نیں سوچیا۔ پنڈ کتے اپنی اگ وچ آپ ای نہ سڑ مرے۔ صدیاں دے سانجھ پیار دے پھل مٹی وچ نہ رُل جان۔ آزادی تے خوشی دی گل اے۔ فیر ایہہ تلواراں کرپاناں دا کیه معاملہ ہو یا؟ ایہہ شہراں دے لوک پنڈاں وچ آکے آزادی دی خوشخبری دے نال نال لڑن مرن دی بُری خبر کیوں سناؤندے نیں؟ انج نہیں ہوسکدا کہ فرنگی چلا جاوے۔ پاکستان تے ہندوستان تے خالصتان بن جان پر بھر پے نہ ٹٹن۔ خون خرابہ نہ ہووے۔ سانجھاں قائم رہن۔ دل جڑے رہن۔“

”ہتھ ر ب جو کرے گا دیکھی جاوے گی“

”مراد خاں نیں کہیا تے کُتے دے سُوٹے مارن لگ پیا۔“

(7)

عشاء دی نماز پڑھ کے مولوی اکبر مراد خاں دی حویلی وچ آ گیا اوہدے نال بہت سارے غازی وی سن۔ جدوں دی پاکستان بنن دی گل چھیڑی ہوئی سی بہت سارے لوک مسیتے جان لگ پئے سن۔ کیوں پئی نماز پڑھن دے بعد مولوی اکبر علی مسلماناں دے مطالبہ پاکستان دا نکھیرا کر داسی تے لوک سُن دے سن۔ حویلی وچ پنڈ دے بہت سارے لوک پہلے

ای جمع سن تے کجھ آ رہے سن۔ سارے لوک زمین اُتے وچھیاں ہویاں صفاں اُتے بیٹھے سن۔ لوکاں نہیں کھیاں، چادران تے رضائیاں دیاں بُکلاں ماردیاں سن تے حقہ تما کو پی رہے سن۔ حویلی دے نال دے کوٹھے وچ پنڈ دیاں عورتاں تے کڑیاں اکٹھیاں ہوئیاں سن۔ ایہناں وچ صُغی تے پرتیو وی سن۔ مائی رُوڑی اپنے پُت نوں مراد خاں تے ہرنام سنگھ نال بیٹھے ہوئے ویکھ کے بڑی خوش سی۔ اوہنوں اِنج جا پدا سی جیویں بوٹے خاں زندہ ہو گیا اے تے اپنے یاراں کول بیٹھا اے۔

”سکھ تے مسلمان بھراؤ“۔ مولوی اکبر نہیں گلا صاف کر کے کہیا۔

”اج ساڈے پنڈ دے گوردوارے وچ اکٹھ ہو یا سی تے اوہدے وچ شہر دے دو بندیاں نے پٹھیاں سدھیاں گلاں کیتیاں سن۔ میں چاہنا واں، اپنے سکھ بھراواں نوں آزادی بارے دو چار سدھیاں پدھریاں گلاں دتاں تاں جے فرید پور دے پٹھاناں تے سکھاں وچ ویر نہ پوے تے پیار محبت تے سٹ نہ وے۔

گل ایہہ وے کہ انگریز سانوں آزاد کرنا چاہندا اے۔ تسیں پُچھو گے کہ انگریز سانوں ہن کیوں آزاد کرنا چاہندا اے؟ اج تُوں دس سال پہلے سانوں آزاد کیوں نہیں سی کرنا چاہندا۔ ایہدا جواب ایہہ وے کہ دوجی وڈی لڑائی دے بعد حالات بدل گئے نیں۔

لڑائی وچ جرمن، جاپان تے اٹلی نوں ہار ہوئی اے۔ ایہہ تھے ملک جمہوری ملکاں دے خلاف سن۔ جمہوری ملک اوہ ہوندا اے۔ جتھے عام لوکاں دی حکومت ہووے۔ کسے اک شخص دی حکومت نہ ہووے۔ برطانیہ جمہوری ملک اے۔ اوہ جت گیا اے ایہدا مطلب ایہہ ہو یا کہ عام لوک جت گئے نیں۔ ایہناں عام لوکاں وچ ہندوستان دے ہندو مسلمان تے سکھ وی نیں ایس واسطے ہندوستان دے عام لوک فتح حاصل کرن دے بعد انگریزاں کولوں حقیقی آزادی دی منگ کر رہے نیں۔ دوجی گل ایہہ وے کہ بھاویں برطانیہ لڑائی جت گیا اے۔ پر اوہدا لڑائی وچ کچھ مر نکل گیا اے۔ برطانیہ دے جوان مرے نیں اوہدی تجارت تباہ ہوئی اے مہنگ ودھیا اے لڑائی دے بعد برطانیہ ڈاڈھا کمزور ہو گیا اے۔ ساڈے اُتے حکم چلان والا فرنگی پتلا پے گیا اے تے ساڈے وانگوں مصر، فلسطین، برما، ملایا تے انڈونیشیا وی آزادی چاہندے نیں۔

تہیجی گل ایہہ وے کہ 1945ء توں پہلاں برطانیہ وچ چرچل دی پارٹی دی حکومت سی۔ چرچل دی پارٹی ہندوستان نوں آزادی دین دے خلاف سی تے چرچل دے مقابلے وچ اٹلی دی پارٹی ہندوستان دی آزادی دے حق وچ سی۔ 1945ء وچ چرچل دی پارٹی چٹا وچ ہر گئی تے حکومت اٹلی دی پارٹی وی بن گئی۔ ایس واسطے وی ہندوستان نوں آزادی مل رہی اے۔

پر سبھ توں وڈی گل ایہہ وے کہ ہندوستان دے ہندو مسلمان تے سکھ آزادی چاہندے نیں تے آزادی حاصل کرن لئی اوہ انگریزاں نال لڑن لئی وی تیار نیں۔ ”انقلاب زندہ باد“ تے ”فرنگی بچے ہائے ہائے“ دا مطلب ایہہ وے کہ لوک آزادی لین واسطے خون خرابے توں وی نہیں ڈرن گے۔ پر ایہہ خون خرابا کرن دا نعرہ انگریزاں دے خلاف اے تے جے خلاف نہیں تے ہونا چاہی دا اے۔

پر انگریز تے ہندو سکھاں نوں مسلماناں دے خلاف کر رہے نیں۔ جے سکھ مسلماناں دے خلاف ہو گئے تے دوویں قوماں تباہ ہو جان گیاں۔ فائدہ انگریزاں نوں پہنچے گا۔ چنگی گل ایہو اے کہ ہندو مسلمان تے سکھ پیار محبت نال رہن تے انگریزاں دے خلاف موڈھے نال موڈا جوڑ کے لڑن نہ۔ دو جے دی بے عزتی کرن تے نہ آپ بے عزت ہون۔

جتھوں تیک فرید پور دے مسلماناں دا تعلق اے ایہہ سکھاں اُتے کدے وی حملہ نہیں کرن گے کیوں جے مسلمان تعداد وچ تھوڑے نیں تے سکھ زیادہ جے فرید پور پاکستان وچ آ گیا تے سکھاں نوں کوئی تکلیف نہیں دتی جاوے گی۔

”کیوں مراد خاں؟“ مولوی اکبر نیں مراد خاں کولوں پچھیا۔

”بالکل بالکل۔ سکھ ساڈے بھرا نیں، بلکاں وڈے بھرا، بہتے جو ہوئے۔“ مراد خاں نیں کہیا۔

”تے جے فرید پور بھارت وچ آ گیا تے ظاہر فرید پور چھڈ کے پاکستان وچ چلے جان گے کیوں پئی ہر مسلمان دا دل چاہندا اے اوہ اپنے پیارے وطن وچ وسے رستے۔ کیوں مراد خاں ٹھیک اے نا؟“ مولوی اکبر نیں فیر پچھیا۔

”سولہ آنے ٹھیک اے۔ پاکستان بنن نال ساڈے وی کوئی اسلامی گل آ جاوے گی۔“

”اک گل ہو رکھ دیاں۔ اوہ گل ایہہ وے کہ سکھ مُنڈے گوردوارے جا کے گرنّھی
 کولوں گرنّھ سنیا کرن تے سمجھیا کرن۔ شراباں گھٹ پین تے سانسیاں نال گھٹ پھرن۔
 مسلمان منڈیاں نوں چاہی دا اوہ مسیتے آ کے نماز پڑھیا کرن تے اپنے اوس رب
 نوں یاد کرایا کرن جیہڑا اوہناں نوں رزق پہنچاندا اے۔ سائیں سپ کدے کدے بابا فرید
 دا کلام سناندا اے۔ میں اوہدے کولوں اک شلوک سنیا سی۔ تئیں وی سن لو تے غور کرو۔
 فریدا کوٹھے منڈپ ماڑیاں اُسار دے بھی گئے
 کُوڑا سودا کر گئے گوریں جائے

بابا فرید فرماندے نیں۔ اے فرید! ایس دنیا وچ لوک آئے اوہناں محل ماڑیاں
 اُساریاں پر ایہہ سارا کھوٹاتے نکما سودا سی۔ اوہ ایہہ سودا کر کے قبریں وچ جاسّے۔“
 مولوی اکبر نیں اپنی سوٹی پھڑی تے گھر گُریا۔ اوہدے بعد لوک اُٹھے تے مولوی
 اکبر دیاں گلاں اُتے وچار کر دے اپنے اپنے گھراں نوں تھر پئے:

(8)

1946ء تے 1947ء وچ قریب قریب ہر پنڈ وچ مولوی اکبر ورگے بندے لڑائی
 فساد نوں روکن دا جتن کر رہے سن۔ ایہہ سارے سیانے بندے سن۔ عقل سمجھ والے۔ عزت
 آبرو والے تے ہندوواں، مسلماناں تے سکھاں دا بھلا چاہن والے۔ ایہہ بندے آزادی
 دی دوڑ وچ کسے کولوں پچھے نہیں سن۔

اوہ کہندے سن آزادی نچت اے۔ ہندوستان نوں آزاد ہونا چاہی دا اے۔
 پاکستان بن کے رہوے گا۔ سکھاں نوں اوہناں دے حق حقوق ملنے چاہی دے نیں۔ پر
 آزادی ملن، پاکستان بنن تے حقوق لین واسطے ایہہ لازمی نہیں کہ ماواں کولوں پتر کھولو،
 سہاگناں نوں رنڈیاں کر کے بٹھادیو، بھیناں کولوں ویر گھس لواک دُوبے دا سر پاڑو،
 آپوں مرو تے دُوجیاں نوں مارو۔ ایہہ ساریاں عقل دیاں گلاں سن پر ہندو عقل مند ہو
 کے بیوقوف بن گیا سی۔ پہلاں اوس اثر و رسوخ کولوں کم لیا پر کجھ نہ بنیا۔ انگریز پاکستان
 بنان لئی راضی ہو گئے۔ فیر اوس روپے پیسے نال پاکستان ختم کرن دی کوشش کیتی پر روپیہ

وی کم نہ آیا۔ مسلمان وکن لئی تیار نہ ہوئے ایہدے بعد اوس پاکستان دے خلاف ہتھیار چک لئے پر ہتھیار چلاؤن لئی سکھاں نوں اگے کیتا۔ کیوں جے سکھ قوم سٹ مارنا تے سٹ کھانا جاندی سی۔

ایس کم لئی ہندو سیٹھاں نیں اپنیاں تجوریاں دے مونہہ کھول دتے کیوں جے دھن والی قوم سی بارود سدے برچھے بلماں اکٹھیاں ہون لگ پیاں۔ اوہ ہندو سکھ جیہناں کدے سوئی پھرد کے وی نہیں ویکھی اپنے آپ نوں سیوا جی، رانا سانگا تے پرتھوی راج کہن لگ پئے۔

مسلمان کبھدے نالوں ماڑے سن۔ مسلمان تے جھدا بہادر ہوندا اے اوہدی زندگی دی بنیاد ای ایس گل اُتے اے کہ کوئی تہاڑے اگے چچا سر نیواں کردا اے تے تئیں اوہدے اگے گٹھ نیوں جاؤ تے جے کوئی آکڑ پھاکڑ دسدا اے تے رب رسول دانالے کے لکڑ مارو تے میدان وچ آجاؤ۔ مر گئے تے شہید بُرائی ختم ہو گئی تے غازی۔ برائی کولوں ڈر کے تننا نمر دپنا اے۔

1946ء تے 1947ء وچ جے وی فساد ہوئے۔ پہل ہمیشاں ہندوواں ولوں ہوئی۔ یا تے ہندوواں نیں آپ پٹھ چکلیا تے پھر بے سمجھ سکھاں نوں شہ دتی کہ پتر و سولی چڑھ جاؤ رام بھلی کرے گا۔ ہندوواں دی قومی جماعت کانگریس دی مثال ساڈے سامنے اے اک زمانہ سی قائد اعظم وی کانگریس وچ سن تے ہندوواں تے مسلماناں دی صلح صفائی لئی کم کر دے سن۔ پر اخیر اوہناں نوں وی نا اُمید ہو کے کانگریس نالوں علیحدہ ہونا پیا۔ اوہ ہندوواں دی ذہنیت نہیں سی بدل سکدے ایس ذہنیت دی سبھ توں وڈی گل ایہہ سی کہ مسلماناں نوں نقصان پہنچاؤ۔ تعلیمی طور تے سیاسی طور تے مالی طور تے مذہبی طور تے۔

کئی مسلمان سکھ تے ہندو اک دوجے نوں نقصان اپڑان دے خلاف سن پر جتھے لڑائی فساد کراؤن والیاں دے ڈھول وجدے ہون او تھے امن دے سنیے دین والے طوطے دی آواز کون سُن دا اے؟ فرید پور وچ وی ایہو گل ہوئی۔

نرنجن سنگھ ترکھان تے بہتر سنگھ لوہار نے چرن سنگھ دے گھر بھٹھی گڈ لئی۔ بہت سارا لوہیا تے ونجھ آ گئے۔ برچھے بنن لگ پئے۔ بلماں دیاں پنچھاں سان اُتے تڑکھیاں ہون

لگ پیاں۔ چھوٹیاں دے پھالے چمکن لگ پئے۔ لمیاں لمیاں ونجھاں نال چھوٹیاں،
 بکماں، برچھے تے ٹکوائے لگ گئے۔ گتکاتے تلوار بازی لئی شہراں دے ہندو تے سکھ باہر
 آ گئے۔ شراب دیاں بوتلاں کھل گیاں۔ گوردوارے وچ جلسے ہون لگ پئے۔ انقلاب
 زندہ باد تے ست سری اکال دے نعرے وچن لگ پئے۔ ہندو سکھ بھوتر گئے۔

فرید پور دے مسلماناں دیاں اکھیاں اگے دن نوں تارے نچن لگ پئے۔ ہر نام سنگھ
 پنڈ دے منڈیاں نوں گالیاں دے دے دے کے تے جتیاں مار مار کے پھاوا ہو گیا۔ منڈے
 گالی تے جتنی کھاندے سن پر جس لیک اُتے تڑے ہوئے سن ذرا نہیں سی ہندے۔ کدے
 کدے کوئی زکا موٹا سکھ لیڈر فرید پور آ کے ہر نام سنگھ نال پچھلے اندروڑ کے گلاں کردار ہندا
 سی پر ہمیش ہر نام سنگھ ہر لیڈر نوں دھکے دے کے گھروں کڈھدا ویکھیا گیا۔

اوہ مراد خاں کول روز شام نوں آؤندا سی تے اوہدی حویلی آ کے ہندو سکھ لیڈراں
 نوں پنج پنج سوگالی کڈھدا سی۔

”میرے یار! تُوں کجھ نہیں کر سکتا۔ تُوں بے وس ایس۔ جدوں خلقت پاگل ہو
 جاوے تے کسے دی وی پیش نہیں جاندی۔“

مراد خاں اوس نوں کہندا سی۔

”پر میں نہیں چاہندا پئی فرید پور دے سکھ تے مسلمان اک دو جے نال لڑن، ساڈے
 پیو دادے اکٹھے جئے پلے، اکٹھے ملے ورتے، اکٹھے اُٹھے بیٹھے۔ پر ایہہ نواں پوچ پاگل
 کیوں ہو گیا اے؟ مینوں ایہدی سمجھ نہیں آؤندی مراد خاں“ ہر نام سنگھ اپنے غصے نال تے
 اپنی اُچی آواز وچ بولدا پئی اوہدیاں اکھاں لال ہو جاندیاں تے داڑھی تھک ڈگ ڈگ
 کے چٹنی ہو جاندی۔

”تیرے ایس سوال دا جواب میرے کول نہیں ہر نام سیہاں۔ ایس سوال دا جواب
 اپنے ہندوواں تے سکھاں کولوں پچھ“ مراد خاں کہندا۔

”میں پچھیا اے۔ میں ہر اوس ہندو تے سکھ لیڈر کولوں پچھیا اے جیہڑا میرے پاس
 آیا اے۔ مینوں ہر کوئی ایہو کہندا اے تُوں پاگل ایس۔ عقل دی گل کر برچھا پھڑتے مراد
 خاں دے ڈھڈ وچ مار۔ دس مراد خاں میں تینوں مار سکناں واں؟“

”نہیں۔ ہرنام سنگھ، مراد خاں نوں نہیں مار سکدا تے مراد خاں ہرنام سنگھ نوں نہیں مار سکدا۔ ہاں ہرنام سنگھ مراد خاں لئی مر سکدا اے تے مراد خاں ہرنام سنگھ واسطے جان دے سکدا اے۔ اوہ اک دوہے نوں مارنا وی چاہن تے نہیں مار سکدا۔“

”شباباشے مراد خاں۔ لکھ روپے دی گل کیتی او۔ مرداں والی گل کیتی او۔ اوئے میرے کالجے وچ ٹھنڈ پے گئی او مراد خاں تیری گل سن کے پٹھانا! جتھے تیرا مڑھکا ڈگے او تھے ہرنام سنگھ اپنے دل دا خون ڈلھے گا۔“

اوہ دوویں حویلی وچ بہہ کے ایس طرحاں دیاں گلاں کر دے تے اوہناں دے کناں وچ برچھتیاں بلماں چنڈن دیاں آوازاں آوندیاں۔

اک دن اوہ دوویں مراد خاں دی حویلی بیٹھے گلاں کر رہے سن تے خان پورا پٹھان ہتے خاں آ گیا اوس اپنیاں لمبیاں لمبیاں مچھاں اُتے مہندی لائی ہوئی سی۔ قادو نے اوہدی گھوڑی پھر کے کھلے نال بنھئی تے اوہ منجی اُتے بہہ گیا تے بولیا۔

”مراد خاں! میں سُنیا اے تیرے پنڈ لڑائی بھڑائی دیاں بڑیاں تیا ریاں ہو رہیاں نیں۔ کیہ کہندا اے؟“

”آہو ہے خاں۔ گل ہرنام سنگھ دے قابو وچ نہیں رہی۔ باہر ہو گئی اے“ مراد خاں نیں کہیا۔

”ہرنام سنگھ دے منڈے تے ایس ساری تیاری وچ آگو ہتھ ہتے ہوئے نیں کیہ کہندا اے؟“

”اوئے ایہو تے رونا اے کہ گھر نوں آگ گھر دے بندے لا رہے نیں۔“ مراد خاں بولیا۔

”ہرنام سنگھ اوہناں نوں منع کیوں نہیں کر دا؟ کیہ کہندا اے۔“

”لے دس۔ انھے ہرنام سنگھ اوہناں نوں منع کیوں نہیں کر دا۔ اوئے ہرنام سنگھ تے اوہناں نوں منع کر کے پاگل ہو گیا اے۔ روز شام نوں پیلی پکڑی والے نہنگ یاں گاندھی ٹوپی والے ہندو آ جاندے نیں۔ اوہ ہرنام سنگھ دی دن دی کیتی کتری رات نوں کھوہ وچ پا جاندے نیں۔ دس ہرنام سنگھ وچارا کیہ کرے؟“

”کرے ایہہ کہ منڈیاں نوں بھیرى تھان نہ جان دیوے۔ کیہ کہندا اے۔“

”اوہ تے ٹھیک اے۔ پئی ہر نام سنگھ منڈیاں نوں بھیرى تھان نہ جان دیوے پر ہر نام سنگھ اودوں کیہ کرے جدوں منڈے چھیں داتریاں مار کے پٹھے لین جان تے اوگرے دے چو وچ جا کے گنگا تے کرپان چلاونی سکھدے رہن۔ دس مینوں؟“ پھر تے واقعی ہر نام سنگھ بے قصور اے۔ کیہ کہندا اے؟“

”بس فرید پور دے سکھاں وچ اک ہر نام سنگھ تے اک ایہدا وڈا منڈا سلکھن سنگھ پڑی توں نہیں اترے، باقی سارے اتر گئے جے۔“

”گل انج اے مراد خاں۔ فرید پور وچ چالی (40) گھر سکھاں دے نیں تے تہ (30) گھر پٹھاناں دے۔ سکھ بہتے نیں تے نالے تیاری وچ نیں۔ جے کتے لڑائی ہو پئی تے سکھاں نے پٹھاناں وچ کجھ نہیں چھڈنا۔ کیہ کہندا اے؟“

”رب مالک اے جتے خاں۔ ویلا آیا تے ویکھی جاوے گی“ مراد خاں نے کہیا۔

”واگورودی کرپانال ایسا ویلا کدے نہیں آئے گا۔“ اخیر ہر نام سنگھ بولیا۔

”ویلا تے آ گیا اے۔ لڑائی فساد دیاں خبراں اخباراں وچ روز آؤندیاں نیں کیہ

کہندا اے؟“

”جدوں فساد ساڈے کول آئے گا ویکھی جاوے گی۔ جتے خاں“ مراد خاں نہیں سی

چاؤندا پئی جتے خاں لڑائی فساد دیاں گلاں کرے۔

”مراد خاں نیں کہیا میں لمیاں نہیں جاندا۔ سدھی پدھری گل کرنا واں پئی توں وی

تیاری کر۔ کیہ کہندا اے؟“

”کاہدی تیاری خانصاحب؟“ مراد خاں نیں رکتھے جینے مونہہ نال پکھیا۔

”ایخو فرید پور دے سکھاں دے مقابلے دی ہوور کاہدی تیاری۔ کیہ کہندا اے؟“

”فرید پور دے سکھ تے پٹھان آپس وچ بھرا بھرا نیں تے بھرا بھرا لڑ دے تے

اک دوجے دے خلاف تیاری کر دے سوہنے نہیں لگدے جتے خاں“ مراد خاں نیں جتے

خاں نوں سمجھان دیاں کہیا۔

”توں تیاری نہیں کرنی تے خان پور دے پٹھان تیار نیں کیہ کہندا اے؟“

”میں فرید پور دے سکھاں دے ہتھوں مر جانا چنگا سمجھنا واں بجائے اسدے کہ خان پور دے پٹھان فرید پور دے سکھاں نوں مارن۔ نہیں سمجھیا؟“ مراد خاں نہیں غصے نال کہیا۔

”ہچھا ایہہ گل اے!“

”آہو“

”پر خان پور دے پٹھان فرید پور دے سکھاں نوں اپنا دشمن سمجھدے نیں۔ کیہ کہندا اے؟“

”ہر نام سنگھ سمیت ہتے خاں؟“ ہر نام سنگھ نہیں ہچھیا۔

”نہیں ہر نام سنگھ تے میرا سا جھی اے۔ کیہ کہندا؟“

”شکر اے۔ ہر نام سنگھ نوں تُوں اپنا سا جھی سمجھنا ایں ہتے خاں۔ پر ایہہ وی سکھ اے“

مراد خاں نہیں طنزاً ہس کے کہیا۔

”ایہہ ہور طرحاں دا سکھ اے۔ کیہ کہندا؟“

”کیہ گل؟ ایہدے ہر سنگھ نیں تے باقی سکھاں دے ہر نہیں ہیں؟“

”باقی ساڈے دشمن نیں“ ہتے خاں نہیں کہیا۔

”ہتے خاں۔ میں تیرے دل دی گل جاننا واں۔ فرید پور دے سکھ تے پٹھان سارے تیرے دشمن نیں۔ توں سکھاں یا پٹھاناں دا ویری نہیں۔ توں خان پور دے مقابلے وچ فرید پور دا ویری ایں۔ ایس واسطے پئی فرید پور دے سکھ تے پٹھان خان پور دے پٹھاناں دے مقابلے وچ ٹوہر والے نیں پیسے والے نیں، عزت آبرو والے نیں تُوں فرید پور دی عزت آبرو دا ویری ایں۔ تینوں فرید پور دے مسلماناں نال کوئی ہمدردی نہیں۔ تینوں اپنی نفرت نال ہمدردی اے۔ اوہ نفرت جیہڑی فرید پور پنڈ دے خلاف تیرے دل وچ مدتاں توں چھپی ہوئی اے“ مراد خاں غصے وچ آ گیا سی۔

”کیہ کہندا۔ میں چلنا واں۔ قاذو! سنیاں نیں مراد خاں دیاں گلاں۔“ ہتے خاں منجی اُتوں اٹھ کھلویا ”جدوں فرید پور دے سکھاں دے برچھے فرید پور دے پٹھاناں دیاں ہٹکاں تے چھاتیاں وچ مورییاں کرن گے خان پور دے پٹھاناں نوں آواز مارنا مراد خاں۔ کیہ کہندا“

”مراد خاں اپنے پیراں تے کھلو کے لڑنا مرنا سکھیا ہو یا اے اوہ ہتے خاں نوں آواز

ہن مارے گا“ مراد خاں نہیں کہیا۔

”پر جے تُوں آواز ماریں گاتے اسیں اوس ویلے تیری مدت لئی نہیں آواں گے۔ کیہ کہندا؟ اودوں میرے منڈے سکھاں دے کسے دوجے پنڈ وچ لڑ دے ہون گے۔“

”یار! تُوں اپنے بہادر منڈیاں نوں اپنے کول ای رکھ“ مراد خاں نہیں اک پک کے کہیا۔ ہتے خاں نیں گھوڑی کھولی پھٹا کی مار کے گھوڑی اُتے بیٹھاتے بولیا۔

”خان پور یے فرید پور دے سکھاں دی تیاری از ماؤن لئی فرید پور ضرور آؤن گے۔“

”جم جم آؤن۔ فرید پور دے پٹھان فرید پور دے سکھاں دیاں ڈھالاں بنن گے ہتے خاں“ مراد خاں جوش نال منجے اُتوں اُٹھ کھلوتا۔ ہے خاں نیں گھوڑی نوں اڈی لائی تے حویلیوں باہر ہو گیا۔

”قاؤ و پتر۔ میری حویلی وچ بھٹھی چڑھا دے تے برچھیاں بلماں تیار کر کل میں تے ہر نام سنگھ تھیلے جا کے سوٹے وی لے آواں گے۔“

”بچھا تایا جی“ قاؤ و نے دھون نیویں پا دتی۔

”فرید پور دے سکھ تے پٹھان فرید پور دی آن لئی اکٹھے لڑن مرن گے“ مراد خاں نیں کہیا تے بچھا ہو یا کھتھ بھکھان ڈیہہ پیا۔

(9)

اخباراں دیاں سُرخیاں موٹیاں تے لمیاں ہو گیاں۔ اخبار پڑھدیاں ہتھ کنبدے سن تے دماغ اُتے سکاں وجدیاں سن۔ فلانے نیں فلانے نوں گولی مار دتی، فلاں نیں فلانے دی گردن کرپان نال کپ دتی، فلانے شہر وچ فساد ہو گیا۔ بم پھٹن کارن پنج بندے مر گئے تے باراں بندے پھٹڑ ہوئے۔ فلاں شہر دے فلانے محلے وچ سوڈے واٹر دیاں بوتلاں نال لڑائی ہوئی۔ دو نیاں مرے تے چار زنائیاں زخمی ہویاں۔ سکھاں نیں مسلمان جٹاں دے پنڈ تے حملے کر کے مکان ساڑ دتے۔ مسلمان تھانیدار نیں سکھاں دے پنج بندے تھان تے سٹ لئے، فلانے لیڈر نیں فلانے چوک وچ کھلو کے تقریر کیتی پئی یا بیٹ و سے گارتے یا فیر بانگر۔ اسیں اپنے دشمنان نوں اگن جمن جوگا نہیں چھڈاں گے فلانے لیڈر

دی تقریر دے جواب وچ ڈھنگیرے لیڈر نہیں کہیا اے پئی ساڈی قومی پالیسی دا بنیادی اصول ”ہنّے یا ہنّے“ اے۔

اخبار کیہ سن دکھاں دیاں پوٹلیاں سن۔

دن ہفتے تے ہفتے مہینے بن دے گئے۔ تیاریاں مکمل ہو گیاں، پنڈاں تھاواں وچ پہلے تے آرام رہیا پر کدوں تیک؟ اخیر شہراں وانگ پنڈاں وچ وی پریڈاں تے قواعداں ہوم ڈیہہ پیاں۔ وارداتاں ودھن لگ پیاں۔ رات نوں ڈھول وچن لگ پئے تے نعریاں دیاں آوازاں آؤن لگ پیاں۔ اک پنڈ توں دوجے پنڈ جتھے چڑھن لگ پئے۔ رات نوں سونا حرام ہو گیا۔ لوک ڈانگاں سوٹے، برچھیاں، گہاڑیاں، تلواراں، بلماں، چھوٹیاں نگوئے، برچھے، سوٹے، پستول، بندوقاں لے کے اپنی جان تے مال دی حفاظت کرن لگے پئے۔

پاکستان دا اعلان ہون وچ تھوڑے دن رہ گئے سن فرید پور دے سکھ وی لڑائی لئی تیار سن تے پٹھان وی۔ ہرنام سنگھ دا خیال سی کہ پٹھاناں نیں لڑائی دی تیاری پنڈ دے سکھاں اسلام پور دے پٹھاناں کولوں پچان لئی کیتی اے۔ پر پنڈ دے باقی سکھ ہرنام سنگھ دے ایس خیال تے ہمدے سن۔ اوہ کہندے سن مراد خاں نیں ہرنام سنگھ نوں دھوکے وچ رکھیا اے۔ اوہدا اصل مقصد ایہہ اے کہ جدوں جتے خاں باہروں فرید پور دے سکھاں اُتے حملہ کرے تے مراد خاں اندروں سکھاں دا پی مارے۔ پر ہرنام سنگھ نوں سکھاں دیاں ایہناں گلاں اُتے کدے یقین نہ آیا۔

پٹھان اپنے پنڈ دے سکھاں دے اپنے تے حملے دا مقابلہ کرن لئی وی تیار سن تے پنڈ دے سکھاں اُتے خان پوریاں دے حملے نوں وی روکن لئی تیار سن۔ سکھ ایہہ چاہندے سن کہ خان پور دے حملہ کرن توں پہلے اپنے پنڈ دے پٹھاناں دا گھان بچہ کولہو دتا جاوے۔ جو ہوئے گی سو ویکھی جاوے گی۔ اوہناں ایس کم لئی چودہ 14 اگست دی رات متھی ہوئی سی۔ اوسے دن ای پاکستان بنن دا اعلان ہو رہیا سی۔ سکھاں نوں یقین سی کہ فرید پور نیں بھارت وچ آؤنا اے۔ تے مسلماناں نوں پنڈ چھڈ کے پاکستان جانا پوے گا۔ اوہ چاہندے سن پنڈ دا اک مسلمان جی وی نہ بچ کے جاوے۔

درشن سنگھ، چرن سنگھ، بھتر سنگھ، نرنجن سنگھ اک رات تلسی داس کواڑ دی دکان اُتے

برچھے لے کے کھلوتے ہوئے سن۔ اوہناں ساریاں نیں شراب پیتی ہوئی سی تے اوہ شانتی نال ہاسا بکھیرا کرن آئے ہوئے سن۔

”سردار درشن سیہاں۔ فیرکیہ ارادے نیں۔ دھرم نال“ بنارسی نیں اکھ مار کے درشن سنگھ نوں پچھیا۔

”واہگورو دی سونہہ۔ میں اج باپونوں کہہ دتا کہ مینوں تے صُغی پسند اے۔ مینوں ہور کجھ نہیں چاہی دا“ درشن نیں شراب واہوا پیتی ہوئی سی تے اوہدے بولن دا طریقہ اُولا بولاسی۔

”دھرم نال لکھ روپے دی گل کیتی اُوسردار درشن سیہاں“ بنارسی نیں سر ہلا کے کہیا۔

”اُوئے سانوں تے بس قادو دی کھل نال پیار اے لالہ بنارسی اُوئے اسیں اوہدی کھل وچ توڑی بھر کے حویلی وچ رکھاں گے۔ ہاں“ چرن سنگھ بولیا۔

”بس داری۔ ہور کوئی نہیں“ بختر لوہار پیلے پیلے دند کڈھ کے ہسیا۔

”اُوئے بختر سیہاں کلا نوں نہیں۔ دوویں بھرا۔ اُوئے آہو“ بختر لوہار دا بھرا نرنجن ترکھان نیں بختر دے موڈھیاں اُتے ہتھ مار کے آکھیا۔

”جیو میرے شیر و جیو۔ فرید پور نوں مان اے تہاڈے اُتے، دھرم نال“ تلسی داس نوں چنگا بھلا پتا سی کہ ایہہ شیر ڈھونگے کھوہ اُتے قادو دے سامنے بھیڈاں بنے سن پر اوہ کراڑ پُتر سی۔ اوہنوں کیہ لوڑ سی سچ بولن دی۔ اوہ اجکل جھوٹھ دا تھوک بیوپار کر رہیا سی۔

”اُوئے مراد خاں دی ساری دولت اساں تلسی داس دے پیراں وچ ڈھیری کر دینی اے۔ ویکھدے تے رہو۔“ درشن سنگھ نیں تلسی داس نوں اوہدا حصہ دتا۔

”میں تیرا متھا چُماں درشن سیہاں۔ دھرم نال۔“ تلسی داس خوش ہو یا ایہو جیہیاں گلاں ہر اوس جگہ ہندیاں سن تے جتھے فرید پور دے سکھ مُنڈے گھڑی پل لئی اکٹھے ہو جاندے سن۔

اخیر 14 اگست نوں پاکستان بنن دا اعلان ہو گیا تے فرید پور دے سارے سکھ جھگ وانگ ٹھنڈے پے گئے۔ فرید پور پاکستان وچ آ گیا سی!

اوہ سکھ گبھرو جیہڑے گلیاں وچ ساہن بنے بڑھکاں مار دے پھر دے سن اندروں گنڈے مار کے گھریں بہہ گئے۔

مراد خاں نہیں ہر نام سنگھ نوں اوس ے دن ای حویلی بُلا کے کہیا۔
 ”ہر نام سیہاں گھبران دی کوئی گل نہیں۔ فرید پور دے سکھ ساڈے بھرا نہیں۔ اوہناں
 نوں میرے ولوں کہہ دے کوئی فکر نہ کرن۔“

”مراد خاں! مینوں فرید پور دے پٹھاناں کولوں ڈر نہیں آؤندا۔ مینوں جتے خاں
 کولوں ڈر آؤندا اے۔ کہتے اوہ حملہ نہ کر دے۔“ ہر نام سنگھ گھبرایا ہو یا سی۔
 ”جتے خاں دی نیت واقعی ٹھیک نہیں پر تُوں فکر نہ کرا سیں اوہدیاں پر چھیاں اپنے
 سینے اُتے لواں گے۔ واہ حد کیتی آ ہر نام سیہاں۔ تُوں تے یار انج ای دل چھڈ بیٹھا ایں“
 مراد خاں نہیں ہر نام سنگھ نوں دلیری دتی۔

”مراد خاں! میرا دل کہندا اے کہ تُوں سچ کہنا ایں پر میرے دل وچ بیٹھا ہو یا وہم
 یا انج کہو بٹھایا ہو یا وہم کہندا اے کہ مراد خاں نہیں تیرا ساتھ نہیں دینا۔“
 ”وہم دا علاج لقمان حکیم کول وی نہیں سی۔ دس ہُن میں تیرا وہم تیرے دل وچوں
 کیویں کڈھاں؟“

اوہ گلاں کر رہے سن تے دینے مراٹی دامنڈا فیروز دوڑیا دوڑیا آیا تے بولیا۔
 ”خانصاحب اج رات ساڈے پنڈ اُتے حملہ ہو رہیا اے!“
 ”کون کر رہیا اے حملہ ساڈے پنڈ اُتے؟“ مراد خاں نہیں تسلی نال پچھیا۔
 ”جتے خاں تے اوہدے پتر تے نالے دُوبے“ فیروز نہیں چھیتی نال کہیا۔
 ”ٹھیک اے کرن حملہ اسیں مقابلہ کراں گے۔ تُوں قاؤو ول جاتے اوہنوں کہو کہ تیار
 ہو جاوے۔“

”بہت اچھا جی“ فیروز قاؤو ول نس گیا۔
 ”ہر نام سیہاں! تُوں سکھاں نوں کہہ دے کہ اوہ آرام نال گھریں بیٹھن۔ گھبراؤن
 دی کوئی لوڑ نہیں۔“

”انج نہ اوہناں نوں گھراں وچ ای پھوک دتا جائے۔“ ہر نام سنگھ نہیں کہیا۔
 ”ہر نام سیہاں! جتے خاں سانوں مار کے تے ساڈے گھر گُٹے ساڈے تہانوں قتل کر
 دے تے میرا دوس کوئی نہیں۔ میرے جیوندیاں جی تہانوں کچھ نہیں ہووے گا۔ آہو۔ یقین کر“

”مینوں یقین اے مراد خاں تیری گل اُتے“

ہر نام سنگھ نہیں کہیا۔ ہولی نال منے اُتوں اُتیا تے دھون نیویں پا کے سوچدا ہویا
اپنے گھروں لڑ پیا۔

(10)

پاکستان بنن دی خوشی وچ مراد خاں نیں 14 اگست دی شام نوں اپنی حویلی وچ چار
دیگاں زردے دیاں تے چار دیگاں پلا دیاں پکائیاں تے سارے پنڈ دیاں بچیاں نوں بُلا
کے نیاز کھوائی۔ فوجی رستم خاں دے کا کے شیموں نیں بچیاں دی پلٹن بنائی تے ساری
حویلی وچ قواعد کیتی پر اوس اپنی پلٹن نوں کاشن سارے سکھاں والے دتے۔ اوہ کہتے لگ
جھپ کے گوردوارے وچ سکھاں دی ٹریننگ ویکھ آیا سی تے کاشن اوس نوں زبانی یاد ہو
گئے سن۔ پریڈ دیکھن والے ہس ہس کے دوہرے ہو گئے۔ ہسن والیاں وچ ہر نام سنگھ
تے مولوی اکبر وی سن۔

سائیں سپ وی اپنی گودڑی موڈھے اُتے رکھ کے نیاز کھان آیا ہو یا سی۔ اوس نیاز
کھا کے ڈکار مارے، گھنگرو پیراں نوں بٹھے، مکھیتڑ موڈھے اُتے رکھی تے دھمال پون لگ
پیا۔ اوہ نال نال نعرے وی مار رہیا سی۔

علیٰ دا مست قلندر، ہو۔

علیٰ دا پہلا نمبر، ہو۔

شیموں تے شیموں دیاں یاراں باشاں نیں اوہدے آ لے دوالے گھیرا گھت لیا سی
تے اوہ وی سائیں سپ دے نال شامل ہو گئے سن۔

اخیر سائیں سپ دھمالاں پا کے تھک گیا تے جتھے دھمال پارہیا سی او تھے ای گودڑی
اُپر لے کے سوں گیا۔

اوس ے دن ای اڈھی رات نوں خان پور دے پٹھان ڈانگاں سوٹے تے برچھیاں
بلماں لے کے فرید پور دے سکھاں نوں وڈھن ٹکن لئی آئے۔ فرید پور دے سکھاں نیں
کدے خان پور دے پٹھاناں نوں تنگ نہیں سی کیتا۔ ایہہ ٹھیک اے پئی ہر نام سنگھ تے

اوہدے پتر سلکھن سنگھ دے سوا فرید پور دے سکھ جنگی تیاری وچ سن پر ایہہ تیاری فرید پور دے پٹھاناں دے خلاف سن۔ خان پور دے پٹھاناں دے خلاف نہیں سن۔ مراد خاں نہیں سی چاہندا کہ فرید پور دے سکھاں اُتے کوئی بھاری بنے۔ اک تے اوہ ہر نام سنگھ دا بلی سی۔ دو جے اوہ وعدہ دے پکا سی کہ سکھاں نوں نقصان نہیں پہنچے گا تے تیجے اوہدا خیال سی کہ جے پاکستان وچ وسن والے سکھاں نوں کوئی تکلیف پہنچی تے ہندوستان وچ وسن والے مسلماناں نوں بہتی تکلیف پہنچے گی۔ مولوی اکبر نیس اوہنوں ایہہ وی دسیا سی کہ اسلام وچ ذمیاں نوں بلا وجہ تکلیف پہنچان دی اجازت نہیں۔ مراد خاں۔ قادو تے فوجی رستم خاں گھوڑیاں اُتے سن۔ مراد خاں کول ہر نام سنگھ دی کرپان سی۔ قادو تے فوجی رستم خاں کول بلماں سن۔ پنڈ دے باقی منڈیاں کول برچھیاں، ٹکڑے، چھوٹیاں، سوٹے تے دراٹ سن۔ کئی صرف ڈانگاں لے کے آئے سن۔ اوہناں ساریاں نیس منڈا سے بٹھے ہوئے سن تے تہمت کئے ہوئے سن۔

بٹے خاں نوں اُکا یقین نہیں سی پئی فرید پور دے پٹھان سکھاں نوں بچان لئی اوہدے مقابلے وچ آؤن گے۔ پر ہُن اوہ آ ای گئے سن مقابلے وچ۔ بٹے خاں لئی وی مشکل ہو گیا سی پئی اوہ پرت جاوے۔ آخر اوہ وی لمیاں مچھاں والا پٹھان سی۔

فرید پور دے پتراں وچ ٹاکرا ہو یا۔ خان پور یے فرید پور وڑنا چاہندے سن تے فرید پور یے خان پوریاں نوں نسانا چاہندے۔ قادو دی گھوڑی نندی سی تے خان پور دے گجھرو اوہدے اگلوں دُور دوڑ لا جاندا سن۔ کئی پھٹڑ ہوئے سن تے کنیاں دیاں بانہواں مٹیاں سن۔

اچانک فوجی رستم خاں نیس بلم مار کے ہے خاں دا پٹ چیر دتا۔ اوہدے منڈے بیرم خاں نوں پتا لگا تے اوہ شوٹ مراد خاں ول نسا تے برچھا مار کے اوس نوں گھوڑیوں ڈیگ لیا۔ اوہدے بعد اوہ تے اوہدا ننگا بھرا حنیف ہے خاں نوں چک کے لڑ دے لڑ دے پچھوڑ ہٹ گئے۔ مراد خاں دے مرن نال فرید پوریاں دے وی دل ٹٹ گئے۔ قادو مراد خاں دی لوتھ گھوڑی اُتے رکھ کے حویلی لے آیا تے مولوی اکبر نوں لوتھ لاگے بٹھا کے پنڈ دے پہرے اُتے بیٹھ گیا۔ خطرہ سی کہ بٹے خاں دے پتر پھر حملہ نہ کر دیں۔

قاؤو نے اوس ے راتیں ہر نام سنگھ دے گھر جا کے اوس نوں کہیا۔

”چاچا! اپنے سارے بندیاں نوں کہو کہ کپڑا لیڈا ٹونب چھلاتے چیز وست پھرن تے تیار ہو جان۔ میں اوہناں دے لئی بیڑیاں دا انتظام کرنا تاں جے شاہ ویلا ہون تیکر سارے بندے راوی توں پار ہو جان۔“

”نہیں پُتر، اسیں اپنے بھیڑے نہیں کہ مراد خاں دی لاش چھڈ کے راویوں پار ہندوستان چلے جائے۔ اسیں اوس نوں دفنا کے جاواں گے۔“

”چاچا! میں تائے مراد خاں دے حکم نوں چھیتی پورا کرنا چاہنا واں۔

اوہ مرن توں پہلے مینوں کہہ گیا اے کہ بھاویں تیری جان میرے وانگ چلی جاوے پر توں فرید پور دے سکھاں اُتے کوئی گل نہیں آؤن دینی۔ کیوں جے میں اوہناں نوں اوہناں دی حفاظت دا وچن دے چُنگا واں۔“

”ٹھیک اے پُتر، توں ساڈے بھلے واسطے کہنا ایں پئی اسیں راوی ٹپ کے ہندوستان چلے جائے پر اسیں اج رات نہیں جانا کیوں اسیں اک تے اوہدے جنازے وچ شامل ہونا چاہنے آں تے دو جے اوہدا اک ضروری کم کرنا اے۔“

”اوہ کیہ کم اے چاچا؟ مینوں دس۔ میں کراں گا۔“ قاؤو نے کہیا۔

”اوہ کم تیرے کرن والا نہیں اوہ کم مولوی اکبر دے کرن والا اے“ ہر نام سنگھ نے کہیا۔

”آپے کم مولوی اکبر کر لوے گا۔ تسیں تیاری کرو تہانوں پار ٹپائیے۔ جے جتے خاں نیں

حملہ کر دتا تے کوئی سکھ ماریا گیا تے میں اگلے جہان تائے مراد خاں نوں کیہ جواب دیاں گا؟“

”ہے نا بھولا۔ اوئے قادر داد خاں! سانوں اک دن وچ کجھ نہیں ہون لگا۔ میں

مراد خاں دی میت چھڈ کے نہیں جاسکدا۔ آہو۔ نالے تیرا کل نکاح وی پڑھانا اے۔“

”نکاح؟ میرا؟ کدے نال؟“ قاؤو ویاہ دی گل اچن چیتی سُن کے حیران ہو گیا سی۔

”پُتر! جتے خاں دے مقابلے تے جان توں پہلاں مراد خاں نیں مینوں تے مولوی

اکبر نوں اپنی حویلی بلایا سی تے کہیا سی کہ جے مر جاواں تے تسیں جیوندے رہو تے صُغی

تے قادو دا نکاح پڑھا دینا۔ ہُن سمجھ گیا ایں نا؟ میں اج رات نہیں کل رات فرید پور
چھڑاں گا۔“

”چنگا جیویں تیری مرضی پر گھر میت پئی ہووے تے اُتوں نکاح پڑھیا جارہیا
ہووے۔ کجھ چنگی گل نہیں لگدی۔“

”دیکھ قادو داد جس طرحاں مرن والے دا حکم تُوں اپنی چھیتی پورا کرنا چاہنا ایں تے
فکر مند ایں اُنج ای میں چاہنا واں مرن والے دی میں اچھیا پوری کراں۔ آہو۔ جاہُن جا
کے سوں جو ہونا سی ہو گیا۔“

”تُوں وی چاچا سوں ہن تینوں وی نیندر آئی وی ہووے گی۔“
”نہیں مینوں کوئی نیندر نہیں آئی پتر۔ مینوں اج رات کیویں نیندر آسکدی اے؟“
”نیندر تے مینوں وی نہیں آئی ہوئی۔ میں تے چل کے حویلی بہنا واں۔“
”ہور کون کون نیں حویلی؟ ہر نام سنگھ نیں کچھیا۔“
”سارا پنڈ ای اکٹھا ہو یا ہو یا اے۔“

”چلو فیرا سیں وی چلیے حویلی۔ میں گھر آیا ساں کہ پریتو جا کے صُغی لاگے بیٹھے۔ پتا
نہیں اوس معصوم دا کیہ حال اے؟“

”رب ای جاندا اے چاچا۔ مینوں تے دیر ای ہوئی اے صُغی نوں ملیاں۔“
”قادو دا پتر بہت بُرا ہو یا۔ مراد خاں بندہ نہیں سی، پہاڑ سی پہاڑ۔ دل گردے والا،
انگ پالن والا۔ اوہ جو کہندا سی اوہدے اُتے عمل کردا سی واہ اوئے پٹھانا۔ تینوں کتھوں
لہھیے، ہر نام سنگھ دیاں اکھاں وچوں اتھرو ڈگ ڈگ کے اوہدی داڑھی وچ اٹکن لگ پئے۔
پھر اوہ دوویں اُٹھے تے مراد خاں دی حویلی ول تڑپئے۔“

(12)

ساری رات پنڈ دے بندے پنڈ دے آ لے دوالے ڈھانیاں بنا کے پہرہ دیندے
رہے پرہے خاں یا اوہدے پتر بیرم خاں میں حملہ نہ کیتا۔ مولوی اکبر تے پنڈ دے بڈھے
ٹھیرے مراد خاں دی میت کول بیٹھے رب رب کر دے رہے۔ مولوی اکبر جن ساری عمر

مراد خاں نال ایس کر کے مُتّہ لائی رکھیا سی پئی مراد خاں نماز نہیں پڑھدا۔ رب دے حضور
اوہدی بخشش لئی دعاواں منگدا رہیا۔

سویرنوں سائیں سپ دی اکھ گھٹئی اوس اکھیاں ملیاں۔ گودڑی دی بُکل وچوں نکلیا
تے کھلو کے نعرہ ماریا:

رَب رَب کہوتے سدا راضی رہو!

جو کریں گا سو بھریں گا۔

فیر اوس ویکھیا کہ بہت سارے لوک اک منجے دے آلے دوالے چپ چان دھوناں
نیویاں پا کے بیٹھے ہوئے نیں تے منجے تے کوئی لمی تان کے سٹا ہویا اے۔ اوس اپنی
گودڑی سنبھالی، مکھیتر موڈھے اُتے چائی تے ہولی ہولی پیر پُندا مولوی اکبر دے کول جا
کھلوتا۔ اوہدے گھنگر وواں دا چھنکار ساری حویلی دی چُپ وچ گونج کے چُپ ہو گیا۔

”مولوی جی! مولا خیر کرے کیہ گل اے؟“ اوس مولوی اکبر نوں چکھیا سارے لوک
سائیں سپ ول اکھاں پاڑ کے تلن لگ پئے۔ اوہناں دیاں اکھاں وچ افسوس دُکھ تے
غصہ سی۔ غصہ ایس لئی پئی مراد خاں رات لڑائی وچ مر گیا اے تے بھنگ پین والے گندے
مانگ نوں ابے تیک پتا ای نہیں۔

”سائیں جی! رات ہتے خاں نیں فرید پور دے سکھاں نوں قتل کرن لئی حملہ کیتا تے
مراد خاں سکھاں نوں بچاؤ ندا بچاؤ ندا بیرم خاں دے ہتھوں مر گیا۔“ مولوی اکبر نیں دسیا۔
سائیں سپ کجھ دیر چُپ رہیا جیویں اوہ مولوی اکبر دی گل سُن کے اوہنوں سمجھن دی
کوشش کر رہیا ہووے۔

”پچھاتے فیر مر گیا مراد خاں۔ میرا یار؟“ اوہ انج بولیا جیویں اوہ اپنے کولوں پچھ رہیا
ہووے۔

”آہو سائیں جی“ مولوی اکبر نیں تلخی نال کہیا۔ انج جیویں کہیا ہووے ”آہو بیوقوف!“۔
سائیں سپ مراد خاں دے منجے دی پائی نال لک لا کے بہہ گیا تے مکھیتر نوں گود
وچ لما پالیا فیر اوہ سوچدا ہویا۔ نموجھانا ہو کے بولیا۔
”بابا فرید سچ فرما گئے۔“

”کَلر کیری کھیری، آؤ لتھے ہنچھ

پنچو بوڑ نہ پیوہن، اڈن سنڈی ڈنچھ

بابا جی فرماؤندے نیں: ایہہ دنیا اک چھپڑی اے تے اوہدے چار چوہیرے کَلر اٹھی زمین اے۔ اوہ کَلر کھادی زمین جیہدے وچ کجھ نہیں ہوندا۔ چھپڑی کول ہنس آگئے نیں تے بہہ گئے نیں۔ ایہہ ہنس اللہ دے پاک بندے سمجھو۔ اوہناں ہنساں نوں ترہہ لگی اے۔ اوہ اپنیاں پنچھاں پانی وچ پوندے نیں۔ پر اے پانی سیس پیندے تے اوہناں نوں فیراؤ کے اُتاتنہ جان دی چاہت لگ جاندی اے۔

”باوا لوکو! رب دے پیارے ایس کوڑ دنیا نال پیار نہیں ودھاؤندے۔ اوہ چھیتی چھیتی اپنے پالنہار کول جاون دی چاہ کردے نیں۔“

سائیں سپ نیں گل کر کے دھون نیویں پائی۔ لوکاں نیں اوہدی گل اُتے دھیان دتا کیوں پئی اوس اپنی گل جذبے دے پانی نال بھیوں کے کہی سی۔ سائیں سپ نیں دھون چکی تے پھر بولیا..... بابا فرید سچ فرما گئے۔

چَل چَل سکھیاں پنکھنیاں جہناں دسائے تل

فریدا! سُر بھریا وی چل سی تھکے کول اکل

بابا جی فرماؤندے نیں: اوہ پنچھی وی اڈاری مار گئے۔ جیہناں علاقے دسائے سن۔ فریدا! اک دن دنیا دا بھریا ہویا چھپڑ سک جاوے گا۔ صرف اللہ دے پیارے، دنیا نال پیار نہ پان والے ہمیش لئی جیوندے جاگدے رہن گے اساں تہاں ساریاں نیں اک دن مرجانا اے۔ اپنے اللہ کول اوسے طرحاں چلے جانا اے جیویں میرا یار مراد خاں چلا گیا اے۔ سائیں سپ دیاں اکھاں وچوں اتھرو ڈگ ڈگ کے گود وچ رکھی مکھیر اُتے پین لگ پئے۔ پھر اوس روندیاں اکھاں اُتاتنہ چکیاں تے بولیا۔

”بابا فرید سچ فرما گئے:

فریدا! دریا دے کتے بگلا بیٹھا کیل کرے

کیل کریندے ہنچھ نوں چنتے باز پئے

بابا جی فرماؤندے نیں: ایہہ دنیا دریا اے تے انسان اک بگلے طرحاں اے۔ بگلہ

دریا دے کنڈھے اُتے ناز نخرے کردا تھر پھر رہیا اے۔ اپن چیت موت دا باز اڈاری مار
کے باز اُتے حملہ کردا اے تے اوس نوں مار دیندا اے۔

دنیا دے دریا وچ اسیں خواہشاں دیاں مچھیاں بگے وانگ پھڑے رہنے آں تے
پھر چُپ چپتے سٹ وٹ کے موت دا باز آ جاندا اے تے سانوں انج پھڑ کے مار دیندا اے
جیویں بگلہ مچھی نوں۔ ایہہ باز ہر بگلے تے حملہ کردا اے۔ اساں تساں اخیر موت دے باز
دا شکار ہونا اے۔ اج میرا یار مراد خاں ہویا اے کل میں ہو جاواں گا۔ پرسوں مولوی اکبر
چوتھ کوئی ہوڑ۔

مراد خاں دی میت دے آ لے دوالے بیٹھے سارے لوکاں دیاں اکھاں وچ اتھرو
سن۔ مولوی اکبر اپنی پگڑی دے لڑنا اپنیاں اکھاں پونجھ رہیا سی۔ تھوڑی دیر چُپ رہ کے
سائیں سپ فیر بولیا:

فریدا! کوٹھے منڈپ ماڑیاں ات نہ لائیے پت

مٹی پئی اتو لوں کوئی نہ ہوسی مت

بابا جی فرماؤندے نیں: اے فریدا! دنیا دے کوٹھیاں، محلاں تے حویلیاں نال اپنا پت
نہ لا۔ ایہناں کوٹھیاں، حویلیاں تے محلاں نیں اخیر ڈگ پینا اے تے ایہناں دے اُتے
انتولی مٹی پے جانی اے۔ ایہناں نظروی نہیں آنا۔ ایہناں دی شان نیں تیرا مت نہیں بننا۔
اصل پیار رب نال پاتے رب دے کول چلا جاویں جیویں میرا یار مراد خاں چلا گیا اے۔
سائیں سپ نیں مکھیر گود وچوں چک کے موڈھے اُتے رکھی تے اُٹھ کے کھلو
گیا۔ ساریاں لوکاں اُتے اُن نظر ماری۔ اوہدیاں اکھاں لال ہو گئیاں سن۔ پھر سائیں
سپ نیں ”رب رب کہو تے سدا راضی رہو“ دا نعرہ ماریا تے گھنگھرو چھنکاؤندا حویلی چوں
باہر نکل گیا۔ لوک اپنے اتھرو پونچھن لگ پئے۔

سورج دی ٹلی اُتاناہہ آگئی سی تے سارے پنڈ وچ چُپ دا ہونجا پھر گیا سی۔ تھوڑی
دیر بعد قاؤو۔ فوجی رستم خاں تے ہرنام سنگھ کہنیاں چکیاں حویلی آئے۔ اوہ مراد خاں دی
قبر کڈھ کے آئے سن۔

مولوی اکبر نیں مراد خاں دی میت نوں غسل دتا تے فیر پنڈ دے سارے مسلمان

تے سکھ ہندو اونوں دفنان لئی قبرستان لے گئے۔

اوس ے دن شاہ ویلے مولوی اکبر نیں قادو تے صُغی دا نکاح پڑھا دتا۔ قادو دی بے
بے رسم دے طور تے صُغی نوں مراد خاں دے گھروں ٹور کے اپنے گھر لے گئی۔

(13)

نکاح دے بعد مولوی اکبر، ہرنام سنگھ، قادو تے فوجی رستم خاں نیں صلاح کیتی پئی
فرید پور دے سکھ دن دُبن توں پہلے پہلے راوی پار کر جاوَن۔ قادو نے فیروزے نوں
ملاحاں ول بھیجیا کہ اوہ ڈیگر ویلے پتن توں اگے پچھے ہون دی کوشش نہ کرن تے
بیڑیاں لنگھائی لئی تیار رکھن۔

ایہہ فیصلہ ایس واسطے کیتا گیا سی پئی جے سکھ اک ہور رات راوی نہ ٹپے تے ہو
سکدا اے بٹے خاں تے اوہا پتر بیرم خاں پھر جتھ لے کے حملہ نہ کر دین۔

دوپہر نوں جد قادو گھر گیا تے بہت ساریاں زنانیاں اوہدی ماں کول پھوہڑی اُتے
بیٹھیاں ہوئیاں سن اوہناں عورتاں وچ صُغی وی گچھو چُھو ہو کے بیٹھی سی تے اوہدے سر
اُتے اوہو پُرانی پھلکاری سی جیہڑی اوہ اُپر لے کے وسا کھی دا میلہ ویکھن گئی سی تے پھر
ہسپتال وچ قادو دے نال۔ قادو نوں سمجھ نہ آئی کہ اوہ مراد خاں دے مرن اُتے رووے یا
صُغی نال ویاہ ہون کر کے ہستے۔ اوہ روون تے ہستن دی دہلیز اُتے کھلوتا ہو یا سی تے سوچ
رہیا سی پئی کیہ کرے۔

”کاکا! ہرنام سنگھ تے دو جے سکھ بھرا جے، اج رات نہ جان تے تُوں اوہناں دی
روٹی پکا لے۔“ مائی روڑی نیں کہیا۔

”بے بے! اوہ اج دن دُبن توں پہلاں راوی پار کرنا چاہندے نیں“ قادو نے
ویرھے وچ کھلوتیاں کھلوتیاں کہیا۔

”اوہ اک رات ہو رہیں نیک سکدے؟“ اوہدی بے بے نیں پچھیا۔

”نہیں بڑا مشکل اے۔ اوگرے دے بُبانے اج سویرے پتن پار کر گئے نیں۔

سکھاں دے باقی پنڈ وی چلے گئے نیں“ اوس اپنی بے بے نوں دسیا۔

”کاکا۔ اگے ساڈا بڑا نقصان ہو گیا اے۔ ہن کسے نال نہیں لڑنا“ ماں میں نصیحت کیتی۔
 ”بے بے! اسیں اگے کیہدے نال لڑن گئے ساں؟ ہن جے کوئی گھر آ کے مارنا
 چاہوے تے پھر لڑائی دے بغیر چارہ کوئی نہیں۔“
 ”توں سویر دی روٹی وی نہیں کھادی کاکا۔“
 ”بھکھ ہووے تے روٹی کھاواں۔ بھکھ ای مر گئی اے۔“
 ”کاکا! توں سویر داکم کر کر کے تھک گیا ایں۔ دو گھڑی بہہ کے آرام کر لے۔ توں
 رات دا نیندرا وی ایں۔“

”چاچا ہر نام سنگھ تے دو جے خیری سلا نال راوی پار کر جاؤن تے آرام کراں گا۔“
 قادوا ایہہ گل کر کے ہر نام سنگھ ول تڑپیا۔

پنڈ دے سارے سکھ تے تلسی داس چیز وست بنھ کے تیار ہو گئے سن۔ بناری نہیں
 فرید پور چھڈن توں انکار کر دتا سی۔ اوہ کہندا سی میرے وچ ہندوواں والی کیہڑی گل
 اے پئی میں ہندوستان جاواں۔ ساری عمر تے مسلماناں نال بہہ کے روٹی کھاندا رہیا واں
 تے پانی پیندا رہیا واں۔ میں تے ہن سونہہ وی ایمان دی چکنا واں دھرم دی نہیں۔ شانتی
 نہیں وی بڑا زور لایا پر اوہ بالکل تیار نہ ہويا۔ اوہ دے ایس فیصلے نہیں تلسی داس تے شانتی
 توں زیادہ چرن سنگھ تے درشن سنگھ نوں دکھ دتا۔

پنڈ وچ چار گڈھے سن۔ دو سکھاں دے تے دو پٹھاناں دے۔ پٹھاناں دے
 گڈھیاں اُتے فوجی رستم خاں تے دُلا گاڈھی وان بن گئے تے سکھاں دے گڈھیاں
 اُتے زرنجن سنگھ تے درشن سنگھ۔ فیصلہ ایہہ ہو یا پئی جیہڑے سکھ ذرا غریب تے نتھا دین نہیں
 اوہناں نوں پہلے پتن تے پہنچایا جائے۔ اوہ ایہہ نہ سمجھن مسلماناں نہیں لحاظ ملاحظے والے
 سکھاں دی مدد کیتی اے تے غریباں دی سار نہیں لئی تے وات نہیں پکھئی۔

پنڈ دے سارے مُنڈیاں نہیں مُنڈا سے بٹھے ہوئے سن تے اوہناں دے ہتھ وچ
 ڈانگ سوئے تے برچھیاں بلماں سن۔ شیموں وی اپنے پر نے دا ٹھاٹھ بنھ کے تے ہتھ
 وچ اپنی نکی ساری تلوار پھڑ کے اپنے پیو دی گڈھ اُتے بیٹھاسی۔

سبھ توں پہلی گڈھ سورج ڈھالے پین نال تلسی داس، شانتی تے اوہناں دے گھر

دے سامان نوں لے کے پتن ول تری۔ ایہہ گڈھ فوجی رستم خاں دی سی۔

فرید پور دے مسلمان اپنے پنڈ دے سکھاں نوں بچان واسطے تے پتن نوں پار کرن واسطے جانا تلی اُتے رکھ کے کم کر رہے۔ اوہ اوہناں دی حفاظت کر دے ہوئے اپنے پنڈ دا سردار بندہ دی مروا بیٹھے سن۔ پر فیر دی بعض سکھاں نوں یقین نہیں سی آیا پئی مسلمان دل دے ساکھل تے وعدے دے پکے نہیں تے اوہ اپنا وعدہ توڑ چاڑھن لئی جان دی بازی لوا بیٹھے نہیں۔ خاص طور تے سکھ عورتاں بہت ڈریاں ہوئیاں سن۔ اوہ آپس وچ اک دوجی نوں کہندیاں سن کہ مسلماناں نہیں مسلمان ملاحاں نوں کہیا ہو یا اے کہ بیڑی جس ویلے دریا دے وچکار ہووے ڈوب دیوتاں پئی سکھ رڑھ پڑ جان۔ ایہہ غلط پراپیگنڈہ شانتی تے چرن سنگھ دی گھر والی ہر نامی داسی۔ اوہ اک طرحاں سکھ زنانیاں دیاں لیڈراناں بنیاں ہوئیاں سن۔

فیصلہ ایہہ کیتا ہو یا سی کہ جیہڑے لوک پتن اُتے آون اوہ سامان بیڑی وچ رکھن تے نالو نال راوی پار کر دے جان تاں جے کم چھیتی مک جاوے پر سکھ مرد تے عورتاں بیڑی وچ نہیں سی بہندے۔ اخیر تلخی داس نہیں قاؤونوں کہیا کہ اوہ آپ ہر بیڑی وچ ہووے کیوں جے اوہناں نوں مسلمان ملاحاں اُتے وشواس نہیں۔

قاؤونے اپنی گھوڑی دارسہ بیڑی بنن والے کلتے نال اڑنگیا تے گھونڈ پھڑ کے بیڑی وچ جا کھلوتا۔ اوہدے کھلون نال سارے ای لوک بیڑی وچ بہہ گئے تے بیڑی تڑ پئی اوہ لوکاں نوں پارے کنڈے اُتار کے پلٹ آیا تے فیر دوجی تیار بیڑی وچ جا چڑھیا۔

سردار ہر نام سنگھ اُزلے کنڈھے روندیاں تے ڈسکدیاں سکھ تیویاں نوں پُچ کرارہیا سی۔ گڈھے آرہے سن۔ لوکاں نوں تے لوکاں دیاں چیزاں نوں پتن اُتے اُتار رہے سن تے فیر جا رہے سن۔ جیہڑے مُنڈے سکھاں دے گڈھیاں دی حفاظت لئی مقرر سن اوہ خزانے دے سنتریاں وانگ چوکنے تے ہوشیار سن۔ گڈھیاں توں سامان اُتارن والے جوان مُدھکو مُدھکی ہوئے دے سن پر اوہناں دے متھے اُتے اک وٹ نہیں سی۔ بیڑی وچ کھلوتا ہو یا لکٹیاں مُچھاں تے گول سونے مکھڑے والا قادر داد ہمت تے دلیری دا مجسمہ جا پدا سی۔ قاؤون دا فوجی تجربہ فرید پور دے سکھاں دے بڑا کاری آیا سی۔ اوس پہلے توں

حساب لایا ہویا سی کہ چار گڈھاں دے دس پھیرے۔ فرید پور دے سارے سکھاں نوں
پتن اُتے پہنچا دین گے۔

نُو پھیرے لا کے گڈھے دسویں پھیرے فرید پور گئے ہوئے سن۔ سورج دی ٹکلی
ڈبن وچ حالی دیراے۔ سورج سکھاں نوں راوی دے پرلے کنڈھے ڈبے گا۔ قادو نے
راوی دے اڈھ وچکار جاندی بیڑی وچ کھلوتیاں سوچیا تے اطمینان دالما ساہ لیا۔

آخری پھیرے دی پہلی گڈھ فوجی رستم خاں تے شیموں لے کے پتن اُتے پہنچے۔
اوہدے بعد دُتے دا گڈھا آیا تے دُتے دے بعد نرنجن سنگھ دا۔ درشن دا گڈھا آخری
پھیرے دا آخری گڈھا سی تے اوہ کتے نظر نہیں سی آؤندا۔ فرید پور تے راوی پتن دے
وچکار بیلاوی سی تے کما دے اُچے اُچے کھیت وی۔

گڈھا خراب نہ ہو گیا ہووے رستے وچ“ قادو نے بیڑی وچ کھلوتیاں سوچیا۔
”نرنجن سیہاں! درشن سنگھ دا گڈھا نہیں لبھدا۔ کتھے اے؟“ قادو نے زور نال آواز
مار کے پچھیا۔

”گڈھا اوس لدھ لیا سی تے سلکھن سنگھ، پرتیو گڈھے وچ بہہ گئے سن۔ دلدر سنگھ
حویلی وچ اپنی جُتی لبھ رہیا سی۔ میرا خیال اے دلدر سنگھ دی وجہ نال ڈیری ہوئی اے“
”آؤندا تے میں اوہنوں جتیاں مارنا واں۔ سارا پنڈ راوی ٹپ گیا اے تے دلدر
سیہاں اے تیک جُتی لبھ رہیا اے بیوقوف دا پتر نہ ہووے تے۔“
سردار ہرنام سنگھ غصے وچ آ گیا سی۔

”دُلیا! اوہ کون نئے آؤندے نیں بیلے وچوں؟“ نرنجن سنگھ نیں دو بندیاں ول اشارہ
کر کے پچھیا۔ دوویں بندے سکھ سن تے ریت وچوں دی نئی آؤندے سن۔
”ایہہ تے درشن سنگھ تے دلدر سنگھ نیں“ فوجی نیں گوڑ لایا۔

”آہو۔ آہو۔ ایہہ درشن تے دلدر نیں پر ہویا کیہ اے؟“ دُلا فکر مند ہو گیا۔ قادو
بیڑی وچوں اتر کے اپنی گھوڑی لاگے کھلو گیا تے کھونڈ گھٹ کے پھڑ لیا۔
”میرا خیال اے کوئی گڑبڑ ہو گئی اے“ فوجی نیں دسیا۔ قادو نے کَلّے نالوں گھوڑی دا
رستہ کھولیا چنگی ماری تے گھوڑی اُتے بہہ گیا۔

”پُتر۔ دوڑ کے جا۔ کچھ کیہ گل ہوئی آ۔ جا میرا پُتر“ ہر نام سنگھ نہیں لیلوی بھر کے
کہیا۔ قاؤو نے گھوڑی نوں اڈی لائی تے ریت وچوں وی سٹ دتی۔ اگانہہ جا کے اوس
درشن سنگھ تے دلہ ر سنگھ کول گھوڑی کھلار دتی۔

بیرم خاں تے اوہدے دو ساتھیاں نہیں بیلے وچ گڈ اُتے حملہ کیتا سی۔ مقابلہ کردا
سلکھن سنگھ زخمی ہو گیا تے درشن سنگھ تے دلہ ر سنگھ جان بچا کے پتن ول نس آئے۔ پرتیو
نوں بیرم خاں گھوڑی اُتے سٹ کے کماداں وچ ڈر گیا۔

گھوڑی دے اُتوں، قاؤو نے اشارے نال فوجی رستم خاں تے دُتے نوں بلایا تے
درشن سنگھ نوں کہیا۔

”فوجی چاچے تے دُتے نوں کہنا گڈ تے سلکھن سنگھ نوں لے کے پتن اُتے آ جان۔
میں پرتیو نوں لیاؤنا واں“۔ ایہدے بعد قاؤو نے گڈیاں دارستہ چھڈ کے گھوڑی کماد دے
کھیتراں ول سٹ دتی۔

”رب ای اے مینوں میرے مقصد وچ کامیاب کرے۔ اوہ تن نہیں تے میں اکلا۔
ایہہ نہ ہووے میرے جان توں پہلاں بیرم خاں تے اوہدے نال دے پرتیو دی عزت
نوں ہتھ پا چکے ہوں“ گھوڑی چڑھے قاؤو نے سوچیا۔ بیلٹپ کے اوہ کماد دے اک کھیتر
وچ جا وڑیا تے گھوڑی کھلار کے اوس پرتیو دی چیک دی بڑھک لئی۔ پر اوہدے کناں وچ
کوئی آواز رولا یا چیک نہ پئی۔ اوس گھوڑی نوں اڈی لائی تے کھیتر دے دوسرے پاسے
جانکلیا۔ دُور اوس تن گھوڑ سوار ویکھے جیہناں وچوں اک نہیں گڑی چکی ہوئی سی تے اوہ
اگلے کماد دے کھیتر وچ وڑن والے سن۔ قاؤو نے گھوڑی ہور تیز کر دتی اوہدے
ویکھدیاں ویکھدیاں گھوڑے سوار کھیتر وچ جا وڑے۔

ایہہ کھیتر خان پور دے بابے مہندو داسی تے اوہدے وچکار اک گڈھیال تے ڈنگر
بنن نوں اک کوٹھاوی سی۔

قاؤو جس ویلے گھوڑی نسا کے ویلے دے پلانے وچ پکھیا تے اوس ویکھیا۔ بابے
مہندو دا منڈا شاہنا دو گھوڑیاں کلکیاں نال ہنہ چکا سی تے تیجی گھوڑی ہنہ رہیا سی۔ قاؤو
نوں ویکھ کے شاہنا گھوڑی دارستا چھڈ کے کماد ول نسا تے اکھاں توں اوہلے ہو گیا۔ بیرم

خاں تے جیدہ پریتونوں گڈھیال وچ دھو کے مار کے چپ کرار ہے سن چھال مار کے قاؤ
گھوڑی توں اُتریا تے گڈھیال دے دروازے وچ گھونڈا لار کے کھلو گیا۔

”بیرم خاں۔ جیدیا۔ سوٹے لے کے باہر آ جاؤ۔“

گڈھیال دے سیونک کھادے بُو ہے نال قاؤ دی آواز پتھر وانگ وُجی۔

”تُوں اندر آن کے ویکھ۔“ بیرم لکاریا۔

قاؤ نے زور نال دروازے نوں لٹ ماری تے دروازہ اندر والے پاسے ڈگ پیا۔

قاؤ آپ سٹ مارن تے کھان لئی تیار ہو گیا۔

جیدا تلوار اگے ودھا کے، دند پی کے گولی دی سٹ وانگ اندروں باہر آ پیا۔ قاؤ پاسا

وٹ کے گڈھیال دے چنے نال لگ گیا۔ سٹ وچ جیدا ویلنے نال جانکرایا۔ چنگی مار کے

قاؤ جیدے کول بچھتا تے کھونڈ سروں کڈھ کے اوہدے لک وچ ماریا۔ جیدا تھاں اُتے بے

وس ہو کے ڈگ پیا تے بے ہوش ہو گیا۔

قاؤ گڈھیال دے اندر وڑیا تے زور نال بولیا ”پریتو“۔

”قاؤ ویر“ پریتو گڈھیال دی ٹکر وچوں بولی۔

”بھین دیا ویر! ذرا اگے پیر پٹ تے سامنے بٹر کے آ.....“ بیرم خاں کچھی وٹ

کے تے دند پیس کے غصے وچ بولیا۔

گڈیال دے اندر ہنیر اسی تے اک پاسے سواہ نال بھریا ہو یا چنبہ تے دو جے پاسے

چھوی دیاں پنڈاں سن۔ بیرم خاں چھوی دی اک پنڈ دے اوہلے کبھے ہتھ نال پریتو دا گلا

پھڑ کے تے سچے ہتھ نال برچھی تان کے کھلوتا ہو یا سی۔

”لگ چھپ کے لکارن دامزہ نہیں سامنے آ کے شکل دکھاتے وار کر۔“ قاؤ نے کہیا۔

”وار کرن توں آیا ایس میں نہیں آیا۔ تُوں پھل کر“ بیرم خاں اوسے طرحاں غصے وچ برہکیا۔

”پریتونوں چھڈ دے، تُوں میرا بجن تے میں تیرا بلی“ قاؤ نرمی نال بولیا۔

”میں تیرے کہن اُتے پریتونوں چھڈنا ہوندا تے ہتھ کیوں پاؤندا جے ایہہ تیرے

دل دی چھمک چھلو بن سکدی اے تے میرے دل دی کیوں نہیں بن سکدی“ بیرم خاں

دی آواز وچ طعنہ بیٹھیا ہو یا سی۔

”لے فیرنگڑا ہو جا سجا“۔ قادو نے لکاریا تے کھونڈا اُلا ر کے ہولی ہولی اگے ودھیا۔ اوہدے کناں وچ پریتو دے لمیاں ساہواں دی شوکر پے رہی سی تے اوہدے سریر دے گرم خون دا اک اک تہکا اگ دا لائو بن گیا سی۔

چھوٹی وچ سرس ہوئی تے فیر برچھی دا چٹا بوہا جیہہ کڈھ کے بجلی ونگر اگے اُلیا۔ قادو دے تہبند دی ڈب وچ مست جیہی لگی تے فیر اوہو چٹا لوہا سپ دی جیہہ بن کے اوہدے ڈھڈھ وچ دھس گیا۔ ”مر گیا اوئے“ قادو دی آواز وچوں نکلیا تے اوہ ڈگدا ڈگدا سنبھل گیا۔ بیرم نیں سر چکیا تے ہسیا پر قادو دے اُترے ہوئے کھونڈ دے اگے۔ اوہدے سر دی کھوپڑی انج ٹٹی جیویں نکلے ہدوانے اُتے ڈانگ وچ تے اوہ ٹوٹے ٹوٹے ہوئے جائے۔ پریتو دے گلے اُتوں بیرم دا ہتھ چکیا گیا تے اوہ دوڑ کے آئی تے قادو دے سینے نال لگ پئی۔ پھر اوس قادو دیاں حریان اکھیاں ول تکیا تے سوالیہ نشان بن کے رہ گئی۔

قادو نے کھونڈ سٹ دتا سی تے دوویں ہتھ اپنے ڈھڈ اُتے رکھے ہوئے سن۔ اوہ اوس ے انداز وچ گڈھیال دے باہر آیا تے گھوڑی لاگے آ کے کھلو گیا۔ پھر اوس پریتونوں خون نال گچن ہتھاں نال لکوں پھڑ کے گھوڑے تے چڑھایا تے آپ ہنبلا مار کے چڑھیا۔ گھوڑی نوں اڈی لائی تے پتن ول سر پٹ دوڑ پیا۔

جد اوہ پتن تے پہنچیا اوہدے پنڈ دے بندے تے بیڑیاں دا پور اوہدا تے پریتو دا انتظار کر رہے سن۔ پریتو چھال مار کے گھوڑے توں اُتری تے قادو نوں اتارن لگ پئی۔ جد باقی لوکاں نیں ویکھیا پئی قادو دے کپڑے خونوں خون ہوئے ہوئے نیں تے اوہ وی دوڑ کے اوہدے لاگے آ گئے۔

”ایہہ کیہ ہو یا منڈیا؟“ فوجی نیں گھبرا کے ہکھیا۔

قادو دیاں اکھیاں ہنیرا سی تے اوہدا حلق خشک ہو گیا سی۔ اوس کجھ کہنا چاہیا پر بول اوہدی زبان تے نہ آ سکے۔ قادو گھوڑی دا سہارا لے کے کھلوتا سی۔ جد اوہ زمین اُتے ڈگن لگاتے فوجی نیں اگانہہ ودھ کے اوہنوں پھڑ لیا تے سینے نال لالیا۔

”قادو مر رہیا اے“ اوہ بھیجی ہوئی آواز وچ بولیا تے شیموں سمیت سارے لوک اوہدے ہور نیڑے آ گئے۔ فیر پریتو اگے ودھی اوس، قادو دا سجا ہتھ پھڑیا۔ اوہنوں چُمیا تے

اکھیاں نال لا کے ڈھانیں مار کے رون لگ پئی۔

شیموں نیں ایہہ کجھ ویکھیا تے ہر نام سنگھ وی لاٹھی پھڑ کے کھلو گیا تے رون ہٹکا ہو کے اُچی اُچی بولن لگ پیا۔

”چلو پتن تے چلو۔ بیڑیاں وچ بیٹھو..... پریتو آگنی اے۔ چلو چھیتی کرو، بھا قادر داد شہید ہو گیا اے تے تاں کیہ اے؟..... میں جو ہیگا واں“

سارے لوک سرسٹ کے پتن ول ٹر پئے۔ پریتو قادو دے ہتھ نوں اکھاں نال لا کے روندی رہی۔ اخیر اوہدا بابو اوہدے کول آیا تے بولیا۔

”دھیئے! اوہدی قوم ہمیشہ جیوندی رہندی اے۔ جس قوم دے لوک نیکی واسطے مرنا جاندے نیں۔“ فیراوس پریتو دی بانہہ پھڑی تے پتن ول لے ٹریا۔

جد سارے لوک بیڑیاں وچ بہہ گئے تے شیموں نوں تسلی ہو گئی پئی اوہ خیریں مہریں ہندوستان اُپر جان گے اوہ پلٹیا تے اپنے فوجی پوکول نمو جھان ہو کے کھلو گیا۔

فوجی نیں قادر داد دی لوتھ اپنے لگ اُتے سٹی تے پنڈ ول ٹر پیا۔ شیموں اوہدے ”چکھے نکے نکے قدم پُٹ رہیا سی..... فیرا وہ زور نال ہسیا تے نعرہ لاؤن دے انداز وچ بولیا، ”میں پاکستان آں، میں پاکستان آں۔“

دُور لہندے وچ سورج ڈُب رہیا سی تے اوہدی لاکھی رنگ رُشنائی نال قادر داد دے پنڈ دی مسیت دے چٹے منارے سونے دے پانی وچ نہار ہے سن۔

فوجی قادر داد دی لوتھ لے کے چانن تے ہنیرے دی سرحد اُتے چل رہیا سی تے قادر داد دی ماں تے اوہدی ووہٹی اپنے گھر دی کندھ اُتے بیٹھیاں اوہدی اڈیک کر رہیاں سن۔